

ԵՐԵՎԱՆԻ ՊԵՏԱԿԱՆ ՀԱՄԱԼՍԱՐԱՆ

Է. Ա. ԶՈՅՐԱԲՅԱՆ

**ՆԱԽԻՋԵՎԱՆՅԱՆ
ՀԻՄՆԱՀԱՐՑԸ
1920 Թ. ՄԱՅԻՍ - 1921 Թ. ՀՈԿՏԵՄԲԵՐ**

ԵՐԵՎԱՆ
ԵՊՀ ՀՐԱՏԱՐԱԿՉՈՒԹՅՈՒՆ
2010

ՀՏԴ 941 (479,25)
ԳՄԴ 63.3 (2Հ)
Ձ 768

**Տպագրված է ԵՊՀ Միջազգային
Հարաբերությունների ֆակուլտետի
խորհրդի երաշխավորությամբ**

Նմբագիր՝ Կիլ. գիտ. դոկտ. պրոֆ. **Հ. Ղ. Միրզոյան**

Զոհրաբյան է. Ա.

Ձ 768 Նախիջևանյան Հիմնահարցը 1920-1921թթ./է. Ա. Զոհրաբյան.
- Եր.: ԵՊՀ Հրատ., 2010, 430 էջ + 1 թ. ներդիր:

Համակողմանի լուսարանվում են Ազրբեջանի խորհրդայնացումից հետո Նախիջևանյան Հիմնահարցում տեղի ունեցած զարգացումները, խնդրի լուծման ուղղությամբ ծավալված ուղղման ու դիվանագիտական գործընթացները, ցույց է տրված Հիմնահարցի տեղն ու դերը հայ-ազրբեջանական, հայ-ուսական և հայ-թուրքական հարաբերություններում, որոնց արդյունքում Նորհրդային Հայաստանը դուրս մղվեց Հիմնահարցի լուծման դիվանագիտական գործընթացից և այն փոխադրվեց ուս-թուրքական հարաբերությունների ոլորտ:

Աշխատության առանցքային հարցերն են՝ Նախիջևանյան Հիմնախնդրի արժարժույթները Մոսկվայի 1920թ. հայ-ուսական և ուս-թուրքական բանակցություններում, ՀՀ մուսուլմանաբնակ ապստամբ շրջանների հնազանդեցումը և Նախիջևանի խնդիրը Թիֆլիսի օգոստոսի 10-ի հայ-ուսական համաձայնագրում, ուղղման գործողությունները Շարուրի ձևակառուցում թուրք-հայկական պատերազմի ժամանակ և Շարուր-Նախիջևանն ըստ Ալեքսանդրապոլի պայմանագրի, թուրք-ազրբեջանյան հակահայկական խժոժությունները Շարուր-Նախիջևանում և Հիմնահարցի ազրբեջանապատ լուծման պատճառները Մոսկվայի ու Կարսի կոնֆերանսներում և այլն:

Նախատեսված է պատմաբանների, միջազգայնագետների, դիվանագետների, քաղաքագետների և Նախիջևանյան Հիմնահարցով հետաքրքրվողների լայն շրջանի համար:

ՀՏԴ 941 (479,25)
ԳՄԴ 63.3 (2Հ)

ISBN 978-5-8084-1329-0

© ԵՊՀ Հրատարակչություն, 2010 թ.
© է. Ա. Զոհրաբյան, 2010 թ.

*Նվիրում եմ որդուս՝
ՎԱՐԴԵՆ ԶՈՆՐԱԲՅԱՆԻ
պայծառ հիշատակին*

ԽՈՍՔ ԸՆԹԵՐՑՈՂԻՆ

Ընթերցող լայն հասարակության ուշադրությունը ներկայացվող այս աշխատությունը Նախիջևանյան հիմնահարցին նվիրված մեր եռամսա ուսումնասիրության երրորդ՝ վերջին գիրքն է, որը նախապես ծրագրել էինք լույս ընծայել 2003թ. և այդ մասին նշել էինք 2002թ. լույս տեսած երկրորդ գրքում (Նախիջևանյան հիմնահարցը և Հայաստանի «դաշնակիցները» (1918թ. դեկտեմբեր – 1920թ. ապրիլ): Սակայն առողջական վիճակի կտրուկ վատթարացման և մի շարք այլ հանգամանքների պատճառով ստիպված եղանք երկար ժամանակով դադարեցնել աշխատանքը գրքի վրա: Ահա ինչու այս գիրքը լույս աշխարհ է գալիս բավականին ուշացած, ինչի համար հայցում ենք ընթերցողի ներողամտությունը:

Լինելով երկրորդ գրքի օրգանական շարունակությունը՝ ժամանակագրական առումով այս աշխատությունն ընդգրկում է 1920թ. մայիսից մինչև 1921թ. հոկտեմբերն ընկած ժամանակաշրջանը: Բավականին կարճ մի ժամանակամիջոց (մեկ և կես տարուց էլ պակաս), որի ընթացքում սակայն տեղի ունեցան այնքան բախտորոշ իրադարձություններ՝ ինչպես ողջ հայ ժողովրդի, այնպես էլ Նախիջևանի քաղաքական ճակատագրում, որ կբավականացնեն մի ամբողջ դարաշրջանի համար: Այս գրքում ընթերցողը կգտնի պատասխանը բոլոր այն հարցերի, թե ինչպե՞ս և ինչո՞ւ Ադրբեջանի խորհրդայնացումով Նախիջևանի հիմնահարցը փաստորեն դուրս մղվեց հայ-ադրբեջանական հարաբերությունների ոլորտից և այնուհետև հաջորդաբար հայտնվեց նախ հայ-ռուսական և ապա հայ-թուրքական ու ռուս-թուրքական բարդ ու հակասական հարաբերությունների հորձանուտում: Կծանոթանա հարցի դրվածքին ինչպես մինչև Հայաստանի խորհրդայնացումը (հատկապես Մոսկվայի, Թիֆլիսի և Երևանի հայ-ռուսական բանակցություններում ու Ալեքսանդրապոլի թուրք-հայկական կոնֆերանսում), այնպես էլ խորհրդայնացումից հետո (Նարիմանովյան դեկլարացիայի լույս աշխարհ գալու իրական շարժառիթներին, Հայհեղկոմի անիրատեսական մոտեցումներին, թուրք-ադրբեջանյան հակահայկական խարդավանքներին, Մոսկվայի ռուս-թուրքական և Կարսի թուրք-անդրկովկասյան կոնֆերանսներում Նախիջևանյան հիմնա-

հարցի շուրջ ծավալված դիվանագիտական պայքարին և այլն):

Գերազանցապես արխիվային վավերագրերի, հրապարակի վրա եղած փաստաթղթերի ժողովածուներից ու նաև ժամանակի մամուլից քաղված նյութերի հիման վրա գրված այս աշխատությունն մեջ ընթերցողը նաև կտեսնի ու կհամոզվի, թե այդ բախտորոշ ժամանակաշրջանում հայություն համար ինչպիսի կործանարար հետևանքներ ունեցավ քեմալ-բոլշևիկյան համագործակցությունը՝ թուրք քեմալականներին ամեն կերպ սիրաշահելու, նրանց բոլոր պահանջները բավարարելու գնով իբրև հակաանտանտայական ուժ իր կողմում պահելու Մոսկվայի ձգտումը: Եվ եթե դրան ավելացնենք նաև այն դժբախտ իրողությունը, որ կովկասյան գործերի տնօրինությունը գտնվում էր Ստալինի ու նրա արբանյակների ձեռքում, որոնց հակահայկական կեցվածքի մասին գիտեին ոչ միայն Մոսկվայում, այլև Անկարայում, ապա պատկերը միանգամայն պարզ կդառնա:

Հանգամանքների պատահակա՞ն զուգադիպություն էր դա թե՞ մեկ այլ բան, թող ընթերցողը դատի: Իսկ մենք կխոսենք փաստերի լեզվով, քանզի համոզված ենք, որ դրանք են ճշմարտություն բացահայտման միակ միջոցը: Նաև ավելացնենք, որ ելնելով այն իրողությունից, որ ուսումնասիրվող ժամանակաշրջանում Նախիջևանյան հիմնահարցը հաջորդաբար գտնվել է նախ Հայաստանի Հանրապետության արտաքին քաղաքականության ոլորտում և վերջինիս խորհրդայնացումից հետո միայն դարձել Թուրքիայի և Նորհրդային Ռուսաստանի հարաբերությունների խնդիր, նպատակահարմար գտանք աշխատությունը բաժանել երկու մասի.

1. Նախիջևանյան հիմնահարցը ՀՀ արտաքին քաղաքականության համատեքստում (1920թ. մայիս - դեկտեմբեր)

2. Շարուր-Նախիջևանի խնդիրը թուրք-խորհրդային հարաբերություններում (1920թ. դեկտեմբեր - 1921թ. հոկտեմբեր)

ՄԱՍ ԱՌԱՋԻՆ

ՆԱԽԻՋԵՎԱՆՑԱՆ ՀԻՄՆԱՀԱՐՑԸ ՀՀ ԱՐՏԱՔԻՆ ՔԱՂԱՔԱԿԱՆՈՒԹՅԱՆ ՀԱՄԱՏԵՔՍՏՈՒՄ (1920 թ. ՄԱՅԻՍ - ԴԵԿՏԵՄԲԵՐ)

ԳԼՈՒՆ ԱՌԱՋԻՆ

Աղբրեջանի խորհրդայնացումը և վիճելի տարածքների հարցը հայ-աղբրեջանական և Մոսկվայի ուսու-հայկական բանակցություններում: Ծարուրի վերամիավորումը Հայաստանին (1920թ. մայիս-հուլիս)

Աղբրեջանի խորհրդայնացումը, ուղղա-քաղաքական նոր իրադրությունը տարածաշրջանում: Բաքվի ղեկավարության ազդեցիկ ներտուճները, Հայաստանի կառավարությանը ներկայացրած վերջնագրային պահանջները: Տարածքային վեճերը խաղաղորեն լուծելու ՀՀ կառավարության պատրաստակամությունը, հայ-աղբրեջանական կոնֆերանս գումարելու շուրջ դիվանագիտական գրադրությունները: Ջենքի ուժով Հայաստանը խորհրդայնացնելու Օրջոնիկիձե-Նարիմանով խմբի գործունեությունը, Մոսկվայի դիրքորոշումը:

Լ. Ծանթի առաքելությունը և հայ-աղբրեջանական տարածքային վեճերի խնդիրը Մոսկվայի հայ-ուսական բանակցություններում: Ջիչերինի դիրքորոշումը: Բանակցությունները ձախողելու ուղղությունը Աղբրեջանի ղեկավարության ծավալած գործունեությունը:

ՀՀ ներքին գրության կայունացման խնդիրը, աղբրեջանաբնակ ապստամբ շրջանների հնազանդեցման անհրաժեշտությունը 1920թ. հունիս-հուլիսին: Իրադարձությունները Զանգիբասարում և Վեդիբասարում: Ծարուրի ազատագրումը թուրք-աղբրեջանական հրոսակախմբերից: Բանակցությունները Նախիջևանի մուսուլմանական խորհրդի հետ, ՀՀ կառավարության առաջարկած հաշտության պայմանները: Մուսուլմանական խորհրդի երկդիմությունը, կարմիր բանակի դորամասերի հրավիրումը Նախիջևան: Հայկական ուժերի առաջխաղացման դադարեցումը:

1920թ. գարնանը արմատապես փոխվեց ուղղաքաղաքական իրադրությունը հարավկովկասյան տարածաշրջանում: Մի կողմից՝ Աղբրեջանի խորհրդայնացումը և ուսական 11-րդ կարմիր բանակի

Հայտնվելը Հայաստանի և Վրաստանի արևելյան սահմանների վրա, իսկ մյուս կողմից՝ Անատոլիայում քեմալական կառավարությունը կազմավորումը, խիստ ծանր ու սպառնալից վիճակ ստեղծեցին Հայաստանի և մասամբ էլ Վրաստանի համար: Եթե դրան ավելացնենք և այն իրողությունը, որ այդ շրջանում Անդրկովկասում արդեն բրիտանական ռազմական ուժեր համարյա թե չէին մնացել (1920թ. ամռան սկզբին միայն մի փոքր շոկատ կար Բաթումում), ապա պատկերը միանգամայն պարզ կդառնա:

Թե՛ քեմալական Թուրքիան և թե՛ Սորհրդային Ադրբեջանը տարածաշրջանում ագրեսիվ քաղաքականություն վարելու գիծ էին որդեգրել, որի կոնկրետ արտահայտությունը արտաքին քաղաքականություն ասպարեզում նրանց ձեռնարկած առաջին իսկ քայլերն էին: Ընդամենը երեք օր էր անցել Անկարայում Թուրքիայի ազգային մեծ ժողովի գումարումից (ապրիլի 23), երբ Մուստաֆա Քեմալը Վ. Ի. Լենինին ուղարկած նամակում առաջարկում է Անդրկովկասի փաստական բաժանում կատարել (Ադրբեջանը և Վրաստանը մեծահոգաբար թողնելով Ռուսաստանին, նա իր վրա էր վերցնում ռազմական գործողությունները «իմպերիալիստական Հայաստանի» դեմ)¹: Ինչ վերաբերում է Ադրբեջանին, ապա նրա խորհրդայնացումը սկզբում նույնիսկ որոշ լավատեսական տրամադրություններ առաջացրեց Հայաստանի կառավարող շրջաններում: Նման ենթադրություն համար նյութ են տալիս 29-ին և 30-ին Բաքու ուղարկած երկու փաստաթուղթ, որոնցից առաջինում՝ ուղղված ժողովրդի նախագահ Ն. Նարիմանովին, խոսելով այն մասին, որ մուսավաթական կառավարությունը բազմիցս փորձել է ղենքի ուժով զավթել հայկական Ղարաբաղը և Զանգեզուրը և որ մարտի 22-ից սկսած հրի ու սրի է մատնում Ղարաբաղի հայկական գյուղերը, հույս է հայտնվում, որ «Ադրբեջանի բանվորա-գյուղացիական կառավարությունը, որը հռչակել է ժողովրդի ազատ կամա-արտահայտություն սկզբունքը, Ղարաբաղի հարցում չի գնա մուսավաթական կառավարության հետքերով, որն իր գործողությունների համար ձեր ժողովրդի և Ձեր կողմից գլխավորվող կառավարության կողմից հայտարարված է Ադրբեջանական Հանրապետության աշխատավոր ժողովրդի շահերի դավաճան և չի հապաղի ամենաշտապ մի-

¹ Այս նամակը Մոսկվա էր հասել միայն հունիսի 1-ին և նրան պատասխանել էր ոչ թե Վ. Ի. Լենինը, այլ արտգործոժողովոմ Գ. Չիչերինը, որը հավանություն չէր տվել Մ. Քեմալի առաջարկին, այլ առաջ էր քաշել իր միջնորդությունը հայ-թուրքական կնճոխ լուծման համար:

ջոցներ ձեռնարկել Ղարաբաղում և Զանգեզուրում ռազմական գործողությունները դադարեցնելու ու նշված շրջաններից ադրբեջանական զորքերը հետ կանչելու համար»¹: Երկրորդը հասցեագրված էր Ադրբեջանում Հայաստանի դիվանագիտական ներկայացուցիչ Մ. Հարությունյանին: Նրանում ասված էր, որ «Ադրբեջանական Հանրապետության տապալված կառավարությունը քաղաքական նկատառումներով ամեն կերպ արգելակում էր նավթամթերքների արտահանումը Հայաստան, որի հետևանքով կանգ էին առնում երկաթուղիները, այլապես, որի հետևանքով կանգ էին առնում երկաթուղիները, այլապես, որի հետևանքով կանգ էին առնում երկաթուղիները, փոքրը, բաղնիքները և արդյունաբերական ձեռնարկությունները՝ ծանր դրություն ստեղծելով Հայաստանի դեմոկրատիայի համար: Այժմ՝ Ադրբեջանում իրական դեմոկրատական կարգի հաստատումով, Հայաստանի կառավարությունը վստահ է, որ նավթի արտահանման ամեն կարգի խոչընդոտները այսուհետ ամբողջովին կվերացվեն: Այդ համոզումով կառավարությունը լիազորում է Ձեզ անմիջապես բանակցություններ սկսել Ադրբեջանի նոր կառավարության հետ նշված հարցի շտապ լուծման համար»² (ընդգծումը մերն է - է. Զ.):

Զենք կարծում, թե Հայաստանի դեկավարությունը ղենքի ուժով հաստատված խորհրդային իշխանությունը, իսկապես, դեմոկրատական էր համարում: Ավելի շուտ դա դիվանագիտական քայլ էր՝ որոշակի նպատակ հետապնդող: Ամեն դեպքում թե՛ Նարիմանովին հասցեագրված ապրիլի 29-ի նոտան և թե՛ Մ. Հարությունյանին ուղղված ապրիլի 30-ի հեռագիրը վկայում են, որ Հայաստանի կառավարությունը փորձում էր Ադրբեջանի նոր իշխանությունների հետ բարիդրացիական հարաբերություններ հաստատել, վերջ տալ չհայտարարված պատերազմին Ղարաբաղում, առևտրատնտեսական փոխշահավետ կապեր հաստատել: Սակայն սպասելիքները ոչ միայն չարդարացան, Ադրբեջանի խորհրդային կառավարությունը ոչ միայն չընդառաջեց Հայաստանի խաղաղասիրական առաջարկությունը, այլև հոխորտաց, հանդես եկավ վերջնագրով ու սպառնաց պատերազմով. «Ադրբեջանյան խորհրդային Հանրապետության բանվորա-գյուղացիական կառավարությունը, - ասված է Հայաստանի կառավարու-

¹ Հայաստանի ազգային արխիվ (ՀԱԱ), Ֆ.278,ց.1,գ.38,թ.1: «Հառաջը» չգիտես ինչու ապրիլի 29-ով թվագրված այս նոտան ներկայացրել է որպես ՀՀ արտգործնախարարի պատասխանը Ն. Նարիմանովին այն դեպքում, երբ նույն համարում տպագրել է ապրիլի 30-ով թվագրված Ադրբեջանի վերջնագիրը (տես՝ «Հառաջ», 5 մայիսի 1920թ.):

² Նույն տեղում, թ. 85:

Թյանն ուղղած ապրիլի 30-ի նոտայում, - Հանձինս հեղափոխական կոմիտեի, պահանջում է.

Մաքրել ձեր գործերից Ղարաբաղի և Զանգեզուրի տերիտորիան, Քաշվել դեպի ձեր սահմանները,

Դադարեցնել ազգամիջյան կոտորածը:

Հակառակ դեպքում Ադրբեջանական խորհրդային հանրապետության հեղափոխական կոմիտեն իրեն կհամարի պատերազմական դրուժյան մեջ Հայաստանի Հանրապետության հետ: Վերջնագրի պատասխանի համար տրվում է 3 օր ժամանակ»¹:

Մխաված չենք լինի, եթե ասենք, որ ժողովուրդների պատմության մեջ հազիվ թե նախադեպը գտնվի, երբ ընդամենը երկու օրվա կյանք ունեցող, դեռևս չկազմավորված և սեփական բանակ չստեղծած կառավարությունը հանդես գա վերջնագրերով ու սպառնա պատերազմով: Ուրեմն, Բաքվի ղեկավարությունը հույսը դրել էր ոչ թե սեփական ուժերի, այլ ռուսական 11-րդ կարմիր բանակի վրա, ինչի մասին են վկայում այդ նույն օրը՝ ապրիլի 30-ին, ադրբեջանական գործերին իջեցված հրամանի հետևյալ տողերը. «Հայաստանի Հանրապետության կառավարության կողմից վերջնագրի չկատարման դեպքում ձեզ օգնության կուղարկվի դաշնակցային, եղբայրական խորհրդային կարմիր բանակը, որը պատրաստ է ամբողջ աշխարհը ազատագրել բռնությունից և շահագործումից»² (ընդգծումը մերն է - է. Զ.):

Եվ կարծես ի հաստատումն Ադրբեջանի կառավարության այս սպառնալիքի, մայիսի 1-ին 11-րդ կարմիր բանակի հրամանատարությունը ևս վերջնագիր ներկայացրեց Հայաստանի կառավարությանը՝ պահանջելով հայկական զորքերը դուրս բերել Ադրբեջանի տարածքից, վերջ տալ ազգամիջյան կոտորածներին և բոլոր վիճելի հարցերը լուծել խաղաղ բանակցությունների միջոցով: «Դա պետք է արվի 24 ժամվա ընթացքում ներկա առաջարկությունը ստանալու օրվանից, - ասված է այդ վերջնագրում: - Սույնի չկատարումը կդիտվի որպես հայկական կառավարության մարտահրավեր Ռուսաստանի Սոցիալիստական Ֆեդերատիվ խորհրդային Հանրապետությանը: Առաջարկությունը կիրառործվի ռուսական կարմիր բանակի ուժերով, հետևանքների համար պատասխանատվությունը ամբողջովին կընկնի հայկական կառավարության վրա»³ (ընդգծումը մերն է - է. Զ.):

¹ «Հառաջ», 5 մայիսի 1920թ.:

² «К истории образования НКАО Аз. ССР, 1918-1925», документы и материалы, Баку, 1989, с. 42.

³ ՀԱԱ, Ֆ. 278, ց. 1, գ. 35, թ. 15:

Դժվար չէ պատկերացնել այն ծանր վիճակը, որ ստեղծվեց հայկական կողմի համար՝ կապված հատկապես այս վերջին վերջնագրի հետ, քանի որ նրա հեղինակները (Օրջոնիկիձե, Կիրով, Մեխտիզին, Լևանդովսկի) խոսում էին Ռուսաստանի անունից և սպառնում Կարմիր բանակի ուժով: Ահա թե ինչու՝ ձգտելով խուսափել վտանգավոր հետևանքներից, Հայաստանի կառավարությունն այդ նույն օրը՝ մայիսի 1-ին, շտապեց պատասխանել 11-րդ կարմիր բանակի հրամանատարության վերջնագրին, փաստելով այն իրողությունը, որ Ադրբեջանի տարածքում հայկական զորքեր երբեք չեն եղել և ներկայումս էլ չկան, այլ հակառակը՝ ադրբեջանական զորքերն են, որ հայկական Ղարաբաղում պատերազմում են աշխատավոր հայ գյուղացիության դեմ, ավերում գյուղերն ու ավաններն այն դեպքում, երբ այդ գյուղացիությունը իր մի շարք համագումարներում արտահայտել է իր անհողորդ կամքը՝ չճանաչել Ադրբեջանի գերիշխանությունը և չմտնել նրա կազմի մեջ: «Հայաստանի կառավարությունը խնդրում է Ձեզ առաջարկել Ադրբեջանի նոր կառավարությանը դուրս բերել զորքերը հայկական Լեռնային Ղարաբաղից և այնուհետև արդեն 10-րդ անգամ կազմակերպել այդ մարզի բնակչության կամաարտահայտություն և գործել համաձայն բնակչության կամքի, - ասված է այդ նոտայում: - ... Հայաստանի կառավարությունը առաջարկում է խորհրդային Սոցիալիստական Ռուսաստանի ներկայացուցիչներին չեզոք հանձնաժողով ուղարկել Ղարաբաղ գործի իրական դրուժյունը պարզելու համար»¹: Նոտայի վերջում հույս է հայտնվում, որ խորհրդային Ռուսաստանի կառավարությունը թույլ չի տա ճնշում գործադրել հայ աշխատավոր ժողովրդի նկատմամբ և որ սույն դեպքում վերջնագրի համար ոչ մի հիմք չկա:

Ադրբեջանի կառավարության ապրիլի 30-ի վերջնագիրը ևս Երևանում մայիսի 1-ին էր ստացվել, սակայն պատասխանը անմիջապես չէր տրվել, ինչպես դա արվեց 11-րդ կարմիր բանակի հրամանատարության վերջնագրի դեպքում, այլ հետաձգվեց մինչև մայիսի 3-ը: Դրա փոխարեն վերջնագրի բովանդակությունը շտապ հաղորդվել էր Մոսկվա՝ Վ. Լենինին և Գ. Ջիչերինին՝ տեղեկացնելու նրանց Բաքվի ղեկավարության վարքագծի մասին: Դա նշանակում է, որ Հայաստանի կառավարությունը լուրջ նշանակություն չէր տվել Ադրբեջանի սպառնալիքներին, քաջ գիտակցելով, որ առանց Մոսկվայի հավանության

¹ Տե՛ս նույն տեղում, գ. 38, թ. 84:

Բաքուն չի կարող տեղից շարժվել: Այնուամենայնիվ վերջնագրի ժամկետի ավարտին՝ մայիսի 3-ին¹, պատասխան նոտա ուղարկվեց Բաքու (պատճենը Լենինին, Ջիչերինին և Օրջոնիկիձեին), որտեղ կետ առ կետ հերքվում էին ներկայացված մեղադրանքները, ցույց տրվում, որ ոչ թե հայկական զորքերն են մտել Ադրբեջանի տարածք, այլ հակառակը՝ ադրբեջանական զորքերն են ներխուժել հայաբնակ շրջաններ, որոնք չեն ուզում լինել Ադրբեջանի կազմում: Բայցևայնպես «կանգնած լինելով բոլոր վիճելի հարցերի խաղաղ լուծման տեսակետի վրա և բացարձակապես դեմ լինելով որևէ ուղղման գործողության, – սակայն էր նոտայում, – Հայաստանի կառավարությունը՝ համաձայնելով ապագայում նոր ընդհարումների ծագման հնարավորությունների վերացման մասին խորհրդային Ռուսաստանի ներկայացուցչի վերահիշյալ կարծիքի հետ, Ձեր կառավարությանն առաջարկում է. առաջին՝ դադարեցնել ամեն կարգի ուղղման գործողությունները, երկրորդ՝ Հայաստանի Հանրապետության հետ բանակցություններ սկսել երկու հարևան հանրապետությունների միջև սահմանների և նորմալ հարաբերությունների վերջնական հաստատման համար»²:

Հայաստանի խորհրդարանի մայիսի 3-ի նիստում լավեց արտգործնախարար Համո Օհանջանյանի հաղորդումը Ադրբեջանի նոր իշխանությունների վերջնագրի և կառավարության պատասխանի մասին ու հավանություն տրվեց վերջինիս գործունեությանը՝ հանձնարարելով «բոլոր միջոցները ձեռք առնել ապահովելու հայ ժողովրդի ֆիզիկական գոյությունը և ազատ հայրենիքի անկախությունը»³:

Հայաստանի կառավարության վերահիշյալ պատասխան նոտաները բավականաչափ հիմնավոր էին կոնֆլիկտը հարթելու և ուղղման անհնարաբեր խոստովելու համար: Սակայն ձգտելով ամբողջովին ապահովագրվել ամեն մի արկածախնդրությունից՝ հայկական կողմը դիվանագիտական մի հաջողված քայլ էլ է կատարում. մայիսի 4-ին արտգործնախարար Հ. Օհանջանյանը շտապ հեռագրում է ՌՆՖՍՀ արտաքին գործերի ժողովրդական կոմիսար Գ. Ջիչերինին (պատճենը՝ ժողովրդական կոմիսարների խորհրդի նախագահ Վ. Լենինին), հայտնում, որ հենվելով Հայաստանի ազատ ինքնորոշման իրավունքի մասին խորհուրդների համառուսաստանյան երրորդ

համագումարի որոշման և Լենինի համապատասխան դեկրետի վրա, Հայաստանի կառավարությունը խորհրդային Ռուսաստանի կառավարությանն «առաջարկում է բանակցություններ սկսել երկու հանրապետությունների միջև պայմանագրային հարաբերություններ հաստատելու համար՝ Հայաստանի Հանրապետության անկախության և սուվերենության ճանաչման հիման վրա»¹: Նաև հայտնվում է, որ հայկական պատվիրակությունն արդեն ուղևորվել է Մոսկվա և գտնվում է Ռուսաստանի տարածքում:

Դժվար չէ գուշակել, որ հայտնելով իր պատվիրակության մեկնելու մասին, դրանով իսկ Հայաստանի կառավարությունը ձգտում էր կանխել բանակցությունները հետաձգելու հնարավորությունը, ինչը քիչ հավանական չէր մայիսի առաջին օրերին Հայաստանի ներքին և արտաքին իրադրության պայմաններում: Ինչևիցե, Հայաստանի կառավարության դիվանագիտական քայլերը անհետևանք չեն մնում: Բացի այդ, խորհրդային Ադրբեջանի ուղղման վարքագիծը (այդ նույն օրերին վերջնագիր էր ներկայացվել նաև Վրաստանին և 11-րդ Կարմիր բանակի գորամասերին ներքաշել արյունոտ կոնֆլիկտների մեջ վրացական բանակի հետ) նաև չէր կարող արժանանալ Մոսկվայի հավանությունը ոչ միայն որովհետև, որ վերջինս չէր ցանկանում միաժամանակյա պատերազմներ մղել թե արևմուտքում (լեհական ճակատ), թե հարավում, այլև որովհետև, որ կապակազերծվեր համալսարհային հանրությանը որպես խաղաղարար ներկայանալու ձգտումը: Ուրեմն, նա պիտի չափավորեր Բաքվի դեկավարության ախորժակը: Մայիսի 6-ին Ստալինը հեռագրում է Օրջոնիկիձեին՝ «մեր գորամասերի որոշ գործողությունները, ինչպես և Ադրբեջանի գորամասերի... խառնում են քարտերը և... խանգարում մեր քաղաքականության իրագործմանը»²: Իսկ Ջիչերինի տեղեկալ Լևոն Կարախանը, Օրջոնիկիձեին ուղարկած առանձին նամակում հայտնելով Հայաստանին ուղղված Ադրբեջանի նոտայի և վերջնագրի մասին Լենինի կարծիքը, գրում է. «Իյիչը հանձնարարել է հաղորդել Ձեզ, որ պետք չէ շտապել մեր հետագա տարածմամբ նախ՝ ամրապնդելու համար Ադրբեջանը, իսկ մյուս կողմից, ընդարձակումը, որը չի հարուցվել անհապաղ անհրաժեշտությամբ, ավելի լավ է հետաձգել՝ նկատի առնելով լուրջ խնդիրները արևմտյան ճակատում և զգուշություն ցուցաբերելու անհրաժեշտ»

¹ Այդպես է թվագրված արխիվային փաստաթղթում, մինչդեռ «Հառաջ»-ի մայիսի 5-ի համարում հրապարակված տեքստը կրում է մայիսի 4 ամսաթիվը:

² ՀԱԱ, ֆ. 278, ց. 1, գ. 35, թ. 24-25:

³ «Հառաջ», 5 մայիսի 1920թ.:

¹ ՀԱԱ, ֆ. 200, ց. 1, գ. 556 I մաս, թ. 18.1:

² Коммунист, 23 дек. 1989г.

տուժյունը՝ հաշվի առնելով մեր միջազգային դրուժյունը: Իրականում Հայաստանը մեզ համար առաջնահերթ հետաքրքրություն չի ներկայացնում, մինչդեռ շատ անհանգստություն կպատճառի: **Հարկավոր է չանցնել նրա հետ Հին Ադրբեջանի հաստատած սահմանները, վիճելի տարածքներն էլ չգրավել վերջնագրի կարգով, այլ վիճելի հարցերը լուծել խաղաղ ճանապարհով, օրինակ, երկու պետությունների խառը հանձնաժողով՝ մեր նախագահությամբ:** Դուք մոտիկից գիտեք հարաբերությունների բարդությունը՝ նոր փոխադարձ կոտորածի վտանգը, գումարած թուրքական փոխհարաբերությունները: Եթե մեր առաջխաղացման արդյունքում լինեն նոր փոխադարձ ջարդեր, դա լրջորեն կվնասի մեզ Անգլիայում և Ամերիկայում, դրա համար էլ առաջարկում ենք սահմանափակվել **Ադրբեջանով**»¹ (ընդգծումը մերն է - է. Զ.): Մոսկվայի նման դիրքորոշումը, հասկանալի է, պետք է զգաստացնեն Բաքվի տաքգլուխներին և հարկադրեր առժամանակ զերծ մնալ Հայաստանի դեմ զենք ճոճելուց: Ադրբեջանը պատերազմ չհայտարարեց Հայաստանին, Դրոյի գլխավորած հայկական զորամասերն էլ Ղարաբաղից հեռացան ոչ թե երեքօրյա ժամկետում, այլ միայն մայիսի 25-ին, իսկ Զանգեզուրը մաքրելու պահանջը գոնե գարնանային այդ օրերին օրակարգից հանվեց: Ավելին. Բաքվի ղեկավարությունը մայիսի 8-ին Հայաստանի կառավարությանը բանակցություններ սկսելու առաջարկություն արեց՝ չմոռանալով միաժամանակ մեղադրել նրան մոսսուլմանական ազգաբնակչության դեմ գործած բռնությունների ու ջարդերի համար: Վերջինս էլ մայիսի 9-ի նիստում լսեց վարչապետ² և արտգործնախարար Համո Օհանջանյանի «գեկուցումը Ադրբեջանի նութայի մասին, որով կառավարվել մայիսի 15-ին նշանակել բանակցություններ Բաքվում» և որոշեց «ընդունել բանակցելը, ժողովի վայր նշանակել ոչ թե Բաքուն այլ Ղազախը: Մեր կողմն նշանակել ներկայացուցիչներ Մ. Յարութիևեան, Պապովեան և Իզբրաչեան: Պատասխանելուց առաջ համաձայնություն զալ վրաց կառավարության հետ»³: Սակայն պատասխան նոտան ուղարկվեց միայն 3 օր հետո՝ մայիսի 12-ին: Նման ուշացման պատճառը հավանաբար վրացիների

¹ Հայաստանի Հանրապետությունը (այսուհետ՝ ՀՀ) 1918-1920թթ., փաստաթղթերի և նյութերի ժողովածու, Եր. 2000թ., էջ 190:
² ՀՅԳ բյուրոյի որոշումով 1920թ. մայիսի 5-ին Ալ. Խատիսյանի փոխարեն վարչապետի պաշտոնը ստանձնեց արտգործնախարար Հ. Օհանջանյանը:
³ ՀԱԱ, ֆ. 199, ց.1, գ.133 I մաս, թ.78:

հետ բանակցելն էր, ինչի մասին խոսվում է կառավարության որոշման մեջ՝:

Ինչևէ, մայիսի 12-ին ուղարկվեց պատասխան նոտա, որում ասված էր, որ Հայաստանի կառավարության դեմ Ադրբեջանի առաջ քաշած մեղադրանքները հարկադրում են հայտարարելու, որ հեղաշրջման միջոցով խանրեզական, մուսավաթական կառավարությունը փոխարինելու եկած, այսպես կոչված հեղափոխական, սոցիալիստական կառավարությունն ըստ էության ոչ մի փոփոխություն չի մտցրել Ադրբեջանի պետական և քաղաքական կյանքում, որ Հայաստանին ներկայացված վերջնագրային բնույթի նոտաները ոչնչով չեն տարբերվում նախկին կառավարության համանման նոտաներից: Այնուհետև հիմնավորապես հերքվում էին Հայաստանում մահմեդականների նկատմամբ բռնություններ գործադրելու վերաբերյալ Ադրբեջանի մեղադրանքները, ցույց էր տրվում, որ վերջինս է նույնիսկ, Արեշում, Ելիզավետպոլում, Շամախում, Ղարաբաղում և Գողթանում մասսայական գազանություններ կատարել, բայցևայնպես, Հայաստանի կառավարությունը՝ իր մշտական խաղաղասիրությունից ելնելով, ընդունում է բանակցություններ սկսելու և բոլոր վիճելի հարցերը խաղաղորեն լուծելու առաջարկը «որպես լիազոր ներկայացուցիչներ նշանակելով Բաքվում դիվանագիտական ներկայացուցիչ Մարտիրոս Հարությունյանին, Ղարաբաղ մեկնած Անդրկովկասյան կոնֆերանսի պատվիրակներ Պապովյանին ու ղոկտոր Յուզբաչյանին...»⁴: Որպես բանակցությունների վայր առաջարկվում էր Ղազախ քաղաքը:

Հետաքրքրությունից զուրկ չէ այն հանգամանքը, որ այս նոտայի պատճենները ևս ուղարկվել էին Մոսկվա՝ Լենինին և Ջիզերինին: Սակայն ժամանակն անցնում էր, իսկ Բաքվից պատասխան չէր ստացվում: Պատճառն այն էր, որ մայիսյան այդ օրերին Բաքվի ղեկավարությունը և 11-րդ Կարմիր բանակի հրամանատարությունը՝ խրախուսվելով Օրջանիկիձեի կողմից, փորձում էին օգտագործել Հայաստանում ծայր առած բոլշևիկյան շարժումները և զենքի ուժով խորհրդային կարգեր հաստատել այնտեղ, առանց նախապես Մոսկվայի համաձայնությունը ստանալու: Նման ինքնագործունեություն արդյունք էր մա-

⁴ Հայաստանի և Վրաստանի միջև դաշնակցային որևէ պարտավորություն չկար: Ուղղակի Կարմիր բանակի Ադրբեջան մտնելուց հետո մայիսին որոշ բանակցություններ վարվեցին ռազմական գործողությունների համաձայնեցման հնարավորության ուղղությամբ, որոնք ավարտվեցին անարդյունք:
² ՀԱԱ, ֆ. 278, ց.1, գ.35, թ. 5-6:

յիսի 20-ին Կարմիր բանակի մի զորաջոկատի մուտքը Քարվանսարա և Դիլիջան: Նպատակը, անշուշտ, միմիայն Հայ կոմունիստներին օգնություն հասնելը կամ էլ խորհրդային սահմանների ընդարձակումը չէր, ոչ էլ Հայ ժողովրդի նկատմամբ տածած սերը: Նարիմանովին և նրա շուրջը համախմբված թուրք ազգայնականներին Հայաստանի շուտափույթ խորհրդայնացումը պետք էր նաև նրա համար, որ կանխվի ապրիլին Սան-Ռեմոյի կոնֆերանսում նախագծված և առաջիկայում Սևրում կնքվելիք պայմանագրով մեծ Հայաստանի ստեղծումը:

Չորքեր մտցնելով Հայաստան, Օրջոնիկիձեն միայն երկու օր հետո է հեռագրում Մոսկվա և Հայաստանում ռազմական գործողություններ ծավալելու իրավունք խնդրում: Պատասխանելով Օրջոնիկիձենին (մայիսի 23-ին) Լևոն Կարախանը Հայտնում է, թե Ստալինը Հայաստանի մասին տեղեկությունները անբավարար է համարում և համոզված չէ, որ Հայկական զորքերը դիմադրություն ցույց չեն տա, ուստի և այդ ուղղությամբ ձեռնարկվող գործողությունները անժամանակ է համարում, քանի որ ամեն ինչ հատկացվում է լեհական ճակատին: Կարախանը միաժամանակ առաջ է քաշում վիճելի տարածքների գրավման միջոցով թուրքիայի հետ կապի հաստատման խնդիրը. «Ես անձամբ գտնում եմ, որ մեր զորքերը թուրքիայի հետ շփման լիակատար հնարավորություն պետք է ստանան, - ասված է հեռագրում:- Այդ խնդիրը պետք է իրականացվի, բայց անհրաժեշտ է ընտրել ռազմական ուժերի ամենաքիչ վատնման ուղին: Ես Հայտնել եմ քեզ, որ հարկավոր է Հայաստանի կառավարությունից պահանջել ռուսական զինվորական ուժերով Հայ-մուսուլմանական խառը բնակչությամբ տարածքները գրավելու համաձայնություն»¹: Այնուհետև ընդգծելով, թե դա նշանակում է, որ ռուսական զորքերին պետք է թույլատրվի դուրս գալու թուրքական սահմանի վրա, Կարախանը ավելացնում է, թե դա պետք է բացահայտ անել, «որպեսզի ողջ Հայաստանը իմանա մեր այդ պահանջի մասին և հասկանա մեր ցանկությունը՝ կանխելու ամեն մի պրովոկացիա և ազգային կոտորած»: Իսկ վերջում, թե «Հայտնեցեք Ձեր նկատառումները, և գլխավորը՝ տվեք Ստալինի համար նկատառումներ հոգուտ այն բանի, որ Հայկական զորքերը և բնակչությունը մեզ կրնան անհանգստացնել դիմադրության կամ, եթե դիմադրություն լինի, Դուք հարցը կլուծեք առանց դժվարության և առանց ռուսական նոր զորամասերով ձեզ ուժեղացնելու անհրաժեշտություն»²:

¹ «Քանրեր Հայաստանի արխիվների», N 1-2, 1993, էջ 212:

² Նույն տեղում:

Օրջոնիկիձեն Կարախանին (պատճենը՝ Լենինին և Ստալինին) պատասխանում է հաջորդ օրը՝ մայիսի 24-ին: «Հայաստանը կարելի է պայթեցնել, - գրում է Օրջոնիկիձեն, - բայց, ինչպես ես նշել եմ, դա առաջ կրեի չափազանց մեծ մթերային դժվարություններ: **Չեմ կարծում, թե դաշնակները համաձայնեն թույլ տալ մեր զորքերի և զենքի անցում թուրքիա:** Ամեն դեպքում այն, ինչ դուք առաջարկում եք՝ թուրքիա անցնելու բացահայտ պահանջ ներկայացնել Հայաստանին, Հայ զանգվածների մեջ զայրույթ կառաջացնի: **Առայժմ, կգրավենք Նախիջևանի շրջանը, Օրդուբադը, Ջուլֆան, իսկ հետո կտեսնենք»**¹ (ընդգծումը մերն է - է. Ջ.): Ինչպես տեսնում ենք, դեռևս մայիսին բոլշևիկյան իշխանությունները մտածում էին թուրքիա ոչ միայն զենք, այլև զորք ուղարկելու մասին՝ հույների դեմ պատերազմում թուրք ազգայնականներին օգնելու համար: Անհետաքրքիր չէ նաև Նախիջևանը, Օրդուբադը, Ջուլֆան գրավելու Օրջոնիկիձեի ինքնավստահ Հայտարարությունն այն առումով, որ այդ օրերին Դրոյի կորպուսը դեռևս Ղարաբաղում էր (հեռացել է մայիսի 25-ին), բացի այդ, վերը նշված շրջանները գրավելու համար նախ պետք է գրավվեր Ջանգեզուրը, որն այնքան էլ հեշտ գործ չէր:

Հեռագրում Օրջոնիկիձեն Հայտնում է նաև, որ նամակ է ստացել Քեմալ փաշայից, որը օգնություն է խնդրում և առաջարկում դաշինք, որ նամակ կա նաև Սալիլի համար և ավելացնում. «...մեր ընկերների միջոցով Հայերն առաջարկում են մեր նախագահությունը լուծել թուրքա-Հայաստանի մարզում Հայերի և թուրքերի միջև վիճելի հարցերը: Այդ հարցի վերաբերյալ համաձայնության գալու դեպքում Հայաստանը թուրքիայի հետ ազատորեն հաղորդակցվելու հնարավորություն կտա»²:

Հեռագրից պարզ չէ, թե ո՞ր Հայերի մասին է խոսքը, թեև պարզ է, որ չէր կարող իշխող կուսակցությունից լինել: Ուշագրավ է սակայն, որ Օրջոնիկիձեի հաղորդած այդ լուրը Մոսկվայում ուշադրության չի էլ առնվել: Հաջորդ օրը՝ մայիսի 25-ին, ՌԿ(բ)Կ ԿԿ Քաղբյուրոն քննարկման հարց դարձրեց Հայաստանի խորհրդայնացման հարցը և որոշեց. «Շարունակել բանակցությունները Հայաստանի կառավարության հետ՝ մեզ վրա ռուսական զորքերի օգնությամբ անհապաղ խորհրդայ-

¹ "Геноцид армян. Ответственность Турции и обязательства мирового сообщества". Документы и комментарии. Составитель и редактор Ю. Барсегов, т. 2, ч. 1, М. 2003, стр. 60-61.

² Նույն տեղում, էջ 61:

նացման նախաձեռնություն չվերցնելով: Միջոցներ ձեռնարկել Նախիջևանը Հին թուրքական կառավարության և Անտանտի ազդեցությունից ապահովելու համար»¹ (ընդգծումը մերն է- է. Զ.):

Քաղբյուրոյի այս որոշումը վկայում է, որ Մոսկվան գերադասում էր Անատոլիայի հետ կապը իրականացնել Նախիջևանի վրայով և ոչ Հայաստանի, որի խորհրդայնացումը հեշտ խնդիր էր համարում: Իսկ թե ինչու էր կարծում, որ Նախիջևանը Անտանտի ազդեցության տակ կարող է ընկնել, անհասկանալի է, քանի որ վերջինս այդ ժամանակ Անդրկովկասում չնչին ուժեր ուներ: Առավել անհասկանալի է Հին թուրքական կառավարության մասին ասվածը, որի իշխանությունը փաստորեն Ստամբուլից այն կողմ էր տարածվում:

Քաղբյուրոյի այս որոշումը խոսնեց Հայաստանը անհապաղ խորհրդայնացնելու ջատագովների հաշիվները, և նրանք հարկադրված եղան առժամանակ տեղի տալ: Մայիսի վերջին օրերին տեղեկանալով, որ հայկական զորքեր են մոտենում Դիլիջանին, Օրջոնիկիձեն հարկադրված եղավ Կարմիր բանակի զորամասերը հետ կանչել Ադրբեջան, որոնք հեռանալով՝ իրենց հետ բռնությունը տարան նաև ՀՀ ներքին զործերի նախարարի օգնական Մանասյանին, գեն. Բաղդասարովին և մի շարք այլ պաշտոնատար անձանց: Իսկ Բաքվում էլ ձերբակալվել էր ՀՀ դիվանագիտական ներկայացուցիչ Մ. Հարությունյանը:

Ձախողվելով Հայաստանը անհապաղ խորհրդայնացնելու հարցում՝ Օրջոնիկիձեն, Նարիմանովը և նրանց չրջապատը որոշում են ձեռքերը ծալած չնստել, այլ ձեռնարկել վիճելի հռչակած տարածքների գրավումը, մասնավորապես որ Նախիջևանի վերաբերյալ ՌԿ(Բ) ԿԿ Քաղբյուրոյի մայիսի 25-ի որոշումը նման հնարավորություն ընձեռում էր: Մայիսի վերջերին² Մոսկվա՝ Լենինին, Ստալինին, Չիչերինին ուղարկած հեռագրում՝ խոսելով այն մասին, որ հայ և մահադանական ազգաբնակչությունները ուրախությունը են ընդունում ռուսական Կարմիր բանակին, միաժամանակ ավելացնում է. «...կարծում եմ, որ Շուշու, Նախիջևանի, Օրդուբադի, Ջուլֆայի շրջանները կգրավվեն առանց հայերի կողմից դիմադրություն»³: Բաքվի շահագրգռվածությունը՝ ռուսական զորքերով այդ տարածքների գրավման խնդրում, պատճառաբանվում է նաև նրանով, որ դրանով իսկ կկանխվեր վիճելի տարածք-

ների պատկանելիության հարցի քննարկումը Մոսկվայում մայիսի վերջին սկսված ռուս-հայկական բանակցություններում: Իսկ թե ինչպես է վերաբերվել Գ. Չիչերինը Օրջոնիկիձեի և Բաքվի դեկավարության կողմից տարվող այդ քաղաքականությանը, պարզ երևում է Լենինին հասցեագրած նրա հունիսի 29-ի նամակից, որտեղ անդրադառնալով մայիսի 25-ին Ադրբեջանում ծագած հակախորհրդային ապստամբությունը և Նախիջևանի մոտ թուրքական ուժերի հայտնվելու վերաբերյալ Մդիվանու հաղորդմանը, ավելացնում է. «Իրերի նոր դրությունը պետք է անդրադառնա մեր պլանների վրա Անդրկովկասում և հարկադրի մեզ ավելի զգուշորեն վերաբերվել հարձակողական պլաններին, ընկ. Օրջոնիկիձեն, Մդիվանին, Նարիմանովը և մյուս ընկերները սկզբնապես ձգտում էին զենքը ձեռքներին և՛ Վրաստանում, և՛ Հայաստանում խորհրդային կարգեր մտցնելուն, և ծայր աստիճան հիասթափվեցին, երբ մեր ԿԿ դա մերժեց: Մինչև այժմ ընկ. Նարիմանովը իր հեռագրերում վերադառնում է անհապաղ ամբողջ Վրաստանը և Հայաստանը խորհրդայնացնելու իբրև թե անհրաժեշտության մտքին: Երբ Բաքվի ընկերները ստիպված եղան հրաժարվել այդ պլանից, նրանց մոտ, այդուհանդերձ, պահպանվեց Վրաստանի և Հայաստանի դեմ հարձակողական գործողությունների մարտավարություն: Մենք հարկադրված էինք շատ էներգիա վատնել համարյա ամենօրյա միջամտությունների վրա՝ մեր ընկերներին հարձակողական գործողություններից ետ պահելու նպատակով»¹ (ընդգծումը մերն է- է. Զ.):

Թե որքանով է Չիչերինին հաջողվել Նարիմանովի խմբին հետ պահել Հայաստանի նկատմամբ հարձակողական գործողություններից կտեսնենք հետագա շարադրանքում: Իսկ հիմա ուզում ենք ասել, որ Համո Օհանջանյանի կառավարությունը, կողմնակից լինելով վիճելի հարցերը խաղաղ բանակցությունների միջոցով լուծելուն, այնուամենայնիվ էր կարող Ադրբեջանի կառավարության ազդեցիվ գործողությունները թողնել անպատասխան: Մայիսի 25-ին վարչապետ և արտգործնախարար Համո Օհանջանյանը հեռագրով դիմում է Բաքվում Պարսկաստանի հյուպատոսին, խնդրում իր վրա վերցնել Բաքվում Հայաստանի դիվանագիտական ներկայացուցչության չենքի, ծառայողների, Ադրբեջանում ապրող Հայաստանի քաղաքացիների հովանավորությունն ու պաշտպանությունը²: Իսկ մայիսի 31-ին Ադրբեջանի

¹ Նույն տեղում, էջ 212-213:
² Արխիվային այդ փաստաթղթի վրա ամսաթիվ չի նշված, բայց դատելով նրա բովանդակությունից՝ պետք է դրված լինի մայիսի վերջին օրերին:
³ РГАСПИ, ф. 85, оп. 13, д. 41, л. 1.

¹ «Բանբեր Հայաստանի արխիվների», N 1-2, 1993թ., էջ 224:
² Տե՛ս „Геноцид армян...“, т. 2, ч. 1, стр. 62.

արտգործող կոմ Հուսեյնովին ուղարկած նոտայում բողոքելով Իջևանում պաշտոնատար անձանց գերեվարելու և Բաքվում Հայաստանի դիվանագիտական ներկայացուցիչ Մ. Հարությունյանին ձերբակալելու համար, Հայաստանի արտգործնախարարը միաժամանակ Հայտնում է, որ ի պատասխան Բաքվի վերոհիշյալ գործողությունների՝ Երևանում տնային կալանքի տակ են վերցված նախկին ադրբեջանական ներկայացուցչության բոլոր անդամները¹:

Հանրապետությունների միջև նման լարված իրադրություն պայմաններում բնական է, որ կոնֆերանսի գումարման մասին խոսք լինել չէր կարող: Եվ միայն այն բանից հետո, երբ Բաքուն ազատ արձակեց դիվանագիտական ներկայացուցիչ Մ. Հարությունյանին, Հայաստանի կառավարությունը նորից բարձրացրեց Հայ-ադրբեջանական կոնֆերանս գումարելու հարցը: Հունիսի 21-ին Մ. Հարությունյանը իր կառավարությունից ստանում է հետևյալ ռադիոհեռագիրը.

«Ձեր հեռագիրը ստանալուն պես կառավարությունը անհապաղ կարգադրություն արեց հանելու տնային կալանքը նախկին ադրբեջանական միսիայից: Խնդրում եմ որպես Հայաստանի Հանրապետության ներկայացուցիչ կապվել ադրբեջանական կառավարության հետ և ստանալ մեր հեռագրերի պատասխանը. առաջին, կոնֆերանսի գումարման վերաբերյալ՝ խաղաղ բանակցություններ վարելու համար, երկրորդ, Մանասյանի, Ջաղեթյանի և մյուսների ազատման հարցի մասին:

Անհրաժեշտ է պարզել նախկին ադրբեջանական ներկայացուցչության իրավական դրությունը, որին մենք առայժմ պաշտոնապես չենք ճանաչում՝ նոր կառավարությունից լիազորությունների բացակայության պատճառով...»²:

Թեև Մ. Հարությունյանը Հուսեյնովին խնդրել էր ռադիոհեռագրում բարձրացված հարցերին պատասխանել հնարավորինս շուտ, բայց ադրբեջանական կողմը բոլորովին չէր շտապում: Հունիսյան այդ օրերին Բաքվի ուշադրությունը ամբողջովին բեռնված էր Մոսկվայի վրա, որտեղ ընթացող Հայ-ռուսական բանակցություններում պետք է լուծում ստանար նաև վիճելի տարածքների հարցը: Խոսքը Լեոն Ծանթի և Գ. Չիչերինի գլխավորած պատվիրակությունների միջև ընթացող բանակցությունների մասին է, որոնք սկսվեցին մայիսի վերջին և շարունակվեցին մինչև հուլիսի սկիզբը:

* * *

Լեոն Ծանթի առաքելության և Մոսկվայի ռուս-հայկական բանակցությունների ընթացքն ու արդյունքները լուսաբանված են դեռևս 1997 թ. լույս տեսած մեր «1920թ. Թուրք-հայկական պատերազմը և տերությունները» գրքում³: Ուստի այստեղ մենք կանգ չենք առնի բոլոր այն հարցերի վրա (Հայաստանի Հանրապետության անկախություն, արևմտահայ նահանգները Հայաստանի Հանրապետությանը միացնելու սկզբունքի ընդունում, ռուսահայերի Հայաստան գաղթելու իրավունքի ճանաչում, Առաջին աշխարհամարտի հետևանքով Հայ ժողովրդին հասցված վնասների հատուցում և այլն), որոնք քննարկման նյութ են դարձել, այլ կանդիդատները Հայ-ադրբեջանական տարածքային վեճերի և հատկապես Նախիջևանի հարցում Ռուսաստանի դիրքորոշմանը:

Նախ՝ արձանագրենք, որ Ծանթի պատվիրակությունը կառավարությունից ցուցում էր ստացել Մոսկվայից պահանջել Հայաստանի մաս ճանաչելու Ադրբեջանի կողմից վիճելի հայտարարված Լեոնային Ղարաբաղը, Ջանգեզուրը և Նախիջևանը: Դատելով հունիսի 1-ին Լեոն Ծանթի Թիֆլիս՝ Հայաստանի Հանրապետության դիվանագիտական ներկայացուցիչ Տ. Բեկզադյանին ուղարկած հեռագրից, բոլշևիկյան կառավարությունը բարյացակամորեն էր տրամադրված և Հայաստանի «պահանջները համարում էր արդարացի», բայց Բաքվի ճնշման տակ տատանվում էր և հապաղում պայմանագրի կնքման հարցում: «Կառավարությունն այստեղ երկար տատանումներից ու խորհրդակցություններից հետո վերջապես երեկ երեկոյան հայտնեց մեզ իր որոշումը, - ասված է հեռագրում, - որը, ըստ էության, հանդիսանում է Բաքվի պահանջը, այն է վիճելի համարել Ղարաբաղը, Ջանգեզուրը, Նախիջևանը և Ծարուր-Դարալագյազը, գրավել այդ մարզերը ռուսական զորքերով մինչև վեճի ավարտը, խոսք հանձնաժողովով Կովկասում հաստատել վերջնական սահմանները»⁴: Այնուհետև չեղելով, որ պատվիրակությունը վճռականապես մերժել է այդ առաջարկությունը՝ վիճելի համարելով միմիայն Ղարաբաղը, Ծանթը ավելացնում է, թե «այժմ մեր կարծիքով, երեք ելք կա. Առաջին, կնքել պայմանագիր՝ վիճելի հայտարարելով Ղարաբաղը և Ջանգեզուրը Ելիզավետպոլի,

¹ ՀԱԱ, ֆ. 278, ց. 1, գ. 38, թ. 100:

² Նույն տեղում, թ. 29:

³ Տե՛ս է. Ա. Զոհրաբյան, «1920թ. Թուրք-հայկական պատերազմը և տերությունները», Երևան 1997թ. էջ 47-77:

⁴ ՀԱԱ, ֆ. 276, ց. 1, գ. 218, թ. 112:

Ղազախի և Աղստաֆայի հետ միասին՝ պայմանով, որ զորքերը մնան իրենց տեղերում և առաջ չանցնեն: Այդ զիջումը, հավանաբար, կրնողունեն: **Երկրորդ**, պայմանագրում Հայաստանի տարածքը հիշատակելով ընդհանուր բառերով՝ կազմված Կարսի, Երևանի, Ելիզավետպոլի, Թիֆլիսի և Բաթումի մարզերի մասերից, սահմանների որոշման հարցը հանձնելով ուսանների միջնորդությունը խառը հանձնաժողովին մի կողմից Վրաստանի, մյուս կողմից Ադրբեջանի հետ՝ պայմանով, որ զորքերը մնան այնտեղ, որտեղ ներկայումս են: Այդ դեկլարատիվ ձևը իսկույն ևեթ կրնողունվի: Կարող է նույնիսկ հնարավոր լինի մի քիչ ավելի կոնկրետացնել տարածքը: **Երրորդ**, պնդել միայն Ղարաբաղի վիճելի լինելու վրա, որով, հավանաբար, համաձայնությունը կհետաձգվի, մենք կվերադառնանք, իսկ բանակցությունները կշարունակվեն մեզ մոտ՝ նրանց նշանակված ներկայացուցչի հետ:

Այդ երեքից չարիքի փոքրագույնն մենք համարում ենք առաջինը՝ եթե պայմանագիրը դուք համարում եք անպայման անհրաժեշտ: Ձեր որոշումը և հրահանգները շտապ հեռագրեցեք հեռագրաթերով և ուղիղով...»¹:

Ստանալով Շանթի հեռագիրը՝ Տ. Բեկզադյանը այն հաղորդեց Երևան (Երևանի և Մոսկվայի միջև ուղիղ հեռագրակապ չկար) և այնտեղից ստացած հրահանգների հիման վրա հունիսի 16-ին պատասխան հեռագիր ուղարկեց Շանթին, որում ասված էր.

«Առաջին, խնդրում եմ անհապաղ պարզաբանել Ուրհրդային կառավարությանը Բաքվի հայ բոլշևիկների իրական պատկերը, որոնք Հայաստանի մասին ամբաստանագրեր և կեղծ տեղեկություններ են ուղարկում Մոսկվա: Մատնանչեք, որ Հայաստանում երբեք չաչխատած այդ մարդիկ, անծանոթ նրա իրական կարիքներին և դրությունը, քողարկվում են կոմունիզմի դրոշմով՝ հետապնդելով իրենց չահաղիտական նպատակները: Թիֆլիսում կոմունիստական կուսակցության երկրային կենտրոնի հայ գաղափարական կոմունիստները վճռակա՛նորեն դեմ են արտահայտվել Հայաստանում կոմունիստների ելույթներին և հայտնել են նրանց իրենց կշտամբանքը: **Երկրորդ**, հնարավոր բոլոր միջոցներով ձգտեցեք արագացնել մեր անկախության և Հայաստանի սահմանների պաշտոնական ճանաչումը: Պնդեցեք Ղարաբաղից խորհրդային զորքերի անհապաղ դուրս բերման վրա: Հայտնում եմ Ձեզ ի գիտություն, որ նրանց ներկայությունը կազմալուծող ազդեցություն է ունենում մեր գյուղացիության վրա Ղարաբաղում և նույն-

¹ Նույն տեղում, թ. 112-113:

նիսկ կից Ջանգեղուրում և այդ հարցում ամեն մի հապաղում կարող է լուրջ բարդություններ առաջացնել Հայաստանի մյուս մասերում ևս: Դրոն իր ջոկատով Ղարաբաղից հետ է քաշվել Ջանգեղուր:

Երրորդ, Հայաստանի և նրա չրջապատող պետությունների միջև միջնորդությունը համարում ենք ընդունելի:

Չորրորդ, նկատի առնելով ֆինանսական ծանր ճգնաժամը, ձգտեցեք օգտագործել Հայաստանի նկատմամբ Ուրհրդային Ռուսաստանի բարյացակամ վերաբերմունքը ստանալու մեզ համար հնարավոր և ընդունելի օգնություն: Այդ հարցը առաջ քաշեք ծայրահեղ գգուշությունը, առանց մեր կողմից քաղաքական պարտավորություն՝ նրան հաղորդելով բացառապես ֆինանսական բնույթով¹:

Տպագիր այս փաստաթղթի վերջում ձեռագրով կետեր են ավելացված նալթի, հացի և այլ պահանջների մասին:

Ինչպես տեսնում ենք, Բաքվի բոլշևիկների ակտիվ միջամտությունը Մոսկվայում ընթացող բանակցություններին անհանգստացնում էր նաև Հայաստանի կառավարությանը: Ցավալին այն է, որ դրանց շարքում քիչ չէին նաև հայ կոմունիստները: Սակայն այդ հարցի մանրամասնումը մեր խնդիրը չէ, առավել ևս, որ բանակցությունների այդ փուլում (մինչև հուլիս), Ուրհրդային կառավարությունը, ինչպես վերը նշվեց, բարյացակամորեն էր տրամադրված և ձգտում էր անպայմանորեն գործն ավարտել պայմանագրի կնքումով:

Ուրհրդային Ռուսաստանի կառավարության բարյացակամությունը, Հայաստանի պահանջները ճանաչելու և համապատասխան պայմանագիր ստորագրելու պատրաստակամության մասին վկայում է նաև Շանթի պատվիրակության անդամ Համբարձում Տերտերյանը 1954թ. «Հայրենիք» ամսագրում տպագրած իր հուշերում:

Նա գրում է, որ երկրորդ տեսակցության ժամանակ², որը տեղի էր ունեցել հավանաբար հունիսի կեսերին, կայացվեց համաձայնություն՝ Ղարաբաղը վիճելի, իսկ Ջանգեղուրը և Նախիջևանը Հայաստանին: Ուրիչ ուղղակի վկայություններ չկան այս մասին, բայց Տերտերյանին էլ չհավատալ՝ չենք կարող: Առավել ևս, որ բանակցությունների հաջող ընթացքի մասին խոսվում է նաև պատվիրակության մեկ այլ անդամի՝ Լևոն Ջարաֆյանի հունիսի 10-ի հեռագրում. «Օրերս կձևակերպվի մեր

¹ ՀԱԱ, ֆ. 276, ց. 1, գ. 218, թ. 88:

² Բանակցությունները կրել են տեսակցությունների բնույթ, հրավիրվել են ուսական պատվիրակության կողմից և վարվել բանավոր:

միսիայի քաղաքական մասը, – ասված է հեռագրում, – որի մասին կհայտնենք կիրակի օրը...»¹: Ուստի պետք է ընդունենք, որ Ծանթի պատվիրակությունը պնդել է հունիսի 1-ի հեռագրում նշված երրորդ տարբերակի վրա (միայն Ղարաբաղը վիճելի, իսկ Ջանգեղուրը և Նախիջևանը Հայաստանին), իսկ ռուսական կողմն էլ ընդառաջել է: Ընդհանրապես չ. Տերտերյանը այս տեսակցությունը համարում է ամենաարդյունավետը, դրականորեն էին լուծվելու մյուս հարցերը ևս (Ջիչերինը ստանձնելու էր միջնորդությունը Հայաստանի և քեմալական թուրքիայի միջև՝ ապահովելու ելք դեպի Սև ծով և Արևմտյան Հայաստանի որոշ մարզերի միացումը Հայաստանի Հանրապետությանը², դրականորեն պետք է լուծվեին նաև մշակութային և տնտեսական խնդիրները): Պայմանավորվել էին նաև, որ ռուսական կողմը կնախապատրաստի պայմանագրի նախագիծը և կներկայացնի ստորագրության երկու օրվա ընթացքում: Սակայն կայացած համաձայնությունը գործի չվերածվեց. օրերն անցնում էին, իսկ ռուսական կողմը շարունակում էր խորհրդավոր լուծելուն պահպանել: Նա կարծես թե մոռացել էր թե՛ Ծանթի պատվիրակության, թե՛ կնքվելիք պայմանագրի մասին: Չ. Տերտերյանը այս կապակցությամբ գրում է. «Պարզ էր, որ կայացած համաձայնությունը անակնկալ և անսխալ արգելքների էր հանդիպել թանձր վարագույրի ետևում»:

Իսկապես որ, հունիսի երկրորդ կեսին Մոսկվան սկսեց հեղեղվել Բաքվից և Կովկասում գործող ղեկավար կոմունիստներից ստացված հեռագրերով, որոնք՝ խոսքները մեկ արած, պահանջում էին պայմանագիր չստորագրել Հայաստանի հետ: Ծանոթանանք դրանցից մեկերկուսին: Հունիսի 19-ին Ջիչերինը ստանում է Օրջոնիկիձեի հետևյալ հեռագիրը Վլադիկավկազով.

«Ադրբեջանը հավակնում է Ղարաբաղի, Ջանգեղուրի, Նախիջևանի և Ծարուր-Ռարալազյազի գավառների վրա: Ղարաբաղում և Ջանգեղուրում հայտարարված է խորհրդային իշխանություն և վերոհիշյալ տարածքները իրենց համարում են Ադրբեջանի Խորհրդային Հանրապետությանը»:

¹ Ս. Ալիխանյան, Սովետական Ռուսաստանի դերը Հայ ժողովրդի ազատագրման գործում (1917–1921), Եր., 1966, էջ 108:

² Բանակցությունների առաջին իսկ օրը պարզ դարձավ, որ Ջիչերինին ավելի շատ հետաքրքրում էր հայ-թուրքական կնճիղը և առաջարկում էր իր միջնորդությունը նրա լուծման գործում: Մինչդեռ Ծանթի պատվիրակությունը այդ հարցը քննարկելու լիազորություն չէր ստացել և ամեն ջանք գործադրում էր խուսափելու Ջիչերինի առաջարկությունից (մանրամասն տես է. Ա. Զոհրաբյան, նշվ. աշխ., էջ 48–60):

պետություն մաս: Նախիջևանը արդեն մի քանի ամիս է ապստամբ մուսուլմանների ձեռքում է: Ծարուր-Ռարալազյազի վերաբերյալ ես տեղեկություններ չունեմ:

Ադրբեջանը առանց Ղարաբաղի և Ջանգեղուրի ոչ մի կերպ չի կարող մնալ: Ընդհանրապես, իմ կարծիքով հարկավոր էր Մոսկվա հրավիրել Ադրբեջանի ներկայացուցչին և նրա հետ միասին լուծել Ադրբեջանին և Հայաստանին վերաբերող բոլոր հարցերը: Դա պետք է անել մինչև Հայաստանի հետ պայմանագրի ստորագրումը, զաքաթալ-չչինայի¹ կրկնությունը նաև հայերի հետ այստեղ մեզ վերջնականորեն կտապալի»² (ընդգծումը մերն է – է. Զ.):

Մեկ այլ գրություն մեջ՝ ուղղված Լենինին, Ստալինին, Ջիչերինին, որտեղ Օրջոնիկիձեի խոսում է այն մասին, որ եթե Նախիջևանը և Ծարուր-Ռարալազյազը խոստացվի Հայաստանին, ապա վերջինս կհամաձայնի ստորագրել պայմանագիր Ղարաբաղը և Ջանգեղուրը Ադրբեջանին անցնելու մասին, ավելացնում է. «Կարող եմ Ձեզ հավաստիացնել, որ մենք բավականին պարզ պատկերացնում ենք մեր խաղաղության քաղաքականությունը և իրագործում ենք այն, բայց ես վստահ եմ և իմ խորը համոզմունքն է, որ Ադրբեջանում խորհրդային իշխանության ամրապնդման և Բաքուն մեզ պահելու համար անհրաժեշտ է միացնել Լեոնային Ղարաբաղը... Այդ հարցի այլ լուծումը մեր դրությունը Ադրբեջանում դարձնում է խախտում և ոչինչ չի շահում Հայաստանում: Ես գերազանց հասկանում եմ, որ Հայտնի քաղաքական իրադրության դեպքում Հայաստանը կարող է մեզ պետք գալ: Որոչքեք, ինչպես հարմար եք գտնում: Մենք կիրագործենք ամենը, ինչ մեզ կկարգադրվի, բայց թույլ տվեք տեղեկացնել ձեզ, որ Ադրբեջանի նկատմամբ վերաբերմունքը խիստ վարկաբեկում է մեզ Ադրբեջանի լայն զանգվածների աչքում և ստեղծում վերին աստիճանի նպաստավոր հող մեր՝ հակառակորդների աշխատանքի համար»³ (ընդգծումը մերն է – է. Զ.):

Օրջոնիկիձեից, Նարիմանովից և Ադրբեջանի մյուս ղեկավարներից բացի հունիսյան այդ օրերին զգալի ակտիվություն ցուցաբերեցին նաև մայիսյան ապստամբությունից հետո Բաքվում ապաստանած Հայ կոմունիստները: Ձայնակցելով Նարիմանովին, Հուսեյնովին և մյուսներին՝

¹ Ռուս-վրացական պայմանագրով (1920թ. մայիս) Ադրբեջանի կողմից վիճելի հայտարարված Ջաքաթալայի շրջանը հանձնվել էր Վրաստանին, ինչը և առաջ էր բերել Բաքվի ղեկավարության դժգոհությունը:

² «К истории образования НКАО Аз. ССР, 1918-1925.» стр. 49-50.

³ Նույն տեղում, էջ 32–33:

նրանք Մոսկվա ուղարկեցին մի շարք նամակներ ու հեռագրեր, որոնցում ամեն կերպ վատաբանում էին Հայաստանի կառավարությունը, պահանջում նրա հետ պայմանագիր չկնքել ու ոչ մի զիջում չանել: Ոմանք նույնիսկ իրենց ստորագրությունը դրեցին վիճելի տարածքների վերաբերյալ Ադրբեջանի ղեկավարության Մոսկվա ուղարկած գրությունների տակ: Սակայն այդ ապագայնացած կոմունիստների կարծիքին Չիչերինը ուշադրություն չէր դարձնում: Հունիսի 26-ին Օրջոնիկիձեի հետ հեռախոսային խոսակցության ժամանակ Չիչերինն այդ կապակցությամբ ասել էր. «Նկատի ունեցեք, որ Երրորդ ինտերնացիոնալի հայկական խմբի տեսակետը վճռականորեն տարբերվում է Բաքվի ընկերներից: Մենք պետք է բացարձակապես անկողմնակալ դեր խաղանք, ես Հայկունու հետ երկար խոսակցություններում ինձ համար պարզել եմ այդ տարածայնությունները, որոնց մասին լավ գիտեմ Նարիմանովից: Վերջինիս հետ ես շատ ընկերացել էի նրա այստեղ գտնվելու ժամանակ և գիտեմ նրա միակողմանիությունները...»¹:

Փորձելով հակազդել Բաքվի ճնշումներին, Չիչերինը հատուկ գրությամբ դիմում է ՌԿ(բ)Կ Կենտկոմի Քաղբյուրո, առաջարկում «սանձահարել Բաքվի ընկերներին», որոնք իրենց անկարգապահությունները առաջ են բերում խոսքի և գործի հակասություն, խախտում են Կենտկոմի կողմից հաստատված քաղաքական գիծը: «Բաքվի ընկերները իրենց գործողություններով խափանում են կոմպրոմիսները, – ասված է այդ գրությունում, – մերժում են Հայաստանի հետ համաձայնագիր ստորագրելու Կենտկոմի պահանջը, օժանդակում են ապստամբություններին, պնդում են Ադրբեջանին միացնել այն վիճելի տարածքները, որոնք որոշված է գրավել մեր ուժերով և որոնց միացումը Ադրբեջանին, միանգամայն անհնարին են դարձնում Հայաստանի հետ համաձայնությունը»²: Այդ ամենը կանխելու և Բաքվի ղեկավարության գործունեությունը վերահսկելու նպատակով Չիչերինն առաջարկում է հատուկ հեղինակավոր ներկայացուցիչ ունենալ Բաքվում, որն ի վիճակի կլինի տեղական գործիչներին հետ պահել կամայականություններին:

Հունիսի 22-ին ՌԿ(բ)Կ Կենտկոմի Քաղբյուրոն քննության առավ Չիչերինի առաջարկը և որոշեց հանձնարարել Արտգործոժողկոմատին

Հստակ հրահանգներ մշակել Արևելքում գործող աշխատակիցների համար և պատասխանատու ռազմական գործիչներին պարտավորեցնել իրենց գործողությունները համապատասխանեցնելու Քաղբյուրոյի հաստատած որոշումների ու ցուցումների հետ: Հատուկ ընդգծված էր Կենտկոմի Կովկասյան բյուրոյի անդամներին և Կիրովին ու Լեգրանին այդպիսի ցուցումներ տալու անհրաժեշտությունը¹:

Ի՞նչ ցուցումների մասին է խոսքը, փաստաթղթում ոչինչ չի ասված: Բայց, որ ռազմական գերատեսչությունը հաճախ էր գործում ինքնագլուխ, առանց իր քայլերը Արտգործոժողկոմատի հետ համաձայնեցնելու, դա ակնհայտ է: Հենց այդ օրը՝ Հունիսի 22-ին Կարմիր բանակի գլխավոր հրամանատարությունը 11-րդ Կարմիր բանակին Ձանգեզուրը, Նախիջևանը, Օրդուբադը և Ջուլֆան գրավելու հրաման էր տվել: Իսկ վերջինս էլ իր հերթին երեք հոգուց բաղկացած մի պատվիրակություն էր ուղարկել Հայաստանի կառավարությունը համոզելու, որ այդ գրավումների նպատակը Նախիջևանը թուրքական ներխուժումից փրկելն է²:

Ահա թե որքան հակասական է եղել Մոսկվայի քաղաքականությունը: Մինչ արտգործոժողկոմ Չիչերինը հայ պատվիրակներին խոստանում էր Ձանգեզուրը և Նախիջևանը թողնել Հայաստանին, զինվորականներն այդ նույն գավառները գրավելու հրաման են ստանում:

Անփոփոխ չի մնում նաև Չիչերինի դիրքորոշումը: Հ. Տերտերյանը վկայում է, որ Հունիսի վերջերին Չիչերինը հայ պատվիրակներին նորից հրավիրեց տեսակցության և հայ-ադրբեջանական սահմանագծման հարցում ներկայացրեց նոր առաջարկ. «Ղարաբաղը Ադրբեջանին, Ձանգեզուրը վիճելի, Նախիջևանը Հայաստանին»: Հ. Տերտերյանը նաև նշում է, որ ինքը և Ջարաֆյանը համաձայն էին այդ սկզբունքով համաձայնագրի ստորագրմանը. «Լևոն Ջարաֆյանը և տողերիս գրողը այն կարծիքին էինք, որ անմիջապես պետք է ընդունել Չիչերինի առաջարկը և ստորագրել պատրաստված ռուս-հայկական դաշնագրությունը, որով նախ ապահովված կլինեք Հայաստանի անկախության պաշտոնական ճանաչումը Խորհրդային Միության (Ռուսաստանի – է. Ջ.) կողմից, և երկրորդ՝ թաթարաբնակ Նախիջևանի շրջանը կդառնար մեր հանրապետության անվիճելի հողամասը: Ինչ վերաբերում է Ձանգեզուրի խնդրին, նրա վիճելիության պարագան համարում էինք զուտ

¹ „Геноцид армян...“, стр. 74.

² ՀՀ-ն 1918-1920թթ., փաստաթղթերի..., էջ 212:

¹ Տե՛ս նույն տեղում, էջ 211:

² Տե՛ս Ս. Ալիխանյան, նշվ. աշխ., էջ 124-125:

ձևական և ժամանակավոր բնույթ ունեցող, որովհետև այդ խնդիրը լուծվելու էր տեղական բնակչության ցանկության համաձայն: Ղարաբաղի խնդրում, գտնելով հանդերձ Սորհրդային Միության առաջարկը միանգամայն անիրավացի, համամիտ էինք ժամանակավորապես համակերպվելու, ունենալով այն խորը համոզումը, որ Ղարաբաղի ազատասեր և ըմբոստ հայությունը վաղ թե ուշ պիտի միանար իր Մայր Հայրենիքին՝ Հայաստանի Հանրապետությանը»¹: Սակայն այլ կարծիքի էր պատվիրակության նախագահ Լևոն Շանթը: Վկայակոչելով կառավարության հրահանգը, ըստ որի՝ պատվիրակությունը լիազորված չէր զիջելու Ղարաբաղը, նա պահանջեց նախ հարցում անել կառավարությանը և դրական պատասխանի դեպքում միայն ընդունել Ձիչերինի առաջարկը: Ի դուր անցան Տերտերյանի և Զարաֆյանի ջանքերը՝ համոզելու Շանթին, որ Երևան դիմելը կձգձգի հարցը, իսկ այդ ընթացքում Ռուսաստանի դիրքը կարող է նորից փոփոխվել, որ բանակցություն վարող պատվիրակությունը պետք է որոշ ազատություն ունենա և գործի ստեղծված պայմաններին համապատասխան: Շանթը անդրդվելի էր և որոշեց ծածկագիր-հեռագրով դիմել Երևան՝ համաձայնագրի ստորագրելու համար կառավարության հավանությունը ստանալու նպատակով:

Տերտերյանի և Զարաֆյանի գուշակությունը ճիշտ դուրս եկավ. Համո Օհանջանյանի կառավարությունը հարցումին պատասխանեց չուրջ մեկ ամիս հետո, որում ոչ միայն մերժում էր Ձիչերինի նոր առաջարկությունը, այլև տարածքային նոր պահանջ էր առաջ քաշում, այս անգամ Դաշտային Ղարաբաղի մասին: Արտգործնախարարության թիվ 10 տեղեկագրում (1920թ. հուլիսի 25-ով թվագրված) «Մենք և Սովետական Ռուսաստանը» բաժնում կարողում ենք. «Կառավարությունը հրահանգել է մեր Մոսկվայի պատվիրակությանը, որ պայմանագրի կնքելը ցանկալի է: Վիճելի կարող են նկատվել Ղարաբաղը իր դաշտային մասով, Գանձակի շրջանը, Ղազախ քաղաքը և Աղստաֆան իր երկաթուղային ելքով: Այդ վիճելի տեղերից ռուսական զորքերը պիտի հեռանան և այդ հողամասերը պիտի կառավարվեն տեղական ժողովրդի կողմից: Հայաստանի Հանրապետությունը չի կարող ընդունել Ռուսաստանի իրավախոհությունը Ադրբեյջանի հետ ունեցած վեճերի համար, եթե վճռող կողմերը իրենք համաձայնության չզան, արբիտրը լինելու է հաշտարար կոնֆերանսը»² (ընդգծումը մերն է - է. Զ.):

Հայաստանի կառավարության այս նոր հրահանգը այնքան տարօրինակ էր ու զարմանալի, որ Հայ պատվիրակները որոշեցին այդ մասին չհայտնել ռուսներին. «Անչափ զարմանք պատճառեց մեզ մեր կառավարության նման հրահանգը, - գրում է Տերտերյանը, - քանի որ Դաշտային Ղարաբաղի մասին մեր կողմից երբեք խոսք չէր եղել: Եվ այսօր հանկարծ նոր հարց էր հարուցվում: Հազար ու մի ենթադրություններ արինք ու վերջը եկանք այն եզրակացություն, որ հաղթական դաշնակիցները ինչ-որ երաշխիքներ են տվել մեր կառավարությանը բոլշևիկների հանդեպ, և մեր կառավարությունը՝ իրեն չատ գորավոր դգալով, արհամարհում է Զանգեզուրի վրայով դեպի Նախիջևան արշավող Կարմիր բանակը և Դաշտային Ղարաբաղի հարց հարուցանելով ցանկանում է Մոսկվայի բանակցությունները ձգձգել ու հետաձգել: Ստեղծված պայմաններում պատվիրակությունը բարվոք համարեց որևէ խնդիր չհարուցանել մեր կառավարության նոր առաջարկի մասին»¹ (ընդգծումը մերն է - է. Զ.):

Որ Համո Օհանջանյանի կառավարությունը տարված էր պատրանքներով և չէր տեսնում, թե ինչ է կատարվում հանրապետության շուրջ ու չէր փորձում իրատեսական քաղաքականություն վարել, այլ անվերապահորեն հայացքն ուղղել էր Արևմուտքին, դա անառարկելի է և այդ հանգամանքը արձանագրել են բոլոր ուսումնասիրողները: Եվ իսկապես. 1920թ. ամռանը անգլիական վերջին զինվորները հեռացել էին Անդրկովկասից, Ադրբեյջանը վաղուց խորհրդայնացել էր, Վրաստանը հաշտության պայմանագիր էր ստորագրել Ռուսաստանի հետ, իսկ 11-րդ Կարմիր բանակի զորամասերը պատրաստվում էին Զանգեզուրի վրայով մտնել Նախիջևան: Այսպիսի պայմաններում ո՞ւմ կամ ինչի՞ վրա էր դրել իր հույսը Հայաստանի կառավարությունը նման քաղաքականություն վարելով ու խուսափելով Ռուսաստանի հետ պայմանագրի ստորագրումից: Բայց մենք այն կարծիքին չենք, թե Մոսկվայի բանակցությունների ձախողման պատճառը միայն Հայաստանի կառավարության այդ վերջին պահանջն էր Դաշտային Ղարաբաղի մասին: Ո՛չ ինչպես տեսանք այդ պահանջի մասին Ձիչերինին նույնիսկ չէր հայտնվել: Իսկ վերջինս էլ չէր սպասել մինչև Երևանից պատասխան ստացվի, այլ Բաքվի և Անկարայի ճնշման տակ տեղի էր տվել և որոշել բանակցությունները փոխադրել Երևան:

Բանն այն է, որ հուլիսի վերջերին կովկասյան կոմունիստները և

¹ «Հայրենիք» ամսագիր, 1954թ., թիվ 2, էջ 16:

² ՀԱԱ, Ֆ. 200, ց. 1, գ. 607, թ. 54:

¹ «Հայրենիք» ամսագիր, 1954թ., թիվ 2, էջ 16:

Աղբրեջանի ղեկավարությունը ավելի ու ավելի մեծացրել էին ճնշումը Մոսկվայի վրա: Դա աներկրա հաստատում են արխիվային փաստաթղթերը: Միայն Օրջոնիկիձեն հունիսի երկրորդ կեսին վիճելի տարածքների հարցով երեք հեռագիր է ուղարկել Մոսկվա՝ Լենինի, Ստալինի, Չիչերինի հասցեով, որոնցում պաշտպանում էր Աղբրեջանի իրավունքը Հայաստանի հետ վիճելի տարածքների հարցում: Իսկ 27-ին Լենինը ստանում է Նարիմանովի ընդարձակ հեռագիրը, որում ոչ միայն խոսվում էր վիճելի տարածքների մասին, փաստորեն մերժում Չիչերինի դիրքորոշումն այդ խնդրում, այլև այդ հարցը կապում Արևելքում հեղափոխական շարժումների հեռանկարի հետ: Դա տիպիկ նարիմանովյան փաստաթուղթ է՝ հեղեղված և՛ սպառնալիքներով, և՛ կեղծ բարեպաշտությամբ: Կարծում ենք արժե այդ փաստաթուղթը ներկայացնել ամբողջությամբ, որպեսզի ընթերցողն էլ տեսնի, թե ում հետ գործունե հայ ժողովուրդը. «Թանկագին ընկ. Լենին, - գրում է Նարիմանովը, - ընկ. Չիչերինի հեռագրերից երևում է, որ Կենտրոնի տեղեկատվությունը միակողմանի է: Կենտրոնն ընկել է նրանց ազդեցության տակ, ովքեր մինչև այժմ ղենիկիյանների հետ մեկտեղ գործում են Աղբրեջանի խորհրդային իշխանության դեմ: Եթե Կենտրոնին ցանկալի է Աղբրեջանը զոհաբերել և իրեն պահել միայն Բաքուն, նավթը և ամբողջովին հրաժարվել արևելյան քաղաքականությունից, թող դա անի, բայց զգուշացնում եմ. Բաքուն չի կարելի պահել առանց ամբողջ Աղբրեջանի՝ դավաճան դաշնակների և վրացական մենչևիկների հարևանությամբ: Մյուս կողմից ես կուզենայի իմանալ, թե Կենտրոնը ինչպե՞ս է նայում մեզ՝ մուսուլման-կոմունիստներիս վրա և ինչպե՞ս նա կարող է այդպիսի կարևոր հարցերը լուծել առանց մեզ: Կենտրոնը կարող է մեզ անվատահույսությամբ վերաբերվել, բայց չէ որ կենտրոնի որոշմանը համաձայն չեն (այնպիսի) պատասխանատու աշխատակիցներ, ինչպես Օրջոնիկիձեն և Մդիվանին: Ես ուղիղ կասեմ. կենտրոնը մեր ձեռքից խլեց զենքը և Ղարաբաղի մասին իր որոշումով ուժեղացրեց, հիմնավորեց Մուսավաթի պրոպագանդան, որը անընդհատ ասում է, իբր մուսուլման-կոմունիստները Աղբրեջանը ծախել են Ռուսաստանին, այն Ռուսաստանին, որը միաժամանակ ճանաչում է Հայաստանի և Վրաստանի ինքնուրույնությունը և չգիտես ինչու մինչև Աղբրեջանում խորհրդային իշխանության հաստատումը անվիճելի մարզերը, այժմ համարում է վիճելի: Ընկ. Չիչերինը խոսում է կենտրոնին ենթարկվելու մասին, բայց արդյո՞ք կենտրոնը միաժամանակ հաշվի է առնում այն, որ նա հարկադրում է մեզ վարագույր լինել: Հակահեղափոխությունը ճնշված է, բայց նա չնչում է և պատրաստ է նոր ուժով

բռնկվել, քանի որ կենտրոնը մեզ դրել է այնպիսի պայմաններում, որ չուստով ի վիճակի չենք լինի գործել խոսքի ուժով, այլ միայն զենքի ուժով: Ահա մեր դրություն ողբերգությունը: Այն, ինչ ամիս առաջ մեզ հնարավորություն էր տալիս ջախջախել մուսավաթականների պրովակացիաները, հիմա մենք զրկված ենք այդ հնարավորությունից: Մեզ ասում են, դուք չեք կարողանում Աղբրեջանին ամրակցել միանգամայն անվիճելի տարածքները, իսկ խոսում եք Արևելքի ազատագրության մասին: Մենք անպայման կենթարկվենք ԿԿ-ի որոշմանը, միաժամանակ հայտարարում ենք. մենք, կորցնում ենք ազդեցությունը զանգվածների մեջ, մենք օգտվում էինք հսկայական ազդեցությունից և կարող էինք միանգամայն անցավազին իրականացնել երկու հանրապետությունների միավորման մասին ղեկընտնեքը, բայց այժմ դա հնարավոր է միայն զենքի ուժով: Ճանապարհվում է մեր ներկայացուցիչը, ուստի խնդրում և աղաչում եմ ժամանակավորապես կանգնեցնել Աղբրեջանի մասին կենտրոնի որոշումը: Նարիմանով»¹ (ընդգծումները մերն են - է. Զ.):

Նավթ, մուսուլմանական Արևելք, հեղափոխություն, իշխանության կորուստ և այդ ամենը «դավաճան դաշնակների» պատճառով, որոնք ղենիկյանների հետ միասին պայքարում են Աղբրեջանի դեմ, և որոնց, ըստ Նարիմանովի, միացել է նաև Չիչերինը: Ի՞նչ տպավորություն թողեց այս հեռագիրը Լենինի վրա: Պարզվում է, որ երկու օր պահելուց հետո ուղարկել է Չիչերինին՝ առաջարկելով «երկու խոսքով կարծիք» գրել և հայտնել, թե հնարավոր չէ՞ Նարիմանովի հետ հարցերը խաղաղությամբ լուծել:

Չիչերինի պատասխանը բավականին ընդարձակ է ու չափազանց հետաքրքիր: Նրանում ոչ միայն վիճելի տարածքների վերաբերյալ Արտգործժողկոմատի դիրքորոշումն է հիմնավորված, այլև բացահայտված է նարիմանովյան քաղաքականության էությունը, կովկասյան կոմունիստների (Օրջոնիկիձե, Մդիվանի և այլն) գործելակերպը և որ առամձնապես կարևոր է՝ Գ. Հայկունու գլխավորած Հայաստանի կոմունիստական կուսակցության դիրքորոշումը վիճելի տարածքների հարցում: Ուստի հարկ է, որ Չիչերինի կարծիքը ևս ներկայացնենք ամբողջությամբ: Նա գրում է. «Աղբրեջանից ոչ ոք ոչինչ չի խլում: Ղարաբաղը և այդպես կոչված վիճելի տարածքները ժամանակավորապես գրավվում են ոռուսական խորհրդային զորքերով, և մենք ժամա-

¹ „Геноцид армян...“, стр. 75.

նակավորապես դրանք չենք տալիս ո՛չ Հայաստանին, ո՛չ Ադրբեջանին: Դա չի կողոպտում ո՛չ մեկին, ո՛չ մյուսին: Ամեն մի այլ լուծում մեզ կղներ մեկին՝ ի վնաս մյուսի, հովանավորելու կեղծ ուղու վրա: Ես այդ մասին չատ եմ խոսել Երրորդ Ինտերնացիոնալի Հայկական խմբի ներկայացուցիչների, այժմ այնտեղից եկած Հայ կոմունիստների ԿԿ-ի ներկայացուցիչների, էլիվայի, Կիրովի և մյուսների հետ: Մեր լուծումը միակ հնարավորն է: Ղարաբաղը վաղեմի Հայկական տարածք է, բայց Հայերի ջարդերից հետո հարթավայրերում բնակվեցին թաթարները, իսկ Հայերը մնացին լեռներում: Մենք այժմ այդ շրջանը չենք տալիս Հայերին, որպեսզի չնեղացնենք թաթարներին: Բայց մենք այն չենք տալիս թաթարներին, ինչը խորապես սխալ քայլ կլինի՝ խաղաղարների մեր անհրաժեշտ քաղաքականությունը հակասող: Բայց Նարիմանովը ուզում է Բաքվի թաթարների զավթողական հավակնություններին գոհացում տալ: Դա անթույլատրելի է: Բայց Նարիմանովը հեռուն է գնում, նա դեմ է բուրժուական Վրաստանի և բուրժուական Հայաստանի հետ կոմպրոմիսի մեր քաղաքականությունը: Բայց Վրաստանի և Հայաստանի խորհրդայնացումը ԿԿ-ի կողմից նրա համար է մերժվել, որ գերազանցում է մեր ներկայիս ուժերը: Մենչևիկները և դաշնակները չեն հանձնվի առանց կատաղի կռիվի: Մենք ընտրել ենք նրանց աստիճանական քայքայման ուղին, որն արդեն դրսևորվում է: Տրոցկին էլ ինձ հանդիմանեց արևելյան քաղաքականությունը չափից ավելի տարվելու համար: Հայ կոմունիստների ԿԿ-ի անդամները ասում են, որ մայիսի 1-ին Հայաստանում զանգվածների տրամադրությունը ամենախորհրդայինն էր, և այդ օրը ստացվում է Ադրբեջանի վերջնագիրը Ղարաբաղի և Ջանգեզուրի մասին. իսկույն ամեն ինչ փոխվեց, իսկույն դաշնակները ամրացան: Մուսուլմանական տենդենցների քաջայերման նարիմանովյան քաղաքականությունը, որին միանում է Օրջոնիկիձեի և Մդիվանու հարձակողական քաղաքականությունը, տանում է դեպի դաշնակների ուժեղացում, արյունալի կոնֆլիկտների, ճգնաժամների սրացում: Ուսիլ փաշան այնտեղ մերոնց ասել է, եթե հայերը մեր ճանապարհին են, նրանց կարելի է կոտորել: Այդ արյունալից լարվածություններին է տանում մուսուլմանական բաղձանքների հովանավորման քաղաքականությունը: Ելքը մեկն է՝ օբյեկտիվ երրորդի մեր դերը: Գալիս է պահը Վրաստանի և Հայաստանի խորհրդայնացման համար, այդ ժամանակ այդ ամենը կվերանա: Չիչերին»¹ (ընդգծումները Չիչերինինն են):

¹ Նույն տեղում, էջ 75-76:

Չիչերինյան այս տողերը կարդացողը չի կարող չընդունել, թե որքան ճիշտ էր նա հասկացել նարիմանովյան քաղաքականությունը և հեռահար նպատակները: Որհնորային պետական բարձրաստիճան գործիչների շարքում փաստորեն նա միակն էր, որ տեսնում էր այն վտանգը, որ կարող է կախվել Հայոց գլխին՝ «մուսուլմանական բաղձանքներին» և թուրք փաշաներին հովանավորելու հետևանքով: Միայն ափսոսալ կարելի է, որ խորհրդային պետական համակարգի պայմաններում էականորեն ազդել արտաքին քաղաքականության ձևավորման վրա նա չէր կարող: Հետագա շարադրանքում դեռ կտեսնենք, որ բոլշևիկների որևելյան քաղաքականությունն ամբողջովին տնօրինում էր Ստալինը և իրականացնում կովկասյան իր արբանյակների միջոցով: Կտեսնենք նաև, թե նա ինչպես էր վերաբերվում Հայկական հարցին և Հայերին ընդհանրապես: Իսկ առայժմ, որպես նախերգանք, ծանոթանանք Չիչերինին ուղարկած նրա նամակին, որ գրել էր Սմոլենսկից դեռևս մեկ տարի առաջ՝ 1919թ. օգոստոսի 16-ին, և որում պահանջում էր Լևոն Կարախանին հեռացնել արտգործոցը կոմատից, որովհետև նա ծագումով Հայ է: Նամակի սկզբնամասում երկար դատողություններ անելով այն մասին, թե ինքը զարմացած է, որ մուսուլման պատվիրակները՝ չրջանցելով Արտգործոցը կոմատը, գերադասում են իր հետ գործ ունենալ, իր հետևից գնում են Պիտեր, Սմոլենսկ և այլն, հետևություն է անում, թե երկար մտածելով գտավ, որ պատճառը Արտգործոցը կոմատում ազգությունը Հայ Կարախանի առկայությունն է, ինչը իբրև թե խանգարում է իրենց «մուսուլմանական» քաղաքականությունը: «Քանի որ մեր «մուսուլմանական» քաղաքականությունն արդարացվել է, արդարացվում է և դեռ կարողարացվի (մենք նվաճել ենք պարսիկների, թուրքերի, աֆղանների և մյուսների համակրանքը), - գրում է Ստալինը, - այդքանով Կարախանի ներկայությունը Արտգործոցը կոմատում՝ ազգությունը Հայ, միակ «արևելյան մարդը», որ կոչված է արտաքին աշխարհի համար ներկայացնել Արևելքի ժողովուրդները՝ ծակում է լսողությունը և խախտում մեր արևելյան քաղաքականության ներդաշնակությունը, թուլացնում Արևելքի ժողովուրդների և առաջին հերթին մուսուլմանների աչքում մեր քաղաքականության ուժն ու էֆեկտը»¹: Ջարգացնելով այն միտքը, որ չկա իրենց արևելյան քաղաքականությունը ձախողելու ավելի հարմար միջոց, քան այդ նպատակի համար Հայերի օգտագործումն է, որոնց «մուսուլմաններն ընդհանրապես, իսկ թուրքերը հատ-

¹ Նույն տեղում, էջ 33:

կապես, մաքսիմում անվստահություն են տածում», Ստալինը շարունակում է. «Ելնելով այդ նկատառումներից, ես՝ Մոսկվայում գտնվելու ժամանակ, առաջարկել եմ ընկեր Լենինին, հարց հարուցել ԿԿ-ում Կարախանին մուսուլմաններից որևէ մեկով՝ թեկուզ միջին կուսակցական նախապատրաստությունը, փոխարինելու մասին»¹ (ընդգծումը մերն է - է. Ջ.):

Նամակի հետագա շարադրանքից պարզվում է, որ Ստալինն արդեն ուներ այդպիսի թեկնածու և այդ մուսուլմանը Նարիմանովն է: «Նարիմանովն ինձ համար այդ բազմաթիվ մուսուլմաններից մեկն է, - կարդում ենք նամակում, - ըստ որում դժբախտություն չէ, եթե նրա մոտ բացակայում է լայն քաղաքական հեռանկարը. քաղաքականությունը նա չի անելու իհարկե, այլ ԿԿ-ն, և Արտգործօգնությունը, - Նարիմանովը կարևոր է որպես դրոշակ: Դեկորացիաների այդպիսի փոփոխությունը, կամ ամեն դեպքում Արևելքի հարցերում Կարախանին ստվերում պահելը և մուսուլմանի առաջաշույնը առաջին պլան՝ ես գտնում եմ բացարձակապես անհրաժեշտ: Եթե դա հետաքրքիր է, կարող եմ հայտնել, որ ընկ. Լենինը այդ առթիվ արտահայտել է իր լիակատար համաձայնությունը: Այդպիսի փոփոխությունը իսկույն մուսուլմանների կողմից հաշվի կառնվել, կբարձրացնեն մեր քաղաքականության կուրսը վերջիններիս մեջ, կտար մի շարք պլյուսներ: Առարկությունն այն մասին, որ Նարիմանովը ծանոթ չէ Հեռավոր Արևելքին, որ նա ծեր է և դանդաղ է կողմնորոշվում, ինձ համար վճռական նշանակություն չունի, քանզի ես երբեք չեմ մտածել, որ Նարիմանովը պետք է ղեկավարի արևելյան քաղաքականությունը, նա ինձ համար, կրկնում եմ, միայն դրոշակ է, դեկորացիա»² (ընդգծումը մերն է - է. Ջ.):

Այսպիսին է Ստալինի գործելաոճը: Նրան անհրաժեշտ են միայն «դրոշակներ», և ոչ մտածող ու բանիմաց գործիչներ: Ծայրահեղ դեպքում կարող է համաձայնել, որ այդ «դրոշակների» կողքին լինեն նաև մեկ կամ երկու ուսներ կամ ընդհանրապես «արևելյան» աշխատակիցներ, բայց ոչ երբեք հայեր: «Բոլոր այս նկատառումների վերաբերյալ, - եզրափակում է Ստալինը, - ես ստիպված եմ պնդել իմ հին առաջարկության վրա, որը ես անհրաժեշտ եմ համարում ԿԿ-ի պլենումի քննարկմանը դնել»³:

Չենք կարող ընթերցողի ուշադրությունը չհրավիրել Ստալինի բնավորության մեկ այլ կողմի վրա ևս. դա այն տիրական և առարկություններ չընդունող տոնն է, որով նա խոսում է Չիչերինի հետ: Կարծես թե ինքն է կառավարության նախագահը: Մինչդեռ խորհրդային պետական համակարգում նա այն ժամանակ ընդամենը զբաղեցնում էր Ազգությունների գործերի ժողկոմի պաշտոնը: Ճիշտ է, նա նաև ՌԿ(բ)ԿԿ Քաղբյուրոյի անդամ էր, և վայելում էր Լենինի վստահությունը, բայց չունեի այն դիրքը, ինչ ձեռք բերեց հետագայում՝ Լենինի մահվանից հետո: Պետական համակարգում և Քաղբյուրոյի կազմում կային շատ հայտնի գործիչներ՝ Տրոցկին, Ջինովկը, Կամենևը և ուրիշներ: Հատկապես առաջինը, որը համարյա Լենինին հավասար հեղինակություն ուներ և զբաղեցնում էր ՌՍՖՍՀ ռազմահեղափոխական խորհրդի նախագահի պաշտոնը: Կարծում ենք Նարիմանովի հունիսի 27-ի գրության վերաբերյալ Լենինին ուղարկած կարծիքով Չիչերինը պատահական չէր հիշեցնում Տրոցկու կարծիքը՝ արևելյան քաղաքականությունը չափից ավելի տարվելու մասին: Ի դեպ, վերադառնալով այդ կարծիքին, ուզում ենք մատնանշել մի հանգամանք ևս: Բանն այն է, որ մեր պատմաբանները, նաև տողերիս հեղինակը, հայ-ադրբեջանական և հայ-թուրքական տարածքային վեճերի կապակցությամբ Չիչերինի դիրքորոշումներին անդրադառնալիս, որպես կանոն այն կապում ենք Կարախանի անվան հետ՝ կարծելով, որ անհրաժեշտ տեղեկատվությունը Չիչերինը նրանից էր ստանում: Հնարավոր է, որ դրանում որոշ ճշմարտություն կա, թեև կոնկրետ փաստեր չունենք: Մինչդեռ վերը նշված կարծիքում, ինչպես նաև Օրջոնիկիձեի հետ հունիսի 26-ի հեռախոսազրույցում Չիչերինը բացահայտել է տեղեկատվության իր աղբյուրը: Դա Գուրգեն Հայկունին է, և նրա գլխավորած կուսակցության ԿԿ-ի անդամները, որոնց հետ Չիչերինը երկարատև զրույցներ է ունեցել նշված հարցերի շուրջ:

Դատելով այն բանից, որ Չիչերինը չէր բավարարվել Նարիմանովի հեռագրի մասին կարծիք գրելով, այլ նաև մի ընդարձակ նամակ էր ուղարկել (նույն օրը) Լենինին, պետք է ենթադրել, որ նա խիստ ազդվել էր այդ հեռագրի ոճից և վիրավորական տոնից: Նամակում Չիչերինը կրկին մեկ առ մեկ հերքում է Նարիմանովի տեսակետներն ու առաջարկությունները, ցույց տալիս, որ Ադրբեջանը հարևանների նկատմամբ «հարձակողական գործողությունների տակտիկա» է որդեգրել և «հավակնում է Ղարաբաղի, Ջանգեղուրի և Շարուր-Դարալագյազի գավառի վրա՝ Նախիջևանի, Օրդուբադի և Ջուլֆայի հետ միասին»:

¹ Նույն տեղում:

² Նույն տեղում:

³ Նույն տեղում, էջ 34:

Չիչերինը նշում է, որ Ադրբեջանին բավարարելու երկու ուղի կա, որոնցից առաջինն այն է, որ Ադրբեջանը իր թաթարական ուժերը ուղղի Հայերի դեմ, ինչը «բացարձակապես անընդունելի է և մեծագույն հանցագործություն կլինի», մյուս ուղին՝ ուսական գործերով այդ տարածքների գրավումը և նվիրելն է Ադրբեջանին, ինչին ձգտում է Նարիմանովը: «Կատարել այդ կոմբինացիան ուսական գործառնների ձեռքերով, միանգամայն անթույլատրելի է, - գրում է Չիչերինը: - Մեր դերը պետք է բացարձակապես օբյեկտիվ և խիստ անաչառ լինի: Արևելքում մեր ամբողջ քաղաքականությունը համար ձակատագրական սխալ կլինի, եթե մենք սկսեինք հենվել մի ազգային տարրի վրա՝ ընդդեմ մյուս ազգային տարրի: Ոչնչև Հայաստանից ինչ-որ մասեր և մեր ձեռքերով տալ դրանք Ադրբեջանին՝ կնշանակեր Արևելքում մեր ամբողջ քաղաքականությունը միանգամայն կեղծ երանգ հաղորդել: Դա կխախտեր մեր քաղաքականության մասին պատկերացումը՝ որպես միանգամայն անաչառ և օբյեկտիվ»¹: Այնուհետև ընդգծելով, որ հենց դրա համար է վիճելի վայրերը ուսական գործառններով գրավելու և դրանք ուսական օկուպացիոն իշխանություններին ենթարկելու որոշում կայացվել, որպեսզի այդ տարածքները չտրվեն ոչ Ադրբեջանին և ոչ էլ Հայաստանին, մինչև որ բարենպաստ քաղաքական իրադրություն կստեղծվի և հնարավորություն կառաջանա խաղաղ ու բոլորին բավարարող ելք գտնել, Չիչերինն ավելացնում է, թե մինչև հիմա մեր գործերի կողմից գրավված են միայն Շուշին և Ջեբրայիլը, իսկ «այսպես կոչված վիճելի տարածքների մեծագույն մասը գտնվում է Հայաստանի Հանրապետության ձեռքին: Թուրքերի հարձակումը² հարկադրում է մեզ հրաժարվել այդ պլանի հետագա իրագործումից: Հանրապետության Ռազմահեղխորհուրդը վճռականապես հայտարարում է մեր գործերով որևէ նոր տարածքներ գրավելու անհնարինություն մասին: Թուրքական վտանգը հարկադրում է մեզ սահմանափակվել արդեն ունեցածի պաշտպանությունը՝ նկատի ունենալով գլխավորապես Բաքվի պաշտպանությունը: Մերն ուժերն այնտեղ անբավարար են, որպեսզի գրավենք նոր տարածքներ և շարժվենք Հայաստանի խորքը: Այսպիսով պարզ է, որ մենք ստիպված ենք սահմանափակվել մեր կողմից արդեն գրավված տարածքների օկուպացիայով և հրաժարվել Հայաստանի որևէ նոր մասեր գրավելուց՝

թեկուզև որակված որպես վիճելի»¹: Լենինին ուղարկած Չիչերինի այս նամակը ուղագրավ է նաև այն առումով, որ նրանում հստակ կերպով ներկայացված է նաև Հայաստանի հետ պայմանագիր կնքելու անհրաժեշտությունը՝ առանց սակայն հայ-ադրբեջանական սահմանագծումը նախապես իրականացնելու: «Հայաստանի գերիշխանությունը տակ գտնվող տարածքների հետագա օկուպացումից ձեռնպահ մնալը կհեշտացնի վերջինիս հետ պայմանագրի կնքումը, - ասված է նամակում: - Հայկական պատվիրակությունը ոչ մի կերպ չցանկացավ համաձայնել կամավոր կերպով ուսական օկուպացիայի հանձնելու Հայաստանի տիրապետության տակ գտնվող տարածքները, բացի Ղարաբաղի օկրուգից: Միայն ռազմական ստատուս-քվոյի հիման վրա կարելի է Հայաստանի հետ պայմանագրի կնքման հույս ունենալ, որն անհրաժեշտ է հանուն Անդրկովկասում մեր խաղաղարար քաղաքականության իրագործման: Այսպիսով, ամեն ինչ խոսում է այն մասին, որ մենք պետք է հրաժարվենք այնտեղ որևէ այլ տարածքներ գրավելուց, բացի արդեն գրավածից»²:

Ինչպես տեսնում ենք, Չիչերինը ճիշտ էր հասկացել Ադրբեջանի ղեկավարության իրական նպատակները և փորձում էր դրանում համոզել նաև Լենինին՝ նրա միջոցով ազդելու Ռուսաստանի կովկասյան քաղաքականության վրա: Դժբախտաբար, ո՛չ կառավարության և ո՛չ էլ ՌԿ(Բ)Կ Կենտկոմի քաղքյուրոյի կազմում Չիչերինի պես մտածողներ համարյա չկային (Չիչերինը քաղքյուրոյի անդամ չէր): Ինչ վերաբերում է Կովկասում գործող բոլշևիկ ղեկավարներ Օրջոնիկիձեին և Կիրովին, ապա սրանք թեև հասկանում էին ադրբեջանական ղեկավարության ազգայնական նկրտումների ներքին ծալքը, բայց ղեկավարվելով «դասակարգային համերաշխություն» սկզբունքով, պաշտպանում էին Ադրբեջանին, ինչն ավելի ու ավելի անպատկառ էր դարձնում Նարիմանովի խմբին ու նպաստում Չիչերինի վրա ճնշում գործադրելուն: Դա այնքան բացահայտ էր արվում, որ զգացել էին նաև հայ պատվիրակները: Հուլիսի 1-ին Երևան ուղարկած հեռագրում Շանթը նշում էր, թե «միակ դժվարությունը Ադրբեջանի սահմանն է. որովհետև Բաքվից ամեն կերպ աշխատում են խանգարել պայմանագրի կնքումը: Սորհրդային կառավարությունը ընդունում է մեր պահանջները իրավացի, չի փափագում գոհացում տալ Սորհրդային Ադրբեջանի և հայ բոլշևիկների բոլոր բաղձանքներին, այնուամենայնիվ, վերջիններիս

¹ Բանբեր Հայաստանի արխիվների, 1993թ., N 1-2, էջ 225:

² Այդ օրերին Մոսկվայի հեռագրել էր, թե թուրքական մի գործառն շարժվում է դեպի Նախիջևան:

¹ Բանբեր Հայաստանի արխիվների, 1993թ., N 1-2, էջ 226:

² Նույն տեղում:

համառ պնդումների ազդեցություն տակ պայմանագրի կնքումը դանդաղում է»¹:

Հ. Տերտերյանը ևս իր հուշերում նախնական համաձայնությունից Չիչերինի աստիճանական նահանջը և ի վերջո բանակցությունների խզումը՝ դրանց երևան փոխադրելու պատրվակով, բացատրում է Ադրբեջանի ղեկավարության գործունեությանը: Նա գրում է, որ երբ Չիչերինը տեղեկացավ Ադրբեջանի պահանջների մասին, իրենց ներկայությունը ջղայնացած բացականչեց. «Օհ՛օ, Ջուլֆան ու Նախիջևանն էլ են ուզում, շատ են երես առել»²: Երես առնելու և առավելագույն պահանջներ առաջ քաշելու մասին ուշադրավ տեղեկություն կա նաև ՀՀ արտգործնախարարության N-12 տեղեկագրում.

«Ադրբեջանի ներկա քաղաքականության գլխավոր ուշադրությունը ուղղված է դեպի ոռու-հայկական բանակցությունները, - ասված է նրանում: - Ամենահեռավոր և թույլ հավանականությունը, որ Ղարաբաղը և Ջանգեզուրը կարող են անցնել Հայաստանին, ոտքի է հանում ամբողջ Ռևուլյուցիոն և թուրքական ակտիվ շրջանակները:

Նրանք ամեն կերպ աշխատեցին և աշխատում են խանգարել ոռու-հայկական դաշնագրի ստորագրումը՝ հատուկ պատվիրակներ ուղարկելով Մոսկվա, չտապեցրին Ջանգեզուրի գրավումը՝ նպատակ ունենալով Նախիջևանի, Ծարուրի և Սուրմալուի վրայով միանալ տաճկական ուժերի հետ: Իսկ Մոսկվայի կոմունիստները նույն ծրագրի իրագործումը պատճառաբանում են «Կարմիր Անատոլիայի» հետ միանալու անհրաժեշտությունը:

Մոսկվայում իրենց տեսակետները պաշտպանելու համար բացի իրեն՝ Հուսեյնովից (որն արդեն վերադարձել է Բաքու) ուղարկել են մի հատուկ պատվիրակություն, որի մեջ մտնում են գլխավորապես ոչ կոմունիստ տարրեր՝ Մամադ Հասան Հաջինսկու նախագահությամբ: Այդ պատվիրակության գլխավոր նպատակն է պահանջել Մոսկվայում իրենց տերիտորիալ ծրագրի իրագործումը՝ պատճառաբանելով, որ Ադրբեջանի մուսուլմանության համակրանքը գրավելու միակ միջոցն այն է, որ Ադրբեջանին միացվեն ոչ միայն Ղարաբաղն ու Ջանգեզուրը, այլև Նախիջևանը, Ծարուրը և Սուրմալուն»³:

Առանց Օրջոնիկիձեի օգնության Լեզրանը որևէ հաջողության չէր կարող հասնել: Դա քաջ գիտակցում էր Չիչերինը: Դրա համար Լեզ-

րանին գործուղելով Հայաստան, նա միաժամանակ մեկը մյուսի հետևից հեռագրեր է ուղարկում Օրջոնիկիձեին, հիմնավորում Հայաստանի հետ պայմանագրի կնքման անհրաժեշտությունը, խնդրում ազդել Բաքվի ղեկավարության վրա, չափավորել նրանց պահանջները: Հուլիսի 2-ին՝ Վլադիկավկազում գտնվող Օրջոնիկիձեին հասցեագրած ձեպագրում Չիչերինը գրում է. «Մեզ անհրաժեշտ է կոմպրոմիսի հասնել հայկական դաշնակցական կառավարության հետ: Մինչդեռ Ադրբեջանական կառավարությունը վիճելի է հայտարարում ոչ միայն Ղարաբաղն ու Ջանգեզուրը, այլև Ծարուր-Գարալագյազի գավառը: Վերջինս երբեք ոչ մեկի կողմից վիճելի չի հայտարարվել և նույնիսկ մուսավաթական կառավարությունը միշտ այն համարել է Հայաստանինը: Առանց նրա Հայաստանից համարյա ոչինչ չի մնում»²: Այնուհետև նշելով, որ Ծանթի պատվիրակությունը երկար դիմադրությունից հետո համաձայնել է վիճելի հայտարարել Ղարաբաղն ու Ջանգեզուրը, բայց ոչ երբեք Ծարուր-Գարալագյազը, Չիչերինը շարունակում է. «Մյուս կողմից մեզ անհրաժեշտ է համաձայնություն գալ ադրբեջանական կառավարության հետ, որպեսզի Հայաստանի հետ մեր պայմանագիրը Ադրբեջանի պահանջների հետ հակասության մեջ չլինի: Նկատի ունենալով Բաքվում Ձեր հսկայական ազդեցությունը, խնդրում ենք Ձեզ օգտագործել այն, որպեսզի ստանանք ադրբեջանական կառավարության համաձայնությունը վիճելի հայտարարելու Ղարաբաղը և Ջանգեզուրը, բայց ոչ Ծարուր-Գարալագյազի գավառը»³:

Ինչպես տեսնում ենք, Չիչերինը նույնիսկ փորձում է շոյել Օրջոնիկիձեի փառասիրությունը՝ խոսելով Բաքվում նրա «հսկայական ազդեցության» մասին, միայն թե հաջողվի ազդել Ադրբեջանի ղեկավարության վրա՝ հրաժարվելու Հայաստանի նկատմամբ ագրեսիվ նկրտումներից: Ճեպագրի այս մասում Չիչերինը կարծես թե չըջանցում է Նախիջևանի հարցը, Ծարուր-Գարալագյազի հետ մեկտեղ չի հիշատակում Նախիջևանի անունը՝ ստեղծելով տպավորություն, թե նա չի ուզում բացորոշ արտահայտել իր վերաբերմունքը այդ գավառի պատ-

¹ «Մշակ», 17 Հուլիսի 1920թ.:

² «Հայրենիք» ամսագիր, Բոստոն 1954թ., թիվ 2, էջ 15:

³ ՀԱԱ, Ֆ. 200, ց. 1, գ. 607, թ. 31-32:

¹ Փաստաթուղթը թվագրված է Հունիսի 2-ով և այդպես էլ այն ներկայացված է փաստաթղթերի և նյութերի ժողովածուներում: Մինչդեռ նրա բովանդակությունից դժվար չէ գուշակել, որ պետք է լինի Հուլիսի 2 (թուրքական ջոկատները Նախիջևանի մոտ հայտնվել են Հունիսի վերջին օրերին, Ջանգեզուրը վիճելի ճանաչելու վերաբերյալ Ծանթի պատվիրակությունը իր համաձայնությունը տվել է Ս. Տեր-Գաբրիելյանի հետ հանդիպման ժամանակ Հունիսի վերջին օրերին և այլն):

² РГАСПИ, ф. 85, оп. 13, д. 32, л. 1-2.

³ Նույն տեղում:

կանելիություն խնդրում: Սակայն ճեպագրի վերջնամասից դժվար չէ կոահել, որ նա մտադիր չէր հագուրդ տալ Նարիմանովի խմբի նկրտումներին և վիճելի հայտարարել նաև այդ գավառը: «Միաժամանակ մեր ռազմական ուժերի անբավարարությունը և Նախիջևանի մոտ մեզ սպառնացող թուրքական ջոկատների հայտնվելը (հարկադրում են մեզ) հրաժարվել մեր զորամասերով Հայաստանի Հանրապետության գրադեցրած ինչ-որ նոր տարածքներ գրավելու մտքից, - ասված է ճեպագրում: - Մեր զորքերը տիրում են Շուշին և Ջերբախը, մենք հարկադրված եղանք հրաժարվել Նախիջևանը և Ջուլֆան գրավելուց: Մատնանչեք Ադրբեջանի կառավարությունը, որ մենք անհրաժեշտաբար հարկադրված ենք սահմանափակվել Շուշու և Ջերբախի գրավումով և փաստորեն հնարավորություն չունենք մեր զորքերն ավելի առաջ չարժելու: Դա անառարկելիորեն հաստատված է Հանրապետության ռազմահեղափոխական խորհրդի կողմից: Խնդրում եմ հայտնել Բաքվի կառավարությանը մեզ համար ներկայումս Նախիջևանը և Ջուլֆան գրավելու անհնարինություն մասին և մատնանչեք օբյեկտիվ պատճառները, որոնք հարկադրում են մեզ սահմանափակվել ռազմական ստատուս-քվոյով»¹ (ընդգծումը մերն է - է. Զ.):

Չիչերինյան այս տողերում ուշագրավը նախ այն է, որ նա թուրքական ջոկատներին դեռևս չի համարում դաշնակից ուժեր և հետո՝ Նախիջևանի ու Ջուլֆայի գրավումը համարում է ռազմական ստատուս-քվոյի խախտում: Այլ կերպ ասած Չիչերինն այդ տարածքները համարում է Հայաստանի Հանրապետության մաս:

Թե որքան մեծ կարևորություն էր տալիս Չիչերինը Հայաստանի հետ փոխդիտմային համաձայնություն հասնելուն և այդ խնդրում Օրջոնիկիձեի դիրքորոշմանը, վկայում է թեկուզ այն փաստը, որ հաջորդ օրը՝ հուլիսի 3-ին, դարձյալ դիմում է Օրջոնիկիձեին, խնդրում օգտագործել իր ազդեցությունը՝ համոզելու Ադրբեջանի ղեկավարությանը վիճելի ճանաչել միայն Ղարաբաղը և Ջանգեղուրը և «չդիպել» մյուս տարածքներին՝ Նախիջևանին, Շարուր-Ռարայագյազին, Օրդուբադին և Ջուլֆային: Իսկ հուլիսի 4-ին գործի մեջ է ներքաշում նաև Վրաստանում ՌԽՖՍՀ լիազոր ներկայացուցիչ Ս. Կիրովին: Վերջինիս տեղեկացնելով այն մասին, որ Հայաստանի հետ պայմանագրում ամենաէական կետերն են լինելու Ադրբեջանի հետ սահմանագծման, Թուրքա-Հայաստանի սահմանների և Հայաստանում կոմունիստների դրու-

թյան հարցերը, միաժամանակ ավելացնում է. «Հայկական պատվիրակությունը համաձայն է վիճելի ճանաչելու Ղարաբաղը և Ջանգեղուրը, բայց բացարձակապես հրաժարվում է վիճելի համարել Շարուր-Ռարայագյազի (գավառը), Նախիջևանը, Օրդուբադը և Ջուլֆան: Մեզ անհրաժեշտ է այդ հարցում համաձայնություն գալ և՛ Հայաստանի, և՛ Ադրբեջանի հետ: Հայերը հաստատում են, որ նույնիսկ մուսավաթականները երբեք չեն հավակնել այդ մարզերի վրա, ըստ որում նարիմանովյան կառավարության ներկայիս հավակնությունների ծայրակետը գտնվում է հենց էրիվանի մոտ»¹ (ընդգծումը մերն է - է. Զ.):

Չիչերինը տեղեկացնում է Կիրովին, որ ինքը հեռագիր է ուղարկել Օրջոնիկիձեին՝ խնդրելով ազդել Բաքվի կառավարության վրա սահմանափակվելու Ղարաբաղը և Ջանգեղուրը վիճելի հայտարարելով, բայց պատասխան դեռ չի ստացել: «Դուք Օրջոնիկիձեի հետ կապի մեջ եք, խնդրում եմ հաղորդեք նրան մեր խնդրանքը, - գրում է Չիչերինը և ավելացնում, թե մատնանչեք Օրջոնիկիձեին, որ նրա երկարատև լուծությունը երբեմն ողբերգական վիճակներ է ստեղծում»²:

Չենք կարող ընթերցողի ուշադրությունը չհրավիրել մի էական տարբերության վրա, որ առկա է Կիրովին ուղարկած ճեպագրում: Բանն այն է, որ Օրջոնիկիձեին հղած բոլոր գրություններում Ադրբեջանի ազդեցիվ նկրտումները չբավարարելու երկու հիմնական պատճառ էր նշում. 1. Հայկական պատվիրակությունը վիճելի է համարում միայն Ղարաբաղը և Ջանգեղուրը, 2. Նորանոր տարածքների գրավման համար անհրաժեշտ ուժերի բացակայությունը: Մինչդեռ Կիրովին ուղարկած ճեպագրում Չիչերինը մի նոր պատճառ էլ էր առաջ քաշում. դա համաշխարհային քաղաքականությունն է: «Բաքվի ընկերները պետք է հաշվի նստեն ներկա պահին ուժերի հարաբերության և համաշխարհային կոնյունկտուրայի հետ, - գրում է Չիչերինը: - Ընդհանրապես կովկասյան ընկերներին պետք է մշտապես մատնանչել համաշխարհային քաղաքականության նկատմամբ առաջնային բնույթը և Ռուսաստանյան Հանրապետության գոյության հիմնական պահանջ-մոլեքները, իսկ առաջնային պահանջների համեմատ մյուս երկրորդայինները կարող են իրականացվել միայն առաջինների բավարարմանը զուգընթաց»³ (ընդգծումը մերն է - է. Զ.):

Ինչո՞ւ Չիչերինն այս խնդիրների մասին Օրջոնիկիձեին չի գրում,

¹ „Геноцид армян...“, стр. 86.

² Տե՛ս նույն տեղում:

³ Նույն տեղում:

¹ Նույն տեղում:

ինչո՞ւ էր կովկասյան ընկերներին լուսավորելու գործը դնում Կիրովի վրա, որն ընդամենը դեռ պանի կարգավիճակ ուներ, և ոչ կովկասյան գործերը տնօրինողի՝ Օրջոնիկիձեի: Սրանք հարցեր են, որոնց պատասխանը միայն Չիչերինը կարող է տալ: Փաստորեն անհայտ է մնում նաև այն հարցը, թե Հայաստանի հետ պայմանագրի կնքման կապակցությամբ առաջ քաշելով համաշխարհային քաղաքականությունն առաջնահերթությունները հաշվի առնելու գաղափարը, նա նկատի ուներ միայն «Ռուսաստանյան հանրապետություն գոյություն պահանջում ենք» թե՞ նաև Հայկական հարցը, որը վաղուց միջազգային դիվանագիտության հարց էր դարձել: Ինչ վերաբերում է Չիչերինի՝ Կիրովին տված հանձնարարականին, ապա Կիրովը կատարել է իր վերադասի հանձնարարականը, թեև այդ բանը նա արել է որոշ ուշացումով: Յու. Բարսեղովի խմբագրությամբ հրատարակված փաստաթղթերի ժողովածուում տեղ է գտել Կիրովի՝ հուլիսի 17-ով թվագրված մի հեռագիրը Օրջոնիկիձեին, որում բառացիորեն ասված է. «Չիչերինը շատ է խնդրում հակել ադրբեջանական ընկերներին չափավորելու իրենց հավակնությունները Հայկական հարցում: Նա, ըստ երևույթին, հակված է վիճելի ճանաչել Ղարաբաղ-Չանգեզուրը. Նախիջևանի գավառը, Օրդուբադը գիջել հայերին: Չիչերինը բազմիցս ընդգծում է այդ հարցը շուտով լուծելու անհրաժեշտությունը»¹:

Մենք վերը տեսանք, որ Չիչերինն իր կարծիքը շատ հստակ էր արտահայտել՝ վիճելի ճանաչել միայն Ղարաբաղը և Չանգեզուրը, մինչդեռ Կիրովը որոշ չափով փոխում է երանգը՝ օգտագործելով «ըստ երևույթին» բառակապակցությունը: Իսկ Օրջոնիկիձեին դուր չէին գալիս Չիչերինի համառ պնդումները. դա երևում է բոլոր այն գրություններից, որ այդ օրերին նա հասցեագրել է Լենինին և Ստալինին: Դրանց մի մասին դեռ կանգնադրանք, իսկ այստեղ մեջբերենք միայն մեկը, որում բացորոշ արտահայտում էր իր դժգոհությունը Չիչերինի նկատմամբ և խնդրում Ստալինին աջակցել իրեն: Ն. Ալելուևային ուղարկած հեռագրում նա գրում է. «Որտե՞ղ է ներկա պահին Ստալինը: ...Ինձ շատ է հետաքրքրում, և ընդհանրապես մեզ բոլորիս, նրա կարծիքը այդ հարցի վերաբերյալ: Թեև մենք գիտենք, որ այդ ամենը նրան քիչ է հետաքրքրում: Հաղորդեք նրան, որ Չիչերինը և Կարախանը նորից ինձ այստեղ անելանելի դրություն մեջ են դնում: Նրա պատասխանը հաղորդեք մինչև իմ մեկնումը»² (ընդգծումը մերն է - է. Ջ.):

Կարծում ենք, Օրջոնիկիձեին պատահական չէ Չիչերինի հետ մեկտեղ հիշատակել նաև Կարախանի անունը՝ քաջատեղյակ վերջինիս նկատմամբ Ստալինի վերաբերմունքին: Ինչևէ, ահա այն պատասխանը, որ ուղարկել է Ստալինը հուլիսի 8-ին. «Իմ կարծիքն այսպիսին է, որ չի կարելի անվերջ խուսանավել կողմերի միջև, անհրաժեշտ է որոշակիորեն պաշտպանել կողմերից մեկին, տվյալ դեպքում, իհարկե Ադրբեջանին Թուրքիայի հետ: Ես խոսել եմ Լենինի հետ, նա չի առարկում»¹ (ընդգծումը մերն է - է. Ջ.):

Թե որքան կողմորեր Ստալինի այս կարծիքը Նարիմանովի խմբին և բոլոր նրանց, ովքեր վիճելի տարածքների հարցում միանշանակ հակահայկական դիրքորոշում ունեին, դժվար չէ հասկանալ: Ամեն դեպքում, ինչպիսի որակում էլ որ չտանք Ադրբեջանի ղեկավարություն վարքագծին՝ ուսու-հայկական բանակցությունները ձախողելու գործում, մի բան այնուամենայնիվ պետք է արձանագրենք. նա հասավ իր նպատակին, կանխեց պայմանագրի ստորագրումը, որով կկարգավորվեին հայ-ռուսական հարաբերությունները և գուցե վերջ գտնեին հանրապետության սահմանների վրա տեղի ունեցող բախումները:

Սակայն կար մի ուրիշ պատճառ ևս, որի մասին ո՛չ Շանթը, և ո՛չ էլ Տերտերյանը այդ օրերին իմանալ չէին կարող: Խոսքը քեմալական Թուրքիայի մասին է, որի տարածքային հավակնությունների մասին մինչ այդ Չիչերինը պատկերացում չուներ (դա պարզ երևում է հունիսի 3-ին Անկարա ուղարկած նրա նամակից) և կարծում էր, թե Արևմտյան Հայաստանի որոշ շրջաններ Հայաստանի Հանրապետությանը հանձնելու միջոցով հնարավոր կլինի լուծել Թուրք-հայկական կնճիորը: Հուլիսի 4-ին նրա այդ հույսերը ի դերև ելան. այդ օրը Մոսկվայում ստացվեց Անկարայի կառավարության արտգործկոմիսար Բեքիր Սամի բեյի նամակը, որտեղ առաջին անգամ պաշտոնապես տեղեկացվում էր, որ իր կառավարությունը ընդունում է Ռուսաստանի միջնորդությունը հայ-թուրքական կնճի հարցում, բայց միաժամանակ ավելացվում էր, որ սահմանադատման հարցում իրենք կանգնած են Բրեստ-Լիտովսկի և Բաթումի պայմանագրերի սկզբունքի վրա²: Իսկ դա նշանակում է, որ Անկարան ոչ միայն չի ցանկանում ոչ մի թիզ գիջել Թուրքա-Հայաստանից, այլև հավակնում է Հայաստանի Հանրապետության տարածքի շուրջ կեսին (Կարսի մարզին): Ուրեմն, Շանթի պատվիրակության հետ

¹ Նույն տեղում, էջ 99:

² Նույն տեղում, էջ 90:

¹ Նույն տեղում, էջ 92:

² Տե՛ս «Документы внешней политики (ДВП) СССР», т. 2, М., 1958, с. 556:

բանակցությունների շարունակումը դառնում էր անհեռանկար, հարկավոր էր հետաձգել այն, սպասել Անկարայի պատվիրակության Մոսկվա ժամանելուն (այդ մասին ևս հայտնվում էր Բեքիր Սամի բեյի նամակում) և նոր որոշել անելիքը: Հենց այդ օրերին էլ (ըստ Տերտերյանի՝ հուլիսի սկզբին) Ջիչերինը և Կարախանը նորից հայ պատվիրակներին հրավիրում են տեսակցության և կարճատև զրույցից հետո հայտնում, որ որոշվել է վիճելի համարվող տարածքների և հատկապես Ջանգեղուրի ազգաբնակչության կարծիքի ուսումնասիրման և նրանց ճակատագրի վերջնական լուծման նպատակով Բ. Լեգրանի գլխավորությամբ հատուկ պատվիրակություն գործուղել և ընդհանրապես բանակցությունները փոխադրել Երևան: Կարծում ենք, ընթերցողն էլ կընդունի, թե որքան կեղծ է հնչում «վիճելի համարվող տարածքների» կարծիքի ուսումնասիրման վերաբերյալ պատճառաբանությունը: Այդ ինչպե՞ս պետք է կարծիք ուսումնասիրվեր. արդյո՞ք հանրաքվեի միջոցով և ո՞վ դա պետք է աներ այնպիսի տարածքներում, որտեղ ազգամիջյան կոիվները այդպես էլ չէին դադարում: Որ Ջիչերինը անկեղծ չէր, դա հասկացան նաև հայ պատվիրակները, հասկացան ու դժգոհ մնացին, որ դրանով իսկ պայմանագրի ստորագրումը հետաձգվում էր անորոշ ժամանակով: Հետաքրքրությունից գուրկ չէ նաև այն փաստը, որ այդ օրերին Կովկաս ուղարկած և ոչ մի հեռագրում Ջիչերինը վերը նշված պատճառաբանությունը չի հիշատակում: Ի դեպ է նշել, որ հունիսի 29-ին Լենինին ուղարկած նամակում նա արդեն, ըստ էության, ներկայացրել էր բանակցությունները հետաձգելու առաջարկ: Խոսելով այն մասին, որ Հայաստանի հետ իսկապես անհրաժեշտ է հնարավորինս շուտ պայմանագիր կնքել, Ջիչերինը միաժամանակ ավելացնում է, թե վիճելի տարածքների հետագա օկուպացումից հրաժարվելը չի վերացնի պայմանագրի կնքման ճանապարհին եղած արգելքները, քանի որ «հայկական պատվիրակությունը ձգտում է նրան, որ մենք որոշենք, թե որտեղով է անցնում սահմանը Հայաստանի և Ադրբեջանի միջև, ինչը մեզ համար կնշանակեր այնտեղ ամեն մի տարածք անհապաղ Ադրբեջանին կամ Հայաստանին զիջելու անհրաժեշտություն: Մենք հիմա դա չենք կարող անել՝ մեկի կամ մյուսի նկատմամբ մեր քաղաքականությունը մեծագույն վնաս չպատճառելով: Դրա համար էլ մենք ստիպված կլինենք ամեն կերպ խուսափել Հայաստանի և Ադրբեջանի միջև սահմաններ հաստատելու պարտականությունից»¹ (ընդգծումը մերն է - է. Զ.):

Ասված է պարզ և հասկանալի. Սահմանները ճշտել չենք կարող, հետևապես բանակցությունները պետք է հետաձգել, ժամանակ չահել մինչև որ նպաստավոր պայմաններ կստեղծվեն խնդրի լուծման համար»: Եվ քանի որ Շանթի պատվիրակությանն այդքան երկար Մոսկվայում պահել չեն կարող, ուրեմն բանակցությունները պետք էր տեղափոխել Երևան: Այդ գաղափարը նամակում հստակ ձևակերպում չի ստացել, բայց նրա վերջին տողերը հանգեցնում են այդ մտքին: Անդրադառնալով քեմալականների հետ հարաբերությունների հարցին և մատնանշելով Անկարայում ներկայացուցիչ ունենալու անհրաժեշտությունը, Ջիչերինը գրում է. «Ներկայումս անհրաժեշտ է արագացնել նրա (էլիավայի - է. Զ.) մեկնումը: Ճիշտ այդպես էլ չպետք է հետաձգել ընկ. Լեգրանի մեկնումը: Այդ ընկերները կհետևեն իրադրությանը Անկարայում և Երևանում և այն ժամանակ մենք որոշում կընդունենք՝ իրադրության իսկական իմացություն հիման վրա: Ներկա պահին գլխավորը մեր ներկայացուցիչների շուտափույթ այնտեղ ժամանելն է»¹:

Լեգրանի առաքելությունը և մեզ հետաքրքրող խնդրում նրա դերքորոշումներին դեռ կանդրադառնանք, իսկ այստեղ ուզում ենք արձանագրել, որ Մոսկվայի բանակցությունները թեև չավարտվեցին պայմանագրի ստորագրումով, բայց դա չի նշանակում, թե դրանք բոլորովին անարդյունք էին և անհետևանք, ինչպես հաճախ հանդիպում ենք մեր պատմագիտական գրականության մեջ: Ո՛չ, այդ բանակցությունները կողմերին հնարավորություն տվեցին ծանոթանալու և պարզելու փոխադարձ դիրքորոշումները մի շարք հարցերում, այդ թվում մեզ հետաքրքրող Շարուր-Նախիջևանի պատկանելիության խնդրում: Հայկական կողմը համոզվեց, որ Մոսկվայի հակված չէ պաշտպանելու իր դաշնակցի՝ Խորհրդային Ադրբեջանի տարածքային բոլոր պահանջները: Եթե վերջինիս ճնշման տակ Գ. Ջիչերինի գլխավորած պատվիրակությունը նահանջեց իր սկզբնական դիրքորոշումից և Ղարաբաղի հարցում բռնեց Ադրբեջանի կողմը, իսկ Ջանգեղուրը հռչակեց վիճելի, ապա Նախիջևանի և Շարուր-Գարալազյազի խնդրում հաստատապես կանգնած մնաց Հայաստանի կողմում:

¹ Բանբեր Հայաստանի արխիվների, 1993, N 1-2, էջ 226:

¹ Նույն տեղում, էջ 227:

* * *

1920թ. ամռան սկզբին Հայաստանի Հանրապետության ռազմա-քաղաքական դրությունը դեռևս բավականին բարդ էր: Բոլշևիկների մայիսյան շարժումները¹ թեև ամբողջովին լիկվիդացվել էին, իսկ Կարմիր բանակի զորամասերն էլ հյուսիս-արևելքում հետ էին քաշվել Ադրբեջան (մայիսի վերջերին մտել էին Քարվանսարայի շրջան), սակայն հարավ-արևելքում նրանց առաջնադասումը շարունակվում էր: Ռուսական կառավարությունը բանակցություններ վարելով Շանթի պատվիրակության հետ՝ Հայաստանի և Ադրբեջանի միջև վիճելի հոչակված Լեռնային Ղարաբաղի, Ջանգեղուրի, Նախիջևանի հարցի լուծման շուրջ, միաժամանակ Ադրբեջանում գտնվող 11-րդ կարմիր բանակի միջոցով աստիճանաբար օկուպացնում էր այդ նույն վիճելի տարածքները՝ ազգամիջյան ընդհարումներին վերջ տալու շինծու պատճառաբանությամբ: Ոստիկան և զործի կատարյալ հակասություն. Մոսկվայում ասում էին մի բան, տեղերում կատարում մեկ այլ բան: Բաքվի ղեկավարությունն էլ, օգտվելով առիթից, գրավված տարածքները հռչակում էր Ադրբեջանի մաս:

Հանգիստ չէր նաև Հանրապետության արևմտյան սահմանների վրա: Ճիշտ է, քեմալական Թուրքիան Գ. Չիչերինի միջամտությունից հետո ստիպված եղավ կանգնեցնել հունիսի սկզբի համար ծրագրված հարձակումը Հայաստանի վրա², բայց վտանգը դրանով չէր վերացել: Արևմտյան սահմանների հարևանությամբ տեղաբախված Թուրքական շուրջ 22 հազարանոց բանակը կազմ ու պատրաստ սպասում էր հարմար պահի՝ Հանրապետության տարածք ներխուժելու համար: Ճիշտ է նաև, որ Հայաստանի կառավարությունը, ինչպես հետագա դեպքերը ցույց տվեցին, ճշգրտված տեղեկություններ չունեն Թուրքական ուժերի իրական թվի ու հնարավորությունների մասին (կարծում էին, թե դրանց թիվը 5 հազարից ավելի չէ): Բայցևայնպես, Թուրք-քրդական հրոսակախմբերի հաճախակի հարձակումները և սահմանի

¹ Ադրբեջանի խորհրդայնացումով և աշխատավորների մայիսմեկյան ցույցերով ոգևորված՝ հայ բոլշևիկները մայիսին ապստամբություններ էին բարձրացրել Ալեքսանդրապոլում, Կարսում, Սարիղամիչում և մի շարք այլ վայրերում՝ հույս դնելով ոչ այնքան ապստամբական ուժերի, որքան 11-րդ կարմիր բանակի օգնության վրա:

² Քեմալական Թուրքիայի՝ Հայաստանի վրա հարձակման գարնանային նախապատրաստությունների և Գ. Չիչերինի միջամտության մասին մանրամասն տե՛ս է. Ա. Ջոհրաբյան, 1920թ., Թուրք-հայկական պատերազմը և տերությունները, Եր. 1997, էջ 18-41:

խախտումները Կարսի և Սուրմալուի հատվածում, առաջ էին բերում մշտական լարվածություն ու ստեղծում պատերազմական վիճակ: Հանրապետության կյանքի կնճռոտ հարցերի թվում էր նաև մուսուլմանաբնակ ապստամբ շրջանների հնազանդեցման խնդիրը, որոնց առկայությունը ոչ միայն ներքին անկայունության պատճառ էր դառնում, այլև արտաքին ուժերի միջամտության առիթ ծառայում: Ադրբեջանն ու Թուրքիան բացահայտորեն օգնում էին դրանց՝ ուղարկելով զենք, զինամթերք, ֆինանսներ, սպաներ ու ասկյարներ, և նաև ամեն առիթ օգտագործում միջազգային հանրության առաջ վարկաբեկելու Հայաստանի կառավարությանը, որն իբր մուսուլմանների նկատմամբ բռնության ու հալածանքի քաղաքականություն է վարում:

Այդպիսի պայմաններում էր հայտնվել Հայաստանի Հանրապետությունը 1920թ. մայիսի վերջին և հունիսի սկզբին: Անհրաժեշտ էր վճռական քայլեր ձեռնարկել ինչպես արտաքին վտանգը չեզոքացնելու, այնպես էլ Հանրապետության ներքին դրությունը կայունացնելու ուղղությամբ: Եվ Համո Օհանջանյանի կառավարությունը¹, գիտակցելով այդ հարցերի լուծման կարևորությունը Հանրապետության գոյապահպանության հարցում, ինչպիսի վճռականությամբ որ գործել էր մայիսյան օրերին, նույն վճռականությամբ հունիսին ձեռնամուխ եղավ ծառայած խնդիրների լուծմանը:

Երկրի ներքին դրության կայունացման համար կառավարությունը անհրաժեշտ էր համարում լուծել հետևյալ խնդիրները. 1. Վճռական գործողություններով հնազանդեցնել ադրբեջանական այն շրջանները (Ջանգիրասար, Վեդիրասար, Շարուր-Նախիջևան), որոնք 1919թ. հուլիս-օգոստոսին Ադրբեջանի և Թուրքիայի օգնությամբ ապստամբել էին և Հայաստանի իշխանությունը չէին ճանաչում, 2. Գրավել Ալաշ-կերտի հովիտը, բնակեցնել այն արևմտահայերով և դրանով իսկ հանրապետության մուսուլմանաբնակ շրջաններին զրկել Անատոլիայում բուն դրած քեմալական ուժերի հետ կապվելու և նրանից օգնություն ստանալու հնարավորությունից:

Երկրորդ խնդիրը Հայաստանն ինքնուրույն լուծել չէր կարող անհրաժեշտ չափով զենք, զինամթերք ու զորք չունենալու պատճառով և հույսը դրել էր Անտանտի տերությունների օգնության վրա՝ կարծելով, թե նրանք ևս պետք է չահագրգռված լինեն այդ խնդրում: Արդարաց-

¹ Կազմավորվել է 1920թ. մայիսի 5-ին: Ամբողջովին բաղկացած էր Հ.Յ.Գ. Բյուրոյի անդամներից, որի համար էլ հաճախ անվանվում էր բյուրո-կառավարություն:

վաճ էր այդ հույսը, թե՞ ոչ, կտեսնենք հետո: Ինչ վերաբերում է առաջին խնդրին, ապա Հայաստանի կառավարությունը այն, հատկապես Հունիսյան համընդհանուր գորահավաքից հետո, սեփական ուժերով կարող էր լուծել: Ավելի ճիշտ կլինի ասել՝ պարտավոր էր լուծել, քանի որ հանդուրժել այդ վիճակը այլևս չէր կարելի: Դա միմիայն ներքին հարց չէր, երկրում կարգն ու խաղաղությունը վերականգնելու հարց չէր, այլև արտաքին՝ օտարի աչքում թույլ ու անկազմակերպ պետություն համբավ չվաստակելու հարց էր: Մի հանգամանք, որը Սևրի պայմանագրի ստորագրման նախօրեին առանձնակի կարևորություն էր ստանում:

Զանգիբասար (ներկայիս Մասիսի շրջանը) էր անվանվում Զանգու գետի ստորին հոսանքում (Երևանի մոտ գտնվող Չարբախ գյուղից մինչև Արաքս գետը) ընկած հարթավայրային ընդարձակ տարածքը, որը ոռոգվում էր Զանգուի ջրերով: 17-րդ դարի սկզբին Շահ Աբբասի կողմից Արարատյան դաշտավայրի հայ բնակչության բռնի գաղթեցումից հետո ժամանակի ընթացքում Իրանի հյուսիսային շրջաններից (Ատրպատական) այստեղ էին թափանցել մահմեդական տարրեր, որի հետևանքով կազմավորվել էին չուրջ 15 թաթարաբնակ (աղբրեջանաբնակ) գյուղեր:

Երևանից ընդամենը մի քանի կմ հեռավորություն վրա գտնվող Զանգիբասարը օսմանյան զորքերի հետ քաշվելուց հետո դարձել էր թուրք-աղբրեջանական էմիսարների հավաքատեղի, չէր ճանաչում Հայաստանի իշխանությունը, բացահայտ գինվում էր, հաճախ փակում ճանապարհները, վնասում երկաթգիծը և այլն: Հայաստանի Հանրապետության մուսուլմանաբնակ ազգաբնակչության՝ 1919թ. հուլիս-օգոստոսյան համընդհանուր ապստամբությունից հետո Աղբրեջանի կառավարությունը ոչինչ չխնայեց Զանգիբասարը Վեդիբասարի հետ մեկտեղ Շարուր-Նախիջևանի թրքությունից առաջապահ ջոկատի վերածելու ուղղությամբ: Զենքը և գինամթերքը Նախիջևանից էին ստանում, իսկ ֆինանսները՝ Բաքվից:

Աղբրեջանում խորհրդային կարգերի հաստատումը բնավ չազդեց զանգիբասարցիների հակահայկական դիրքորոշման վրա: Ավելին, բոլշևիկների մայիսյան ապստամբությունների ժամանակ կրկին հայտարարեցին Երևանի կառավարությանը չենթարկվելու իրենց որոշման մասին և սկսեցին բացահայտորեն օգնել ապստամբներին (պայթեցրին երկաթգիծը՝ զորքերի տեղաշարժը խոչընդոտելու նպատակով և այլն): «Զանգիբասարցիների հանդեպությունը և թշնամությունը մանավանդ զորեղացավ Հայաստանում մայիս ամսին տեղի ունեցած

դեպքերի ժամանակաշրջանում, - ասված է Զանգիբասարի մասին Հունիսի 23-ի կառավարական հաղորդագրության մեջ, - երբ նրանք բացարձակորեն օգնում էին խռովարարներին, նյութում էին ամեն տեսակի խոչընդոտներ Ալեքսանդրապոլ ուղարկած կառավարական զորքերի դեմ, վնասելով երկաթուղային գիծը և կամուրջները: Մյուս կողմից՝ նրանք տենդորեն գինվում էին և կազմակերպում էին մարտիկ խմբեր՝ ղեկավարությամբ թուրք-աղբրեջանական սպանների»¹: Մայիսի 13-ին նրանք հանկարծակի հարձակվեցին Վարմազիար, Ջաֆարաբադ և Փարաքար գյուղերի վրա և Փարաքարից տարան 8 լծկան եզ²: Հանդուրժել նման իրավիճակը, հատկապես բոլշևիկյան շարժումները ճնշելուց հետո, այլևս չէր կարելի: Հունիսին կառավարությունը որոշեց վերջ տալ այդ անբնական վիճակին և զանգիբասարցիներին առաջարկեց գինաթափվել, վերջ տալ թշնամությանը, ճանաչել Հայաստանի իշխանություններին, վճարել պետական հարկերը և այլն: Սակայն զանգիբասարցիները հարցը խաղաղորեն լուծելու կառավարության առաջարկը թողեցին անհետևանք: Այդ ժամ որոշվեց վճռական միջոցների դիմել, և Հունիսի 18-ին վերջնագիր ներկայացվեց՝ պատասխանի համար տալով 6 ժամ: Սակայն բացի Ուլուխանլուից (այժմ՝ Մասիս) մնացած գյուղերից պատասխան չստացվեց: Այլ ելք չէր մնում, քան գեների դիմել:

Զանգիբասարը ռազմական տեսակետից բավականին լավ էր ամրացված, թուրք սպանների և ասկյարների ղեկավարությամբ փորվել էին խրամատներ, ստեղծվել պաշտպանական ամրություններ: Հայկական բանակի շտաբի տվյալներով Զանգիբասարն ուներ չուրջ 4000 տեղացի մարտիկ, 600-800 ասկյար, 3 թնդանոթ և 8 զնդացիր³: Ռազմական գործողությունները սկսվեցին Հունիսի 19-ին և ավարտվեցին Հունիսի 21-ին, ինչը ևս խոսում է թշնամու ցուցաբերած համառ դիմադրության մասին: Իսկ թե ինչպես ընթացան մարտական գործողությունները, վկայաբերենք Զանգիբասարի օպերացիան իրակապարձ Վաղարշապատի զորախմբի հրամանատար գնդ Ա. Շահմազյանին.

«Հունիսի 19-ին Նորագավթի զորայունը ճեղքեց հակառակորդի դիրքերը Աղջա-Ղչլաղ - 425 բարձունք - 411 բարձունք ճակատի վրա և գրավեց Հաջի-էյլաղ գյուղը: Այսպիսով ողջ զանգիբասարյան

¹ «Մշակ», 4 հուլիսի 1920թ.:
² Տե՛ս «Նոր աշխատավոր», 23 մայիսի 1920թ.:
³ Տե՛ս «Հառաջ», 27 հունիսի 1920թ.:

դիրքերի բանալին խլվեց խոտվարարների ձեռքից, որով և Զանգիբասարի բախտը նախորոշվեց:

Փարաքարի գորաայունը գրավեց Գոյքիվմբեթ, Քելալի և Արբաթ գյուղերը: Ղարխունի գորաայունը գրավեց Թազա Ղարխուն գյուղը և ակտիվ գործողություններ վարեց Չոբան-Քեարա և Շոռլու-Մեխմանդար գյուղերի դեմ:

Հակառակորդը մաքրեց երկաթուղագծից Հյուսիս ընկած բոլոր գյուղերը, բացի Ղարաղչաղ, Շոռլու-Մեխմանդար և Չոբան-Քեարա գյուղերից և սկսեց փախչել դեպի Հարավ, երկաթուղագծի այն կողմը:

Ինձ Հանձնված գորախմբին հրամայեցի վերջնականապես մաքրել խոտվարարներից երկաթուղագծի Հյուսիսային կողմում ընկած գյուղերը՝ և հետո հարձակվել Հարավային գյուղերի վրա:

Հունիսի 20-ին մեր գորամասերը շարունակեցին հետապնդել խոտվարարներին: Հունիսի 21-ի լուսաբացին կարճ և վճռական կռիվից հետո գրավեցինք Սարաջալար գյուղը, որով և կատարվեց գորախմբին հանձնարարված խնդիրը»¹:

Զանգիբասարի հունիսյան կռիվների մասին մամուլում և արխիվներում այլ նյութեր էլ են պահպանվել, բայց, կարծում ենք, վերը ներկայացվածն էլ բավարար է թշնամական այդ որջի մասին ամբողջական պատկերացում կազմելու համար: Միայն ավելացնենք, որ որպես ռազմական ավար Հայերի ձեռքն անցան 2 թնդանոթ, 3 գնդացիր, մի քանի հազար փամփուշտ և այլ ռազմամթերք², թեև այս դեպքում կարևորը ոչ թե ռազմավարի քանակն է կամ թշնամու կենդանի ուժին հասցված վնասը, այլ այն բարոյահոգեբանական ու նաև քաղաքական նշանակությունը, որ ստանում է Զանգիբասարի ենթարկումը Հայաստանի իշխանություններին: Առավել ևս, որ ռազմավարի մասին մամուլում եղած տվյալները միչտ է, որ համընկնում են: Օրինակ, եթե «Մշակը» գրում է, թե 3 գնդացիր է անցել Հայերի ձեռքը, ապա «Ռազմիկը»՝ 4, իսկ «Ժողովուրդը»՝ 5: Այս վերջինը տվյալներ է հաղորդում նաև մեր կորուստների մասին. «մինչև այսօր մեր կորուստներն են. սպանված երկու սպա՝ Ղարիբյան և Քաջազնունի, 20 զինվոր, վիրավորված 7 սպա և 100 զինվոր: Թուրքերի կորուստները դեռ Հայտնի չեն: Ուրեմն մինչև այժմ թուրքերից խլված են ընդամենը երկու թնդանոթ, 150 ռումբ, 5 գնդացիր, մեծաքանակ փամփուշտի պաշար և

պարապ փամփուշտներ, որոնց ժողովելու համար այսօր երկաթուղով Հայ սկաուտներն ճանապարհվեցին Զանգիբասար»¹: Ավելացնենք նաև, որ կառավարությունն իր խոստման տերը եղավ և ապահովեց այն գյուղերի անվտանգությունը (օր. Ուլուխանլու), որոնք նախապես Հայտնի էին իրենց հպատակությունը: Բարյացակամություն դրսևորվեց նաև ապստամբ գյուղերի խաղաղ բնակչության նկատմամբ՝ ապահովության և անվտանգության երաշխիքներ տալով բոլոր այն մուսուլմանաբնակ գյուղերին, որոնք կհայտարարեին Հայաստանի կառավարությունը ճանաչելու մասին և կանցնեին խաղաղ աշխատանքի:

Զանգիբասարի և գրեթե նույն օրերին Կարսի գորախմբի ուժերով իրականացված Օլթիի գրավումը Հայրենասիրության մեծ վերելք առաջացրեց հանրապետությունում: Հասարակական-քաղաքական շրջաններում խոսում ու պահանջում էին զորքերն էլ ավելի առաջ չարժել, հպատակեցնել նաև Վեդիբասարը, Շարուր-Նախիջևանը, գրավել Ալաշկերտը և այլն: Սակայն կառավարությունը չէր կարող չզիտակեցել, որ թեև հունիսյան ընդհանուր գորահավաքը հնարավորություն էր տվել հանրապետական զորքերի թիվը որոշ չափով մեծացնել, բայց և այնպես սեփական ուժերով Թուրքա-Հայաստանի այս կամ այն տարածքի գրավումը առանց եվրոպական տերությունների օգնության ծանր և անկանխատեսելի հատևանքներ կարող էր ունենալ: Դա պարզ երևաց Օլթիի դեպքերից անմիջապես հետո, որոնց մենք մանրամասն չենք անդրադառնա, բայց մի փոքր անդրադարձ անհրաժեշտ ենք համարում՝ ընթերցողին որոշ պատկերացում տալու նպատակով:

Օլթիի գավառը նախկինում վարչականորեն մտնում էր Կարսի մարզի մեջ: Սակայն անգլիացիները, Կարսը տալով Հայաստանի Հանրապետությանը, Օլթիի գավառը անջատել էին նրանից՝ պատճառաբանելով, թե այն հիմնականում մուսուլմանաբնակ է: Հայաստանը չհասգրգռված էր Օլթիի հարցում, քանի որ այնտեղ քարածխի հարուստ պաշարներ կային, որոնք կարող էր ինչ-որ չափով մեղմել վառելիքային սուր ճգնաժամը: Հարկ ենք համարում նաև նշել, որ թեև Օլթիի վրա հարձակման համար առիթ ծառայեց հունիսի 18-ին թուրք-բրգական հրոսակախմբերի հայտնվելը Փանջուրեթ-Դորթ-Քիլիսի հատվածում, բայց ճշմարտությունն այն է, որ մինչ այդ Հայաստանի կառավարությունն արդեն որոշում ուներ Օլթիի քարածխի հանքերը գրավելու մասին և այդ միջադեպը պարզապես օգտագործեց նախապես ծրագրած

¹ Նույն տեղում:

² Տե՛ս «Մշակ», 4 հուլիսի 1920թ.:

¹ «Ժողովուրդ», 23 հունիսի 1920թ.:

հարձակումն իրագործելու համար: Ճիշտ էր վարվել արդյոք կառավարությունն Օլթին գրավելու որոշում կայացնելով՝ թե ոչ, դա ևս այստեղ քննարկելու հարց չէ: Ուղղակի նշենք, որ Հայաստանի կառավարությունը գտնում էր, որ Օլթիի չրջանի գրավումը չպետք է համարվի ագրեսիա, քանի որ մտնում էր Ռուսաստանի՝ 1914թ. սահմանների մեջ: Դրա համար էլ Օլթի մտնելուն պես Կարսի գործարարի հրամանատարությունը հեռագրով տեղեկացրեց Թուրքիայի արևելյան ճակատի հրամանատար Կարաբեքիր փաշային, թե հայկական զորքերը չեն անցնի 1914թ. սահմանը: Սակայն դա չհանգստացրեց թուրքերին և արդեն հունիսի 21-ին Կարաբեքիր փաշան՝ Հայկական բանակի հրամանատարությունն ուղղած հեռագրով, իսկ 24-ին Անկարայի կառավարությունն արտաքին գործոց կոմիսար Բեքիր Սամի բեյը՝ ՀՀ արտգործնախարարին հասցեագրած նոտայով, պահանջում են զորքերը դուրս բերել գրաված չրջաններից¹: Կողմերի միջև նոտաների փոխանակություն կատարվեց նաև հետագայում, բայց կոնֆլիկտը չհարթվեց. եթե հայկական կողմը իր գործողություններն արդարացնելու համար վկայակոչում էր 1914թ. սահմանները և Մուղրոսի գինադադարը, որով Թուրքիան պարտավորվել էր իր զորքերը հետ քաշել այդ սահմաններից արևմուտք, ապա թուրքերը վկայակոչում էին Բրեստ-Լիտովսկի և Բաթումի պայմանագրերը: Այդ է պատճառը, որ Օլթիի ղեկավարով ծայր առած սահմանային ընդհարումները, մերթ ժամանակավորապես հանդարտվելով, մերթ մեծապես բորբոքվելով, չարունակվեցին ընդհուպ մինչև թուրքական բանակի սեպտեմբերյան ընդհանուր հարձակումը: Այդ ընդհարումներին այստեղ իհարկե չենք անդրադառնա, բայց հարկ ենք համարում նշել, որ դրանք բավականին դաժան բնույթ են կրել և պետք է որ անհանգստացնեին Հայաստանի կառավարությանը ու բանակի հրամանատարությանը: Առավել ևս, որ Ջանգիրասարի և Օլթիի ղեկավարից կարճ ժամանակ անց պարզ դարձավ, որ քեմալական ղեկավարությունը, աջ և ձախ աղմկելով Հայաստանում մուսուլմանների նկատմամբ բռնությունների և քեմալական շարժման թիկունքին սպառնացող վտանգի մասին, սկսեց ակտիվ քայլեր ձեռնարկել ուսական Կարմիր բանակին ևս Հայաստանի դեմ ռազմական գործողությունների մեջ ներքաշելու, հանրապետությունը բոլոր կողմերից օղակելու ուղղությամբ: Արդեն հունիսի 27-ին Թուրքիայի արևելյան ճակատի հրամանատար Քյազիմ Կարաբեքիր փաշան հա-

¹ Տե՛ս ՀԱԱ, ֆ. 200, ց. 1, գ. 602, թ. 1:

տուկ նամակով դիմեց 11-րդ բանակի հրամանատարությունը՝ խնդրելով թուրքական բանակի հետ կապ հաստատելու նպատակով արագացնելու Ջանգիրուրի գրավումը: Թուրք հրամանատարը նման միջոցառման նպատակահարմարությունը պատճառաբանում էր նրանով, որ հայկական զորքերի կողմից Ջանգիրասարի և Օլթիի գրավման հետևանքով երկու բանակների միջև կապը կարող է խզվել: Անշուշտ դա կեղծ պատճառաբանություն էր, որովհետև բավական է նայել քարտեզին՝ համոզվելու համար, որ Արարատյան դաշտում գտնվող Ջանգիրասարը և Կարսից հյուսիս-արևմուտք ընկած Օլթին ուսական և թուրքական բանակների միջև կապի հաստատման գործում որևէ դեր ունենալ չեն կարող: Ուրեմն Կարաբեքիրին տվյալ ղեկավարում անհանգստացնողը ոչ թե կապի խզման վտանգն էր, այլ ուսական զորամասերին հնարավորինս շուտ հայերի հետ պատերազմի մեջ ներքաշելը: Դրա համար էլ Բայազեդում կանգնած թուրքական դիվիզիայի հրամանատարին կարգադրեց մի գործառն մտցնել Նախիջևան: Հուլիսի 2-ին 300 ասկյարներից բաղկացած մի գործառն մտավ Նախիջևան, որի ներկայացուցիչը շուտով հայտնվեց Շուշիում և դարձյալ առաջ քաշեց Նախիջևանի չրջանում երկու զորքերի միավորման խնդիրը: Սակայն Կարաբեքիրի ջանքերն այս անգամ իզուր անցան. հունիսի 30-ին ՌԿ(Բ)Կ Կենտկոմի Քաղբյուրոն քննության առնելով այդ հարցը, Հայաստանում ուսական զորքերի առաջխաղացումը կանգնեցնելու որոշում կայացրեց հետևյալ ուղադրով ձևակերպվածով. «Առաջարկել ընկ. Ջիչերինին հրահանգ տալ այն մասին, որ ուսական զորամիավորները առաջ չչարժվեն դեպի Հայաստան: Այդ կապակցությամբ ներշնչել կովկասյան ընկերներին կրկնապատկել զգուշությունը, խուսափելու համար թուրքական հարձակումը հրահրելուց»¹ (ընդգծումը մերն է - է. Զ.):

Ադրբեջանը ևս անմասն չմնաց հակահայկական հիստերիայից: Հուլիսի 6-ին Ադր. ԽՍՀ արտգործժողկոմ Հուսեյնովը, ՀՀ արտգործնախարար Օհանջանյանին (պատճենը՝ արտգործժողկոմ Ջիչերինին և Վրաստանում ՌՄՖՍՀ լիազոր ներկայացուցիչ Կիրովին) ուղղած նոտայում մեղադրելով Հայաստանին, որ նրա զորքերը «Ջանգիրասարը ջախջախելուց և այն մուսուլման գյուղացիությունից մաքրելուց հետո հարձակում են գործում Շարուր-Նախիջևանի չրջանի վրա» և որ հուլիսի 5-ին հարձակումներ են իրագործել նաև Ղազախի

¹ ՀՀ-ն 1918-1920թթ., փաստաթղթերի..., էջ 216:

զավառում, եզրափակում է. «...իմ կառավարությունը չի կարող այդ ամենը չդիտել որպես խորհրդային Ադրբեջանի դեմ ռազմական գործողությունների սկսում և պահանջում է հայկական զորամիավորումների կողմից ամեն մի հարձակման անհապաղ դադարեցում: Հակառակ դեպքում իմ կառավարությունը հարկադրված է արձանագրել, որ հուլիսի 2-ին կայացած համաձայնությունը¹ լուծարված է և իրեն ազատ կհամարի հետագա գործողություններում» (ընդգծումը մերն է - է. Ջ.):

Հուլիսի 6-ի դրությամբ ոչ Վեդիբասարի և ոչ էլ Շարուր-Նախիջևանի ուղղությամբ հայկական զորքերը որևէ չարժուճ չէին ձեռնարկել: Կեղծ էր նաև Ղազախի չրջանում հարձակման մասին նոտայում նշվածը, ինչը հիմնավոր ցույց է տրվում Հ. Օհանջանյանի Հուլիսի 7-ի պատասխան նոտայում³: Մնում է հետևություն անել, որ կա՛մ Ադրբեջանը Ձանգիբասարի նկատմամբ հավակնություն է ներկայացնում, կա՛մ էլ առիթն օգտագործում է խուսափելու Հուլիսի 2-ին կայացած համաձայնությունից և հրահրելու ու առաջ բերելու պատերազմ, ինչը հնարավորություն կտար նորանոր տարածքներ նվաճել, անշուշտ, ռուսական Կարմիր բանակի օգնությամբ: Բայց ինչպես և մայիսյան օրերին, այս անգամ էլ Մոսկվան հավանություն չտվեց Բաքվի տաք-գլուխների ազդեցիկ նկրտումներին: Հուլիսի 7-ին ՌԿ(Բ)Կ Կենտկոմի Քաղբյուրոն, անդրադառնալով Կովկասյան ճակատի ռազմահեղափոխական խորհրդի անդամների և Վրաստանում, Հայաստանում և Թուրքիայում խորհրդային դիվանագիտական ներկայացուցիչների համար Ձիչերինի մշակած հրահանգների նախագծին, որոշեց հաստատել այն: Նախագիծը բաղկացած էր 9 հոդվածներից, որոնցից 7-ը ուղղակի առնչվում են մեր թեմային: Նրանում ասված է. «Քանի որ մեր ռազմական դրությունը մեզ հնարավորություն չի տալիս ռուսական զորամասերով ամբողջությամբ գրավել Ղարաբաղը, Ձանգեղուրի գավառը, Նախիջևանը, Ջուլֆան, Շարուր-Դարալագյազի գավառը, ռուսական ռազմական իշխանությունները պետք է սահմանափակվեն զբաղեցնելով Հայաստանի և Ադրբեջանի միջև այն վիճելի տարածքներ-

րը, որոնք նրանց կողմից այժմ գրավված են, այսինքն՝ Շուշին և Ջերախլը՝ բացառելով այս կամ այն հարևան հանրապետության զորքերի միջամտությունը, ինչպես որ ռուսական կառավարությունը արդեն որոշել էր և հայտնել Կովկասի խորհրդային իշխանություններին: Ոչ մի ադրբեջանական և հայկական իշխանություններ նշված տեղերում չեն կարող թույլատրվել: Այդ տեղերում ռուսական զորամասերի խնդիրների մեջ պետք է մտնեն. ա) ընդհանուր կարգի պահպանումը, բ) թաթարների և հայերի միջև ընդհարումներ չթույլատրելը, ըստ որում հատուկ ուշադրություն պետք է դարձվի խառը բնակչությամբ շրջաններին, որտեղ նշված ազգություններից մեկը փոքրամասնություն է կազմում...»¹: Նախագիծում խոսվում է նաև այն մասին, որ ռուսական գինվորական հրամանատարությունը չպետք է միջամտի տեղական բնակչության կողմից վարչական մարմինների ստեղծման գործին, պետք է ազգաբնակչության մեջ բացատրական աշխատանք տանի այն մասին, որ ռուսական զորքերի կողմից վիճելի տարածքների գրավման նպատակը ազգամիջյան թշնամանքի վերացումն է, որ այդ տարածքների պատկանելիությունը այս կամ այն հանրապետությանը կորոշվի խառը հանձնաժողովի կողմից՝ Ռուսաստանի ներկայացուցչի մասնակցությամբ և որ «խառը հանձնաժողովը կղեկավարվի բնակչության ազգագրական կազմով ու նրա կամքով»²:

Ձիչերինի կազմած հրահանգների նախագծի տակ իր ստորագրությունը կղններ ամեն մի լրջախոս մարդ, բայց ոչ երբեք Նարիմանովի խմբի անդամները, որոնց ո՛չ բնակչության ազգագրական կազմն էր հետաքրքրում, ո՛չ էլ նրա կամքը: Միակ չափանիշը, որով նրանք ղեկավարվում էին, զենքի ուժով բոլոր վիճելի տարածքների գրավումը և Թուրքիայի հետ անմիջական կապի հաստատումն էր: Դրա համար էլ խուսափում էին ոչ միայն եռակողմ, այլև երկկողմ՝ հայ-ադրբեջանական կոնֆերանսի գումարումից, թեև Հուլիսի 10-ին և 11-ին կողմերի միջև նոտաների փոխանակություն կատարվեց քննարկվելիք հարցերի շուրջը, այն է՝ միմյանց նկատմամբ ազդեցիկ գործողությունների դադարեցում, ձեռքարկվածների (Ադրբեջանում դաշնակցականների և Հայաստանում՝ կոմունիստների) փոխանակում, վիճելի բոլոր հարցերի լուծում կոնֆերանսում և այլն: Բայց եթե Հայաստանը առաջարկում էր կոնֆերանսը գումարել Թիֆլիսում, ապա Ադրբեջանը պնդում էր

¹ Սուրբ Հուլիսի 15-ին հայ-ադրբեջանական կոնֆերանս գումարելու մասին էր, որտեղ պետք է քննարկվեին բոլոր վիճելի հարցերը: Հուսեյնովի հետ այդ համաձայնությունը կայացվել էր Թիֆլիսում Տ. Բեկդադյանի նախաձեռնությամբ և Ս. Կիրովի միջնորդությամբ:

² ՀԱԱ, Ֆ. 278, ց. 1, գ. 35, թ. 32:

³ Տե՛ս նույն տեղում, գ. 38, թ. 117:

¹ ՀՀ-ն 1918-1920թթ. փաստաթղթերի..., էջ 219-220:

² Նույն տեղում, էջ 220:

Ղազախի կամ Վլադիկավկազի վրա¹:

Ներքին և արտաքին ճակատներում պատերազմական դրուժյան առաջացումը, զենքի ու զինամթերքի սուր պակասը հարկադրեցին Հայաստանի կառավարությանը մի անգամ ևս օգնության խնդրանքով դիմել Անտանտի տերություններին: Հենց այդ նպատակն էին հետապնդում նախկին վարչապես Ալ. Սատիսյանի բանակցություններն Անդրկովկասում արևմտյան տերությունների ներկայացուցիչների հետ 1920թ. մայիս-հունիսին: Ֆրանսիայի գերագույն կոմիսար, գրաֆ դե Մարտելի հետ մայիսի 20-ին կայացած հանդիպումը առանձնակի հետաքրքրություն չի առաջացրել, ուստի դրան չենք անդրադառնա: Առավել հետաքրքիր է Բաթումի մարզի անգլիացի նահանգապետ գեն. Կուկ-Կոլլիսի հետ ունեցած նրա զրույցը, որը տեղի է ունեցել Բաթումում մայիսի 24-ին: Այն նաև սղագրվել է, որից և պարզ է դառնում, որ Սատիսյանը գեներալի առաջ իր կառավարության անունից երկու կարևոր հարց է դրել՝ 1. ուղղմական, 2. քաղաքական:

Առաջին հարցի մասին խոսելիս Սատիսյանը ներկայացրել է այն ծանր վիճակը, որ ստեղծվել է Հայկական բանակում զենքի և զինամթերքի պակասի պատճառով, և հայտարարել, որ «Հայկական բանակը դրանց սուր կարիքն է զգում և ամբողջովին կկորցնի մարտունակությունը, եթե ամենակարճ ժամանակամիջոցում դրանք չստանան: Մենք ունենք բավականաչափ երեքգծանի հրացան, բայց չունենք նրանց համար փամփուշտ: Ունենք 40 միլիոն Լեբելի փամփուշտ, բայց չունենք հրացան: Մինչդեռ 10 հազար Լեբելի հրացանը և ուսական երեքգծանու մի քանի միլիոն փամփուշտը մեզ հնարավորություն կտան ստեղծել նոր բանակ, որի ընդհանուր թիվը, ինչպես Լորդ Քերզոնն է նշել, կարող է հասնել 40 հազար մարդու»²:

Առավել տպավորիչ է եղել Սատիսյանի խոսքը քաղաքական իրադրության մասին. «Հայ ժողովուրդը անվեհեր ժողովուրդ է և երբեք գլուխը չի կորցնում: Բայց նա ուզում է ճշմարտությունն իմանալ. մտադի՞ր են դաշնակիցները իրական օգնություն ցույց տալ նրան, թե՞ ոչ: Չպետք է մոռանալ, որ մեր նկատմամբ դաշնակիցների ներկա անորոշ վերաբերմունքը Հայաստանում բոլշևիզմի պրոպագանդանը նպաստող գործոններից մեկն է: Այսպես օրինակ, անգլիացիների կողմից Բաթումից մեր երկու ինքնաթիռների դուսերման վրա դրած արգելքը, բոլշևիկներին հնարավորություն է տալիս հաստատելու, որ

դաշնակիցները ոչ միայն մտադիր չեն մեզ օգնելու, այլև ուղղակի խանգարում են: Եվ այդ կերպ նրանք համոզում են բնակչությանը, որ Հայաստանի ժողովուրդը և կառավարությունը պետք է կողմնորոշվեն բացառապես դեպի Սորհրդային Ռուսաստանը, որը միակն է, որ կարող է մեզ օգնել»³ (ընդգծումը մերն է - է. Զ.):

Ինչպես տեսնում ենք, Անգլիայի ներկայացուցչի առաջ Սատիսյանը հարցը դրել է պարզ ու հստակ, առանց դիվանագիտական սեթեթեթանքների. «Հայկական բանակը կորցնում է մարտունակությունը զենք և զինամթերք չունենալու պատճառով, Անգլիան ոչ միայն չի օգնում, այլև խանգարում է՝ Հայաստանի ինքնաթիռները արգելափակելով Բաթումում»: Սակայն որքան էլ տարօրինակ է, գեն. Կուկ-Կոլլիսը, մի կողմից համաձայնում է Սատիսյանի հարցադրումների հետ, մյուս կողմից դիվանագիտորեն խուսափում պարտավորեցնող պատասխան տալուց՝ մեկ վկայակոչելով այն, որ «զենք մատակարարելը իր ուժերից վեր է և իր իրավասության չըջանակներից դուրս է», մեկ այն, որ «Սան-Ռեմոյում ուղեղները դանդաղ են աշխատում, իսկ իրադարձություններն այստեղ խիստ արագ են ծավալվում», և վերջապես այդ ծանր խոսակցությունից գլուխը պրծեցնելու համար հայտարարում. «Ես գրում և ուղարկում եմ զեկուցագիր զեկուցագրի հետևից, բայց դրանք բոլորը մնում են անհետևանք: Դրա համար ես գտնում եմ, որ Դուք անձամբ պետք է տեսնվեք և խոսեք Կոնստանտինոպոլում Գերագույն կոմիսար ադմիրալ Դե-Ռորեկի հետ»²: Գործին չօգնեց նաև Սատիսյանի ակնարկը բոլշևիկների և թուրք-քեմալականների հնարավոր միավորման հեռանկարի մասին. «Էնդելիից բոլշևիկները կհասնեն Պարսկաստանի խորքերը՝ Թեհրան և Թավրիզ, և կձգտեն ամբողջ Մերձավոր Արևելքը վարակել բոլշևիզմով»³: Այդ նպատակով նրանք մտադիր են և Հայաստանը հատել երկու ուղղությամբ. 1. Ղարաքլիսի, 2. Ղարաբաղի: Իսկ թուրքերը, որոնց հետ միավորվելու են նրանք գնում, բացի այդ, մեզ սպառնում են ևս երկու կողմից՝ էրզրումի և Բայազետի: Այնպես որ, մենք մեր միլիոն փամփուշտով նստած ենք

¹ Նույն տեղում:

² Նույն տեղում, թ. 74:

³ Մայիսյան այդ օրերին Կասպից ծովի խորհրդային նավատորմը անգլիացիների համար անսպասելի դեպանտ էր ավի հանել էնդելիում, գրավել քաղաքն ու շրջակայքը և հարկադրել անգլիացիներին հեռանալու Իրանի հյուսիսային այդ շրջանից:

¹ Տե՛ս «Մշակ», 15 հուլիսի 1920թ.:

² ՀԱԱ, ֆ. 200, ց. 1, գ. 516, թ. 73:

մեջտեղում՝ Երևանում, չիմանալով, թե ո՞ր կողմ ստիպված կլինենք դրանք ուղարկել»¹:

Սղազիր այս փաստաթուղթը վկայում է, որ Սատիսյանը բավականաչափ համառություն է ցուցաբերել՝ ձգտելով որևէ խոստում կորզել անգլիացի գեներալից. «Այսպիսով, - եզրափակել է իր խոսքը Սատիսյանը, - ամեն դեպքում, Ձերդ գերազանցություն, հարկավոր է բոլոր ջանքերը գործադրել, որպեսզի ես կարողանամ դրական պատասխան տալ իմ կառավարությունը և ժողովրդին՝ դաշնակիցների կողմից մեզ իրական օգնություն ցույց տրվելու է, թե՞ ոչ: Այնպես որ, Հայաստանում բոլշևիզմ կլինի թե ոչ, կախված է ձեր պատասխանից»²: Ավելացնենք նաև, որ Սատիսյանը պատրաստակամություն էր հայտնել իսկույն ևեթ մեկնել Ստամբուլ՝ բարձրացված հարցերի շուրջ աղմիրալ Դե-Ռոբեկի հետ բանակցելու, եթե Կուկ-Կոլլիսը հեռագրակապի միջոցով պարզի, որ աղմիրալը դա նպատակահարմար է համարում: Նման մտավախություն առիթ էր տվել այն հանգամանքը, որ հենց Սատիսյանի հանձնարարությունը Ստամբուլում Հայաստանի ներկայացուցիչ Թախտաջյանը մայիսի 12-ին և 21-ին ներկայացել էր Դե-Ռոբեկի օգնական, աղմիրալ Վերբին, հանձնել Սատիսյանի երկու նոտաները, քննարկել Բաթումում գտնվող ինքնաթիռների և զենքի մատակարարման հարցը, բայց դեռևս կոնկրետ պատասխան չէր ստացել³:

Արխիվային վավերագրերը վկայում են, որ Սատիսյանը դաշնակիցների ներկայացուցիչներին հետ զենք և զինամթերք ստանալու, ինչպես նաև ռազմաքաղաքական մի շարք կարևոր հարցերի շուրջ առավել ուշադրավ բանակցություններ վարել է Թիֆլիսում: Դրանց մասին Վրաստանում Հայաստանի դիվանագիտական ներկայացուցչությունից Երևան՝ ՀՀ արտգործնախարարություն, ուղարկված հունիսի 29-ով թվագրված գեկուցագրում ասված է. «Կառավարության արտակարգ լիազոր պ. Սատիսյանը Թիֆլիսում գտնվելու ժամանակ դաշնակիցների ներկայացուցիչներին արել է հետևյալ հայտարարությունը. Հայաստանի կառավարությունն անհրաժեշտ է համարում մոտ ապագայում, այսինքն մինչև օգոստոս ամիսը, տեղավորել թուրքահայերին, որոնք վեց տարուց ավելի թափառում են տարբեր երկրներում, գլխավորապես Հայաստանում, որտեղ նրանց թիվը հասնում է մոտ

300 հազարի: Բացի նրանցից, Հայաստանի սահմաններից դուրս կան բազմաթիվ գաղթականներ, որոնք սպասում են հարմար պահի (կամ կառավարության կոչին), որպեսզի վերադառնան հայրենիք: Այդ վերադարձը պետք է տեղի ունենա հնարավորին չափ շուտ, որպեսզի նրանք մինչև ձմեռ կարողանան ապահովվել ցանքսով: Այդ նպատակով կառավարությունն անհրաժեշտ է համարում հենց հիմա գրավել Հայաստանի ներկա սահմաններին սահմանակից նախկին Թուրքահայաստանի հողերը և առաջին հերթին Ալաշկերտի հովիտը և Բայազետը՝ պայմանով, որ դաշնակիցները Հայաստանին ցույց կտան որոշակի աջակցություն և ռազմական օգնություն: Վերջինը պետք է արտահայտվի նրանով, որ դաշնակիցները սեփական ուժերով կզբաղեն էրզրումի և Տրապիզոնի շրջանները և այդպիսով հայկական զորքերին հնարավորություն կտան գրավելու մոտակա շրջանները»¹ (ընդգծումը մերն է - է. Ջ.):

Ինչպես տեսնում ենք, Ալ. Սատիսյանի հայտարարությունն այս մասում առաջ է քաշված երեք խնդիր. 1. Թուրքահայ գաղթականների տեղավորում, 2. Ալաշկերտի և Բայազետի գրավում հայկական զորքերով, 3. էրզրումի և Տրապիզոնի գրավում Անտանտի տերությունների կողմից:

Որքանո՞վ իրատեսական և հիմանվորված էր այս խնդիրների կատարումը: Ինչ խոսք, եթե Ալաշկերտի հովիտը գրավվեր ու բնակեցվեր հայերով, ապա դրանով լուրջ նախադրյալ կստեղծվեր ոչ միայն Շարուր-Նախիջևանը գրկելու Անատոլիայի հետ կապի հնարավորությունից, այլև Կարմիր բանակին, որն այդ նույն ժամանակ չարժվում էր դեպի Ջանգեզուր այնտեղից Նախիջևան մտնելու մտադրությամբ: Ճիշտ է, հունիսին հայկական կառավարությունը դեռ չէր կարող կանխատեսել Կարմիր բանակի կողմից Նախիջևանի գրավում, քանի որ Գ. Ջիզերինը Լ. Շանթի պատվիրակության հետ բանակցություններում իր կառավարության անունից բազմիցս հավաստիացրել էր, որ Նախիջևանը համարում են Հայաստանի անբաժանելի մասը:

Կարո՞ղ էին արդյոք հայերը սեփական ուժերով գրավել Ալաշկերտի հովիտը, որտեղ կանգնած էր թուրքական 9-րդ դիվիզիան: Գուցեև կարող էին, եթե Անտանտի տերությունները իրապես օգնեին Հայկական բանակին, բայց պահել այդ տարածքները հեշտ չէր լինի, ինչի մասին են վկայում թեկուզ 1919թ. հուլիս-օգոստոսյան դեպքերը Շարուր-

¹ Տե՛ս ՀԱԱ, Ֆ. 200, ց. 1, գ. 516, թ. 74:

² Նույն տեղում, թ. 75:

³ Տե՛ս ՀԱԱ, Ֆ. 368, ց. 1, գ. 4, թ. 50-51:

¹ է. Ա. Զոհրաբյան, 1920թ. թուրք-հայկական պատերազմը և տերությունները, Եր., 1977, էջ 95:

Նախիջևանում: Այդ դեպքերը նաև վկայում էին, որ դաշնակից տերու-
թյունների վրա հույս դնել պետք չէ: Մինչդեռ, դատելով Ռատիսյանի
հայտարարությունից, Հայաստանի կառավարությունը շարունակում
էր հավատալ դաշնակիցներին. «Կառավարությունը, - ասված է Ռա-
տիսյանի հայտարարության մեջ, - դա համարում է դաշնակիցների
ընդհանուր գործը՝ Թուրքիայի հետ կնքված պայմանագրի իրագործ-
ման տեսանկյունից¹ և ցանկանում է իմանալ վերջիններիս կարծիքը
այդ գործողությունների հնարավորության մասին: Դրական կարծիքի
դեպքում՝ գործողությունների կոորդինացման նպատակով, կարող է
ծագել անհրաժեշտություն ստեղծելու կապ մեր և դաշնակիցների
գլխավոր շտաբների միջև»²: Այլ Ռատիսյանը, անշուշտ, այնքան միա-
միտ չէր, որ չհասկանար՝ Անտանտի տերություններն առանց քաղա-
քական շահի չեն ներքաշվի նման գործողությունների մեջ: Եվ կարծե-
լով, թե նրանք իսկապես շահագրգռված են քեմալական շարժման դեմ
պայքարի հարցում, ներկայացրեց նաև իր կառավարության հետևյալ
ռազմաքաղաքական նկատառումները. «Նախ և առաջ, ստրատեգիա-
կան տեսակետից, գրավելով Ալաշկերտի հովիտը և Բայազետը, մենք
մեզ համար հնարավորություն կստեղծենք վերջնականապես կտրել
մեր սահմաններում գտնվող մուսուլմանությունը և թուրք-քրդական
հրոսակախմբերը թուրքական ազգային ուժերից (Մ. Քեմալի): Երկ-
րորդ, նպատակասլաց կօգտագործենք թուրքահայերից կազմված զին-
ված ուժերը, որոնք ակնառու դեր խաղացին վերջին բոլշևիկյան շարժ-
ման ճնշման գործում՝ իրենց վրա վերցնելով ապստամբության անմի-
ջական ճնշման ամբողջ ծանրությունը: Այդ ուժերը երկար անգործու-
թյան հետևանքով կարող են չարիք դառնալ երկրի հանգստության
համար՝ վերածվելով ավազակների հրոսակախմբի: Այդ հանգամանքը
ցույց է տալիս, որ անհրաժեշտ է ելք տալ այդ ուժերին՝ օգտագործելով
վերոհիշյալ նպատակի համար»³ (ընդգծումը մերն է - է. Զ.):

Նախ ասենք, որ կառավարության մտահոգությունը թուրքահայ
զինված ուժերը հրոսակախմբերի վերածելու հնարավորության մասին,
անհիմն չէր: Նման միտումներ նկատվել էին դեռևս 1919-թ., որոնց
վրա, բնականաբար, մենք կանգ չենք առնում: Ինչ վերաբերում է

¹ Մուղրոսի զինազազարի պայմանագիրը դաշնակից տերություններին իրա-
վունք էր տալիս օկուպացնել Թուրքիայի այս կամ այն մասը՝ դրանցում անկար-
գություններ ծագելու դեպքում:

² Է. Ա. Զոհրաբյան, նշվ. աշխ. էջ 95:

³ Նույն տեղում, էջ 98:

թուրքահայ ուժերի միջոցով Ալաշկերտի հովտի գրավմանը, ապա
կառավարությունը անտարակույս գերագնահատել է նրանց ուժը և,
հակառակը, թերագնահատել թշնամու ուժերը, ինչը հետևանք էր Հա-
յաստանի հետախուզական ծառայությունների ոչ բավարար աշխա-
տանքի, որոնք ստուգված և ճշգրիտ տեղեկություններ չունեին սահ-
մանի մյուս կողմում կատարվող իրադարձությունների, թուրքական
ուժերի իրական թվակազմի ու հնարավորությունների մասին:

Իրատեսական չէին նաև կառավարության հաշվարկները Անտան-
տի տերություններին քեմալականների դեմ ռազմական գործողու-
թյունների մեջ ներքաշելու հարցում: Եվ ինդիքը միայն այն մասին չէ,
որ դաշնակիցները մինչ այդ էլ մտադիր չէին Հայաստանի համար ան-
գամ մեկ զինվոր զոհաբերել, ինչի մասին բազմիցս Հայտարարել էին
(օր. Սան-Ռեմոյի կոնֆերանսում), այլև այն, որ իրադրությունը տա-
րածաչրջանում կտրուկ փոխվել էր ոչ ի նպաստ Հայաստանի Հանրա-
պետության: Քեմալական շարժման ամրապնդումը Անատոլիայում,
Կարմիր բանակի մուտքն Անդրկովկաս և Ադրբեջանի անասելի արագ
ու անսպասելի խորհրդայնացումը ու դրան հոջորդած բոլշևիկյան շար-
ժումները Հայաստանում չէին կարող չազդել Անտանտի տերություն-
ների քաղաքականության վրա: Նրանք չէին կարող չտեսնել ու չհաս-
կանալ, որ Անդրկովկասյան հանրապետությունները ի վիճակի չեն
կանգնեցնելու բոլշևիզմի տարածումը դեպի հարավ, որ այդ դերը
առավել հաջողությամբ կարող է կատարել Ռուսաստանի դարավոր
ախոյանը՝ ազգայնական կերպարանք ընդունած Թուրքիան, որի
դաշինքը բոլշևիկյան իշխանությունների հետ համարում էին ժամա-
նակավոր: «Թողե՛ք գործեն թուրքերը և ուսուները Կովկասում, - ասել
է Լյուդ Զորջը, - և դուք կտեսնեք, որ շուտով նրանց միջև նորից
կգարթնի դարավոր թշնամությունը...: Թող հիշեն թուրքերը, որ Ռու-
սաստանի հաղթանակը Թուրքիայի մահն է, և որ այդ երկու ժողո-
վուրդները երբեք չեն կարող ընթանալ միասին»⁴:

Ճիշտ է, 1920թ. ամռանը Անգլիան դեռ աջակցում էր Հունաստա-
նին քեմալականների դեմ պայքարում, բայց արդեն վերջիններիս հետ
չփման ուղիներ էր փնտրում, ինչը առավել ցայտուն արտահայտվեց
Լոնդոնի կոնֆերանսում (1921թ. փետրվար-մարտ): Հենց այդ փոփոխ-
ված տրամադրությամբ պետք է բացատրել այն փաստը, որ ո՛չ Անգ-
լիան, ո՛չ Ֆրանսիան հետաքրքրություն չցուցաբերեցին Ռատիսյանի

⁴ ՀԱԱ, Ֆ. 4/414, ց. 1, գ. 65, թ. 93:

ներկայացրած ծրագրի նկատմամբ: Հայաստանի կառավարությունն այդ ծրագրին հավանություն չտվեց նաև քեմալականների դեմ պատերազմի մեջ գտնվող Հունաստանը: Հ. Օհանջանյանին ուղարկած նամակում, խոսելով Հունաստանի վարչապետ Վենիզելոսի հետ այդ ուղղությամբ իր վարած խոսակցության մասին, Ավ. Ահարոնյանը վկայաբերում է նրա հետևյալ խոսքերը. «Դուք մի սպառնալիք եք, որի լրջությունը կարող է անհայտ լինել թշնամուն, բայց եթե դուք առաջացաք և չհաջողեցիք, կարող եք ամեն ինչ կորցնել, որովհետև ո՛չ մենք՝ Հույներս և ո՛չ դաշնակիցները, ձեզ օգնության չենք գալու»¹: Այսպիսի պայմաններում Հայաստանի կառավարությունը որոշեց հրաժարվել Ալաշկերտը և Բայազեդը գրավելու մտադրությունից և ռազմական գործողությունները շարունակել ներքին ճակատում՝ Վեդիբասարի և Շարուր-Նախիջևանի ուղղությամբ:

Ռազմական տեսակետից Վեդի գետի ավազանը շատ ավելի լավ էր ամրացված, քան Զանգիբասարը: Ուներ 5-6 հազար կովոդներ, որոնք թուրք սպանների ղեկավարությամբ մարզվել ու նախապատրաստվել էին երկարատև դիմադրության: Զենքի և զինամթերքի պակաս չկար. սահմանակցելով Շարուր-Նախիջևանին՝ ադրբեջանական այդ գյուղախումբը, որի կենտրոնը Բեյուք-Վեդին էր, բնականաբար ավելի սերտ կապերի մեջ էր և ավելի մեծ օգնություն էր ստանում այնտեղից: Ահա, օրինակ, ինչ է ասել այդ մասին Նախիջևանից Միսիան անցած ադրբեջանցի մի փախստական. «Նախիջևանում գորահրամանատարն է տաճիկ Սալիլ բեյը, որի հրամանատարության տակ կան հինգ տաճիկ սպաններ, կան և այլ տաճիկ սպաններ ու ասկյարներ, բայց նոքա գտնվում են Բեյուք Վեդու ռազմաճակատում: Բեյուք Վեդում հացը սակավ է. Նախիջևանի թրքությունից պարբերաբար հարկադրանքի միջոցով հաց են հավաքում և փոխադրում Բեյուք Վեդու գինվորների համար»²:

Ինչպես տեսնում ենք, Նախիջևանի հրամանատարությունը Վեդիբասարին ավելի մեծ նշանակություն էր տալիս, և պաշտպանության համար առկա բնական ամրությունները (լեռներ, բարձունքներ, դարավանդներ) թուրք սպանների ղեկավարությամբ վեր էին ածվել անառիկ ամրոցների: Հայկական բանակի հրամանատարությանը դա քաջ հայտնի էր: Հետևապես, պատրաստվելով հարձակման, հայերը պետք է կուտակեին այնքան ուժ և կիրառեին այնպիսի մարտավարություն,

որ չկրկնվեին 1919թ. Հուլիս-օգոստոսյան անհաջողությունները:

Կառավարությունը, ինչպես և Զանգիբասարի դեպքում, փորձելով հարցը լուծել խաղաղորեն, նախ հնազանդության առաջարկ արեց, բայց ոչ մի պատասխան չստացավ: Դրան հաջորդեց այդ նպատակի համար առանձնացված հայկական զորամասերի ընդհանուր հարձակումը երկու կողմերից՝ Ղամարլուի (Արտաշատ) և Նոր-Բայազեդի (Գավառ): Ռազմական գործողությունները սկսվեցին Հուլիսի 10-ին և ավարտվեցին 12-ին: 11-ին մեր զորքերը գրավեցին մի քանի ամրացված կետեր ու գյուղեր և մոտեցան Բեյուք-Վեդիին, իսկ 12-ին գրոհով վերցվեց նաև Բեյուք-Վեդին: Կոիվները բավական համառ էին, և այստեղ ևս թշնամին մարտի դաշտում թողել էր մեծ թվով սպանվածներ, զենք, զինամթերք և այլն: Ահա ինչ է ասված բանակի գլխավոր շտաբի Հուլիսի 12-ի պաշտոնական հաղորդագրության մեջ.

«Հուլիսի 10-ի երեկոյան մեր զորամասերը Ղամարլուից և Նոր Բայազեդից հարձակման դիմեցին Բեյուք-Վեդի գյուղը գրավելու նպատակով:

Հուլիսի 11-ին Ղամարլուի ուղղությամբ համառ կոիվներից հետո գրավեցին Կարայալ, ձաթղոան, Ալի-Մամեդ, Ենգիջա, Կոթուզ, Աղասի-Բեկլու և Ներքին Կարաբեկյար գյուղերը: Բեյուք-Վեդիից Հյուսիս մի վերստ հեռավորության վրա՝ Գյավուր-Ղալասի լեռան մոտ մենք հանդիպեցինք թուրքերի կողմից հուսահատ և կատաղի դիմադրության:

Նոր-Բայազեդի ուղղությամբ Հուլիսի 11-ին երեկոյան մենք գրավեցինք Աղբիլիսա, Մազուկ, Գյուլ-Ջիզին, Ջաղին, Ջիրմանիս, Դոխնազ, Գերմանիս գյուղերը:

Մուլթն ընկնելուց հետո, երեկոյան մոտ ժամը 9-ին Գյավուր-Ղալասի լեռան կողմից թուրքերը հակահարձակման դիմեցին, բայց 2-րդ գնդի հանդիպակաց գրոհով հետ շարտվեցին:

Նահանջողներին հետապնդելով՝ 2-րդ գունդը սվինամարտից հետո գրավեց Գյավուր-Ղալասի սարը, ուր թուրքերը թողին բազմաթիվ սպանվածներ և մի գնդացի «Մաքսիմ» սիստեմի:

Հուլիսի 12-ին, առավոտյան ժ. 5 20 րոպեին մեր զորամասերը մտան Բեյուք-Վեդի գյուղը: Թուրքերը փախչում էին Դավալու-Ջինջիրլուի վրայով»³:

Հաղորդագրության վերջին նախադասությունից պարզ երևում է, որ այս անգամ հայկական ուժերը չեն փորձել օղակի մեջ առնել Վեդի-

¹ ՀԱԱ, Ֆ. 200, ց. 1, գ. 290, թ. 168:

² «Հատաջ», 12 մայիսի 1920թ.:

³ «Հատաջ», 13 Հուլիսի 1920թ.:

բասարը, ինչպես դա արել էին 1919թ. հուլիսյան դեպքերի ժամանակ, այլ, այսպես կոչված, «մարդասիրական միջանցք» են թողել, որպեսզի տեղում մնալ չցանկացող բնակիչները հեռանալու հնարավորություն ունենան: Սակայն առավել մեծ խուճապով փախչում էին կովող ուժերը, այնքան մեծ, որ հրամանատարությունը չի հասցրել տանել շտաբի արխիվը: Ի դեպ, հենց այդ արխիվի նյութերից էլ պարզվել էր, որ Ադրբեջանի ղեկավարություն և Նախիջևանում գործող օսմանյան սպայություն միջև Զանգիբասարի և Վեդիբասարի հարցում որոշ տարակարծություն է եղել: «Թե այս դոկումենտները և թե մի շարք կենդանի դոկումենտների վկայություններ,- կարդում ենք «Նոր աշխատավոր»-ի հուլիսի 29-ի համարում, - գալիս են հաստատելու մի բան. այդ այն է, որ թեև Շարուր-Նախիջևանի ավանտյուրան կազմակերպված է թե Թուրքիայի և թե Նախիջևանի կողմից միասին, համերաշխ ուժերով, սակայն թող տարօրինակ չլից, որ իր ձգտումների և նպատակների մեջ այդ շրջանների վերաբերմամբ Թուրքիան և նրա գործակալները եղել են ավելի դիջող, քան նորելուկ սատրապիայի՝ Ադրբեջան «հանրապետության» դավադիր գործակալները: Թուրքիայի գործակալները՝ տաճիկ սպաները, պնդելիս են եղել, որ գոնե Զանգիբասարը և Վեդիբասարը ցած դնեն գենքերը և ընդունեն Հայաստանի իշխանությունը: Դրան հակառակ՝ ադրբեջանցիները պնդել են մինչև վերջ, որ Ադրբեջանի սահմանները անցնում են Երևանի տակով (Զանգիբասարը չորս վերստի վրա է Երևանից) և որ թե՛ Զանգիբասարը, թե՛ Վեդիբասարը պիտի գենքը ձեռքին դիմադրեն Հայաստանի կառավարության ձգտումներին՝ մտցնել այդ շրջաններում հայկական իշխանություն: Եվ ստիպել են, որ թե՛ Զանգիբասարը և թե՛ Վեդիբասարը կովեն» (ընդգծումը մերն է- է. Զ.):

Կարծում ենք, այստեղ տարօրինակ ոչինչ չկա. թուրքերը իրատեսական չէին համարում այդ շրջանների անջատումը Հայաստանից, ուստի և չէին ուզում ավելորդ ծախսեր անել այդ ուղղությամբ: Իսկ որ Ադրբեջանն ավելի ախորժակով էր, երևաց դեռ Բաթումի կոնֆերանսի օրերին, որտեղ Երևանի նկատմամբ էլ պահանջ առաջադրվեց:

* * *

Բեյութ Վեդին գրավելուց հետո հայկական ուժերը շարունակեցին առաջխաղացումը, հուլիսի 14-ին անցան Գայլի Դրունքը (Արարատյան դաշտը Շարուրի դաշտից բաժանող մասը) և 3-4 օրվա ընթացքում գրավեցին մի շարք գյուղեր Շարուրի դաշտում: Հաղթանակը կատարյալ էր, և Շարուրում գտնվող Ադրբեջանից եկած հեծելազորը, թուր-

քական ջոկատը և տեղական ուժերը (ընդհանուր թվով՝ շուրջ 8-10 հազար) խուճապահար նահանջում էին. մի մասը՝ դեպի Նախիջևան, մի մասն էլ՝ Արաքսի մյուս ափը: «Հատաջ»-ի 1920թ. հուլիսի 29-ի համարում զետեղված Հայաստանի հեռագրական գործակալություն հատուկ թղթակցի հաղորդագրություն մեջ ասված է. «Զանգիբասարի, Վեդիբասարի և Գայլի Դրունքի մոտ կրած ջարդերից հետո Նուրի փաշան տաճիկական աղաների և ասկյարների հետ քաշվել է Բայազետ, ուր կենտրոնացնում է իր ուժերը: Թուրքական (ադրբեջանական - է. Զ.) հեծելազունը, որին մի ժամանակ ղեկավարում էր կնյազ Մաղալովը և որի անունից այնքան պարծենում էր Ադրբեջանը, մեր գործերի հետ ունեցած վերջին ընդհարումների ժամանակ մեծ կորուստներ է կրել և Նախիջևանի վրայով անցել է Մակու»:

Շարուրը (Շարուր-Դարալագյազի գավառի դաշտային մասը) և Նախիջևանի գավառը Հայաստանի Հանրապետության այն շրջաններն են, որոնք 1919թ. հուլիսյան ապստամբության օրերին տեղի հայ բնակչության նկատմամբ գործադրած բռնություններով ավարտին էին հասցվել երկրամասի հայաթափության գործը, որի սկիզբը դրվել էր 1918թ. օսմանյան օկուպացիայի ժամանակ: Սակայն Շարուր-Նախիջևանի վերագրավումը հայոց համար կարևորվում էր ոչ միայն քաղաքական, այլև տնտեսական գործոնով: Դա Երևան-Ջուլֆա երկաթուղու գործարկումն էր, առանց որի Իրանի հետ առևտրատնտեսական կապերի զարգացումը դառնում էր անհնար:

Վեդիբասարի գրավումը և հայկական զորքերի մուտքը Շարուր այնպիսի չիթթ և սարսափ էին առաջացրել Նախիջևանում, որ այդ դեպքերի ազդեցության տակ լուծարվեցին նաև Ադրբեջանի հաստատած նահանգային իշխանությունները, և կրկին սկսեց գործել Մուսուլմանական ազգային խորհուրդը, այսպես կոչված՝ «միլլի շուրան»: Հենց սա էլ իսկույն երկու պատվիրակ ուղարկեց Երևան՝ գինադադար խնդրելու և հպատակության պայմանների մասին բանակցելու: ՀՀ ռազմական նախարար Ռուբեն Տեր-Մինասյանը կառավարության անունից Նախիջևանի պատվիրակներին հանձնեց վերջնազրի բնույթ կրող 15 կետից բաղկացած «պայմաններ Նախիջևանի գավառի մուսուլմանական ազգաբնակչության կողմից Հայաստանի Հանրապետության կառավարության իշխանությունը ճանաչելու մասին» փաստաթուղթը, որի առաջին կետում ասված էր, որ «Նախիջևանի Ազգային կոմիտեն (խորհուրդը - է. Զ.) Նախիջևանի և Շարուրի գավառների ողջ ազգաբնակչության անունից հայտարարում է, որ այդ գավառները հանդիսանում են Հայաստանի Հանրապետության անբաժան մասը և

որ բոլոր բնակիչները իրենց համարում են Հայաստանի Հանրապետության քաղաքացի»։ Երկրորդ կետում ասված էր, որ Նախիջևանի ազգային խորհուրդը, ինչպես նաև գավառի բնակիչները պարտավորվում են չընդունել թուրքերին, Զանգիրասարի, Վեղիրասարի, Շարուրի փախստականներին և Աղբրեջանի ազիտատորներին։ Գավառի վարչությունը գերազանցապես մուսուլմաններից է նշանակվում, բացառությամբ Գողթանի, որտեղ այն կազմվում է հայերից (3), ազգաբնակչությունը՝ կրոնական և մշակութային հարցերում լիակատար ինքնավարություն է ստանում (4) և կարող է դատվել ըստ չարիաթի (5)։

Ներկայացված պայմաններում կային նաև տնտեսական ու ռազմական պահանջներ։ Այսպես, երկու շարաթվա ընթացքում Նախիջևանը Հայաստանի կառավարությանը պետք է վաճառեր 300 ձի՝ յուրաքանչյուրի համար ստանալով 50.000 ռուբլի, 200 գլուխ քարչոդ անասուն՝ 30.000-ական ռուբլով, մեկ ամսվա ընթացքում դարձյալ Հայաստանի կառավարությանը պետք է հանձնվեր 300.000 փուլթ ցորեն, որից 150.000-ը անվճար, իսկ մնացած 150.000-ը՝ վճարով՝ փուլթը 2000 ռուբլով (6)։ Զուլֆայից մինչև Շահթախթի ընկած հատվածում երկաթգծի պահպանությունը և քանդված հատվածների նորոգումը իրականացնում է Նախիջևանի ազգային խորհուրդը (7 և 15), վերադարձնում է 1919թ. զավթած պետական գույքը, հանձնում բոլոր թնդանոթները, գնդացիները և ոչ պակաս քան 10.000 հրացան։ Զենքի հանձնումը պետք է սկսվի այս պայմանների ընդունումից 24 ժամ հետո և ավարտվի 10 օրվա ընթացքում, ըստ որում ռազմական կազմավորումները գնեքերը պետք է հանձնեն առաջին իսկ օրը (9)։ Կետեր կային նաև համընդհանուր ներման (11), Հայաստանի կառավարության կողմից Նախիջևանի ազգային խորհրդին ցուցաբերվելիք աջակցության մասին (12)։ 10-րդ կետում էլ ասված էր, որ Նախիջևանի պատվիրակների՝ Շահթախթի կայարանից մեկնելուց հետո 24 ժամվա ընթացքում ներկայացված պայմանների ընդունման մասին պատասխանի չստացվելու դեպքում Հայաստանի Հանրապետության հրամանատարությունը իրենից վայր է դնում ամեն մի պատասխանատվություն¹։

Արխիվային փաստաթղթերից տեղեկանում ենք, որ Նախիջևանի պատվիրակները Երևանից դուրս են եկել հուլիսի 19-ին և խոստացել

¹ Տե՛ս ՀԱԱ, ֆ. 200, ց. 1, գ. 484, թ. 26:

երեք օրվա ընթացքում ներկայացնել պատասխանը (Երևան-Շահթախթի երկաթգիծը 1919թ. հուլիս-օգոստոսյան իրադարձությունների ժամանակ մի քանի տեղերում քանդվել էր ու չէր աշխատում)։ Հուլիսի 20-ին վարչապետ և արտգործնախարար Համո Օհանջանյանը՝ Թիֆլիսում Հայաստանի դիվանագիտական ներկայացուցիչ Տիգրան Բեկզադյանին ուղարկած նամակում գրում է.

«Զանգիրասարից հետո վերցրինք և Բեյուք-Վեղին, Շարուրը։ Նախիջևանը Հայտնեց իր հպատակությունը՝ ուղարկելով Երևան իր երկու ներկայացուցիչներին, որոնց հետ մշակվում են պայմաններ, որոնց պատճենը ուղարկում եմ Ձեզ՝ անձնական գիտություն համար։ **Մենք չենք ուզում և գուցե չենք էլ կարող զինվորական ուժով գրավել այդ ամբողջ շրջանը և որ գլխավորն է, պահպանել նրան՝ ունենալով 200 վերստի մի նոր ֆրոնտ։ Վերջնական գրավումը մենք կկատարենք մոտիկ ապագայում, երբ կազատվենք մյուս ֆրոնտներից։** Նախիջևանցիներին տրված պայմանները նպաստավոր են մեզ համար, նամանավանդ տնտեսականի տեսակետից. Նոքա ստիպված են տալ մոտավորապես երկու միլիարդ ռուբլու կոնտրիբուցիա՝ եթե մենք գնահատելու լինենք տրվելիք պարենը և ռազմամթերքը։ Այդ օպերացիան տվեց մեզ ժողովրդի և զորքի տրամադրության բարձրացում, հնարավորություն կազմակերպվել և կովել Զանգեզուրի և Ղարաբաղի վերագրավելու համար, բարձրացրեց մեր պրեստիժը թե թուրքերի և թե եվրոպացիների առաջ և կը բաց անի Զուլֆայի երկաթուղագիծը։

Նախիջևանի այդ օպերացիան ցույց տվեց միաժամանակ, որ այդ շրջանի թուրքերի ուժերը, նրանց կապը տաճիկների հետ և վերջիններիս ուժը, չափազանցրած էին»¹ (ընդգծումը մերն է - է. Զ.)։

Իհարկե, ճիշտ էր Համո Օհանջանյանը՝ ասելով, որ դժվարը այդ երկրամասը հնազանդ պահելն է, ինչի ապացույցը 1919 թվականն էր տվել, երբ մայիսին այնտեղ մտած հայկական զորամասերը հուլիսին ստիպված եղան կոիվներով հետ քաշվել դեպի Դարալագյազ և Արարատյան դաշտ։ Բայց, կարծում ենք, ընթերցողն էլ կընդունի, որ վարչապետի ոգևորությունն ու լավատեսությունը այնքան էլ հիմնավոր չէին։ Ինչ խոսք, որ ապստամբ շրջանների հպատակեցումը մեծ հաջողություն էր և նպաստեց կառավարության դիրքերի ու հեղինակությունից ամրապնդմանը։ Բայց նաև փաստ է, որ հայկական զորքերը կովել են ոչ թե կանոնավոր բանակների, այլ անկանոն կազմավորում-

¹ Նույն տեղում, գ. 440, թ. 31:

ների դեմ, որոնք թեև մարզվել էին թուրք սպանների կողմից, բայցևայնպես մնացել էին աշխարհագորայինի կարգավիճակում: Ուրեմն ինչպե՞ս կարելի էր այս վերջիններիս և Ղարաբաղ ու Ջանգեզուր մտած ուսական 11-րդ բանակի՝ պատերազմների բովով անցած զորամասերին նույն հարթություն վրա դնել: Իսկ որ Համո Օհանջանյանը այդպես էր մտածում, երևում է նամակի շարունակությունից, որտեղ ուղղակի ասված է. «Այժմ հերթական հարցը Ջանգեզուրի հարցն է: Չնայած Կիրովի խոստումներին, բոլշևիկների առաջխաղացումը շարունակվում է: Մենք, բացի դիպլոմատիկական քայլերից, պատրաստվում ենք մի լավ հարված տալ բոլշևիկներին Ջանգեզուրում»¹: Եվ ինչպե՞ս պետք է Հայաստանը «մոտիկ ապագայում» ազատվեր «մյուս ֆրոնտներից», երբ արևելքում Կարմիր բանակի զորամասերը Ջանգեզուրի վրայով մոտենում էին Նախիջևանին, իսկ արևմուտքում Օլթիի դեպքերով ծայր առած սահմանային ընդհարումները քեմալական ուժերի հետ ոչ միայն վերջ չէին գտնում, այլև ավելի ու ավելի մեծ չափեր էին ընդունում՝ սպառնալով վերածվել լայնամասշտաբ պատերազմի: Տարօրինակ է, բայց փաստ, որ Հայաստանի կառավարությունը, բանակի հետախուզական ծառայությունը թուր կարծիք ունեին քեմալական շարժման, թուրքական զինված ուժերի և նրանց կողմից Հայաստանին իրապես սպառնացող վտանգի չափերի մասին:

Վերդառնալով Նախիջևանի ազգային պատվիրակների հետ Հայաստանի կառավարության կայացրած համաձայնությունը, ապա ինչպես և պետք էր սպասել, նրանք դրժեցին խոստումը և պայմանավորված ժամկետին ոչ մի պատասխան չուղարկեցին: Այդժամ գեն. Շելկովնիկովի (Շելկովնիկյան) գլխավորած զորամասերը վերսկսեցին ռազմական գործողությունները: «Մեր կառավարության պահանջները թուրքերի կողմից չիրագործելու պատճառով մեր զորքերին ամսի 23-ին հրաման է տրված շարժվել Շահթախթիի վրա, - կարդում ենք «Հառաջ»-ի հուլիսի 27-ի համարում: Երեկ, բավականին ուժեղ կովից հետո, մեր պանծալի զորքերի կողմից գրավված է Շահթախթի գյուղը և կայարանը, նաև Նոկը, Յուրդ Գերդասար և Ղարաբեզլար կայարանները: Թուրքերի կողմից գործում էր բավականին մեծ ուժ՝ 3 թնդանոթներով: Շահթախթիի վերջնելիս թուրքերից գրավված է մեկ հատ լեռնային թնդանոթ և շատ ումբեր: Թուրքերի մի մասը փախել է դեպի Մակուի խանությունը, մյուս մասը՝ դեպի Նախիջևան: Մնացած

¹ Նույն տեղում:

երկու թնդանոթները նրանք փոխադրեցին Մակուի խանությունը: Թուրքերը շատ նշանակալից կորուստներ են ունեցել»: Թերթի այդ նույն համարում զետեղված բանակի գլխավոր շտաբի մի հաղորդագրությունից տեղեկանում ենք, որ այդ օրերին մեր զորքերը գրավել են նաև Փուսիան, Թաղաքենդ, Ղուբուլլու և Ղյուրագ գյուղերը:

Թվում էր, թե այլևս ոչինչ չի կարող խանգարել Հայաստանի իշխանությունների վերականգնմանը Նախիջևանի երկրամասում, սակայն չուտով դեպքերն այլ ընթացք ստացան: Վարչապետ Համո Օհանջանյանը, Նորհրդարանի օգոստոսի 2-ի նիստում պատգամավորների բուռն ծափահարությունների տակ ունեցած ելույթում անդրադառնալով Հայկական բանակի հուլիսյան հաջողություններին, Նախիջևանի առաջին պատվիրակության հետ վարած բանակցություններին ու ներկայացրած պայմաններին, Մուսուլմանական խորհրդի կողմից դրանց մերժելուն և որպես հետևանք Հայկական բանակի նոր հարձակմանն ու Շահթախթիի գրավմանը, ասել է. «Այն ժամանակ թուրքերի կողմից եկավ նոր պատվիրակություն: Մենք չծանրացրինք նախկին մեր պայմանները, ոչ մի պահանջ չավելացրինք, այլ ավելի թեթևացրինք, միայն մի սահմանափակում դնելով, որ գաղթած ազգաբնակչությունը չպիտի վերադառնա Շարուր և Վեդիբասար՝ մինչև նոր կարգադրություն և նոր պայմաններ ստեղծվելը: Բանակցությունները տևեցին 2-3 օր: Այն ժամանակ, երբ ժողովրդի պատվիրակները համաձայն էին ընդունել պայմանները, ժողովուրդը այս անգամ նոր ազդեցության է ենթարկվում՝ բոլշևիզմի, որի վրա և իրենց հույան էին դրել: Այժմ մեր դեմ կանգնած են ոչ միայն տեղական կազմակերպված ուժերը, այլև հեռու հյուսիսից եկած կարմիր Ռուսաստանի և հեռու հարավից եկած նույն կարմիր, բայց ոչ խոսքով, այլ արյունով կարմիր Տաճկաստանի թափթփուկները, երեքը իրար միացած, երեքը իրար դաշնակցած»¹ (ընդգծումը մերն է - է. Ջ.):

Քաղաքականության մեջ թուրքերը (թե օսմանյան և թե աղերի) իսկապես որ ճկուն են, պատրաստ են դաշնակցել անգամ սատանայի հետ, եթե ազգային շահը դա է պահանջում: 18-19-րդ դարերում Օսմանյան Թուրքիան իր գոյությունը պահպանում էր՝ խաղալով արևմտյան Եվրոպայի և Ռուսաստանի հակամարտությունների վրա: Իսկ երբ Առաջին աշխարհամարտից հետո նա Հայտնվեց Արևմուտքի կրնկի տակ, չվարանեց բռնել իր դարավոր թշնամու՝ Ռուսաստանի

¹ «Նոր աշխատավոր», 11 օգոստոսի 1920թ.:

փեչը, որը, կարմիր աստառ հագած կուլում էր Անտանտի դեմ: Աղբյուրները մեկ օրում կարմրեց ու դարձյալ այդ նույն Ռուսաստանի օգնությունը սկսեց իր օգտին լուծել հարևանների հետ ունեցած վեճերը: Ինչու, ուրեմն, Նախիջևանի թուրքերը պետք է հետ մնային իրենց ավագ եղբայրներից: Իսկ գուցե հենց նրանց խորհրդով են նախիջևանցիները այդ քայլին դիմել, ինչի մասին ակնարկ կա Կիրովին ուղարկած Չիչերինի մի նամակում, «Թուրքերը, - ասված է նրանում, - գրավելով Նախիջևանը, այնտեղ խորհրդային իշխանություն են հայտարարել և առաջարկում են, որ մեր զորքերը մտնեն այնտեղ»¹:

Բանն այն է, որ Նախիջևանի ղեկավարությունը, կորցնելով զենքի ուժով Հայկական բանակի առաջխաղացումը կանգնեցնելու հույսը ու նաև չցանկանալով ընդունել Հայաստանի կառավարության թելադրած պայմանները, որոշեց շտապեցնել ռուսական զորքերի մուտքը Նախիջևան: Հենց այդ նպատակով էլ Մուսուլմանական խորհուրդը լուծարվեց և նրա փոխարեն ստեղծվեց մի կեղծ հեղկոմ: Որ դա իսկապես կեղծ հեղկոմ էր, վկայում է թեկուզ այն փաստը, որ նրա կազմի զգալի մասը նախկին խորհրդի անդամներն էին: Դրա հետ մեկտեղ իսկույն մի պատվիրակություն ուղարկվեց Ջանգեզուր՝ շտապեցնելու այնտեղ գտնվող ռուսական զորամասերի ժամանումը Նախիջևան, իսկ մեկ ուրիշը՝ Հայերի մոտ՝ ոչ այնքան Հայաստանի իշխանությունը ճանաչելու ուղղությամբ նոր պայմաններ մշակելու, որքան ժամանակ չահելու, մինչև ռուսական զորքերը կհասնեն Նախիջևան: Եվ նախիջևանցիների այդ խորամանկ քայլը հաջողություն ունեցավ. մինչ Հայերի հետ բանակցություններ էին ընթանում, Սիսիան հասած ռուսական 11-րդ բանակի հեծյալ գնդերից մեկը անցնում է Բիչանաղի լեռնանցքը և հուլիսի 28-ին մտնում Նախիջևան: Անշուշտ մեկ գունդը չափազանց քիչ էր զենքի ուժով Հայերի առաջխաղացումը կանգնեցնելու համար: Բայց, ինչպես և հետագա դեպքերը ցույց տվեցին, ռուսական հրամանատարությունը հույսը դրել էր ոչ այնքան զենքի, որքան այն բանի վրա, որ Հայերը ռուսների դեմ չեն պատերազմի: Այդպես էլ եղավ. տեղ հասնելուն պես այդ զորամասը քայլեր ձեռնարկեց Հայերի հետ չփման մեջ մտնելու և նրանց հետագա առաջխաղացումը կանգնեցնելու համար: 28-րդ դիվիզիայի շտաբի օգոստոսի 1-ով թվագրված մի գաղտնի հաղորդագրություն մեջ հայտնելով այն մասին, որ Սախլի փաշան

¹ Գ. Գալոյան, Հայաստանը և մեծ տերությունները 1917-1923թթ., Եր. 1999, էջ 248:

բարեհաջող կերպով հասել է Նախիջևան, միաժամանակ ավելացվում է, որ հուլիսի 29-ի առավոտյան ժամը 6-ին հեծյալ գնդի մի վաշտապետ՝ երեք կարմիր բանակայինների ուղեկցությամբ, սպիտակ դրոշ պարզած, Ջահրի գյուղից ուղարկվել է Պախ գյուղը՝ տեղեկացնելու Հայերին խորհրդային զորքերի՝ Նախիջևան մտնելու մասին, սակայն Հայերը կրակ են բացել և հարկադրել բանագնացներին վերադառնալու Ջահրի: Այնուհետև հայտնվում է, որ նույն օրը՝ ժամը 18-ին, հաղորդագրություն է ստացվել, որ գեն. Մելիք-Մուրադովի հայկական զորամասը գրավել է Պախը և շարժվում է Ջահրիի ուղղությամբ, և որ Ջահրին պաշտպանելու համար ուղարկվել է 1-ին հեծյալ գնդի 4 էսկադրոն: Հաղորդագրության մեջ նաև ասվում է, որ «Շահթախթի հատվածում դաշնակիները ոչ մեր և ոչ էլ թուրքերի դեմ ակտիվ գործողություններ չեն ձեռնարկում»¹:

Այս հաղորդագրությունից դժվար չէ հետևություն անել, որ թեև բանակցությունների ընթացքում ռազմաճակատի գլխավոր հատվածում (Շահթախթի-Նախիջևան երկաթգծի) հայկական կողմը դադարեցրել էր ռազմական գործողությունները, բայց մյուս մասերում (Պախը և Ջահրին գտնվում են Շահթախթիից հյուսիս-արևելք) աշխատում էր ընդլայնել գրավյալ շրջանը և այնպիսի դիրքեր ձեռք բերել, որ բանակցությունների ձախողման դեպքում դուրսին լինի Նախիջևան քաղաքի գրավումը (Ջահրին Նախիջևանից հեռու է չուրջ 20-25 կմ):

Սակայն առավել ուշագրավ է հաղորդագրության այն մասը, որտեղ խոսվում է Հայերի հետ բանակցություններ վարած հեղկոմի պատվիրակության մասին: Այնտեղ ասված է, որ Երևան մեկնած Նախիջևանի հեղկոմի պատվիրակությունը վերադարձել է հուլիսի 29-ին ժամը 18-ին և բերել է Հայաստանի կառավարության նոր պայմանները, որոնց գլխավոր կետերն են. Նախիջևանի գավառը անվերապահորեն ենթարկվում է Հայաստանի կառավարությանը, հանձնում է 7 հազար հրացան և յուրաքանչյուր հրացանի համար 80 փամփուշտ, բոլոր գնդացիները, հրանոթները, 300 հազար փութ հացահատիկ, որից 150 հազարը անվճար, 300 ձի՝ իրենց թամբերով, 200 գլուխ քարչող անասուն: Հաղորդագրության վերջում հայտնելով, որ նշված պայմանների կատարման համար Հայաստանի կառավարությունը տվել է 40 ժամ

¹ Խորհրդային բանակի կենտրոնական պատմական արխիվ, Ֆ. 195, ց. 3, գ. 456, թ. 136:

ժամանակ, որը լրացել է հուլիսի 31-ին ժամը 14-ին, միաժամանակ ավելացնում է. որ «Նախիջևանի բնակչությունը՝ վստահ չլինելով, որ իր ուժերով կղիմակայի հայկական հարձակմանը, խուճապի է մատնե-ված: Ծատերը անցնում են Պարսկաստան: Նույն պատվիրակությունը հայտնում է, որ Հայաստանի ռազմական նախարարը հայտարարել է, որ նշված ժամկետից շուտ Նախիջևանի շրջանում խորհրդային զորքեր հայտնվելու դեպքում հայկական հրամանատարությունը հրաման կտրվի դուրս քշել բոլշևիկներին Նախիջևանից»¹ (ընդգծումը մերն է – է. Զ.):

Նախիջևանի պատվիրակներին Ռուբեն Տեր-Մինասյանի արած այս հայտարարությունից դժվար չէ գուշակել, որ բանակցությունների օրերին Հայաստանի կառավարությունը թեև տեղեկություններ չունեի նախիջևանցիների կողմից ռուսական զորքերի հրավիրման մասին, բայց կայնպես կասկածներ ուներ, ինչը և իրականություն դարձավ: Եվ եթե հուլիսի 29-ին, ինչպես վերը տեսանք, նրանց չհաջողվեց հայկա-կան հրամանատարության հետ կապի մեջ մտնել, ապա հաջորդ օրե-րին դա հաջողվեց, բայց ոչ թե Զահրիի, այլ Ծահթախթիի հատվածում: «Ծարուրի մեր զորամասերի գլխավորի մոտ եկան պատվիրակության անվան տակ երեք բոլշևիկ պատգամավորներ, – կարդում ենք «Հա-ռաջ»-ում հրատարակված մի հաղորդագրության մեջ, – մի ռուս սպա՝ որն իր հայտարարությամբ ներկայացուցիչ է իրեն և տաճկական զո-րաբանակի, մի տաճիկ և մի ներկայացուցիչ Նախիջևանի ուկրաին: ...Հիշյալ անձնավորությունները հատուկ պահանջներով ուղարկված են Երևան»²: Հենց այս բանագնացներն էլ Ծահթախթիում հայկական հրամանատարությանն էին հանձնել հուլիսի 30-ով թվագրված մի գրություն, որում ասված էր.

«1920թ. հուլիսի 28-ին ՌԽՖՍՀ կարմիր զորքերը, ինչպես և մեր դաշնակից կարմիր Թուրքիայի զորքերը, տրված հրամանի համաձայն, մտել են բնակիչների կողմից բոլորովին լքված Նախիջևան քաղաքը և նրա շրջանը՝ հայերի դեմ ռազմական գործողությունների նպատակ չունենալով:

Մեր ունեցած տվյալներով, Ձեր ենթակայություն տակ գտնվող զորքերը մտադիր են հարձակվել Նախիջևան քաղաքի վրա՝ նրան հրի ու սրի մատնելու համար: Թյուրիմացություններից և անտեղի ար-

յունահեղությունից խուսափելու համար, որոնք կարող են պետա-կան կարևորության հետևանքներ ունենալ, Ձեզ տեղյակ ենք պահում մեր կողմից Նախիջևան քաղաքի և նրա շրջակայքի գրավման մա-սին:

Նախիջևան քաղաքը և նրա շրջակայքը գրաված ՌԽՖՍՀ և կար-միր Թուրքիայի միավորված զորքերի հրամանատար՝ Վ. Տարխով»¹ (ընդգծումը մերն է – է. Զ.):

Գուցեև ճիշտ էր ասում հրամանատար Տարխովը, որ հայերի դեմ մարտական գործողություններ սկսելու նպատակ չունեն, բայց ուրիշ ինչպես անվանել, եթե ոչ ռազմական օկուպացիա, մի տարածքի գրա-վում, որը մինչ այդ ռուսական իշխանությունները՝ ի դեմս Գ. Չիչերինի, բազմիցս հռչակել էին Հայաստանի անբաժանելի մաս (Լ. Ծանթի պատվիրակության հետ Մոսկվայում վարվող բանակցություններում և այլն): Տարօրինակ է նաև, որ Տարխովը ներկայանում է որպես ռու-սական և թուրքական միավորված զորքերի հրամանատար: Ճիշտ է, խորամանկ Կարաբեքիրը, Կարմիր բանակին հրապուրելով մտնել Նա-խիջևան, առաջարկել էր այնտեղ գտնվող թուրքական զորամասը դնել ռուսական հրամանատարության տակ, ինչը սակայն մերժվել էր: Այս դեպքերից երկու տարի անց՝ 1922թ. Վ. Տարխովը «Военный вест-ник»-ի 8-րդ համարում հրատարակված հոդվածում («Նախիջևան քաղաքի գրավումը և Կարմիր բանակի առաջին հանդիպումը Քեմալ փաշայի զորքերի հետ») գրում է, որ այն բանից հետո, երբ հուլիսի վերջին Կարմիր բանակի հեծյալ գնդերից մեկը մտավ Նախիջևան, հուլիսի 31-ին թուրքական մի ջոկատ մյուս ափից մոտեցավ Արաքսին: Թուրքերը առաջարկեցին այդ ջոկատը դնել խորհրդային հեծելազո-րային գնդի հրամանատար Վ. Տարխովի հրամանատարության տակ, բայց այդ առաջարկը մերժվեց²:

Եթե Տարխովի գրությունը համեմատելու լինենք Նախիջևանի հեղկոմի գրության հետ, որը ևս հանձնվել էր Ծահթախթիի հայկական հրամանատարությանը՝ Հայաստանի կառավարությանը փոխանցելու համար, ապա այն կարող ենք համեստ համարել: Իսկապես որ, Նախի-ջևանի հեղկոմի գրությունը անպատկառության մի դասական օրինակ է, որի տակ զրված է հեղկոմի նախագահ Բեկտաշևի և յոթ այլ անդամ-

¹ ՀԱԱ, ֆ. 200, ց. 1, գ. 468, թ. 33:

² Տե՛ս **А. Н. Хейфец**, Советская Россия и сопредельные страны Востока, 1918-1920, М. 1964, стр. 120-121.

¹ Նույն տեղում:

² «Հառաջ», 3 օգոստոսի 1920թ.:

ների ստորագրություն: Հայաստանի կառավարությունը մեղադրելով նախիջևանցիներին ստրկացնելու իմպերիալիստական ձգտման մեջ, ամպագորգոու Հայտարարություն անելով այն մասին, որ «Նախիջևանի աշխատավոր ժողովուրդը իրեն հռչակել է Ադրբեջանի Սորհրդային հանրապետության անբաժան մասը», հեղկոմ կոչվածը այնուհետև, հաղթական կերպարանք ընդունած Հայտարարում է, թե նախիջևանը իր պայքարում «հենվում է փառապանծ, հզոր և անպարտելի ոուսական, թուրքական և ադրբեջանական Կարմիր բանակների վրա», որ «Այսուհետ ձեր բոլոր առաջարկություններով խնդրում ենք անմիջականորեն դիմել Ադրբեջանի կենտրոնական կառավարությանը և ոուսական, թուրքական և ադրբեջանական Կարմիր բանակների միացյալ հրամանատարությունը, որոնք իրենց զորամասերով սույն հուլիսի 28-ից գրավել են նախիջևանի շրջանը»¹:

Այսպես ուրիշի ուժով հոխորտալով և նախիջևանի խնդրում Հայաստանի կառավարության համար նոր հասցեատերեր մատնանշելով հանդերձ՝ հեղկոմ կոչվածը հարմար էր գտել ոչ թե իր նոր տերերի, այլ իր անունից վերջնագրային բնույթի մի պահանջ ներկայացնել Հայաստանի կառավարությանը. «Որպեսզի մեզ Հայաստանի աշխատավոր բնակչության հետ խաղաղ ապրելու հնարավորություն տրվի, ասված է գրություն վերջնամասում, - մեր կողմից առաջարկում ենք անհապաղ՝ 3-օրյա ժամկետում, դուրս բերել զորքերը Շարուրի շրջանից և թույլատրել Վեդիբասարի և Ջանգիբասարի բնակիչների անհապաղ վերադարձը իրենց գյուղերը: Հակառակ դեպքում պատասխանատվությունը կդրվի Հայաստանի կառավարության վրա: Սրա հետ մեկտեղ կյանքի և գույքի լիակատար երաշխիք ենք տալիս իրենց հարազատ գյուղերը վերադարձող հայերին»² (ընդգծումը մերն է - է. Ջ.):

Ինչո՞վ նախիջևանի հեղկոմը հարազատ գավակը չէ նարիմանովի գլխավորած Ադրբեջանի հեղկոմի. նույն կերպ՝ մեկ օրում ստեղծված, ոուսական զենքը սեփական շահերին ծառայեցնելու նույն ուղին բռնած, Հայաստանի գլխին սպառնալիքներ տեղալու նույն ոճը որդեգրած: Ամեն, ամեն ինչում Ադրբեջանի դասերը սերտած, բայց ոչ երբեք յուրացրած: Այլապես կհիշեր, որ եթե Ադրբեջանի հեղկոմի ապրիլի 30-ի վերջնագիրը այդպես էլ թղթի վրա մնաց, ապա նրա գավա-

կինը՝ Նախիջևանի հեղկոմինը, ինչո՞ւ պետք է այլ ճակատագիր ունենար:

Հայաստանի կառավարությունը նախիջևանի հեղկոմի այդ գրությունը ո՛չ քննարկեց, ո՛չ երբեք անդրադարձավ, ո՛չ էլ հայկական զորքերը Շահթախթիից ու նրա շրջակայքից հետ քաշվեցին՝ ընդհուպ մինչև Թուրք-հայկական պատերազմի երրորդ փուլը: Բայց նաև առաջ չչարժվեցին, և դա ոչ թե հեղկոմի պահանջով, այլ Սորհրդային Ռուսաստանի կառավարության, որը Թիֆլիսի իր դիվանագիտական ներկայացուցչի միջոցով հեռագրեց Համո Օհանջանյանին, թե խորհրդային զորքերը գրավել են նախիջևանը իր շրջակայքով, հետևապես «ամեն մի պատերազմական գործողություն այդ ուղղությամբ պիտի համարվի հարձակում Սորհրդային Ռուսիայի զորքերի դեմ»¹:

Անհետաքրքիր չէ իմանալ, որ այդ օրերին Հայաստանի կառավարության մոտ հատուկ ներկայացուցիչ էր ուղարկել նաև Մակվի խանը՝ խնդրելով մեկ-երկու օրով դադարեցնել հարձակումը, որպեսզի հնարավորություն ունենա իր բարեկամներին դուրս բերելու նախիջևանից²:

Այսպիսի վախճան ունեցավ հայկական զորքերի նախիջևանյան օպերացիան, այսպես Անկարան և Բաքուն օգտագործեցին ոուսական Կարմիր բանակը՝ փրկելու նախիջևանը Հայոց վրեժխնդրությունից, երկրամասի Հայ խաղաղ ու անզեն աղագբնակչության դեմ 1918-1919թթ. գործած ոճիրների համար, ոճիրներ, որոնք չի կարելի որակել այլ կերպ, քան ցեղասպանություն: Հայաստանի կառավարությունը նոր միայն հասկացավ, որ ինքը խաբված է և խաբված է հենց նախիջևանցիների կողմից, որ բոլոր այդ բանակցությունները միմիայն ժամանակ շահելու նպատակ են հետապնդել: Բայց արդեն ուշ էր, կորցրած ժամանակը ետ բերել անհնար էր: Մնում էր հարցը փոխադրել դիվանագիտության բնագավառ, փորձել երևան-Ջուլֆա-Թավրիզ երկաթուղու գործարկման խնդիրը լուծել Հայաստանում Ռուսաստանի լիազոր ներկայացուցիչ նշանակված Բ. Լեգրանի հետ բանակցությունների միջոցով: Հաջողվե՞ց դա անել՝ կտեսնենք հաջորդ գլխում:

¹ Նույն տեղում:

² Նույն տեղում, թ. 34:

¹ «Հայաստանի կոչնակ», 16 մարտի 1921թ., թիվ 13, էջ 446:

² Տե՛ս «Հառաջ», 3 օգոստոսի 1920թ.:

* * *

Ավարտելով մեր խոսքը 1920թ. մայիս-հուլիսյան հայ-ադրբեջանական և ուսու-հայկական հարաբերությունների հոլովույթում նախիջևանյան հիմնախնդրի զբաղեցրած տեղի ու նրա չուրջը ծավալված զարգացումների մասին՝ կարող ենք արձանագրել, որ

1. Ադրբեջանի խորհրդայնացումը և 11-րդ Կարմիր բանակի մուտքն Անդրկովկաս իրապես կտրուկ կերպով փոխեց ու սրեց ռազմաքաղաքական իրադրությունը տարածաշրջանում: Հայաստանի Հանրապետությունը և մասամբ Վրաստանը, հայտնվեցին երկու կրակի արանքում՝ արևելքից ռուսական Կարմիր բանակի, արևմուտքից՝ թուրք ազգայնականների (քեմալականների):
2. խորհրդային Ադրբեջանը՝ օգտվելով ռուսական 11-րդ կարմիր բանակի աջակցությունից, Հայաստանի Հանրապետության կառավարության հետ խոսում էր վերջնագրերի լեզվով, պահանջում մուսավաթական կառավարության կողմից վիճելի հայտարարված տարածքներից դուրս բերել հայկական ուժերը, ըստ այդմ էլ խուսափում վիճելի խնդիրների լուծման նպատակով Հայ-ադրբեջանական կոնֆերանսի գումարումից:
3. Հայ-ադրբեջանական տարածքային վեճերի հարցը Մոսկվայի ռուս-հայկական բանակցությունների ամենավիճահարույց ու դժվարագույն խնդիրն էր: Ռուսաստանի խորհրդային կառավարությունը, հայկական պատվիրակության պահանջները համարելով իրավացի, միաժամանակ ձգտում էր չնեղացնել իր դաշնակից Ադրբեջանին և նրա ճնշման տակ նախ Ղարաբաղը, հետո նաև Ջանգեզուրը առաջարկեց համարել վիճելի:

Միակ տարածքը, որը՝ չնայած Ադրբեջանի թափած ջանքերին, բանակցությունների ընթացքում վիճելի չհայտարարվեց, Շարուր-Նախիջևանն էր: Ռուսաստանի կառավարությունը՝ հանձին Չիչերինի, այդ գավառները հաստատապես համարում էր Հայաստանի Հանրապետության անբաժան մաս և մինչև վերջ իր այդ դիրքորոշումը չփոխեց: Նարիմանովին ու նրա խմբին ուրիշ ոչինչ չէր մնում անել, եթե ոչ գնալ զարտուղի ճանապարհով և համոզել Մոսկվային գրավելու Նախիջևանը՝ Անատոլիայի հետ անմիջական կապի հաստատման նպատակով:

4. Բանակցելով Լ. Ծանթի պատվիրակության հետ և վիճելի հայտարարված տարածքների վերաբերյալ առաջարկություններ ներկայացնելով, Մոսկվան, այնուամենայնիվ, այդ օրերին

ղեռես չէր ուզում հստակ սահմանագիծ հաստատել Հայաստանի և Ադրբեջանի միջև՝ ինչին ձգտում էին հայ պատվիրակները: Նա գերադասում էր այդ տարածքները օկուպացնել ռուսական զորքերով և սպասել «հարմար պահի»՝ դրանց ճակատագրի վերջնական լուծման համար: Ղարաբաղը գրավելուց հետո, մոսկովյան բանակցությունների այդ նույն օրերին՝ ազգամիջյան բախումներին վերջ տալու պատրվակով, 11-րդ Կարմիր բանակի զորամասերը շուտով հայտնվեցին նաև Ջանգեզուրում:

5. Մուսուլմանաբնակ ապստամբ շրջանների հնազանդեցումը Հայաստանի կառավարության համար ոչ միայն հանրապետության ներքին դրություն կայունացման, այլև արտաքին աշխարհում նրա հեղինակության խնդիր էր: Ջանգիբասարի և Վեդիբասարի գյուղախմբերի հակահայկական, հակապետական ըմբոստացումները թելադրված էին ոչ թե ազատագրական կամ սոցիալ-տնտեսական նկատառումներով, այլ հայոց պետությունը ներսից թուլացնելու, կազմալուծելու թուրք-ադրբեջանյան քաղաքականությանը: Այդ շրջաններում Ադրբեջանի կողմից ֆինանսավորվող և թուրք սպանների ու ասկյարների ղեկավարությամբ կազմակերպված մարտական ջոկատների առկայությունը լուրջ սպառնալիք էր դարձել հայոց պետականության համար: Պատժիչ զործողությունները, որ ձեռնարկեց Հայաստանի կառավարությունը կարգն ու օրինականությունը վերականգնելու ուղղությամբ, միանգամայն բնական էին և օրինական:
6. խորհրդայնացած Ադրբեջանը՝ շարունակելով մուսավաթի հակահայկական քաղաքականությունը, թուրք-քեմալականների հետ համախորհուրդ փորձում էր ամրանալ Շարուր-Նախիջևանում ոչ միայն երկու թուրքական պետությունների միջև կապի ստեղծման, այլև Հայաստանի Հանրապետության շրջափակումը կատարյալ դարձնելու նպատակով: Շարուր-Նախիջևանում Հայաստանի գերիշխանության վերականգնումը և՛ քաղաքական, և՛ տնտեսական անհրաժեշտություն էր: Դա բռնագաղթի ենթարկված հայ ազգաբնակչության հայրենի օջախներ վերադարձնելու, Ջանգեզուրի ու Պարսկաստանի հետ հաղորդակցության վերականգնման խնդիր էր: Այլ կերպ ասած՝ Հայաստանի կառավարությունը բոլորովին էլ վրեժ-խնդրություն էր չէր ղեկավարվում, նախիջևանահայության կո-

տորածների ու բռնագաղթի համար հատուցելու նպատակ չէր հետապնդում: Այդ է պատճառը, որ Շարուրը գրավելուց հետո անարգել դեպի Նախիջևան շարժվող հայկական ուժերը իսկույն կանգ առան, հենց որ Նախիջևանի մուսուլմանական ազգային խորհուրդը բանակցություններ սկսելու առաջարկ արեց: Սակայն այս անգամ էլ նա խորամանկեց ու խաբեց: Մի քանի օր տևած բանակցությունների ու զինադադարի ժամանակամիջոցը մուսուլմանական խորհուրդն օգտագործեց Ջանգեղուր մտած Կարմիր բանակի զորամասերին Նախիջևան հրավիրելու համար: Հայկական ուժերը հարկադրված եղան կանգ առնել:

ԳԼՈՒԽ ԵՐԿՐՈՐԴ

Նախիջևանյան հիմնահարցը Թիֆլիսի օգոստոսի 10-ի հայ-ուսական համաձայնագրում և Մոսկվայի ուս-թուրքական առաջին կոնֆերանսում

Բ. Լեզրանի առաքելությունը, Նախիջևանյան հիմնահարցում նրա դիրքորոշումը: Վիճելի տարածքների հարցում Օրջոնիկիձեի և Ադրբեջանի ղեկավարությունից տարբեր մոտեցումները:

Համո Յանջանյանի կառավարության դիրքորոշումը Լեզրանի հետ բանակցությունների հարցում: Պատերազմական դրությունը Հայաստանի սահմանների վրա: Կոնվյենտը Ջանգեղուրում և զինադադարի անհրաժեշտությունը:

Շարուր-Նախիջևանի խնդիրը Լեզրան-Ջամալյան բանակցություններում և ստորագրված համաձայնագրում: Շարուրի ամրակցումը Հայաստանին: Շահթախթի-Ջուլֆա երկաթուղու շահագործման հանձնումը ՀՀ երկաթուղային վարչությանը:

Օգոստոսի 10-ի համաձայնագրի դեմ ուղղված շարժումները: Անգլո-ֆրանսիացիների դժգոհությունը և Ռուսաստանի դեմ պատերազմը շարունակելու պահանջը: Շարուր-Նախիջևանը Հայաստանին հանձնելու անթույլատրելիության վերաբերյալ Բ. Շահթախթինսկու նամակը Լենինին: Կարմիր բանակի հետ կապի հաստատման պատրվակով Շահթախթին և Սարիղամիշը գրավելու թուրքական պահանջի բավարարումը Մոսկվայի կողմից և օսմանյան պառլամենտի ընդունած «Ազգային ուխտի» ճանաչումը:

Շարուրի տնտեսական նշանակությունը Հայաստանի համար. Իրանի հետ առևտրական կապերի վերականգնման և զաղթականներին վերաբնակեցնելու հնարավորությունը:

1920թ. Հուլիս-օգոստոսին Նախիջևանի երկրամասում ծավալված ուսուցիչական գործողություններին զուգընթաց ոչ պակաս համառ ու անզիջում պայքար էր ընթանում դիվանագիտական շրջանակներում: Կարմիր բանակի օգնությունը կանգնեցնելով հայկական բանակի

Հաղթական առաջխաղացումը Նախիջևանում՝ Բաքուն և Անկարան միաժամանակ դիվանագիտական ակտիվ քայլեր են ձեռնարկում երկրամասը Հայաստանից անջատելու ուղղությամբ: Իսկ դրա համար անհրաժեշտ էր ստանալ Սորհրդային Ռուսաստանի համաձայնությունը: Ինչպիսի՞ն էր Կրեմլի դիրքորոշումը Հայաստանի համար կենսական նշանակություն ունեցող այդ խնդրում, ինչպիսի՞ն ընթացք ունեցավ այդ հարցը 1920թ. հուլիս-օգոստոսյան հայ-ռուսական և ռուս-թուրքական բանակցություններում: Ահա այն հարցերը, որոնց լուսաբանությունը կանդրադառնանք այս գլխում:

Նախորդ գլխում տեսանք, որ Լ. Շանթի պատվիրակության հետ բանակցություններում ցանկալի արդյունքի չհասնելով, Գ. Չիչերինը որոշեց ընդհատել դրանք և Բ. Լեգրանի գլխավորությամբ մի պատվիրակություն ուղարկել Երևան՝ բանակցություններն անմիջականորեն Հայաստանի կառավարության հետ վարելու նպատակով: Վերջինս էլ Կովկաս մեկնելուց առաջ՝ հուլիսի սկզբին, իր խորհրդական Ս. Տեր-Գաբրիելյանի հետ միասին, հանդիպեց Լ. Շանթի պատվիրակությանը և հանգամանալից զրույց ունեցավ հայ-ադրբեջանական հարաբերությունների շուրջ:

Զրույցի ընթացքում հայ պատվիրակները հնարավորություն ունեցան համոզվելու, որ Լեգրանը շատ ավելի բայրացակամորեն է տրամադրված վիճելի տարածքների հարցում, քան նույնիսկ Չիչերինը. նա խոստացավ Երևանում կնքվելիք պայմանագրով Հայաստանին թողնել ոչ միայն Շարուր-Նախիջևանը, այլև Զանգեզուրը: Բայց թե նա ինչպե՞ս պետք է չափավորեր Ադրբեջանի ախորժակը, եթե դա չէր կարողացել անել Չիչերինը, մնացել էր անհայտ: Այդ է պատճառը, որ հայ պատվիրակները առանձնապես չէին ոգևորվել Լեգրանի խոստումներով: Ասենք, չուտով ինքը՝ Լեգրանն էլ դեռ մինչև Կովկաս հասնելը, առիթ ունեցավ համոզվելու, որ հայ-ադրբեջանական տարածքային վեճերը դժվար լուծելի խնդիրներից են, որ Կովկասում գործող կոմունիստներին հետաքրքրում են ոչ թե հարցերի արդարացի լուծումը, այլ դրա քաղաքական հետևանքները և որ այդ արատներից զերծ չէ նաև Կովկասում գործող գլխավոր կոմունիստը՝ Գ. Օրջոնիկիձեն: Վերջինս ի վիճակի էր խեղաթյուրված տեղեկատվությամբ ազդելու Մոսկվայի քաղաքականության վրա: Դրանում համոզվելու առիթ դեռ կունենանք, իսկ այստեղ վկայաբերենք մեկը, որն անմիջականորեն առնչվում է մեր թեմային. «Նախիջևանը, Օրդուբադը և այդ չրջանի հյուսիսային մասը գրավված են Բայազետի, թուրքական դիվիզիայի կողմից, որի կազմում 9 հազար սվին է հաչվվում, - ասված է հուլիսի

սկզբներին¹ Լենինին, Ստալինին, Չիչերինին ուղարկած նրա մի հեռագրում, - մեր ճշտած տեղեկություններով այդ դիվիզիայի պատվիրակության հետ մենք արդեն հանդիպել ենք: Լեոնային Ղարաբաղից Դրոյի գլխավորությամբ դաշնակցական զորքերի հեռանալը պատճառաբանվում է բացառապես այդ զորամասերի կողմից Նախիջևանի և նրա չրջանի գրավման վտանգով: Հայաստանի կառավարությունը գիտակցաբար ձեզ սխալ տեղեկատվություն է հաղորդում...»² (ընդգծումը մերն է - է. Զ.):

Եթե հիշենք, որ Դրոյի զորամասը Լեոնային Ղարաբաղից հետ է քաշվել մայիսի 25-ին, իսկ Բայազետի թուրքական դիվիզիայի 300 հոգուց բաղկացած ջոկատը Նախիջևան էր մտել հուլիսի 2-ին և հաստատվել Շահթախիթում, ապա պարզ կլինի, թե ով է գիտակցաբար սխալ տեղեկատվություն տալիս Մոսկվային: Ոչ բուն Նախիջևանում, ոչ Օրդուբադում և հատկապես հայերի հսկողության տակ գտնվող նրա հյուսիսային մասում թուրքական ուժեր չկային և դա հայտնի էր Օրջոնիկիձենին: Միակողմանիորեն պաշտպանելով Ադրբեջանի շահերը, այդ նույն հեռագրում նա հայտնում է. «Այսօր Գաբրիելյանը³ հայտնեց ինձ, որ Շարուր-Դարալագյազի գավառից և Նախիջևանի չրջանից Ադրբեջանի հրաժարվելու դեպքում, հայկական պատվիրակությունը կհամաձայնի Լեոնային Ղարաբաղը և Զանգեզուրը անհապաղ Ադրբեջանին միացնելուն: Մենք նրանց հետ պայմանավորվել ենք, որ Բաքու ժամանելուն պես այդ ոգով խոսակցություն կվարենք Նարիմանովի հետ...»⁴: Այնուհետև խոսացնելով գույները, նա իր խորին համոզմունքն է հայտնում, թե Ադրբեջանում խորհրդային իշխանության ամրապնդման և Բաքուն մեզ պահելու համար անհրաժեշտ է միացնել այդ գավառները, որոնց ինքնավարություն կտրվի և այլն, և այլն: Բայց ոչինչ չի ասում, թե Ս. Տեր-Գաբրիելյանը ո՞ւմ է ներկայացնում, ո՞ւմ անունից է նման երաշխիք տալիս: Դա չի անում նաև Չիչերինին ուղարկած հաջորդ հեռագրում, որտեղ դարձյալ պնդում է վիճելի տարածքների բաժանման իր տարբերակի վրա՝ վկայակոչելով Ս. Տեր-Գաբրիելյանին. «Տեսակցել եմ Լեգրանի և Տեր-Գաբրիելյանի հետ: Հարցը դրված է այսպես. Ադրբեջանը պնդում է Ղարաբաղի և Զանգե-

¹ Հրապարակված փաստաթղթի վրա ամսաթիվը նշված չէ:

² «К истории образования Нагорно-Карабахской автономной области Азербайджанской ССР, 1918-1925, документы и материалы», Баку, 1989, с. 32:

³ Սուրբ Սահակ Տեր-Գաբրիելյանի մասին է:

⁴ «К истории образования НКАО...», с. 32:

գուրի անհապաղ և անվերապահ միացման վրա: ...Տեր-Գաբրիելյանի խոսքերով հայկական պատվիրակությունը անպայման դրան կգնա: Հարցի նման լուծման դեպքում Ադրբեջանին կարելի է հարկադրել հրաժարվելու մնացած մարզերից»¹: Ավելորդ չենք համարում նշել, որ իր տեսակետը հիմնավորելու համար Օրջոնիկիձեն մատնանշում էր և՛ Ղարաբաղի ու Ջանգեղուրի տնտեսական կապը Բաքվի հետ, և՛ Բայազետի թուրքական դիվիզիայի կողմից դրանց գրավման ու, որպես հետևանք, հայ բնակչության ջարդը, և այն որ ինքը կհարկադրի Ադրբեջանին այդ մարզերին ինքնավարություն տալ և այլն:

Ինչպես տեսնում ենք, թեև Օրջոնիկիձեն Ջանգեղուրի հարցում հակադրվում է վիճելի տարածքների բաժանման Չիչերինի տարբերակին (Ղարաբաղը՝ Ադրբեջանին, Ջանգեղուրը՝ վիճելի, Շարուր-Նախիջևանը՝ Հայաստանին), բայց ևս այնպես Շարուր-Նախիջևանի հարցում այդ օրերին դեռևս կայուն կերպով կանգնած էր Հայաստանին տալու տեսակետի վրա: Դա ակնհայտ երևում է նաև Նարիմանովի հետ նրա հեռախոսագրուցից, որտեղ ի պատասխան Նարիմանովի դժգոհություն, թե Մոսկվան Հայաստանի հետ պայմանագիր է կնքել և վիճելի տարածքների հարցում մեծ զիջումներ է արել, ասում է. «Հիմա ես խոսել եմ Չիչերինի հետ Ղարաբաղի և Ջանգեղուրի կապակցությամբ: Ես առաջարկում եմ այդ մարզերը անհապաղ և անվերապահորեն միացնել Ադրբեջանին, դուք էլ հրաժարվում եք մյուս մարզերի նկատմամբ հավակնությունից և Լեռնային Ղարաբաղին ու Ջանգեղուրին ինքնավարություն եք տալիս»²: Այնուհետև առաջարկելով հայտնել, թե որքանով նպատակահարմար է համարում հարցի նման լուծումը ու տեղեկացնելով հաջորդ օրը Բաքու գնալու իր մտադրություն մասին, վերջում ամփոփում է. «Առաջին, բացի Ղարաբաղից և Ջանգեղուրից դուք ներկայացրել եք հավակնություններ նաև Նախիջևանի, Շարուր-Դարալագյազի գավառի և Օրդուբադի նկատմամբ: Երկրորդ, որտեղի՞ց է ձեզ հայտնի, որ Հայաստանի հետ արդեն հաշտություն է կնքվել: Երրորդ, ինչպե՞ս է ձեզ մոտ գործը հացի առումով և ընդհանրապես: Չորրորդ, այսօր Տիխորեցկում տեսել եմ Ուլիլ փաշային, որը Լեզգանի հետ միասին գալիս է ձեզ մոտ»³:

Նախորդ գլխում տեսանք, որ մոսկովյան բանակցություններում, առավելագույնը, ինչին համաձայնել էր Շանթի պատվիրակությունը,

Ղարաբաղը և Ջանգեղուրը վիճելի հայտարարելն էր և ոչ Ադրբեջանին հանձնելը: Ուրեմն ո՞վ է խեղաթյուրված ներկայացնում իրականությունը՝ Տեր-Գաբրիելյանը թե՞ Օրջոնիկիձեն: Այս հարցին միանշանակ պատասխան տալ հնարավոր չէ, թեև Օրջոնիկիձեն ուղարկած հուլիսի 9-ի հեռագրում Չիչերինը դա վերագրում է Ս. Տեր-Գաբրիելյանին: «Հայկական պատվիրակությունը մեզ հայտարարել է, որ համաձայն է վիճելի ճանաչել միայն Ղարաբաղը, բայց ոչ Ջանգեղուրը և մնացածը, – ասված է հեռագրում: – Ես տեսել եմ Գաբրիելյանին նրա մեկնելուց անմիջապես առաջ և նա ասաց ինձ, որ հայկական պատվիրակությունը վերջապես համաձայնել է վիճելի ճանաչել և՛ Ղարաբաղը, և՛ Ջանգեղուրը, բայց խոսքը գնացել է վիճելիության ճանաչման մասին և ոչ անհապաղ ու լիակատար հանձնման: ...Ինձ թվում է, որ Գաբրիելյանի օպտիմիզմը հիմնված է մեծ թյուրիմացության վրա»¹ (ընդգծումը մերն է – է. Զ.):

Հեռագրում Չիչերինը նաև կարծիք է հայտնում, թե եթե Լեզգանին հաջողվի հաշտեցնել հայկական և ադրբեջանական կառավարություններին, դա «փայլուն արդյունք կլինի», և բողոքում է այն մեղադրանքի դեմ, որ ինքը «իբրև հաշվի է նստում միայն մի կողմի հետ և ոչ մյուսին»²:

Սակայն Բաքուն մտադիր չէր հրաժարվել Շարուր-Նախիջևանից: Նարիմանովը և նրա խումբը շատ խորամանկ քաղաքականություն էին վարում. լուծված համարելով Ղարաբաղի և Ջանգեղուրի հարցը (հուլիսի 4-ին կարմիր բանակի զորամասերը մտել էին Գորիս), հիմա նրանք առաջ էին քաշում Նախիջևանը ոռուսական զորքերով գրավելու տարբերակը, ինչը, իբրև թե կնպաստի Անատոլիայում ազգայնական շարժման ծավալմանն ու զարգացմանը: Հուլիսի 10-ին ՌԿ(Բ)Կ Կենտրոնում ուղարկած գրություն մեջ երկար-բարակ դատողություններ անելով այն մասին, թե որքան կարևոր է Ադրբեջանում խորհրդային իշխանությունից ամրապնդման համար Ղարաբաղի և Ջանգեղուրի միացումը, Նարիմանովի խմբի անդամները միաժամանակ ավելացնում են. «Ջանգեղուրի ամրակցումը խորհրդային իշխանությունը, բացի նշածից, Նախիջևանի շրջանում և Անատոլիայում թուրքական հեղափոխական շարժման հետ մեր կապը վերականգնելու և ամուր թիկունք ստեղծելու նշանակություն կունենա»: Գրություն մեջ ասված է, թե

¹ Նույն տեղում, էջ 34:

² Նույն տեղում, 33:

³ Նույն տեղում, էջ 34:

¹ „Геноцид армян...“, стр. 94.

² Նման մեղադրանք կար հուլիսի սկզբին Լենինին, Ստալինին, Չիչերինին հասցեագրած Օրջոնիկիձեի հեռագրում:

Հակառակ լուծումը մուսուլմանական մասսան «կհամարի դավաճանություն, հայամետություն կամ խորհրդային իշխանության թուլություն: Ե՛վ դա, և՛ մյուսը կարող է խորհրդային իշխանության դեմ լարված ապստամբության պատճառ դառնալ, Ղարաբաղում և Ջանգեզուրում դաշնակիների հաստատումը կխախտի հեղափոխության զարգացումը Թուրքիայում՝ զրկելով նրանց մեր օգնությունից և դրանով իսկ ստեղծելով նրանց համար սպառնալից թիկունք»¹ (ընդգծումը մերն է - է. Զ.): Հետաքրքրությունից զուրկ չէ այն հանգամանքը, որ Բաքվում գործող բոլշևիկյան ղեկավարների հետ մեկտեղ (Նարիմանով, Մդիվանի, Միկոյան, Նանեչվիլի) փաստաթղթի տակ կան նաև 11-րդ բանակի ռազմահեղափոխական խորհրդի անդամներ Վեսնիկի, Լևանդովսկու և Միխայլովի ստորագրությունները: Իսկ դա նշանակում է, որ Բաքվի ղեկավարությունը հաջողվել էր զինվորական վերնախավին վարակել հակահայկական ախտով և օգտագործել նրանց իր նվաճողական հեռահար ծրագրերի իրագործման համար:

Մեզ հայտնի չէ, թե Բաքու ժամանած Օրջոնիկիձեն ինչ խոսակցություն է ունեցել Նարիմանովի հետ վիճելի տարածքների շուրջը: Բայց արխիվներում պահպանված են երկու փաստաթուղթ թվագրված հուլիսի 14-ով և 15-ով, որոնք վկայում են, որ անգամ եթե Նարիմանովը համաձայնել է Օրջոնիկիձեի հետ, ապա միայն առերես: Դրանցից առաջինը Օրջոնիկիձեի և Լեգրանի ստորագրությամբ Բաքվից Ջիզերին ուղարկած հեռագիր է, որում ասված է. «Անհրաժեշտ ենք համարում հարցի այնպիսի լուծում, որը մասամբ կարող է բավարարել Ադրբեջանին. Ղարաբաղը ամբողջովին և անվերապահորեն միացվում է Ադրբեջանին, Ջանգեզուրը հայտարարվում է վիճելի, մնացած մարզերը... մնում են Հայաստանին»² (ընդգծումը մերն է - է. Զ.):

Ինչպես տեսնում ենք, Բաքվում լույս տեսած փաստաթղթերի ժողովածուում տեղ գտած այս հեռագրից դիտավորյալ հանված են մնացած մարզերի անունները: Բայց պարզից էլ պարզ է, որ խոսքը Նախիջևանի, Շարուր-Ռարայազյազի և Օրդուբադի մասին է: Դա պարզ երևում է Ջիզերինի պատասխան հեռագրից. «Ստացվել է Ձեր հարցումը Ադրբեջանի և Հայաստանի հետ բանակցությունների մասին: Ջիզերինը կողջունի, եթե հայերը ընդունեն այդ որոշումը: Եթե նրանք համաձայնեն իսկույնների հրաժարվել ամբողջ Ղարաբաղից և Ջանգեզուրը ճանաչել վիճելի՝ պայմանով, որ Նախիջևանը ճանաչվում է նրանցը,

Ջիզերինը ուրախ կլինի այդպիսի ելքից: Ձեր խնդիրն է հասնել դրան էրիվանում»¹:

Ինչպես տեսնում ենք, Ջիզերինը նախկինի պես կանգնած է Շանթի պատվիրակության հետ առաջ քաշված տարբերակի վրա: Մինչդեռ Ադրբեջանը միանգամայն այլ գիծ էր վարում, ինչի մասին է վկայում մյուս փաստաթուղթը, որը մի պարզ քաղվածք է Ադրբեջանի Կոմկուսի Կենտկոմի բյուրոյի հուլիսի 15-ի նիստի արձանագրությունից: Պարզվում է, որ այդ նիստում լավել է նաև «Հայաստանի հետ հաշտության հարցը» և որ նիստին՝ Կենտկոմի անդամներից բացի, մասնակցել են նաև Օրջոնիկիձեն, Լեգրանը և 11-րդ բանակի ռազմահեղափոխական խորհրդի ներկայացուցիչները: Հայաստանի նկատմամբ նվաճողական տրամադրություններով զինվորականներին նիստին հրավիրելու նարիմանովյան մարտավարությունն արդարացվեց, ընդունված որոշումներն ամբողջովին բխում էին Ադրբեջանի շահերից: Ահա դրանք.

«1. Ղարաբաղը և Ջանգեզուրը պետք է միացվեն Ադրբեջանին.

Նախիջևանից և մյուսներից հրաժարվել, առաջարկել օկուպացնել ռուսական զորքերով.

Ընկ. Լեգրանին առաջարկել ժամանակավորապես՝ մինչև Հայաստանում դրություն մասին լրիվ ինֆորմացիայի ստացումը, հաշտություն չստորագրել:

Հայաստանին առաջարկել բանակցությունների ընթացքում, ժամանակավորապես, ռազմական գործողությունները դադարեցնել»² (ընդգծումը մերն է - է. Զ.):

Այսպես է Ադրբեջանը լուծում վեճերը. Ղարաբաղը և Ջանգեզուրը վերցնում է իրեն, իսկ Նախիջևանից և մյուսներից հրաժարվում է, բայց ոչ հօգուտ Հայաստանի, այլ առաջարկում է օկուպացնել ռուսական զորքերով, որպեսզի հետո իր հայտնի և գաղտնի գործակալների միջոցով անհրաժեշտ աշխատանք տանի դրանց ևս տիրանալու համար՝ չբացառելով նաև կաշառքը, ինչպես որ դա անում էր Ջանգեզուրում: Ձենք կարծում, թե Օրջոնիկիձեն գոհ է մնացել Ադրբեջանի ԿԿ Կենտկոմի բյուրոյի այս որոշումից: Նախ՝ որովհետև այն կատեգորիկ բնույթ է կրում և, ըստ էության, պայմաններ է թելադրում Ռուսաստանին՝ Հայաստանի հետ պայմանագրի ստորագրման հարցում: Եվ հետո, ինչոր չափով ջրում է նախորդ օրը Ջիզերինին ուղարկած իր հեռագրի

¹ “К истории образования НКАО...”, с. 55-56.

² Նույն տեղում, էջ 56:

¹ «Հայաստանի Հանրապետությունը 1918–1920թթ., փաստաթղթերի և նյութերի ժողովածու», Եր., 2000, էջ 257:

² “К истории образования НКАО...”, с. 57.

բովանդակությունը: Այդ նիստի սղագրական արձանագրությունը պահվում է Բաքվի արխիվներում, հետևապես չենք կարող ասել, թե քննարկումներն ինչպես են ընթացել, բայց հաջորդ օրը «Լենինին, Ստալինին, Ջիզերին» հասցեագրած Օրջոնիկիձեի հեռագրերից դժվար չէ գուշակել, որ այն անցել է ազգայնականության թունդ մթնոլորտում: Այդ օրը Օրջոնիկիձեն նույն հասցեով երկու հեռագիր է ուղարկել, մեկը՝ հակիրճ, մյուսը՝ ավելի ընդարձակ: Առաջինում ասված է. «Իմ բացակայության մեկ ամսվա ընթացքում այստեղ տրամադրությունը նկատելիորեն փոխվել է: Սիստեմատիկ անտեսումը տվել է իր պտուղները: Բացարձակապես անհրաժեշտ եմ համարում Հայաստանի հետ հաշտության հարցում սպասել մինչև Ադրբեջանի ներկայացուցչի ժամանումը, որը ճանապարհվում է այսօր համաձայն ընկ. Ջիզերինի հրավերի»¹: Երկրորդ հեռագրի առաջին պարբերությունը քիչ է տարբերվում առաջինից: Նրանում ասված է. «Բացարձակապես անհրաժեշտ եմ համարում Հայաստանի հետ հաշտության հարցում սպասել մինչև Ադրբեջանի ներկայացուցչի գալը, որը ճանապարհվել է ընկ. Ջիզերինի հրավերով, - ասված է այդ հեռագրում: Առանց Ադրբեջանի մասնակցության Հայաստանի հետ հաշտությունը խիստ նյարդայնացնում է այստեղի ընկերներին: Մեկ ամսվա իմ բացակայության ընթացքում մեծ թերում է կատարվել դեպի նացիոնալիզմը...»:

Նման նախաբանից հետո տրամաբանական կլինեք, եթե Օրջոնիկիձեն քննադատական խոսք ասեր Ադրբեջանի տարածքային նկրտումների մասին, դատապարտեր այն: Բայց նա ոչ միայն այդպես չի վարվում, այլև, մարդասիրական կեղծ դիմակ հագած, փորձում է հիմնավորել Նախիջևանի երկրամասը ուսական գործերով գրավելու Ադրբեջանի Կոմկուսի Կենտկոմի հուլիսի 15-ի որոշումը. «Նախիջևանի շրջանում անխուսափելի է կոտորածը հայերի և թաթարների միջև, - ասված է Օրջոնիկիձեի վերոհիշյալ հեռագրում: Կարելի է խուսափել դրանից միմիայն մեր առաջխաղացումով և Նախիջևանի շրջանի օկուպացումով: Մենք փորձեցինք թեկուզ հետախուզություն կատարել այդ ուղղությամբ, բայց այդ շրջանում մեր ուժերի անբավարարության մասին ՀՌ-ՀՆ Հայտարարությունը (կանխեց այն - է. Ջ.)

Քաղաքական իրադրությունը պահանջում է թույլ չտալ կոտորած Նախիջևանի շրջանում, ինչն անխուսափելի է՝ առանց մեր միջամտության: Ես կարծում եմ, որ կարելի է առաջխաղացումը շարունակել՝ հե-

տախուզության նպատակով: Ես այսօր կկապվեմ Ջիզերինի հետ և, եթե նա չհամաձայնի, մենք մեր հետախուզությունը ետ կբերենք: Կրկնում եմ, հետախուզությունն անհրաժեշտ է...»¹ (ընդգծումը մերն է - է. Ջ.):

Օրջոնիկիձեի վարքագիծը քաղաքական արկածախնդրության տիպիկ օրինակ է: Առաջխաղացման միջոցով հետախուզություն սովորաբար կատարվում է պատերազմական դրության պայմաններում՝ հակառակորդի ուժերի մասին պատկերացում կազմելու նպատակով: Նախիջևանում այդ օրերին հայկական ուժեր չկային և Ռուսաստանն էլ Հայաստանին պատերազմ չէր հայտարարել: Ջորջ մտցնել մի տարածք, որը Հայաստանի մաս է ճանաչված հենց իր կատարարության կողմից, նշանակում է հրահրել և առաջ բերել պատերազմական դրություն այդ երկրների միջև: Արդյո՞ք դա արկածախնդրություն չէ: Ինչ վերաբերում է Հայ-ադրբեջանական կոտորածի անխուսափելիության խնդրին, ապա հուլիսյան այդ օրերին հայկական զորքերը Վեդիբասարի գրավումից հետո դեռ նոր անցել էին Գայլի Դրունքը և մտել Ծարուրի դաշտ: Ըստ որում, ազգամիջյան կոտորած չէր եղել ոչ միայն այդ օրերին, այլև հետագայում, երբ հայկական զորամիավորումները ավելի առաջ էին անցել: Նաև չի արձանագրված խաղաղ բնակչության նկատմամբ զորքերի կողմից բռնության որևէ դեպք: Ուրեմն վստահ կարելի է ասել, որ Օրջոնիկիձեին (և նաև Բաքվի ղեկավարությանը) անհանգստացնողը ոչ թե ազգամիջյան կոտորածի հավանականությունն էր, այլ Ծարուրի և Նախիջևանի ընդարձակ շրջանները հայերի կողմից գրավվելու հնարավորությունը: Իհարկե, մենք այն կարծիքին չենք, թե Օրջոնիկիձեն և Նարիմանովի խումբը Նախիջևանի հարցում նույն մոտիվներով էին ղեկավարվում, ո՛չ: Օրջոնիկիձեին հետաքրքրողը Նախիջևանի վրայով քեմալականների հետ կապի հաստատումն էր, իսկ Նարիմանովը և նրա շրջապատը օգտագործում էին բոլշևիկյան ղեկավարության այդ ձգտումը ազգային խնդիրներ լուծելու համար: Այլ կերպ ասած, Օրջոնիկիձեին այս խնդրում հակահայկական մոլուցքը չէր ղեկավարում, այլ Անտանտի դեմ պայքարի և համալսարհային հեղափոխության: Բայց որ դրանով իսկ նա կամա թե ակամա ջուր էր լցնում Բաքվի ազգայնականների ջրաղացին, դա փաստ է:

Խորհրդային Ադրբեջանի ղեկավար շրջաններում ազգայնական-համաթուրքական տրամադրությունների առկայության մասին

¹ Российский гос. архив социально-политической истории (РГАСПИ), оп. 14, д. 5, п. 12.

¹ Նույն տեղում, թ. 13:

Հայտնվում է նաև Բաքվում ՀՀ դիվանագիտական ներկայացուցիչ Մ. Հարությունյանի հուլիսի 31-ի նամակ-գեկուցագրում: Հայտնելով այն մասին, որ Զանգեզուրի, Նախիջևանի, Շարուրի վրայով Թուրքիային միանալու ծրագիրը, որը «մուսաֆաթական իշխանություն վերջին օրերին կարծես թե բոլորովին լքված էր, այժմ հարություն է առել հսկայական ծավալով և շատ մեծ թափով» և որ այդ նպատակի համար Մոսկվա են ուղարկվում հատուկ պատվիրակություններ, ավելացնում է, որ նաև «ուղարկել է մի հատուկ պատվիրակություն, որի մեջ մտնում են գլխավորաբար ոչ-կոմունիստ ուժեր Մամեդ Հասան Հաջինսկու նախագահությամբ: Այդ պատվիրակությունը հրահանգ ունի պահանջել իրենց տերիտորյալ ծրագրի իրագործումը այն պատճառաբանությամբ, որ Ադրբեջանի մուսուլմանության համակրանքը գրավելու միակ միջոցն այն է, որ Ադրբեջանին կցվեն որ միայն Ղարաբաղն ու Զանգեզուրը, այլև Նախիջևանը, Շարուրը և Մուրմալուն: Այդ տեսակի քարտեզներ ներկայումս զարդարում են Հեղկոմի նախագահի և քարտուղարի սենյակների պատերը»¹:

Որոհողային Ադրբեջանի ղեկավար շրջաններում ազգայնական-հակահայկական տրամադրությունների առկայության մասին արխիվներում փաստերի պակաս չկա: Բայց, կարծում ենք, վերը բերվածներն էլ բավարար են դրանում համոզվելու համար: Միայն ուզում ենք ավելացնել, որ Հենց այդ տրամադրությունների առկայությամբ պետք է բացատրել նաև այն իրողությունը, որ Ադրբեջանը ամեն կերպ խուսափում էր Հայ-ադրբեջանական կոնֆերանս գումարելու հայկական կողմի առաջարկից: Ճիշտ է, հուլիսի 2-ին Թիֆլիսում Հուսեյնովի և Տ. Բեկզադյանի միջև մի համաձայնություն էր կայացվել, իսկ 10-ին էլ նոտաների փոխանակություն էր կատարվել կողմերին հետաքրքրող այն հարցերի շուրջ, որոնք պետք է լուծում ստանային գումարվելիք կոնֆերանսում, սակայն օրերն անցնում էին, բայց կոնֆերանսը չէր գումարվում: Հուլիսի 12-ին արտգործոցը Գ. Չիչերինին (պատճեն՝ Լևոն Շանթին և Թիֆլիսում ՌԽՖՍՀ լիազոր ներկայացուցիչ Ս. Կիրովին) հղած նոտայում վարչապետ և արտգործնախարար Համո Օհանջանյանը՝ բողոքելով Զանգեզուրում ուսական գործերի առաջխաղացման դեմ և մատնանշելով, որ դա Հայաստանի մարմնի վրայով Թուրքիային միանալու մուսաֆաթական ծրագրի իրագործման նպատակով է արվում, միաժամանակ շեշտում է, որ Ադրբեջանում

խորհրդային կարգերի հաստատումից հետո Հայաստանի կառավարությունը բոլոր վիճելի հարցերը կոնֆերանսում լուծելու առաջարկ է արել, բայց միայն այժմ՝ կրկնակի առաջարկությունից հետո է Ադրբեջանը համաձայնել: Կարծելով, թե ուսական գործերի առաջխաղացումը կատարվում է «Հայաստանի սահմանների և իրերի իսկական դրության մասին ուսական հրամանատարության անտեղյակության հետևանքով», Օհանջանյանը նաև խնդրում է կարգադրություն անել ուսական գործերը Լեոնային Ղարաբաղից և Զանգեզուրից դուրս բերելու մասին, որով հնարավորություն կստեղծվի այդ հարցերը խաղաղորեն լուծելու առաջիկայում գումարվելիք Հայ-ադրբեջանական կոնֆերանսում²:

Ադրբեջանը չահագրգռված չէր կոնֆերանսի հարցում, քանի որ դա կարող էր խանգարել նրա նվաճողական պլաններին: Մինչդեռ Կարմիր բանակի զորամասերը հուլիսին արդեն Զանգեզուրում էին և պատրաստվում էին Նախիջևան մտնել: Այսպիսի պայմաններում Բաքվի մտահոգության գլխավոր խնդիրը գրաված տարածքները Ադրբեջանին ամրագրելն էր և ոչ թե այդ խնդիրների խաղաղ լուծումը: Բողոքելով այդ ամենի դեմ՝ Տ. Բեկզադյանը հուլիսի 13-ին հատուկ գրությամբ դիմում է Կիրովին, տեղեկացնում Ադրբեջանի արդգործ-ժողկոմ Հուսեյնովից ստացած պատասխան նոտայի մասին, որում սակայն բացակայում է կոնֆերանսի գումարման կապակցությամբ առաջ քաշված մի շարք պայմանների պատասխանը, հետևություն անում, որ դա հարցի ձգձգում է նշանակում, և խնդրում՝ ազդել Բաքվի վրա այդ ուղղությամբ, ինչպես նաև կանխել Հայաստանի Հանրապետության տարածք թափանցելու ադրբեջանական գործերի փորձերը³: Հուլիսի 22-ին պատասխանելով Կիրովին՝ Բեկզադյանը կրկին առաջ է քաշում կոնֆերանսի գումարման վայրի (Հայաստանը առաջարկում էր Թիֆլիսը՝ որպես չեզոք տարածք, Ադրբեջանը՝ Ղազախը) և Ադրբեջանից Հայերի անարգել Հայաստան գաղթելու խնդիրը, որը սակայն չէր արժանանում Բաքվի ղեկավարության համապատասխան արձագանքին³:

Այսպես խուսափելով վիճելի հարցերի խաղաղ կարգավորումից, Բաքվի ղեկավարությունը միաժամանակ եռանդուն ջանքեր էր գործադրում Կարմիր բանակի կողմից գրաված հայկական տարածքները

¹ Տե՛ս նույն տեղում, ֆ. 278, ց. 1, գ. 35, թ. 37:

² Տե՛ս նույն տեղում, գ. 38, թ. 123:

³ Տե՛ս նույն տեղում, գ. 35, թ. 27:

¹ ՀԱԱ, ֆ. 200, ց. 1, գ. 1, թ. 3-4:

Աղբրեջանին միացնելու ուղղությունը: Այդ նպատակի համար օգտագործվում էր ոչ միայն տեղական բուլճարիկների օգնությունը խորհուրդների (սովետների) ձևով իշխանությունների մարմիններ ստեղծելու հնարավորությունը, այլև քարոզչությունը, կաշառքը, գործակալների միջոցով տարվող քայքայիչ աշխատանքը և այլն: Դա առանձնապես ցայտուն կերպով դրսևորվել է Ջանգեզուրում, որտեղ հուլիսի երկրորդ կեսին արյունահեղ կոմիսներ էին ընթանում հայկական ուժերի և Ջանգեզուր ներխուժած Կարմիր բանակի զորամասերի միջև, որոնց կազմում կար նաև Ռուսաստանում գերություն մեջ գտնվող օսմանյան թուրքերից կազմված մեկ գունդ: Արխիվներում բավականաչափ փաստեր են պահպանվել այդ գնդի ասկյարների կողմից հայկական գյուղերում իրագործած բռնությունների, գնդակահարությունների, կանանց և աղջիկների բռնաբարությունների և այլնի մասին: Այդ ամենին մենք չենք անդրադառնում, քանի որ Ջանգեզուրի խնդիրը դուրս է մեր ուսումնասիրության շրջանակներից: Բայց հենց Ջանգեզուրում և Նախիջևանում տեղի ունեցող իրադարձություններն էլ, որոնք ընթանում էին ոչ հօգուտ հայկական ուժերի, հարկադրեցին Հայաստանի կառավարությունը վերանայել իր որոշումը Լեզրանի հետ բանակցությունների հարցում և հաշտության համաձայնագիր ստորագրել, թեկուզ՝ ժամանակավոր:

* * *

Լեզրանը ձգտում էր օր առաջ Երևան հասնել: Դեռ Հայաստանի կառավարության համաձայնությունը չստացած, նա Բաքվից շարժվել էր Աղստաֆա՝ Երևան անցնելու մտադրությամբ, բայց այստեղ 4 օր մնալուց հետո, անցել էր Թիֆլիս: Հուլիսի 19-ին Թիֆլիս՝ Լեզրանին հասցեագրած հեռագրում Ջիզերինը տեղեկացնում է, որ անհրաժեշտ նյութերը արդեն ուղարկվել են, բայց Երևանից մուտքի վիզաներ դեռ չեն ստացել¹:

Հ. Օհանջանյանի կառավարությունը գտնում էր, որ Լեզրանին չի կարող ընդունել իբրև ղեկավար, քանի որ պայմանագիր չի կնքված և չի կարող ընդունել նաև բանակցությունների համար, քանի որ Շանթի պատվիրակությունը դեռ չի վերադարձել և կառավարությունը լիարժեք ինֆորմացիա չունի նրա վարած բանակցությունների մասին: Այդ կապակցությամբ հուլիսի 20-ին հեռագրելով Թիֆլիս՝ Տ. Բեկզաղ-

յանին, վարչապետը միաժամանակ հանձնարարում է հաղորդել Կիրովին, որ «Շատ-շատ նրան (Լեզրանին) կարող ենք ընդունել իբրև ղեկագացիայի նախագահ՝ չատ փոքրիկ շտատով՝ 4-5 հոգի՝ այդ էլ այն դեպքում, եթե վերջնականապես գլուխ չզան Մոսկվայի բանակցությունները և Շանթը իր ընկերներով վերադառնա Երևան»¹:

Պատճառաբանությունները կարծես թե հիմնավոր էին, բայց դրանք չէին կարող բավարարել Լեզրանին և նա՝ դժգոհ Հայաստանի կառավարության այդ դիրքորոշումից, հուլիսի 21-ին դեռևս գտնվելով Աղստաֆայում (Վրաստանի կառավարությունը չէր թույլատրել նրան ժամանել Թիֆլիս՝ պատճառաբանելով, որ Հայաստանը չի ճանաչում նրա լիազորությունները) մի ընդարձակ գրություն է ուղարկում Ջիզերինին, որում արդեն տարածքային վեճերի լուծման գործում ծագած դժվարությունների համար մեղադրում է ոչ թե Աղբրեջանին, այլ Հայաստանին: «Հայաստանի և Աղբրեջանի միջև տարածքային վիճելի հարցերի լուծումը, - ասված է այդ գրությունում, - այլ հանգամանքներից զատ, մեծապես բարդանում է Հայաստանի կառավարության վարքագծով, որը շարունակում է թշնամական գործողությունները Թուրքիայի դեմ՝ հարձակումներ Օլթիի շրջանում, Ջանգիբասար և հայկական գործերի վերջին առաջխաղացումը դեպի Նախիջևան՝ կապված Բայազեդի դիվիզիայի կողմից Նախիջևանի շրջանի գրավման հետ»² (ընդգծումը մերն է - է. Զ.):

Ընթերցողի ուշադրությունը հրավիրելով ընդգծված տողերի վրա՝ ցանկացել ենք ցույց տալ, թե ինչպես վիրավորանքն ու չարացածությունը կարող են ազդել նույնիսկ դիվանագետի համոզմունքների վրա: Նախորդ չարադրանքում տեսանք, ու հետո էլ կտեսնենք, որ Լեզրանը հաստատապես և անվերապահորեն Նախիջևանը Հայաստանի մաս էր համարում: Մինչդեռ այստեղ նա որոշ չափով նահանջում է իր դիրքերից, խոսում այն մասին, որ տարածքային հարցերի վերաբերյալ Օրջոնիկիձեի հետ իր կայացրած համաձայնությունը «կարող է Բաքվում առաջ բերել բավականին համառ ընդդիմություն», որ այդ համաձայնությունը կարելի է կյանքի կոչել միայն այն դեպքում, եթե Մոսկվան Հայաստանի կառավարությունից պահանջի «անհապաղ դադարեցնել Աղբրեջանի և Թուրքիայի նկատմամբ ամեն մի թշնամական գործողություն» և Հայաստանի կառավարության վրա ճնշում գործադրելու

¹ ՀԱԱ, ֆ. 4033, ց. 1, գ. 1100, փ. 10, թ. 1:

¹ ՀԱԱ, ֆ. 200, ց. 1, գ. 440, թ. 1:

² «ՀՀ-ն 1918-1920 թթ.», փաստաթղթերի և նյութերի ժողովածու, էջ 225:

նպատակով գործերը առաջ շարժի դեպի «Թուրք-ադրբեջանական սահմանը Նախիջևանի շրջանում»: Լեզրանը նաև առաջարկում է դադարեցնել բանակցությունները Շանթի պատվիրակության հետ և դրանք փոխադրել Կովկաս, որ այդ «բանակցություններին պետք է հրավիրվի Ադրբեջանի հանրապետության պաշտոնական պատվիրակությունը»: Ուշագրավ է նաև այն, որ որպես բանակցությունների վայր առաջարկում է ոչ թե Երևանը, ուր նա գործուղված էր, այլ Վլադիկավկազը¹:

Ինչպես տեսնում ենք, Աղստաֆայում 4 օր հարկադրված կանգառը Լեզրանին զգալիորեն կերպարանափոխել էր: Ընդամենը մեկ շաբաթ առաջ նա այդ նույն Ձիչերինին գրում էր, թե Նախիջևանը Հայաստանի անբաժանելի մաս է, իսկ այստեղ արդեն այն համարում է «Թուրք-ադրբեջանական սահման»: Դե ինչ, Լեզրանն էլ մահկանացու էր ու գերծ էր մարդկային թուլություններից: Բայց ինչպես երևում է, չափազանց մեծ է եղել Երևան մտնելու նրա ցանկությունը. «Այնուամենայնիվ խիստ ցանկալի եմ համարում հայկական կառավարության հետ անմիջական հարաբերության հնարավորություն ստանալը, թեև կուզ կարճատև, – ասված է գրության վերջնամասում, – դրա համար էլ առաջարկեցի Կիրովին, որի հետ հենց նոր խոսեցի հեռախոսով, հարցը դնել այսպես. մենք գնում ենք Երևան ոչ լիազոր ներկայացուցչության կարգավիճակով և ոչ էլ որպես խաղաղարար պատվիրակություն, այլ որպես խորհրդային կառավարության լիազոր առաքելություն, որի նպատակն է հայկական կառավարության հետ անմիջական հարաբերությունների միջոցով պարզել այն հիմնական նախնական հարցերը, որոնց շուրջ համաձայնության բացակայությունը խոչընդոտում է Մոսկվայում Շանթի պատվիրակության հետ խորհրդային կառավարության բանակցությունների հաջող ընթացքին»²: Լեզրանը նաև խնդրում է Ձիչերինին հայտնել իր կածիքը այդ պլանի մասին և արագացնել համապատասխան փաստաթղթերի ուղարկումը, թեև կասկածում էր, որ Հայաստանի կառավարությունը կհամաձայնի դրան:

Լեզրանի կասկածները անտեղի չէին: Հուլիսի 26-ին Համո Օհանջանյանը Թիֆլիսի իր դիվանագիտական ներկայացուցչին հանձնարարում է հայտնել Կիրովին Հայաստանի կառավարության ափսոսանքն

այն բանի համար, որ երկու ամիս տևած մոսկովյան բանակցությունները չեն տվել այն արդյունքը, ինչի հույս որ Հայ ժողովուրդն ուներ ու նաև տեղեկացնել, որ այնուամենայնիվ՝ ընդառաջելով խորհրդային կառավարության ցանկությունը, Հայաստանի կառավարությունը դեմ չէ նշված բանակցությունները Երևան փոխադրելուն և Լեզրանի հետ բանակցությունների վարումը հանձնարարում է Լ. Շանթի գլխավորած այդ նույն պատվիրակությանը, որին շտապ Երևան վերադառնալու կարգադրություն է ուղարկված³: Իսկ դա նշանակում էր, որ Հ. Օհանջանյանը համաձայն չէ Լեզրանի առաջարկին և կրկին հետաձգում է նրա պատվիրակության մուտքը Երևան անորոշ ժամանակով: Ի դեպ, հաջորդ օրը՝ Հուլիսի 27-ին Հ. Օհանջանյանը մի ավելի ընդարձակ գրություն է ուղարկել Գ. Ձիչերինին, որում կրկնում է Լեզրանի հետ բանակցությունների վերաբերյալ նախորդ օրը Թիֆլիս հղած իր հեռագրի բովանդակությունը և նաև շոշափում Ադրբեջանի հետ վիճելի տարածքների հարցում իր կառավարության դիրքորոշման, Հայաստանի նկատմամբ Բաքվի և Անկարայի կառավարությունների ագրեսիվ քաղաքականությունը և մի շարք այլ հարցեր²:

Այդ նույն օրը (Հուլիսի 27) Կիրովի միջոցով Լեզրանին փոխանցելու համար ուղարկված ճեպագրում Ձիչերինը պատասխանում է բոլոր այն հարցերին, որ առաջ էր քաշել Լեզրանը Աղստաֆայից ուղարկած գրությունում: «Ստեղծված իրադրության և թուրքերի սկսած հարձակման պայմաններում, – գրում է Ձիչերինը, – մենք չենք կարող միակողմանիորեն, առավել ևս ռազիոյով, միայն Հայաստանից պահանջել կանգնեցնելու ռազմական գործողությունները: Դա կարող է միայն բոլոր շահագրգիռ կողմերի հետ բանակցությունների արդյունք լինել, որի համար անհրաժեշտ է, որ Դուք ավելի շուտ հասնեք Ձեր նշանակման վայրը: ...Ռազմական գործողությունների դադարեցման հարցը այդքան հեշտ չէ, քանզի չի կարելի կապել մեկի ձեռքերը, երբ մյուսը նրա վրա հարձակվում է, իսկ այդպիսի դրության մեջ՝ Անդրկովկասում տիրող քաոսի պայմաններում, այժմ բոլորն են գտնվում: Դրա համար էլ, առաջինը, որ պահանջվում է, Ձեր ժամանումն է էրիվան»³:

Ձիչերինն անդրադառնում է նաև Շանթի պատվիրակության հետ բանակցությունները դադարեցնելու Լեզրանի առաջարկությանը և

¹ Տե՛ս նույն տեղում, էջ 226:

² Նույն տեղում:

¹ Տե՛ս ՀԱԱ, ֆ. 278, ց. 1, գ. 35, թ. 26:

² «ՀՀ-ն 1918-1920 թթ.», փաստաթղթերի..., էջ 231-232:

³ „Геноцид армян...“, стр. 107.

հայտնում. «Շանթի առաքելությունն այստեղից հեռացնել չենք կարող, դա միանգամայն անհարմար կլինի, բայց կպնդենք բանակցությունները էրիվանում վարելու վրա՝ Շանթի հարցը թողնելով անորոշ: Դրանից, անկասկած, կստացվի այն, որ ինքը Շանթը կցանկանա մեկնել: Այդ մասին նա արդեն սկսել է խոսել: Մենք նրան չենք պահելու և բանակցություններն, այդպիսով, փոխադրվելու են էրիվան»¹: Ճեպագրի վերջում Ջիչերինը կրկին վերադառնում է թուրքական հարձակմանը և հայտնում. «...թուրքերը՝ վերցնելով Նախիջևանը, այնտեղ խորհրդային իշխանություն են մտցրել և առաջարկում են, որ մեր զորքերը մտնեն այնտեղ: Նախիջևանը գրավելու մասին հրամանը մեր զորքերին վաղուց արդեն տրված է, և այդ մասին ես Ձեզ հաղորդել եմ, բայց ընդհանրապես թուրքերի կամ ուրիշ ժողովրդի գործը չի որոշել ուր և ինչ քանակով մենք պետք է գնանք»²:

Հուլիսի վերջին օրերին իրադրությունը թե՛ Ջանգեզուրում, թե՛ Նախիջևանում կտրուկ սրվեց՝ սպառնալով վերածվել լայնամասշտաբ պատերազմի Խորհրդային Ռուսաստանի և Հայաստանի միջև: Եթե մինչև այդ Նախիջևանում հայկական զորքերը անարգել առաջ էին շարժվում, ապա Հուլիսի 28-ից վիճակը փոխվեց, այդ օրը Կարմիր բանակի զորամասերը մտան Նախիջևան, իսկ 30-ին հայկական բանակի հրամանատարությունից պահանջեցին դադարեցնել առաջխաղացումը: Էլ ավելի բարդ իրադրություն ստեղծվեց Ջանգեզուրում: Այստեղ Դրոյի գլխավորած զորամասերը նույն օրերին հակահարձակման անցան և մի քանի օր տևած կատաղի կռիվներից հետո օգոստոսի 3-ին ազատագրեցին Գորիսը, բայց կարմիրների ճնշման տակ երկու օր հետո կրկին նահանջեցին դեպի Սիսիան: Հենց այդ դեպքերի ժամանակ էլ՝ օգոստոսի 1-ին, հայկական զորքերի գլխավոր հրամանատարը ստացավ մի նոր վերջնագիր, որի տակ դրված էր Կարմիր բանակի հրամանատար Վասիլենկոյի և ռազմահեղափոխական խորհրդի անդամ Լուկինի ստորագրությունը: Միակողմանիորեն մեղադրելով հայերին Ջանգիրասարում ու Նախիջևանի գավառում ազգամիջյան կոտորածներ կազմակերպելու մեջ, որի հետևանքով իբր «ոչնչացվում են ամբողջ գյուղեր և տնազուրկ են լինում հազարավոր գյուղացիներ», իսկ Կարմիր բանակին ներկայացնելով իբրև խաղաղության դրոշակակիրներ, որոնք Նախիջևան են մտցվել կարգ և օրինականություն հաստատելու նպատակով, վերջնագրի հեղինակները պահանջում են վերջ

տալ Կարմիր բանակի դեմ հայկական զորքերի ակտիվ գործողությունները՝ սպառնալով պատասխանել «մի շարք ջախջախիչ հարվածներով»: «Պատասխանը սպասվում է ոչ ուշ օգոստոսի 5-ից, - ասված էր վերջնագրում, - մինչ այդ պայմանաժամը պետք է դադարեցված լինեն ակտիվ գործողությունները»¹:

Օրջոնիկիձեի և հրամանատար Վասիլենկոյի միջև օգոստոսի 4-ին տեղի ունեցած հեռախոսային մի խոսակցությունից տեղեկանում ենք, որ ռուսական հրամանատարությունը իսկապես պատրաստվում էր ծանր հարված հասցնել հայկական բանակին: Օրջոնիկիձեի այն հարցին, թե «ինչ նոր բան կա Նախիջևանի շրջանում», Վասիլենկոն պատասխանում է. «Հայերը չեն ուզում հաշտվել Նախիջևանի ուղղությամբ մեր առաջխաղացման հետ: 11-րդ բանակի կողմից այստեղ ուղարկած ուժերը միանգամայն անբավարար էին՝ երկու հեծյալ բրիգադի տեսքով, (բայց) իրականում ընդամենը մոտ 300 թուր: Արդյունքում կորավ ոսկին, իսկ գնե. Դրոյի բանդաները գրավեցին և՛ Ենգելյաուրտը, և՛ Գորիսը: Այդ ամենի մասին հետաքննություն և քննություն կատարելու հրաման է (տրված), իսկ առայժմ... Նախիջևանի գավառում դաշնակներին լիկվիդացնելու համար 28-րդ դիվիզիան կենտրոնացնելու հրաման եմ արձակել...»²: Օրջոնիկիձեի հավանություն է տալիս Վասիլենկոյի ծրագրին և ավելացնում, թե «հարկավոր է արագ և սրընթաց հարվածով վերջ տալ դաշնակներին Նախիջևանի գավառում: Այսօր ուղևորվում եմ Բաքու և մանրամասն կտեղեկացնեմ Ձեզ ամեն ինչի մասին...: Մի անգամ էլ եմ խնդրում՝ հնարավորինս արագ լիկվիդացնել Նախիջևանի շրջանը»³:

Օրջոնիկիձեի այս խոսքերը ավելի են ոգևորում Վասիլենկոյին, և վերջինս առաջարկում է Հայաստանին հարվածել ոչ միայն Նախիջևանի, այլև Դիլիջանի կողմից. «Ես կցանկանայի ավելի ճշտված հրահանգներ ստանալ Հայաստանի վերաբերյալ, այսինքն արդյո՞ք սահմանափակվել Նախիջևանի շրջանում պաշտպանությունը, այնտեղ նախիջևանյան բանդաների վերացումով, որը կարող է ձգձգվել, թե՛ կարելի է Երևանի ուղղությամբ Նախիջևանի և Դիլիջանի կողմից միաժամանակյա հարվածով հարկադրել հայկական կառավարությունը դադարեցնելու թշնամական գործողությունները Կարմիր բա-

¹ Նույն տեղում, էջ 107-108:

² Նույն տեղում, էջ 108:

¹ «Նոր աշխատավոր», 5 օգոստոսի 1920թ.:

² Генерал армян..., стр. 117.

³ Նույն տեղում:

նակի դեմ Նախիջևանի շրջանում: Դա խիստ կթեթևացնե՞ր խնդիրը: Ծնորհակալ եմ, կապասեմ փոքրիկ հեռագրի»¹ (ընդգծումը մերն է – է. Զ.):

Ահա այսպես, ինտերնացիոնալիզմի դրոշակ պարզած կարմիր հրամանատարը իրավունք ուներ մտնելու ուրիշի տունը, իսկ տանտերը պաշտպանվելու իրավունք չունեն: Առավել քան զավեշտականն այն է, որ վերջնագրում խոսվում է ոչ միայն Նախիջևանի մասին, ինչը թերևս հասկանալի լինե՞ր, այլև Երևանին կպած Զանգիբասարի: Էլ ինչպե՞ս չմտածես, որ կարմիր Վասիլենկոյի վրա ընկել էր կեղծ կարմիր Նարիմանովի ստվերը: Ինչ էլ որ լինե՞ր այնտեղ, մի բան ակնհայտ էր դարձել. հուլիսի վերջին օրերից սկսած հանրապետությունը հայտնվել է կրակե օղակի մեջ, նրա բոլոր սահմաններում՝ բացի հայ-վրացականից, պատերազմական դրություն է: Արևմուտքում (Օլթի-Մերդենեկի շրջան) թուրք-քեմալականները ավելի ու ավելի հաճախակի էին դարձրել հարձակումները և սահմանի խախտումները, նույնն էին անում ռուս-ադրբեջանական զորամիավորումները հյուսիս-արևելքում (Ղազախ-Քանվանսարա-Շամշադինի շրջան), իսկ հարավ-արևելքում ռուսական Կարմիր բանակի զորամասերը գրավել էին Զանգեզուրը և մտել Նախիջևան: Նախիջևանում էր գտնվում նաև թուրքական մի զորաջոկատ:

Այսպիսի պայմաններում հայտնված հանրապետությունը՝ իր մարդկային և նյութական աղքատիկ ռեսուրսներով, երկար դիմանալ չէր կարող: Անհրաժեշտ էր սահմաններից գոնե մեկում զինազաղար հաստատել, անընդհատ կոիվներում հողնած զորքերին հանգստանալու հնարավորություն տալ, կազմակերպել թիկունքը և այլն: Գիտակցելով դա՝ կառավարությունը որոշեց այդ ուղղությամբ բանակցություններ սկսել Թիֆլիսում գտնվող Բ. Լեգրանի հետ և հնարավորինս արագ համաձայնություն կայացնել ռազմական գործողությունների դադարեցման մասին: Դա տեսանելի հնարավորություն էր, քանի որ հուլիսի 29-ին արդեն Լեգրանը հեռագրով դիմել էր Հայաստանի կառավարությանը և առաջարկել չհետաձգել Երևանում հաշտության բանակցությունների վերսկսումը մինչև Շանթի պատվիրակության վերադարձը: «Հայաստանի սահմանների վրա ստեղծված իրադրության պայմաններում, – ասված է հեռագրում, – խորհրդային Ռուսաստանի հետ հաշտության բանակցությունների ամեն մի ընդմիջում կա-

րող է առաջ բերել բոլորովին անցանկալի բարդություններ երկու հանրապետությունների ժողովուրդների հարաբերություններում և այդ դեպքում կատարվածի պատասխանատվությունը ընկնում է Հայաստանի կառավարության վրա»: Այսպես է Լեգրանը մեծապետական դիրքերից մեղադրում Հայաստանին՝ նրա սահմանների վրա ստեղծված ռազմական դրության համար: Կարծես թե Հայաստանն է մեղավոր, որ ռուսական զորքերը գրավել են Զանգեզուրը, Նախիջևանը, մտել են Իջևանի շրջան: Օգոստոսի 3-ին Տ. Բեկգադյանի միջոցով պատասխանելով Բ. Լեգրանին՝ Հ. Օհանջանյանը նախ իր դժգոհությունն է հայտնում Հայաստանի նկատմամբ Ռուսաստանի վարած թշնամական քաղաքականության, հայկական անվիճելի տարածքները զենքի ուժով գրավելու և Ադրբեջանին ամրագրելու գործընթացի, այն հակասության համար, որ առկա է Ջիչերինի տված խոստումների ու հավաստիացումների և խորհրդային զորքերի գործողությունների միջև: «Ամեն մի սովետական զորավար իր պարտքն է համարում ամեն անգամ մի-մի ուլտիմատում ներկայացնել Հայաստանի կառավարությանը, – ասված է այդ հեռագրում: Այսօր 11-րդ Կարմիր բանակի հրամանատար Վասիլենկոն վերջնագիր է ներկայացրել իմ կառավարությանը, որ սովետական զորքերը Ղարաբաղի և Զանգեզուրի վրայով անարգել անցնեն Նախիջևան: Ուլտիմատումի ժամանակամիջոցը որոշել է օգոստոսի 5-ը, որից հետո նա սպառնում է Հայաստանին խիստ գործողություններով»: Այնուհետև հիշեցնելով, որ նույն բանն էին անում նաև մուսաֆաթական Ադրբեջանը և Օսմանյան Թուրքիան, Օհանջանյանը հավաստիացնում է, որ հայ ժողովուրդը Ռուսաստանի հետ բարի հարևան լինելու ցանկություն ունի, բայց և չի կարող հավատալ տրված խոստումներին, եթե Ռուսաստանը Հայաստանի սահմաններից չհեռացնի իր զորքերը: Վերջում տեղեկացնում է. որ «Ձեզ հետ նախնական բանակցություն վարելու համար օրերս Թիֆլիս կմեկնեն իմ կառավարության երկու ներկայացուցիչները»²:

Մեր պատմագիտական գրականության մեջ գերակշռում է այն տեսակետը, որ Լեգրանը պատկանում է բոլշևիկյան այն գործիչների թվին (Ջիչերին, Կարախան, և այլն), որոնք ճիշտ էին հասկացել ինչպես քեմալականների, այնպես էլ ադրբեջանական կոմունիստների զավթողական նկրտումները Հայաստանի հարցում և ինչ-որ ձևով փորձում

¹ Նույն տեղում, էջ 118:

¹ ՀԱԱ, ֆ. 4033, ց. 2, գ. 1105, փ. 10, թ. 1:

² «Նոր աշխատավոր», 5 օգոստոսի 1920թ.:

էին հակազդել դրանց, բայց քանի որ անհրաժեշտ չափով կշիռ և ազդեցություն չունեին, ուստի և հաջողություն չէին հասնում: Դա արդարացի գնահատական է և հետագա շարադրանքում դեռ առիթ կունենանք դրանում համոզվելու: Իսկ առայժմ ծանոթանանք արխիվային մի փաստաթղթի, որում խոսվում է ինչպես քեմալականների, այնպես էլ հայ-ադրբեջանական վիճելի տարածքների հարցում Լեզրանի կարծիքի մասին: Դա Տ. Բեկզադյանի գրությունն է Լեզրանի հետ ունեցած իր տեսակցության մասին: Ստանալով Ն. Օհանջանյանի հեռագիրը՝ Տ. Բեկզադյանը իսկույն այն տարել էր Լեզրանին և օգտվելով առիթից՝ հանգամանալից գրույց ունեցել Զանգեզուրում և Նախիջևանում ստեղծված իրադրություն, հայ-ռուսական և ռուս-թուրքական հարաբերությունների մասին: Նույն օրը երեկոյան Բեկզադյանը հեռագրով տեղեկացրել է Օհանջանյանին Լեզրանի հետ կայացած հանդիպման մասին, իսկ հաջորդ օրը՝ օգոստոսի 5-ին, ընդարձակ գեկուցագիր ուղարկել նույն հասցեով: Նրանում ուշագրավ վկայություններ կան չոչափված խնդիրների վերաբերյալ Լեզրանի կարծիքի մասին: Ահա օրինակ, ինչ էլ ասել Լեզրանը հայ-ադրբեջանական վիճելի տարածքների մասին: «Ես Զանգեզուրի և Ղարաբաղի խնդրին բոլորովին անտեղյակ եմ, - ասաց նա, - բայց որ Նախիջևանը Ձերը պիտի լինի թեկուզ և իր թուրք ազգաբնակչությանը, դա ինձ համար պարզ է և ինձ թվում է, որ դա նույնպիսի անհրաժեշտություն է Ձեր պետականության համար, ինչպիսին է ջրհորը տնամերձի համար և ինչպես վերջինը չի կարելի թողնել առանց ջրհորի, այնպես էլ Ձեզ՝ առանց Նախիջևանի: Դարձյալ լավ է խոսում»¹ (ընդգծումը մերն է - է. Զ.):

Իսկապես որ, լավ է խոսում: Ուրիշներն էլ են խոսել Հայաստանի հանրապետության համար Նախիջևանի նշանակությունը մասին, բայց ոչ որ նման դիպուկ ու սպառնիչ գնահատական չի տվել: Կարծում ենք, Լեզրանը Նախիջևանի հարցում անկեղծ էր, ինչը չենք ասի Ղարաբաղի և Զանգեզուրի կապակցությամբ: Նա պարզապես խուսափել է այս վերջինների մասին կարծիք արտահայտելուց՝ հավանաբար, թե՛ Օրջոնիկիձեի, և թե՛ Բաքվի ղեկավարության հետ կոնֆլիկտներ չստեղծելու համար: Օժտված լինելով լիազոր ներկայացուցչի պարտականություններով՝ նա լավ էր հասկանում, որ ինքը կատարող է և ոչ վճռող: Դա երևում է նաև հրամանատարներ Տարխովի և Վասիլենկոյի գործողությունների կապակցությամբ նրա արած հայտարարություն-

նից: Պատասխանելով Բեկզադյանի բողոքին՝ նա Տարխովի (Նախիջևան մտած զորամասի հրամանատար) հայտարարության կապակցությամբ ասել է. «...դա անպատասխանատու անձնավորության անպատասխանատու և ինքնագլուխ գործ է», բայց ահա 11-րդ Կարմիր բանակի հրամանատար Վասիլենկոյի վերջնագրի հարցում զգուշություն ավելացրել է. «...այդ մասին տեղեկություն չունի, բայց անհասկանալի կկապվի Բաքվի հետ, կպարզի հարցը և կանի ինչ որ հարկավոր է: Եթե իրեն չհաջողվի ազդել Վասիլենկոյի վրա, կաշխատի այդ անել Մոսկվայի միջոցով»²:

Ի միջի այլոց, քանի որ Հայկական բանակի հրամանատարությանը ներկայացված գրության մեջ Տարխովը հանդես էր եկել որպես Նախիջևանում գտնվող ռուսական և թուրքական միավորված կարմիր զորքերի հրամանատար, ապա, բնականաբար, գրույցի ընթացքում պետք է շոչափվեր նաև ռուս-թուրքական հարաբերությունների և դրանց հակահայկական ուղղվածությունը հարցը: Բեկզադյանը գրում է, որ Լեզրանը չի հերքել քեմալականներին ցույց տրվող օգնությունը, որը սակայն ուղղված է ոչ թե Հայաստանի, այլ արևմտյան իմպերիալիզմի դեմ: «Այդ դաշինքը (թուրքիայի հետ - է. Զ.) մի նպատակ ունի՝ աջակցել կարմիր Տաճկաստանին (որն այժմ տարված է ազգային վերածնության գաղափարով) իրագործել այդ գաղափարը և ազատվել անտանելի իմպերիալիստական լծից: Մի՞թե, - ավելացրեց Լեզրանը (պաթետիկ, բայց կարծում եմ բավական անկեղծ կերպով), - Հայաստանը այնքան վատ կարծիքի է Սովետական Ռուսաստանի մասին, որ կարծում է, որ նա կարող է դաշն կապել տաճիկների հետ ընդդեմ Հայաստանի - դա անհնարին է: Մենք օգնում ենք, այո՛, տաճիկներին և պիտի օգնենք նրանց Անտանտայի լուծը թողնելու և ոչ թե հայերի դեմ կռվելու գործի մեջ: Ընդհակառակը, մենք խոսել ենք Քեմալի հետ և նա համաձայն է անել հայերին բոլոր կարևոր զիջումները տերիտորիալ խնդիրներում՝ ընդունելով, ինչպես և մենք, անկախ և ազատ Հայաստանի գոյությունը»²:

Բեկզադյանը չի փորձել ճշտել, թե Քեմալը տարածքային ինչ կոնկրետ զիջումների է համաձայն: Քաջատեղյակ լինելով թուրքական «Ազգային ուխտի» նախանշած սահմաններին՝ նա, ըստ երևույթին, նշանակություն չի տվել Լեզրանի այդ խոսքերին, այլ ձգտել է պարզել, թե եթե ընդունում են Հայաստանի անկախությունը, ապա ի՞նչն է

¹ ՀԱԱ, ֆ. 199, ց. 1, գ. 198 I մաս, թ. 172:

² Նույն տեղում:

² Նույն տեղում:

խանգարում համապատասխան պայմանագիր կնքելուն: «Եթե ուզում եք, ես պատրաստ եմ հենց այժմ ստորագրել այդպիսի պայմանագիր, – պատասխանել է Լեգրանը: – Բայց չէ՞ որ դա ունի գործ չէ: Մենք ուզում ենք ստեղծել այստեղ այնպիսի պայմաններ, որ գոյություն ունեցող նորակազմ պետություններն այլևս կարողանան առանց վեճերի և կոնֆլիկտների ապրել ու սկսել իրենց գոյություն կուլտուրական աշխատանքի շրջանը: Չէ՞ որ եթե մենք այդ դեկլարատիվ պայմանագիրը ստորագրենք առանց հարթելու ձևեր և Ադրբեյջանի միջև եղած ամենակարևոր վեճերը, վաղը–մյուս օրը դուք նորից պիտի ընդհարվեք, և մենք՝ իբրև Ադրբեյջանի դաշնակից, իսկ ձեր անկեղծ բարեկամ, ստիպված պիտի լինենք նորից խառնվել: Այդ պատճառով նպատակահարմար է, որ եթե չկարողանանք վերջնական սահմանները որոշել, գոնե պայմանագրի մեջ հիշատակենք՝ իբրև հետևանք ձեր համաձայնություն, այն սկզբունքների մասին, որոնցով պիտի ապագայում վճռվեն ձեր վեճերը առանց զենքի դիմելու»¹:

Համո Օհանջանյանին ուղարկած գաղտնի գրությունն մեջ Բեկզադյանը Լեգրանի հետ զրույցում արտահայտված կարծիքները որակել է որպես «ընդհանուր խոսակցություններ»: Գուցե այդ է պատճառը, որ այստեղ ևս նա չի փորձել ծավալվել՝ թեկուզ, ասենք, վեճերի լուծման սկզբունքների խնդրում, այլ շտապել է զգուշացնել, որ այսուհետ իրենց բանակցությունները պաշտոնական բնույթ են կրելու, քանի որ հեռագրում վարչապետը Լեգրանին անվանում է «լիազոր ներկայացուցիչ» ու հայտնում, որ ուղարկում է պատվիրակներ նախնական բանակցությունների համար: «Ես նրան հայտնեցի, – գրում է Բեկզադյանը, – որ այդպիսով նա ճանաչվում է Ձեր կողմից և այսուհետև մեր բանակցությունները պիտի կրեն պաշտոնական բնույթ և որ նա իր կողմից այդ բանակցությունների հաջող վախճանը արագացնելու համար պետք է միջոցներ ձեռք առնի, որպեսզի Շանթը իր ընկերների հետ չուտով վերադառնա: Նա խոստացավ»²: Դրա հետ մեկտեղ Բեկզադյանը Լեգրանի թիֆլիսում գտնվելը նպատակահարմար չի համարում, թեև չի ասում՝ թե ինչու. «Իմ կարծիքը դարձյալ մնում է նույնը, որ նրան այստեղ պահելը նպաստավոր չէ և գուցե թե մենք այնպես սարքենք, որ նա հենց Շանթի հետ միասին այստեղից ճանապարհվի, համենայն դեպս, կարծում եմ, ոչ ոչ Շանթից»³:

Տ. Բեկզադյանի հետ ունեցած զրույցից երկու օր անց՝ օգոստոսի 6-ին, Լեգրանը մի հեռագիր է հղում Կովկասյան ճակատի ռազմահեղափոխական խորհրդին, որում ասված է, որ 11-րդ բանակի ռազմահեղափոխական հաղորդագրություններից և Հայաստանի կառավարությունից կողմից իրեն հանձնված փաստաթղթերից երևում է, որ 11-րդ բանակի հրամանատարությունը, «առաջին՝ չի կարողացել ապահովել մեր զորքերով Նախիջևան քաղաքի և Շուշի-Գորիս-Էնգեյուրտ-Կարմալինովկա-Նախիջևան տրակտի կայուն գրավումը, երկրորդ՝ չկատարելով իրեն տրված ուղղակի հանձնարարությունը, մեր ընդհանուր քաղաքական գծի հետ չհամաձայնեցված վերջնագրային պահանջներ է ներկայացնում անմիջականորեն հայկական հրամանատարությանը. ընդ որում, դրանք ուղեկցում է սպառնալիքներով, որոնց իրականացումը դուրս է գալիս նրա իրավասությունից չընկալներից և փաստական հնարավորությունից»⁴: Այնուհետև նշելով, որ իրեն հասցեագրած հաղորդագրություններում 11-րդ բանակի հրամանատարությունը նույնիսկ խոսում է հարձակման անցնելու և «Արարատյան հանրապետությունը» ոչնչացնելու իր վճռական մտադրությունն մասին, Լեգրանն ավելացնում է, թե անհրաժեշտ է միջոցներ ձեռնարկել կայուն կերպով գրավելու Նախիջևանն ու նշված տրակտը և անթույլատրելի է համարում, որ բանակային հրամանատարությունն իր ուղղակի պարտականությունները կատարելու փոխարեն հանդես գա ինքնուրույն քաղաքականություն: Նա հատուկ ընդգծում է, որ Հայաստանի կառավարության հետ ամեն մի հարաբերություն պետք է իրականացվի Հայաստանում ՌԽՖՍՀ լիազոր ներկայացուցչության, այսինքն, իր միջոցով⁵:

Օգոստոսյան այդ օրերին Հայաստանի հետ հարաբերությունները կարգավորելու և հայ-ադրբեյջանական տարածքային վեճերին շուտափույթ լուծում տալու առաջարկությամբ Չիչերինին հասցեագրած նամակով հանդես եկավ նաև Վրաստանում ՌԽՖՍՀ դիվանագիտական ներկայացուցիչ Ս. Կիրովը⁶: Ցավով արձանագրելով որ այդ ուղղությամբ իր ձեռնարկած քայլերը դեռևս ոչ մի արդյունք չեն տվել, նա գրում է. «Ձանգեցուրում և Նախիջևանի գավառում վերջին ժամանակներս տեղի ունեցած դեպքերի կապակցությամբ ստիպված ենք եղել

¹ «ՀՀ-ն 1918-1920թթ.», փաստաթղթերի և նյութերի ժողովածու, էջ 239:
² Տե՛ս նույն տեղում:
³ Փաստաթղթի վրա ամսաթիվը չի նշված, բայց դժվար չէ գուշակել, որ այն գրվել է Լեգրան-Ջամալյան բանակցությունների օրերին:

¹ Նույն տեղում:
² Նույն տեղում:
³ Նույն տեղում:

Հայկական Հարցին ավելի շատ ուշադրություն դարձնել: Երկար ժամանակ այստեղ էր Ադրբեջանի արտգործոցը կամ Հուսեյնովը՝ մի քանի աշխատակիցներով: Նա և Հայկական ներկայացուցչության Հետ են այստեղ բազմիցս խորհրդակցություններ եմ ունեցել: Կազմակերպել եմ և միացյալ խորհրդակցություններ: Այդ ամենի արդյունքում հասել եմ միայն մի բանի՝ ադրբեջանցիների պատրաստակամությունը զիջելու Շարուր-Գարալագյազը Հայաստանին՝ իսկ մնացածը, այսինքն՝ Նախիջևանի գավառը, Օրդուբադը, Ջուլֆան, Ջանգեզուրը, Ղարաբաղը ադրբեջանցիները համարում են անպայման իրենցը: Իրենց Հերթին Հայաստանի ներկայացուցիչները կտրականապես հավակնում են այդ մարզերի վրա»: Մատնացույց անելով ադրբեջանցիների այն պատճառաբանությունը, որ իբր մուսավաթի օրոք այդ մարզերը պատկանել են Ադրբեջանին, և նրանց զիջումը Հայաստանին, կվարկաբեկի խորհրդային իշխանությունը ոչ միայն Ադրբեջանում, այլև Պարսկաստանում և Թուրքիայում, Կիրովը հետևություն է անում, թե «ստեղծված վիճակից դուրս գալու միակ ելքը այդ հարցի աներեր լուծումն է Մոսկվայում, միայն նրա հեղինակությունը կարող է լուծել գործը»¹: Դժվար չէ կոահել, որ Մոսկվայի հեղինակությունը Կիրովը ուզում էր չափավորել Ադրբեջանի Խորհրդակցության:

Թեև Մոսկվայի ուսուցիչական բանակցությունները դադարեցվել էին հուլիսի առաջին օրերին, բայց և այնպես Լ. Շանթը իր ընկերներով ընդհուպ մինչև օգոստոսի 10-ը շարունակում էր մնալ Մոսկվայում՝ սպասելով իր կառավարության համապատասխան կարգադրությունը և միաժամանակ կատարելով մի տեսակ ներկայացուցչության դեր² (այդ ընթացքում Հայկական կառավարության հեռագրերն ու նոտաները նրա միջոցով էին փոխանցվում Չիչերինին): Իսկ Ջամայանի և Բաբայանի պատվիրակությունը Թիֆլիս հասավ օգոստոսի 5-ին, և արդեն հաջորդ օրը՝ օգոստոսի 6-ին, սկսվեցին բանակցությունները Լեզրանի պատվիրակության հետ: Բանակցություններին մասնակցում էր նաև Թիֆլիսում Հայաստանի իրագոր ներկայացուցիչ Տ. Բեկզադյանը: Հենց նրա խորհրդով էլ պատվիրակության անդամ Ռուբեն Յուզբաչյանը նախապես հանդիպել էր Լեզրանի պատվիրակության անդամ Սահակ Տեր-Փարբիեյանի հետ՝ Լեզրանի առաքելության

նպատակների և ցանկությունների մասին որոշ տեղեկություններ ստանալու համար¹:

Ուշագրավ է, որ Լեզրանի հետ բանակցություններ սկսելու և զինադադար կնքելու մասին որոշում ընդունելուն զուգահեռ, Հայաստանի կառավարությունը միաժամանակ իր «դաշնակիցների» ուշադրությունն էր հրավիրել այն սպառնալից իրողության վրա, որ առաջանում էր Նախիջևանի վրայով քեմալ-բոլշևիկյան կապի ստեղծման հետևանքով: Ահա ինչ է ասված Արտգործնախարարության 1920թ. սեպտեմբերի 1-ի N 12 տեղեկագրում. «Դեռ զինադադարը կնքելու նախօրյակին՝ օգոստոսի 8-ին, մեր կառավարությունը շրջաբերական հայտագիր ուղղեց դաշնակիցների բոլոր ներկայացուցիչներին Կովկասում, ցույց տալով, որ քեմալիստները ձգտում են միանալ Հայաստանի վրայով ուսուցիչական սովետական զորքերին և նրանց օգնությամբ շարունակել դաշնակիցների դեմ սկսած իրենց կռիվը: Նրանք ձգտում են ստեղծել պանիսլամիզմի ծրագրած Միջերկրականից մինչև Կովկասյան լեռները և Հնդկական օվկիանոսը տարածվող մահմեդականությունն ի մի ձուլումը: Իսկ Ռուսաստանը ձգտում է օգտագործել քեմալիստների ուժերը դաշնակիցների դեմ և նպաստավոր դիրք ստեղծել իրեն (համար) սկսված բանակցությունների մեջ»²: Այս նախաբանին հետևում է բացատրություն, թե «Քեմալիստների, Սովետական Ռուսաստանի և Ադրբեջանի այդ ծրագրի իրագործմանը խոչընդոտ է ներկայանում անկախ Հայաստանը, որը պատենչ է հանդիսանում ուժերի միացման: Դրա համար էլ նրանք ձգտում են ոչնչացնել անկախ Հայաստանը և դրանով է բացատրվում Ղարաբաղի, Ջանգեզուրի և վերջերս Նախիջևանի՝ սովետական զորքերով գրավվելը: Հայաստանը ամեն միջոցներ ձեռք է առել կովելու մինչև վերջին հնարավորությունը այդ հրեշավոր ծրագրի իրականացման դեմ և պաշտպանելու իր անկախությունը: Սակայն նա չի կարող հարատևել այդ կովի մեջ ունենալով իր առջև գերազանց ուժեր և ստիպված լինելով պաշտպանել իր սահմանների մեծ մասը: Այդ կովում Հայաստանը իր անկախությունը պաշտպանելով հանդերձ, պաշտպան է հանդիսանում նաև դաշնակիցների շահերին Արևելքում»³:

Ինչպես տեսնում ենք, Հայաստանի կառավարությունը միանգամ

¹ «ՀՀ-ն 1918-1920թթ.», փաստաթղթերի և նյութերի ժողովածու, էջ 268:
² Օգոստոսի 17-ին Հ. Օհանջանյանը Չիչերինին հղած հեռագրով տեղեկացնում էր, որ ՌՆՖՍՀ-ում Հայաստանի ժամանակավոր դիվանագիտական ներկայացուցիչ է նշանակված Եղիազար Եղիազարովը:

¹ Մանրամասն տե՛ս է. Ա. Ջոհրաբյան, 1920թ. թուրք-հայկական պատերազմը և տերությունները, Եր., 1997, էջ 121-123:
² ՀԱԱ, ֆ. 200, ց. 1, գ. 607, թ. 30-31:
³ Նույն տեղում, թ. 31:

մայն ճիշտ է ներկայացնում ոչ միայն քեմալ-բոյլչեիկյան ուժերի հետապնդած նպատակները, այլև Հայաստանի Հանրապետության դիրքն ու դերը Արևմուտքի և Արևելքի միջև ծավալված կռիվում: Միայն հասկանալի չէ, թե ինչու՞ դաշնակիցների շահերը պաշտպանող Հայաստանը այդքան քիչ բան է պահանջում նրանցից. «Ի նկատի ունենալով վերոհիշյալները, – ասված է նշված տեղեկագրում, – Հայաստանի կառավարությունը խնդրում է դաշնակիցների դրական աջակցությունը այդ կռիվի մեջ: Եվ խնդրում է նաև, որ դաշնակիցները ճնշում գործեն Կրասինի¹ միջոցով Սովետական կառավարության վրա և Մուստաֆա Քեմալ փաշայի վրա՝ Տաճկաստանի կառավարության² միջոցով, կասեցնելու նրանց առաջխաղացումները, քանի դեռ ուշ չէ, քանի դեռ նրանք դրություն տեղը չեն»³ (ընդգծումը մերն է – է. Զ.):

Կարծում ենք, չ. Օհանջանյանի կարիներտ սխալվում էր, գտնելով, թե 1920թ. օգոստոսին քեմալ-բոյլչեիկյան ուժերը դեռևս դրություն տեղը չէին տարածաշրջանում: Ո՛չ, նրանք դրություն տեղը դարձան ամիսներ առաջ, երբ 11-րդ Կարմիր բանակը ապրիլին մտավ Ադրբեջան, իսկ մայիսին Իրան (Էնզելի) և անգլիացիներին հարկադրեց հեռանալ Իրանի հյուսիսային շրջաններից: Ո՛չ Անգլիան, ո՛չ Ֆրանսիան ոչինչ չձեռնարկեցին Ադրբեջանի խորհրդայնացումը կանխելու համար, այլ Անգրկովկասում ունեցած իրենց վերջին ուժերը շտապով հեռացրին Եվրոպա: Այնպես որ, Հայաստանի կառավարության խնդրանքը կմնար անհետևանք, և այդպես էլ եղավ. դաշնակիցներից որևէ պատասխան չստացվեց: Զինադադարի կնքումը այլընտրանք չուներ:

Բանակցությունները սկսելուն պես պատմիրակության ղեկավար Զամայյանը Լեզրանին ներկայացրեց ութ կետից բաղկացած մի հուշագիր, որում շարադրված էին Հայաստանի կառավարության կողմից առաջարկվող այն հիմնական պայմանները, որոնք պետք է դրվեին հայ-ռուսական բարեկամական հարաբերությունների հիմքում: Դրանք են. Հայաստանի Հանրապետության անկախության ճանաչում, կողմերի միջև ռազմական գործողությունների դադարեցում, բոլոր գրավյալ շրջաններից ռուսական զորքերի դուրսբերում և այլն: Հուշագրի 6-րդ կետը վերաբերում էր Նախիջևանին: Այնտեղ ասված էր, որ Նախիջևանի գավառի սահմաններ մտած խորհրդային բանակի ջոկատները ազատորեն Ադրբեջան անցնելու թույլտվություն են ստանում:

Նման ձևակերպումը հետևանք էր այն իրողության, որ Զանգեզուրում հաջող հակահարձակում ծավալած Դրոյի զորամասը կարողացել էր մտնել Գորիս և դրանով իսկ Նախիջևանում գտնվող ռուսական ջոկատները կտրել թիկունքից: Սակայն այս վիճակը երկար չտևեց. Ադրբեջանից օգնության եկած ռուսական օժանդակ ուժերը հայ պատվիրակների թիֆլիս հասնելու նույն օրը՝ օգոստոսի 5-ին, վերադարձվել էին Գորիսը: Այս մասին թիֆլիսում դեռևս չգիտեին:

Ստանալով Զամայյանի հուշագիրը Լեզրանն իսկույն հեռագրում է Ջիզերինին, տեղեկացնում, որ «Հայկական կառավարությունը հույս ունի ստանալ Խորհրդային կառավարության համաձայնությունը այսպես կոչված վիճելի մարզերից կարմիր զորքերի հետքաշման վերաբերյալ՝ դրանում տեսնելով Հայաստանի Հանրապետության տարածքում մեզ հետ խաղաղ բանակցություններ սկսելու հնարավորության անհրաժեշտ պայման: Այսօր մենք ստացել ենք այդ հարցի վերաբերյալ պատմիրակության պաշտոնական գրավոր առաջարկությունը: Մեր պատասխանը կհայտնվի վաղը: Հայկական կառավարությանը կառավարկվի հայտնել իր համաձայնությունը Ղարաբաղի, Զանգեզուրի, Նախիջևանի վիճելի շրջանները ժամանակավորապես կարմիր զորքերով գրավելու վերաբերյալ»: Հեռագրում Լեզրանը անդրադառնում է Հայաստանի հետ համաձայնության գալու խնդրում առկա դժվարություններին, 11-րդ Կարմիր բանակի և Ադրբեջանի ղեկավարության ազդեցիվ նկրտումներին: Ջիզերինին տեղեկացնելով համաձայնատարության կողմից Հայաստանի կառավարությանը ներկայացրած վերջնագրերի մասին՝ Լեզրանը հետևություն է անում, որ բանակի հրամանատարությունն իր ուղղակի պարտականությունները կատարելու փոխարեն, հանդես է գալիս ընդհանուր քաղաքական գծին հակասող ինքնուրույն քաղաքականությամբ ու խնդրում վճռական աջակցություն՝ իրավիճակը շտկելու համար: Լեզրանը գտնում է, որ հրամատարության նման վարքագիծը կապված է Ադրբեջանի ղեկավարության հետ: «Որպեսզի մենք այստեղ կարողանանք աշխատել հաջողության հույսով, – գրում է Լեզրանը, – պետք է վստահություն լինի, որ Մոսկվան երկաթե ձեռքով վերջ կտա ադրբեջանական պարտիզանությանը և կօգնի մեզ ստեղծելու պայմաններ, որոնց առկայությամբ կարելի լինի հուսալ Հայաստանի կառավարության հետ կայացնելու համաձայնություն ռազմական գործողությունների դադարեցման մա-

¹ Խորհրդային Ռուսաստանի ներկայացուցիչը Լոնդոնում:

² Նկատի ունի Ստամբուլի սուլթանական կառավարությունը:

³ ՀԱԱ, ֆ. 200, ց. 1, գ. 607, թ. 31:

¹ „Геноцид армян...“, стр. 123.

սին»¹: Նա կարծում է, որ «աղբբեջանական պարտիզանություն» սանձահարումը կանդրադառնա նաև բանակի հրամանատարություն վրա:

Օգոստոսի 16-ին Կովկասյան ճակատի Ռազմահեղափոխական խորհրդի անդամներ Գիտտիսը և Տրիֆոնովը հեռագրում են 11-րդ բանակի հրամանատար Վասիլենկոյին. «...քաղաքական հարցերի լուծումը, մասնավորապես սահմանների մասին հարցը և վերջնագրային պահանջներ ներկայացնելը չի մտնում բանակի հրամանատարության իրավասություն մեջ: Ձեկուցեք, ինչո՞վ եք Դուք դեկավարվել Հայաստանի հետ կոնֆլիկտի լուծման համար...»²:

Հետևությունը միանշանակ է. Ձիչերինը Լեզրանի դժգոհությունը անհետևանք չի թողել:

Հայկական պատվիրակության ներկայացրած պայմանները Ձիչերինին հաղորդելուց և նրանից համապատասխան հրահանգավորում ստանալուց հետո օգոստոսի 7-ին Լեզրանը առաջարկում է քննարկել դրանք: Նա շատ արագ համաձայնում է հուշագրի բոլոր կետերի պահանջներին, բացի 4-րդից: Այդ կետը ձևակերպված էր այսպես. «Սորհրդային զորքերի հետքաշում նրանց կողմից գրավված շրջաններից և վերադարձ status quo ante դրություն՝ մինչև Հայկական Ղարաբաղ և Իջևանի շրջանի (նախկին Ղազախի գավառի լեռնային մասը) սահմաններ նրանց ներխուժումը»³: Լեզրանը, թեև ընդհանուր առմամբ բարյացակամորեն էր տրամադրված և աշխատում էր լարվածություն չստեղծել բանակցություններում, բայցևայնպես գրավյալ տարածքների հարցում համառում է, փորձում համոզել հայ պատվիրակներին, թե ուսական զորքերի ներկայությունն անհրաժեշտ է ազգամիջյան բախումներին վերջ տալու համար, որ նրանց ներկայությունը չի կանխորոշի այդ տարածքների հետագա պատկանելիությունը: Սկզբում հայ պատվիրակները ևս համառորեն պնդում էին իրենց պահանջի վրա, հիմնավորում նրա արդարացիությունը, բայց Ձանգեղուրում ծավալված ռազմական գործողությունների հետագա անհաջող ընթացքը, ինչպես նաև անպայման զինադադար կնքելու վերաբերյալ Համո Օհանջանյանից ստացած գաղտնի հեռագիրը, հարկադրում են գիջման գնալ: Օգոստոսի 10-ի առավոտյան Լեզրանը՝ ոգևորված բանակցություններում ձեռք բերած հաջողությամբ, հեռախոսային ուղիղ կապով հայտնում է Օրջոնիկիձեին, որ հայկական

պատվիրակության հետ կայացրել է համաձայնություն դադարեցնելու ռազմական գործողությունները հետևյալ պայմաններով. «Հայկական կառավարությունը իր զորքերը հետ է քաշում Ձանգեղուրի և Նախիջևանի սահմաններից մինչև Շահթախթի, որտեղ հայկական զորքերն են մնում: Ձորքերի հետ քաշումը այնպես է նախատեսված, որ Կարմալինովկայով Նախիջևանից ենգելալուրտ ամբողջ մայրուղին¹ դուրս լինի հայկական զորքերի ամեն մի ազդեցությունից: Բազարչայի շրջանում հայերը զորքերը հետ են քաշում Ղարաբ-դաղ լեռնաշղթայի մյուս կողմը: Հայկական կառավարությունը տալիս է իր պաշտոնական համաձայնությունը մեր զորքերով գրավելու Նախիջևանը, Ձանգեղուրը, ենգելալուրտի մայրուղին և Բազարչայի շրջանը մինչև նշված լեռնաշղթան: Այս պայմաններով մենք ռազմական գործողությունները անհապաղ դադարեցնելու և մեր զորամասերը Իջևանի գավառից Ղազախի սահման հետ քաշելու պարտավորություն ենք վերցնում: Այսօր, երկուս ու կես ժամից հետո, այդ համաձայնագիրը պետք է ստորագրվի»²:

Դատելով Օրջոնիկիձեի պատասխան-հեռագրից՝ նրան առանձնապես չի գոհացրել Լեզրանի կայացրած համաձայնությունը: «Մեր զորքերը Գորխից չարունակում են շարժումը դեպի Նախիջևան, - ասված է պատասխան-հեռագրում, - Դրոյի բանդաները ջախջախված են ու ցրված, գրավված են թնդանոթներ և այլ ավար, մեր ռազմական գործողությունները զարգացվում են»³ (ընդգծումը մերն է - է. Ջ.):

Հեռագրի վերջին տողերից պարզ երևում է, որ Օրջոնիկիձեին պատերազմը շարունակելու կողմնակից էր: Նույն օրը՝ օգոստոսի 10-ին, Օրջոնիկիձեին Լեզրանի կայացրած համաձայնության մասին հեռագրել է նաև Լենինին, Տրոցկուն և Ձիչերինին, որից նմանապես երևում է, որ ոգևորված չէ Լեզրանի գործունեությունից: Նրանում ասված է. «Նախիջևանի շրջանը գրավված է մեր զորքերով: Լեզրանն այսօր համաձայնագիր է ստորագրել Հայաստանի հետ ռազմական գործողությունները դադարեցնելու մասին: Այդ համաձայնագրով հայկական կառավարությունը տալիս է իր համաձայնությունը մեր կողմից արդեն գրաված շրջանը զբաղեցնելու մեր զորքերով»⁴:

¹ Սուբբ Բիչանադի լեռնանցքով Նախիջևանից Ձանգեղուր տանող մայրուղու մասին է:

² РГАСПИ, ф. 85, оп. 14, д. 9, л. 1:

³ Նույն տեղում:

⁴ «ՀՀ-ն 1918-1920թթ., փաստաթղթերի և նյութերի ժողովածու», էջ 249:

¹ Նույն տեղում:

² Նույն տեղում, էջ 135:

³ է. Ա. Զոհրաբյան, նշվ. աշխ., էջ 124:

Այսպես էր տրամադրությունը Բաքվում: Իսկ Թիֆլիսում, Համաձայնագրի ստորագրումից անմիջապես հետո երկու պատվիրակությունները Համատեղ Հայտարարություն հրապարակեցին, որում հայտնվում էր Հայաստանի Հանրապետության անկախության և լիակատար ինքնուրույնության ճանաչման հիման վրա ստորագրված համաձայնագրի և նրանում տեղ գտած հիմնական պայմանների մասին: Այդ նույն օրը Լեզրանը Համաձայնագրի տեքստը շտապ հաղորդեց նաև Մոսկվա՝ Չիչերինին: Համաձայնագիրը բաղկացած է հակիրճ պրեամբուլայից և 6 հոդվածներից: Նրանում ասված է, որ «1920թ. օգոստոսի 10-ին ՌՍՖՍՀ-ը՝ Հանձին լիազոր ներկայացուցիչ Բ. Վ. Լեզրանի մի կողմից և Հայաստանի Հանրապետության ներկայացուցիչներ Ա. Զամայանի և Ա. Բաբայանի՝ մյուս կողմից, ելնելով Հայաստանի Հանրապետության անկախության և լիակատար ինքնուրույնության ճանաչումից, կնքել են սույն համաձայնագիրը հետևյալի մասին.

1. 1920թ. օգոստոսի 10-ին ժամը 12-ից ռազմական գործողությունները ՌՍՖՍՀ-ի և Հայաստանի Հանրապետության գործերի միջև համարվում են դադարեցված:

Ծանոթություն. Ռազմական գործողությունները, որոնք կարող են տեղի ունենալ նշված ժամերից հետո՝ կապի բացակայության կամ այլ տեխնիկական արգելքների պատճառով, չպետք է հանգեցնեն ոչ մի հետևանքների, որոնք կհակասեն սույն պայմանագրի որևէ կետին:

2. Հայաստանի Հանրապետության գործերը զբաղեցնում են հետևյալ գիծը. Ծախթախթի-Ոսկ-Ազնաբերդ-Սուլթանբեկ և այնուհետև Կուկիից հյուսիս և Բազար-չայից (Բազարկենտ) արևմուտք գիծը: Իսկ Ղազախի գավառում՝ ս/թ. հուլիսի 30-ին զբաղեցրած գիծը: ՌՍՖՍՀ գործերը զբաղեցնում են վիճելի մարզերը. Ղարաբաղը, Ջանգեղուրը, Նախիջևանը, բացառությամբ ներկա համաձայնագրով Հայաստանի Հանրապետության գործերի տեղաբաշխման համար սահմանված գոտու:

3. Խորհրդային գործերով վիճելի տարածքների զբաղեցումը չի կանխորոշում այդ տարածքների նկատմամբ Հայաստանի Հանրապետության կամ Ադրբեջանի Խորհրդային Սոցիալիստական Հանրապետության իրավունքների հարցը: Այդ ժամանակավոր գրավումով ՌՍՖՍՀ նկատի ունի ստեղծել նպաստավոր պայմաններ Հայաստանի և Ադրբեջանի միջև տարածքային վիճելի խաղաղ լուծման համար այն հիմունքներով, որոնք կհաստատվեն մոտ ապագայում ՌՍՖՍՀ և Հայաստանի Հանրապետության միջև կնքվելիք հաշտության պայմանագրով:

4. Ռազմական գործողությունների դադարեցումից հետո պայմանավորվող կողմերը դադարեցնում են ռազմական ուժերի կենտրոնացումը ինչպես վիճելի, այնպես էլ սահմանային տարածքներում:

5. Մինչև ՌՍՖՍՀ և Հայաստանի Հանրապետության միջև պայմանագրի կնքումը Ծախթախթի-Ջուլֆա տեղամասում երկաթուղու շահագործումը տրվում է Հայաստանի երկաթուղային վարչությանը՝ պայմանով սակայն, որ նա չի կարող օգտագործվել ռազմական նպատակներով:

6. ՌՍՖՍՀ-ը երաշխավորում է Հայաստանի կառավարության բոլոր գործառնների արագ անցումը Հայաստան (գեներով և հանդերձանքով) որոնք կհայտնվեն խորհրդային գործերի զբաղեցրած գծի ետևում»¹:

Համաձայնագիրը կազմվել էր երկու օրինակից, որոնցից մեկը տրվել էր Հայաստանի Հանրապետության ներկայացուցիչներին, մյուսը՝ ՌՍՖՍՀ լիազոր ներկայացուցչին: Համաձայնագրի տակ Հայաստանի կողմից ստորագրել էին Զամայանը և Բաբայանը, ՌՍՖՍՀ կողմից՝ Լեզրանը:

Համաձայնագիրն ամբողջությամբ մեջբերեցինք, որպեսզի ընթերցողն էլ համոզվի, որ այն Հայաստանի համար առանձնապես նպաստավոր էր. բոլոր վիճելի տարածքները բացի Ծարուրից և Նախիջևանի գավառի մի մասից, անցնում էին Ադրբեջանի դաշնակցի ձեռքը, որը նույնն էր թե այդ նույն Ադրբեջանի, քանի որ վերջինս այնտեղ ազատորեն գործելու և այդ տարածքներին տիրանալու լայն հնարավորություն էր ստանում: Դա հասկանում էր կառավարությունը, հասկանում էր նաև հասարակությունը, ու նաև գիտակցում այն լրջագույն վտանգը, որ ստեղծվում էր այդ տարածքների պատկանելիության խնդրում: Հենց այդ գիտակցությամբ էր «Ժողովուրդ» թերթը «Զինադադարի առթիվ» հաղորդագրություն մեջ ընդգծում.

«Կնքված համաձայնությունը զինադադարի պայմանագիր չէ, որովհետև գորական գործողությունները դադարեցնելուց բացի պարունակում է իր մեջ այնպիսի խնդիրներ, ինչպիսին է Ծախթախթ-Ջուլֆա երկաթգծի շահագործման հարցը, որը հատուկ է դաշնագրերին:

Արդյոք երկաթգծի հանձնումը Հայաստանին կարծել չի՞ տալիս, որ Նախիջևանի չրջանը Հայաստանին չի կցվում: Սա արդեն տերիտորիալ խնդիր է, որ սոսկ զինադադար կնքող լիազորությունների սահ-

¹ ՀԱԱ, ֆ. 200, ց. 1, գ. 588, թ. 173:

մաններին գուրս է և կանխակալում է հետագայում կնքվելիք հաշտության պայմանները:

Մրանք ձևական խնդիրներ չեն, այլ վերին աստիճանի կարևորագույն և էական հարցեր, որովհետև վերաբերում են Հայաստանի գոյության, նրա մարմնի անդամահատության:

Պոկել մայր Հայաստանի մարմնից նրա մի երրորդը՝ Ղարաբաղը, Ջանգեղուրը և Նախիջևանը և դարձնել, ինչպես հաստատվում է, այդ ահագին հողամասը ինչ-որ չեզոք շրջան, ուր իշխանությունը չեզոք չի լինելու, այլ միակողմանի՝ հակառակորդից կազմված, մեզ համար միանգամայն անընդունելի է

Մենք հիմք ունենք անհանգստանալու: Հայ ժողովրդի երկու (և) կես հազար տարվա պատմական փորձը դարձրել է նրան սկեպտիկ, թերահավատ: Մեծ աշխարհակալ պետությունների՝ նրանց թվում առավելապես Սորհրդային Ռուսաստանի վարած երկդիմի քաղաքականությունը դեպի մանր պետությունները և նոր ազատված ազգերը, ստիպում է լինել վերին աստիճանի զգույշ և շրջահայաց»¹:

Ինչ խոսք, տեղին էր Հայ հասարակական շրջանների մտավախությունը ռուսական զորքերով գրավված տարածքների հարցում, տեղին էր, քանի որ ադրբեջանական իշխանությունները դրանցում ազատորեն գործելու հնարավորություն էին ստանում այն դեպքում, երբ Հայկական կողմը զրկված էր այդ տարածքներ մուտք գործելու ամեն մի հնարավորությունից: Եվ այդ ամենի դիմաց Հայաստանը միմիայն գինադադար էր ստանում ու նաև Ծախթախթի-Ջուլֆա երկաթուղու շահագործման իրավունք, որի իրագործման հնարավորությունը սակայն դյուրին չէր լինելու՝ տեղական ազգաբնակչության թշնամական վերաբերմունքի և Նախիջևանում թուրքական զորամասի ներկայության պատճառով: Դա ևս կառավարությունը հասկանում էր, բայց զինադադարը, ինչպես արդեն նշվել է, այլընտրանք չունեն, պատերազմական գործողությունների շարունակումը ծանր ու ձակատագրական հետևանքներ կունենար հանրապետության համար: Ինչ խոսք, որ համաձայնելով Նախիջևանի ռուսական օկուպացիայի, Հայաստանի կառավարությունը չէր կարող ազգաբնակչության թշնամական վերաբերմունքի վերացման պահանջ դնել: Բայց Նախիջևանում գտնվող թուրքական զորամասի հեռացման պահանջ նա կարող էր դնել: Ջամայանի պատվիրակությունը նման պահանջ դրե՞լ է Լեզրանի առջև

թե՞ ոչ, չենք կարող ասել: Արխիվային փաստաթղթերը այդ հարցը պարզելու հնարավորություն մեզ չեն տալիս: Մենք հակված ենք կարծելու, որ նման հարց բանակցությունների ընթացքում չի քննարկվել ու դա համարում ենք հայկական կողմի բացթողումը: Հենց այդ զորամասն էր, որ հետագայում՝ թուրք-հայկական պատերազմը սկսելուն պես, գրավեց Ծախթախթի-Նախիջևան երկաթուղին, հակահայկական ու հակախորհրդային խժոժություններ ծավալեց Մոսկվայի ռուս-թուրքական երկրորդ կոնֆերանսի նախօրեին՝ երկրամասը թուրքիային միացնելու ակնկալությամբ:

Բոլոր այդ հարցերին կանդորդառնանք հետագա շարադրանքում, իսկ հիմա ստորագրված համաձայնագրի նկատմամբ Հայաստանի դաշնակիցների և հակառակորդների վերաբերմունքին անցնելուց առաջ ծանոթանանք մի փաստաթղթի ևս, որպեսզի համոզվենք, որ Հայ հասարակության անհանգստությունը՝ կապված վիճելի տարածքները ռուսական օկուպացիայի հանձնելու հետ, անտեղի չէր: Դա գրաված հետախոսային խոսակցություն է¹ Նարիմանովի և Օրջոնիկիձեի միջև, որից պարզորոշ երևում է, թե Կովկասում գործող ղեկավար բոլշևիկները՝ ի դեմս Օրջոնիկիձեի, ինչպես էին մոտենում օկուպացված տարածքների պատկանելիության հարցին: Սոսակցության սկզբում Օրջոնիկիձեի տեղեկացնում է Նարիմանովին, որ այժմ ինքը Լենինի հետ ուղիղ հեռախոսակապ ունի, որ Արևելքի ժողովուրդների համագումարի հրավիրման համար ստեղծված կազմակերպական հանձնաժողովի մեջ մտցվում է նաև Նարիմանովը, Հայերից՝ Միկոյանը, Հյուսիսային Կովկասից Գաբրիելը և անդրադառնալով վիճելի տարածքների խնդրին ավելացնում. «...հենց նոր հաղորդված հեռագրին ես իմ կողմից համապատասխան հավելված կկցեմ, բայց, կարծում եմ, մեր մեջ ասած, քանի որ Ջանգեղուրը, Ղարաբաղը կգրավվեն մեր զորքերով, դա միևնույն է՝ կլինի ադրբեջանական»²: Սակայն Օրջոնիկիձեի այս խոսքերը չեն բավարարում Նարիմանովին: «Համագումար գումարելուց առաջ (նախ) անհրաժեշտ է ամրապնդել Ադրբեջանի դրությունը քաղաքական տեսակետից, - պատասխանել է Նարիմանովը: - Դա ես ասում եմ Ջիչերինի վերջին հեռագրերի պատճառով, որոնց բովանդակությունը Ձեզ հայտնի է: Ես Ձեզ կխնդրեի անհապաղ գալ

¹ «Ժողովուրդ», 14 օգոստոսի 1920թ.:

¹ Փաստաթուղթը թվագրված չէ: Դատելով բովանդակությունից՝ պետք է տեղի ունեցած լինի հուլիսի կամ օգոստոսին:

² „Геноцид армян...“, стр. 160:

(Բաբու) այդ հարցը քննարկելու համար, քանի որ մոտ օրերս ներկայացուցիչներ ենք ուղարկում կենտրոն: ...Ձիչերինի վերջին հեռագիրը ցույց է տալիս, որ մեր կողմից այդ տարածքի գրավումից հետո կենտրոնի կողմից տարածքը չեզոք է հայտարարվում, իսկ դա արդեն ցույց է տալիս, որ Ադրբեջանը տվյալ պահին կորցնում է այդ տարածքը: Ես այնուամենայնիվ հետաքրքրվում եմ, Դուք շուտով կլինեք մեզ մոտ: Ես կցանկանայի մինչև ներկայացուցչի ուղարկումը կենտրոն, խորհրդակցել Ձեզ հետ: Հետո կխնդրեի ուղիղ հեռախոսակապով խոսեք ընկ. Ստալինի հետ և ցույց տաք աղբյուրը՝ որտեղից է այդ ամենը տեղի ունենում: Մենք որոշել ենք այստեղ և կենտրոնում չորս-հինգ օրից հետո ցրել հայկական բոլոր խմբերը...»¹ (ընդգծումը մերն է - է. Ջ.):

Ինչպես տեսնում ենք, Ձիչերինից դժգոհ Նարիմանովը ոչ թե նրանից է փորձում իրեն հետաքրքրող հարցի մասին տեղեկություն ստավալ, այլ Ստալինից: Իսկ դա վկայությունն է այն բանի, որ Նարիմանովը հրաշալիորեն տեղյակ էր Ստալինի հակահայկական տրամադրություններին: Գուցեև պատահակա՞ն էր խոսում հայկական խմբերի ցրման մասին, որին Օրջոնիկիձեն այդպես էլ չարձագանքեց: «Իհարկե, ես համաձայն եմ Ձեզ հետ, որ Ձիչերինն անհուսալիորեն չփոթում է, քանի որ այնտեղ լինելու է խորհրդային իշխանություն և լինելու են այնտեղ մեր զորքերը, - ասել է Օրջոնիկիձեն: - Չնայած ձևական կողմին, փաստորեն մենք կկարողանանք այդ տարածքները ամրակցել Ադրբեջանին: Ձե՞ որ ոչ մեկն աշխարհում ի վիճակի չէ խանգարելու մեզ ազդել նշված մարզերի ազգաբնակչության վրա՝ արտահայտվելու Ադրբեջանին միանալու օգտին, այդ մարզերը դարձնելու Հայաստանի դեմ խորհրդային քարոզչության այն բազան, որն այդպես սաստիկ ուզում են մենչևիկները և մուսավաթականները»²:

Կարծում ենք սա այն դեպքն է, երբ անվարան կարող ենք ասել՝ «մեկնաբանություններն ավելորդ են»: Իսկ թե ինչու Նախիջևանի անուր չեն հիշատակել զրուցակիցները, ապա հավանաբար, պատճառը ազգային կազմն էր: Թող Ձիչերինը և Լեզրանը կուրծք ծեծեն, ինչքան ուզում են, թե ժամանակավոր օկուպացիան չի կանխորոշում մարզի պատկանելիությունը: Ստալինը, Օրջոնիկիձեն և Նարիմանովը ստույգ գիտեն, թե ինչպես պետք է լուծել այդ բարդ խնդիրը:

* * *

Թվում էր, թե ստորագրված համաձայնագրից միակ դժգոհը Հայաստանի կառավարությունը պետք է լիներ, իսկ Ադրբեջանը՝ հայտնվելով շահեկան դրություն մեջ, պետք է գոհ լիներ: Բայց ոչ, շատ շուտով պարզվեց, որ Ադրբեջանը և քեմալական Թուրքիան ևս դժգոհ են, և որ առավել քան տարօրինակ է՝ դժգոհ են Հայաստանի Հանրապետության դաշնակիցներ համարվող Անգլիան և Ֆրանսիան: Նախ ծանոթանանք վերջիններին դիրքորոշմանը:

Համաձայնագրի ստորագրման արդեն հաջորդ օրն առավոտյան Անդրկովկասում Մեծ Բրիտանիայի արտակարգ կոմիսար կոմանդոր Լյուկը, իսկ կեսօրին Ֆրանսիական ռազմական առաքելության ներկայացուցիչ Դե Մարտելը Թիֆլիսում Հայաստանի դիվանագիտական ներկայացուցչի՝ Տ. Բեկդադյանի գլխին շանթ ու կրակ էին թափում, ամեն տեսակի սպառնալիք ու մեղադրանք ներկայացնում Հայաստանի կառավարությանն այն բանի համար, որ համարձակվել է Ռուսաստանի հետ զինադադարի համաձայնագիր ստորագրել առանց իրենց տեղյակ պահելու:

Նույն օրը Լյուկը շտապ հեռագրում է լորդ Քերզոնին, հայտնում կնքված համաձայնագրի մասին, ավելացնում, որ ինքը իր զարմանքն է արտահայտել և հայտարարել հայ ներկայացուցիչներին, որ համաձայնելով Նախիջևանի բոլշևիկյան օկուպացիային, որտեղից ճանապարհ է բացվում դեպի Թուրքիա և Պարսկաստանի հյուսիսարևմտյան շրջանները, Հայաստանը փաստորեն գործել է ընդդեմ Մեծ Բրիտանիայի: «Հայերը իրենց գործողությունը բացատրեցին նրանով, որ իրենք այլևս չեն կարողանում դիմադրել և հայտարարեցին, որ իրենք նախկինի պես պահպանում են հավատարմությունը Անտանտին, - ասված է հեռագրում: - Նրանք նաև հաստատեցին, որ ժամանակը, որը նրանք կշահեն առաջիկա բանակցություններում Երևանում, կօգնի իրենց կազմակերպելու հետագա դիմադրությունը»¹:

Ջրավարարվելով կնքված զինադադարի հարկադրական և ժամանակավոր լինելու մասին Բեկդադյանի բացատրություններով՝ շուտով ֆրանսիական ռազմական առաքելության պետ, գնդապետ Կորբելլը և կոմանդոր Լյուկը, մի-մի պատվիրակության գլուխ անցած, ժամանում են Երևան (համապատասխանաբար՝ օգոստոսի 24-ին և 31-ին)՝ Հայաստանի կառավարության հակաբոլշևիկյան տրամադրություններ:

¹ Նույն տեղում:

² Նույն տեղում, էջ 161:

¹ Նույն տեղում, էջ 132:

րի և Արևմուտքի նկատմամբ հավատարմության վերաբերյալ Բեկզաղ-
յանի հավաստիացումների մասին անձամբ վարչապետից լսելու նպա-
տակով: Արխիվներում պահպանված վավերագրերը վկայում են, որ իր
կառավարության հակաբոլշևիկյան աներեր դիրքորոշման մասին Համո
Օհանջանյանից անհրաժեշտ բացատրություններ ստանալուց հետո էլ
և՛ Կորբելը, և՛ Լյուկը Հայաստանին որևէ օգնություն ցույց տալու
խոստում չեն տվել, այլ փորձել են իրենց երկրների համար տնտեսա-
կան շահ հետապնդող պայմաններ պարտադրել: Այդ բանակցություն-
ներին այստեղ չենք անդրադառնա, թեև դրանք խիստ բնութագրական
են մեր «դաշնակիցների» համար, քանի որ 1920թ. թուրք-հայկական
պատերազմին նվիրված մեր աշխատության մեջ դրանք արդեն բա-
վականաչափ լուսաբանված են¹: Սակայն չենք կարող թեկուզ հակիրճ
չանդրադառնալ այն խուճապային տրամադրություններին, որ համա-
կել էր Հայաստանի կառավարող շրջաններին անգլո-ֆրանսիական
ներկայացուցիչների բարձրացրած աղմուկը: Հավատ չընծայելով
վերջիններս՝ Հայաստանի կառավարության հակաբոլշևիկյան դիրքոր-
ոշման մասին իրենց կառավարություններին զեկուցելու խոստումնե-
րին, Արտգործնախարարությունը Եվրոպայում գտնվող իր ներկայա-
ցուցիչների և անհատ գործիչների միջոցով բացատրական աշխատանք
տանելու որոշում կայացրեց: Ահա, օրինակ, ինչ է ասված այդ օրերին
հատուկ առաքելությամբ Եվրոպայում գտնվող Ալ. Խատիսյանին
ուղարկված ընդարձակ (երեք մեքենագիր էջ) գրության մեջ. «Այդ
պայմանագիրը ստեղծել է Թիֆլիսում դաշնակիցների ներկայացուցիչ-
ների մեջ դեպի մեզ շատ աննպաստ տրամադրություն: ...Պետք է աշ-
խատել ամեն միջոցներով, որ նույնանման տրամադրություններ
չստեղծվեն դեպի մեզ Եվրոպայում: Պետք է աշխատել պարզել դաշ-
նակից պետությունների կառավարություններին և առհասարակ քա-
ղաքական շրջաններում, որ Հայաստանի Հանրապետությունը ստիպ-
ված է եղել կնքել այդ պայմանագիրը Սովետական իշխանութեան
ներկայացուցիչ հետ, որը սոսկ զինադադար է: Մենք այդ զինադադարի
պայմանագրով չենք հրաժարվում մեր իրավունքներից այն հողամա-
սերի վերաբերմամբ, որոնք այժմ գրավված են սովետական զորքերով:
Այդ հարցերը մնում են վիճելի և պիտի վճռվեն վերջնականապես մո-
տիկ ապագայում կնքվելիք դաշնագրով: Եթե մենք այդ դաշնագիրը

¹ Տե՛ս է. Ա. Զոհրաբյան, նշվ. աշխ., էջ 131-137:

կնքելու ժամանակ ուժեղ լինենք, կարող ենք պնդել մեր պայմանների
վրա և ոչինչ չզիջել»¹:

Արտգործնախարարության տեղեկատվության բաժնի վարիչ Մ.
Արզումանյանի կազմած այս գրության մեջ խոսվում է նաև այն ծանր
դրության մասին (պատերազմ մի քանի ճակատներում, զենքի ու
զինամթերքի պակաս, անընդհատ կոիվներից գորքերի հոգնածություն
և այլն), որ հայտնվել է Հայաստանի Հանրապետությունը 1920թ. ամ-
ռան ամիսներին և ավելացվում. «Մինչև վերջնական դաշնագիր կնքե-
լը Հայաստանը Հնարավորություն կունենա ամրապնդվել, զինել իր
զորքերը նոր հրացաններով (որոնք դժբախտաբար ժամանակին
չհասան) և նոր օգնություն ստանալով դաշնակիցներից, լարել իր
ուժերը և շարունակել կոիվ բոլշևիկների դեմ: Հայաստանի կառավա-
րությունը չի փոխել իր քաղաքական ուղղությունը և շարունակում է
իր կտրուկ քաղաքականությունը դեպի բոլշևիկները և պիտի կռվի
մինչև վերջին հնարավորությունը: Դաշնակիցները պետք է հասկանան
Հայաստանի ծանր կացությունը և համոզվեն, որ այդ զինադադարը
հակադաշնակից չէ: Ահա այդ ուղղությամբ պետք է գործել ցրելու այն
աննպաստ տպավորությունը, որ կարող է թողնել դաշնակիցների վրա
մեր կնքած զինադադարը»² (ընդգծումը մերն է - է. Զ.):

Ուշագրավ մի հանգամանք ևս. այս գրության հետ մեկտեղ Ալ.
Խատիսյանին էին ուղարկվել նաև Կորբելին տրված հուշագրի և Նա-
խիջևանի ուղղությամբ Հայկական բանակի ռազմական գործողու-
թյունները դադարեցնելու պատճառների վերաբերյալ Արտգործնա-
խարարություն ներկայացրած գեն. Նազարբեկյանի գաղտնի զեկու-
ցագրի պատճենները: Ռուսաց լեզվով գրված այս երկու փաստա-
թղթերն էլ որոշակի հետաքրքրություն են ներկայացնում: Կորբելին
հանձնված հուշագրում ստեղծված իրադրության համար Հայաստանի
կառավարությունը, թեև ծայրահեղ զգուշությամբ, բայցևայնպես մե-
ղադրում է Դաշնակից տերություններին և հատկապես Մեծ Բրիտա-
նիային: «Ինչպես Ձեզ հայտնի է, - ասված է հուշագրում, - Հայաստա-
նի կառավարությունը սկզբից ևեթ Կովկասում Դաշնակցային առաքե-
լությունների ներկայացուցիչներին մատնանչել է Հայաստանի հողերի
վրայով բոլշևիկյան և թուրք-աղբբեջանական ուժերի միավորման
վտանգը Հայաստանի և Արևելքում Դաշնակից տերությունների չա-

¹ ՀԱԱ, ֆ. 200, ց. 1, գ. 588, թ. 171:

² Նույն տեղում, թ. 171-172:

հերի համար: Այդ ժամանակ էլ իմ կառավարությունը մատնանշել է Ղարաբաղի, Զանգեզուրի և Նախիջևանի շրջանները Հայաստանին հանձնելու հսկայական նշանակությունը բոլշևիկների և թուրք-աղբրեջանցիների նշված միավորմանը խանգարելու հաջողության գործում, ինչպես նաև դաշնակիցների կողմից Հայաստանին չտապ և ժամանակին մարտական և այլ կարգի օգնություն ցույց տալու անհրաժեշտությունը: Հայկական Ղարաբաղի կառավարումը Աղբրեջանին հանձնելու և Հայաստանի գործերով Զանգեզուրի շրջանի գրավումը չթույլատրելու մասին Անդրկովկասում անգլիական բարձրագույն հրամանատարությունն որոշումը զգալի հարված հասցրեց բոլշևիկյան և թուրք-աղբրեջանական ուժերի ներխուժումից Հայաստանի սահմանները պաշտպանելու գործին»¹ (ընդգծումը մերն է – է. Զ.): Այնուհետև նկարագրելով այն ծանր դրությունը, որում հայտնվել է Հայաստանը՝ միայնակ պայքարելով արևմուտքում թուրքերի, իսկ արևելքում բոլշևիկյան և աղբրեջանական ուժերի դեմ, երբ Անգլիայի խոստացած ռազմամթերքը ուշանում էր, հայկական գործերը, այնուամենայնիվ, ձգտելով թույլ չտալ բոլշևիկյան և թուրքական ուժերի միավորումը, Նախիջևանի ուղղությամբ հարձակման անցան և շոշափելի հաջողության հասան՝ գրավելով Վեդիբասարը, Ծարուրը, հետ մղելով թշնամուն Օլթիի և Ղազախի ճակատներում: Սակայն «այդ ընթացքում քաղաքական և ռազմական իրադրության բարդացումը, – շարունակում է Համո Օհանջանյանը, – հարկադրեց իմ կառավարությանը կանգնեցնելու հայկական գործերի հետագա առաջխաղացումը դեպի Նախիջևան: Հայաստանի գործերի հրամանատարի՝ կից ներկայացվող հակիրճ հաշվետվությունից դուք կտեսնեք այն հիմնական պատճառները, որոնց հետևանքով կանգնեցվեց նշված առաջխաղացումը և ժամանակավորապես անհնարին դարձրեց Նախիջևանի ուղղությամբ հետագա գործողությունը»²:

Կորբելլին հասցեագրած այս գրությունը միանգամայն ճիշտ է արտացոլում իրականությունը, այն պատճառները, որոնք հնարավոր դարձրին Ղարաբաղի, Զանգեզուրի, Նախիջևանի զինագրավումը խորհրդային գործերի կողմից: Բայց չգիտես ինչու, Օհանջանյանն այդ մասին խոսում է ոչ թե Անգլիայի, այլ Ֆրանսիայի զինվորական ներկայացուցչին ուղարկած գրությունում: Ի դեպ՝ հետագայում էլ հայ

գործիչները համարձակություն չցուցաբերեցին անգլիացիների երեսին ասելու այն, ինչ ասում էին հետևից: Դրանում համոզվելու առիթներ դեռ կունենանք:

Վերադառնալով գեներալ Նազարբեկյանի գրության խնդրին, ավելորդ չենք համարում ընդգծելու, որ թեև մեր ձեռքի տակ փաստեր չկան, որոնք վկայեին որ Դաշնակցային տերությունների ներկայացուցիչները Հայաստանի կառավարությունից բացատրություն են պահանջել Նախիջևանի ուղղությամբ ռազմական գործողությունները դադարեցնելու պատճառների մասին, սակայն հենց այն հանգամանքը, որ Հայաստանի գործերի հրամանատարը՝ գեներալ Նազարբեկյանը, այդ պատճառների մասին զեկուցագիրը գրել է ոչ թե Նախիջևանում ռազմական գործողությունների դադարեցման շրջանում (հուլիսի վերջ-օգոստոսի սկիզբ), այլ բավականին ուշ՝ օգոստոսի 20-ին, գնդ. Կորբելլի Երևանյան այցելության նախօրյակին, ինչպես նաև այն, որ զեկուցագիրը գրվել է ոչ թե ռազմական, այլ արտաքին գործերի նախարարի պահանջով, վկայում է, որ նման հարցադրում, ըստ երևույթի, եղել է: Այդպիսի ենթադրության օգտին է խոսում նաև այն, որ նույն օրը՝ օգոստոսի 20-ին, վարչապետ և արտգործնախարար Համո Օհանջանյանը իսկույն զանգել էր Երևանում կոմանդոր Լյուկի ներկայացուցիչ կապիտան Գրեյսիին՝ նրա միջոցով փաստաթուղթը Լյուկին ուղարկելու նպատակով: Օգոստոսի 25-ին Լյուկին ուղարկած զեկուցագրում Գրեյսին գրում է.

«Պատիվ ունեմ Ձեզ տեղեկացնելու, որ պ-ն Օհանջանյանը զանգեց ինձ ամսի 20-ին, և հետևյալը նրա խոսակցության հակիրճ շարադրանքն է: Ես նրան հայտնեցի, թե այն համաձայնությունը, որ նրանք արել են Սորհրդային Ռուսաստանի հետ և որով նրանք Սորհրդային գործերի առաջ բացել են Նախիջևանի ճանապարհը, շատ անբարյացակամ կերպով կարող է ընդունվել Անգլիայում:

Սրա վրա նա ինձ հայտնեց մի քանի պատճառներ այն մասին, թե ինչո՞ւ է արվել այս համաձայնությունը: Դրանից հետո նա ինձ տվեց մի պաշտոնական հայտարարություն, ինչպես նաև ընդհանուր հրամանատար Նազարբեկովի մեկ հաղորդագրությունը, ուր նա նկարագրում է ռազմական դրությունը»¹: Այնուհետև նշելով, որ Օհանջան-

¹ Նույն տեղում. թ. 175:

² Նույն տեղում:

¹ Գ. Յաղըճյան, Ինչո՞ւ Հայաստանի Հանրապետության բանակը 1920թ. չպաշտպանեց Նախիջևանը (պատմական երկու անհայտ փաստաթուղթ): Տե՛ս «Նախիջևան», ամսաթերթ, մարտ 2000թ.:

յանն առաջարկում է, թե եթե Անգլիան չի կարող անմիջական օգնություն ցույց տալ ռազմական ուժով, ապա գոնե օգտագործի դիվանագիտական ճանապարհով բոլշևիկների վրա ազդելու հնարավորությունը, Գրեյսին մեջբերում է վարչապետի հետևյալ խոսքերը.

«Մեր սեփական ուժն անբավարար է Բենալ փաշայի սպառնական կեցվածքի և մեր սահմաններում նրա ու բոլշևիկների առկայությամբ՝ մենք բոլոր կողմերից շրջապատված ենք: Սա էր հիմնական պատճառը մեր կողմից համաձայնագիրը ստորագրելու: Ուրիշ այլընտրանք չկար, և մենք պետք է համաձայնության գայինք հնարավոր լավագույն պայմաններով, որ կարող էինք ձեռք բերել: Այն փաստը, որ մենք Ջուլֆայի երկաթուղու տիրություն համար մինչև վերջ պայքարեցինք, սա է փաստում: Եվ, իհարկե, մեր երկրի անհույս պայմանները ստիպեցին մեզ համաձայնել:

Նախիջևանում մենք միայն հոգնած զորամասերի կես գումարտակ ունեինք հետևակի երեք գնդի և հեծելազորի մեկ ջոկատի դեմ: Ու այս ուժի կեսը կործանվեց թշնամու կողմից»¹ (ընդգծումը մերն է – է. Զ.):

Որ Համո Օհանջանյանը բացահայտորեն սխալ տեղեկություն է տալիս Նախիջևան մտած Հայկական ուժերի թվակազմի մասին, ակնհայտ է: Նախիջևանի ուղղությամբ գործում էր ոչ թե կես, կամ մեկերկու գումարտակ, այլ մի ամբողջ զորաջոկատ (отряд) գեներ. Շելկովնիկյանի (Շելկովնիկով) գլխավորությամբ: Խնդիրը, անշուշտ, թվակազմի մեջ չէր: Եվ ոչ էլ Հայկական ուժերի առաջխաղացումը հակառակորդի թվական գերազանցության պատճառով էր կանգնեցվել, այլ Ռուսաստանի հետ պատերազմի մեջ խրվելու անհեռանկարայնություն:

Եթե գեն. Նազարբեկյանի գրության լույս աշխարհ գալու հանգամանքների մասին վերը նշված փաստարկները չլինեին էլ, ապա դարձյալ նույն հետևությունը կարելի էր անել, քանի որ նրանում նշված պատճառների շարքում կան այնպիսիք, որոնք հանգեցնում են այն մտքին, որ փաստաթուղթը գրված է եվրոպացիների համար: Ահա, օրինակ, ինչ է ասված Նախիջևանի ուղղությամբ ռազմական գործողությունները դադարեցնելու պատճառներից առաջինում.² «Մուսուլ-

ման բնակչության փախուստը Շարուր-Նախիջևանի շրջանից և Հանրապետության կառավարության իշխանությունը նրա ենթարկվել չցանկանալը: Այդ հարցում Նախիջևանի մուսուլմանական խորհրդի հետ համաձայնության գալու բոլոր փորձերը, ինչպես ձեզ հայտնի է, անհաջողության մատնվեցին»¹:

Ո՞ւմ համար պարզ չէ, որ այս տողերը գրված են Եվրոպայի համար և ոչ Հայաստանի կառավարության: Թե՞ գեն. Նազարբեկյանը նոր պիտի հասկանար, որ սրված թշնամական հարաբերությունների պայմաններում, 1918–1919թթ. Նախիջևանահայության ցեղասպանությունն իրագործած մուսուլմանները՝ վախենալով վրեժխնդրությունից, կփախչեն: Համոզիչ չէ նաև 6-րդ կետի առաջին պարբերությունը. «Վերջապես, եթե և ենթադրվում էր Նախիջևանը գրավել Պարսկաստանի հետ առևտրական կապերի հաստատման համար, ապա միայն այն նկատառումով, որ Շահթախթի-Ջուլֆա տեղամասը պիտի պաշտպանեն իրենք՝ բնակիչները»²: Հասկանալի է, որ բնակիչները դա կանեին միայն այն դեպքում, եթե ոչ թե ուժի թելադրանքով, այլ կամովին ընդունեին Հայաստանի հպատակությունը:

Երրորդ, չորրորդ, հինգերորդ կետերում նշված պատճառաբանությունները (հայկական զորքերի հոգնածությունը, կոմունիկացիաների անապահով վիճակը, պահեստային ուժերի բացակայությունը, անգլիական զենքի ու զինամթերքի՝ Հայաստան ուղ հասնելը և այլն) թեև տեղին են և ընդունելի, բայց, մեր խորին համոզմամբ, որոշիչ դեր չեն խաղացել Նախիջևանում ռազմական գործողությունները դադարեցնելու հարցում: Շարուրում կենտրոնացած հայկական ուժերը ի դրու էին ամբողջ Նախիջևանը գրավելու (թշնամին խուճապահար փախչում էր առանց լուրջ դիմադրություն ցույց տալու, բարոյահոգեբանական առավելությունը Հայկական բանակի կողմն էր և այլն), եթե խորհրդային զորամասերը չմտնեին Նախիջևան և վերջնագրի կարգով չպահանջեին դադարեցնել հետագա առաջխաղացումը: Բայց չգիտես ինչու այդ մասին հստակ չի խոսվում ո՛չ Օհանջանյանի և ո՛չ էլ Նազարբեկյանի գրություններում: «Շահթախթին գրավելու համար ուղարկված զորքերը, – ասված է Նազարբեկյանի գրության երկրորդ կետում, – խորհրդային զորքերով Ձանգեզուրի և Ղարաբաղի գրավվածություն պայմաններում, անբավարար են հետագա առաջխաղացման համար

¹ Նույն տեղում:

² Անիտա Բուրդեյի կազմած «Հայաստան. Քաղաքական և էթնիկական սահմաններ» փաստաթղթերի ժողովածուում տեղ գտած գեն. Նազարբեկյանի գրությունը անգլերենից հայերեն թարգմանել և մամուլում հրատարակել է Գ. Յազըճյանը: Մենք օգտագործել ենք ՀԱԱ-ում պահվող ուսերեն բնօրինակը:

¹ ՀԱԱ, ֆ. 200, ց. 1, գ. 588, թ. 174:

² Նույն տեղում:

և պահանջում են հզորացում նոր գործառնասերով: Այսպես չարացած բնակչության կուտակված զանգվածից բացի, Շարուրի ջոկատի գործառնասերի դիմաց հայտնվեցին նոր ուժեր՝ ի դեմս խորհրդային բանակի»¹: Այսքանը միայն: Ստեղծվում է սպավորություն, որ հայոց դեկավարությունը չէր ուզում իր «ղաչնակիցներին» ասել բուն ճշմարտությունը, այն է՝ հետագա առաջխաղացումը առաջ կբերեր բացահայտ պատերազմ Ռուսաստանի հետ, ինչը կարող էր կործանարար հետևանքներ ունենալ: Չէր ուզում ասել, որովհետև հասկանում էր, որ Կորբելյին և Լյուկին դա չէր բավարարի, նրանք կպահանջեին շարունակել պատերազմը: Հայ գործիչները չէին կարող չհասկանալ, որ անգլոֆրանսիացիներին հետաքրքրողը ոչ թե Նախիջևանի պատկանելիության խնդիրն է, Հայաստանի կազմում նրան տեսնելը, այլ բոլշևիկների դեմ զինված պայքարը: Չէ՞ որ ընդամենը մեկ տարի առաջ՝ 1919թ. հուլիսին Շարուր-Նախիջևանում ծագած հակահայկական ապստամբության ժամանակ, նրանք ոչ միայն չօգնեցին ու չխրախուսեցին ճնշելու ապստամբությունը, այլ հակառակը՝ պահանջեցին դադարեցնել ռազմական գործողությունները²: Այսպիսին էին Հայաստանի «ղաչնակիցները», այսպես էին նրանք հոգ տանում իրենց փոքր դաշնակցի անվտանգության մասին: Իրենք մի կողմ քաշված, նրան հրում էին անհավասար պատերազմի հզոր հակառակորդի դեմ, քաջ գիտակցելով, որ դրանով իսկ Հայաստանի համար մահավճիռ են կայացնում: Մինչդեռ վերջինս շարունակում էր հավատարիմ մնալ ու հայցել նրանցից օգնություն: Օգոստոսյան այդ նույն օրերին էր, որ արտգործնախարար Հ. Օհանջանյանի հանձնարարությունը Տ. Բեկզադյանը ընդարձակ նամակով դիմում է Թիֆլիսում գտնվող անգլո-ֆրանսիական ներկայացուցիչներին, հակիրճ, բայց համոզիչ փաստերով նկարագրում Կարմիր բանակի Ադրբեջան մտնելուց հետո տարածաշրջանում ստեղծված իրադրությունը, Հայաստանի վրայով միմյանց ձեռք մեկնելու քեմալականների և բոլշևիկների ձգտումը, Հայաստանի կառավարության անհավասար կոիվը և հարկադրված զինադադարը, ռուսական ժամանակավոր օկուպացիայի հանձնված հայկական տարածքները վերադարձնելու նրա վճռականությունը: «Հայտնելով վերոհիշյալը Ձեզ ի տեղեկություն, - ասված է այդ նամակում, - իմ կառավարությունը խնդրում է Ձեզ հաղորդել այս ձեր կառավարությանը և

միևնույն ժամանակ հարցնել, թե ինչպիսի նյութական և դիվանագիտական օգնություն կարող է ձեր կառավարությունը ցույց տալ Հայաստանին նրա կողմ ընդդեմ թուրք-մեծամասնական ուժերի, որոնք սպառնում են իր անկախությունը: Իր կողմից իմ կառավարությունը գտնում է չափազանց անհրաժեշտ, որ դաշնակիցները ճնշում գործ դնեն մեծամասնական կառավարության վրա: Իմ կառավարությունը գտնում է նույնպես անհրաժեշտ անմիջապես ուղարկել Հայաստան վառելիք և փոխադրության միջոցներ: Հրավիրում եմ Ձեր ուշադրությունը այն բանի վրա, որ վերոհիշյալ բոլոր միջոցները պետք է գործադրել ամենակարճ ժամանակի ընթացքում, քանի որ Հայաստանը մի փոքր երկիր է, որը չի կարող երկար դիմադրավել հարձակվող հարևաններին, որոնք ավելի ուժեղ են թե՛ մարդկանցով, և թե՛ ուրիշ միջոցներով»¹:

Լեզրան-Ջամայան համաձայնագրի նկատմամբ Հայաստանի դաշնակիցների անհանդուրժող վերաբերմունքի մասին երկար կարելի է խոսել, բայց, կարծում ենք, ասվածն էլ բավական է պատկերացում կազմելու համար: Այժմ փորձենք պարզել թե ինչպես ընդունվեց համաձայնագիրը հակառակորդ ճամբարում, Ռուսաստանի դաշնակիցների՝ Ադրբեջանի և Թուրքիայի կողմից: Սրանք, իհարկե, Ռուսաստանին սպառնալ չէին կարող, բայց կեղծ ու պատիր պատճառաբանություններով ազդել նրա վարած քաղաքականության վրա, կարող էին և հենց այդպես էլ վարվեցին: Հազիվ երեք-չորս օր էր անցել համաձայնագրի ստորագրումից, երբ Մոսկվայում գտնվող Բ. Շահթախթինսկին և Բեքիր Սամի-բեյը ձեռք-ձեռքի տված գրոհեցին Կրեմլը՝ որպես օբյեկտ ընտրելով ոչ թե Չիչերինին, որին տարհամոզելու հույս չունեին այլևս, այլ անձամբ Լենինին: Օգոստոսի 13-ին Լենինը ստացավ Ադրբեջանի արտակարգ ներկայացուցիչ (այդպես է փաստաթղթում) Շահթախթինսկու նամակը Հայաստանի հետ Լեզրանի ստորագրած համաձայնագրի հետևանքով Ադրբեջանին և Ռուսաստանին սպառնացող վտանգների մասին, իսկ 14-ին՝ քեմալական պատվիրակության² ղեկավար Բեքիր Սամի-բեյը Լենինի հետ տեսակցություն ժամանակ Կարմիր բանակի հետ կապի հաստատման պատրվակով համոզորեն պահանջում էր թույլ տալ զրավելու Շահթախթին և Սարիգամիչը: Հա-

¹ Նույն տեղում:

² 1919թ. հուլիսյան դեպքերի մասին մանրամասն տե՛ս Է. Ա. Զոհրաբյան, Նախիջևանյան հիմնահարցը և Հայաստանի «ղաչնակիցները» (1918թ. դեկտ. - 1920թ. ապրիլ), Եր., 2002, էջ 112-182:

¹ «ՀՀ-ն 1918-1920թթ. փաստաթղթերի և նյութերի ժողովածու», էջ 267:

² Մոսկվա էր ժամանել հուլիսի 19-ին Պորհրդային Ռուսաստանի հետ բարեկամության և համագործակցության պայմանագիր ստորագրելու նպատակով (տե՛ս Է. Ա. Զոհրաբյան, 1920թ. թուրք-հայկական պատերազմը..., էջ 137-145):

մաճայնացված գործողություններ էին դրանք, թե՞ ոչ: Հակված ենք կարծելու, որ համաճայնեցված էին: Այլ կերպ լինել չէր էլ կարող. ժամանելով Մոսկվա, նրանք հետապնդում էին նույն նպատակը, պահպանում մշտական կապ, խորհրդակցում միմյանց հետ: Առաջ անցնելով ասանք, որ Բ. Շահթախթինսկին նույն կերպ գործեց նաև 1921թ. Մոսկվայի երկրորդ ուս-թուրքական կոնֆերանսի օրերին, երբ վճռվում էր Նախիջևանի երկրամասի ճակատագիրը: Հենց նրա և Յուսուֆ Քեմալի հանդիպումների արդյունքում ծնունդ առավ Նախիջևանի երկրամասը Ադրբեջանի հովանավորություն տակ դնելու գաղափարը՝ առանց երրորդ տերություն հանձնելու իրավունքի: Ինչ վերաբերում է Լենինին հասցեագրած Շահթախթինսկու օգոստոսի 13-ի նամակին, ապա ահա թե ինչ էր ասված նրանում.

«Նկատի ունենալով Հայաստանի հետ հաշտության կնքման մասին մամուլում հայտնված տեղեկությունը, ես՝ որպես Ադրբեջանի արտակարգ ներկայացուցիչ և Ադրբեջանական կոմունիստական կուսակցության լիազոր ներկայացուցիչ, իմ պարտքն եմ համարում հայտարարելու հետևյալը.

1. Համարյա ամբողջ Նախիջևանի երկրամասի և Շահթախթի-էրիվան երկաթուղագծի հանձնումը Հայաստանին, դաշնակներին հնարավորություն է տալիս օգտագործելու Մակվի երկաթուղին և Մակվի խանությունից արտահանելու միջև 8.000.000 փուլթ ցորեն հին պաշարից և 3.000.000 փուլթ նոր բերքից, ոչ պակաս 20.000 գլուխ խոշոր անասուն և մի քանի միլիոն փուլթ չոր մրգեր: Այդ պաշարները, որոնք անպայման հարկավոր են Ադրբեջանին և Նորհրդային Ռուսաստանին, դաշնակները ամենակարճ ժամանակամիջոցում երկաթուղով կարտահանեն:

Դաշնակներին Շահթախթի-Մակու, Շահթախթի-էրիվան, Զուլֆա-Թավրիզ երկաթուղու և Ուրմիայի չողենավագնացության հանձնումով իրականանում է պարսկական պաշարների ազատ արտահանությունը Հայաստան, Վրաստան և Եվրոպա, ինչին երեք տարի ապարդյուն ձգտում էին դաշնակները, պարսկական կապիտալիստները և Անգլիան:

Այդ պաշարների չնորհիվ Հայաստանի դաշնակցական կառավարությունը հնարավորություն կստանա մեղմելու հայ ժողովրդի դժգոհությունը, պահպանելու Անտանտի ուժի հանդեպ նրա հավատը, բարձրացնելու իր հեղինակությունն ընդդեմ Նորհրդային Ռուսաստանի և հոյակապորեն կազմակերպելու ոչ միայն իր, այլև վրացական բանակի մատակարարումը:

Ամբողջ շարժակազմով Շահթախթի-էրիվան (չուրջ 100 վերստ) և Շահթախթի-Զուլֆա (նույնպես չուրջ 100 վերստ) երկաթուղու անցումը Հայաստանին, դաշնակների ձեռքն է տալիս ողջ պարսկական Ադրբեջանը, նրանց կապում է Պարսկաստանի անգլիական ուժերի հետ, իսկ մեզ գրկում թուրքական հեղափոխական շարժման հետ ամեն մի կապից:

Նախիջևանի երկրամասը քաղաքական, տնտեսական և ռազմական վիթխարի նշանակություն ունի, քանի որ այստեղից մի երկաթուղագիծ տանում է պարսկական Մակվի խանություն և այնտեղից Թուրքիա՝ ք. Բայազեդ, իսկ մյուսը տանում է Պարսկաստան՝ Թավրիզ քաղաք: Այդպիսով Նախիջևանի երկրամասը՝ որպես երկաթուղու հանգուցային կետ, մեզ կապում է Թուրքիայի և Պարսկաստանի հարուստ տարածքների հետ: Ո՛չ Ադրբեջանը, ո՛չ Ռուսաստանը չպետք է հրաժարվեն այդպիսի կարևոր հանգուցային կետից հօգուտ դաշնակների:

1918թ. թուրքերի հեռանալուց հետո Նախիջևանի երկրամասի բնակչությունը ժամանակավորապես հռչակեց այսպես կոչված «Արաքսյան հանրապետությունը»: Մի քանի տարիների ընթացքում Նախիջևանի բնակչությունը պաշտպանում էր իր անկախությունը դաշնակներից, որոնք՝ չնայած բոլոր ջանքերին, ի վիճակի չէին նրան տիրելու: Պահանջվեց Անգլիայի միջամտությունը, որն իր գործերով գրավելով այդ երկրամասը՝ հակառակ բնակչության բացահայտ բողոքին, բռնություններ այն հանձնեց դաշնակներին: Բայց հենց որ անգլիական զորքերը հեռացան, անհապաղ սկսվեց ապստամբություն: Դաշնակցական կանոնավոր զորքերը՝ մեծաքանակ հրետանիով, զնդացիներով և զրահագնացքով, գլխովին ջախջախվեցին: Վերջին ժամանակներս դաշնակները յոթ կետերից հարձակում սկսեցին այդ երկրամասի վրա և չնայած նրան, որ հարձակումը միանգամայն անսպասելի էր տեղական բնակչության համար, ամենուրեք ջախջախվեցին: Այդ երկրամասի հանձնումը դաշնակներին, որի աշխատավոր ժողովուրդը գենքը ձեռքին երեք տարվա արյունալի պայքարից հետո ինքն է ազատվել նրանցից և միացել Ադրբեջանին, երկրամաս, որտեղ ներկայումս ոչ մի հայ չկա, բացահայտորեն խախտում է բոլորի կողմից ընդունված ժողովուրդների ինքնորոշման սկզբունքը և Նորհրդային Ադրբեջանի իրավունքները:

Նախիջևանի երկրամասի ժողովուրդը իր մոտ խորհրդային կարգ է հաստատել, նա կոմունիստների մեջ տեսել է իր փրկարարներին և ազատարարներին և չի կարծել, որ Նորհրդային Ռուսաստանը՝ բնակչության կամքին հակառակ, նրան կտա դաշնակներին, երբ նրանց

իշխանություն տակ ոչնչացվում է ոչ միայն խորհրդային կարգը, այլև անկասկած բնակչության ֆիզիկական գոյությունը վտանգ է սպառնում, ինչպես դա եղավ հարյուրավոր մուսուլմանական գյուղերի հետ դաշնակցական Հայաստանի տարածքում:

Ինձ թույլ եմ տալիս հուսալու, որ խորհրդային Ռուսաստանի կառավարությունը իմ հայտարարությունը չի թողնի առանց ուշադրություն և թույլ չի տա խորհրդային Ադրբեջանի, նաև խորհրդային Ռուսաստանի, իրավունքների և շահերի ակնհայտ խախտում:

Իմ կարծիքով ստեղծված վիճակից լավագույն ելքը՝ մինչև Հայաստանի և Ադրբեջանի միջև տարածքային վեճերի վերջնական լուծումը, Նախիջևանի ամբողջ երկրամասը՝ մինչև նախկին սահմանը, Կարմիր բանակի կողմից գրավումն է»¹:

Այս փաստաթղթի վրա բացի «արխիվ» մակագրությունից ուրիշ ոչինչ չկա, որի համար էլ պարզ չէ, թե Լենինը ինչպես է վերաբերվել այս կեղծիքներով լի ու նաև ինչ-որ չափով հանդիմանություն պարունակող նամակին: Ու նաև այն բանին, որ նամակում հայերի դեմ իր ժողովրդի հերոսական պայքարի մասին ճամարտակող Շահթախթինսկին բացահայտորեն ոչինչ չի խոսում ռուսական զորքերից օգնություն խնդրելու, վերջիններիս Նախիջևան մտնելու և հայկական զորքերի առաջխաղացումը կանգնեցնելու մասին: Ուշադրություն է արժանի նաև այն հանգամանքը, որ նամակում Շահթախթինսկին հատուկ շեշտում է, թե Նախիջևանի երկրամասում «ներկայումս ոչ մի հայ չկա»՝ առանց երկմտելու, որ մոսկովյան ղեկավարությունը կարող է հետաքրքրել, թե ի՞նչ եղան այն ավելի քան հիսուն հազար հայերը, որոնք ապրում էին այդ երկրամասում ընդհուպ մինչև 1918 թվականը:

Բեքիր Սամի-բեյի և Բեհբութ Շահթախթինսկու թափած ջանքերը ապարդյուն չանցան: Չիչերինը հանձնարարություն ստացավ պարզել նման միջոցառման հնարավորությունը: Օգոստոսի 14-ին, այսինքն՝ Լենինի հետ թուրքական պատվիրակության հանդիպման նույն օրը, Չիչերինը հեռագրում է Օրջոնիկիձեին. «Հայաստանի հետ Լեզրանի ստորագրած նախնական հաշտության կապակցությամբ թուրքերը տազնապ են բարձրացնում, քանի որ Շահթախթի հանձնումը հայերին Թուրքիային հերմետիկորեն կտրում է մեզանից և Ադրբեջանից: Ամեն շփում դառնում է անհնարին: Թուրքերը հարցնում են մեր համաձայնությունը, որպեսզի սեփական ուժերով խլեն հայերից Սարիղամի-

չը և Շահթախթին: Մեզնից պահանջվում է միայն բանավոր համաձայնություն, որպեսզի մեզ չվարկաբեկեն: Այդ դեպքում թուրքերը կվերականգնեն կապը մեզ հետ: Հաղորդեք, նպատակահարմար է արդյոք...»¹ (ընդգծումը մերն է - է. Ջ.):

Հեռագրում ընդգծված տողերը ակնառու ցույց են տալիս, որ Չիչերինը կողմնակից էր համաձայնություն տալուն: Գուցե այդ է պատճառը, որ Օրջոնիկիձեին կողմնորոշելու համար անդրադառնում է նաև Շահթախթինսկու նամակին և հայտնում. «...ընկեր Շահթախթինսկին տազնապ է բարձրացնում Շահթախթի-Մակու, Շահթախթի-Երևան, Ջուլֆա-Թավրիզ երկաթուղագիծը և Ուրմիայի շոգենավազնացությունը Հայաստանին հանձնելու կապակցությամբ, որով իրագործվում է դաշնակների և վրացական մենչևեիկների մատակարարումը պարսկական հարուստ պաշարներով, ինչը նրանց կամրապնդի: Անհապաղ հայտնեք Ձեր կարծիքը»²: Օգոստոսի 17-ին Օրջոնիկիձեին մի նոր հեռագիր է ստանում, այս անգամ Վրաստանում ՌՆՖՍՀ արտաքին առևտրի ժողկոմատի ներկայացուցիչ Ռուզբերից, որում ասված էր, որ Չիչերինը խնդրում է շտապ պատասխանել Շահթախթին և Սուրիդամիչը թուրքերի կողմից գրավելու նպատակահարմարության վերաբերյալ իր հարցին: Եվ հենց այդ օրն էլ Օրջոնիկիձեին վերջապես ուղարկում է հետևյալ հակիրճ պատասխանը. «Պետք չէ թուրքերին թույլ տալ գրավելու Շահթախթին, առաջ կրեքի կոտորած, ավելի լավ է ինքներս գրավենք: Երկաթուղագիծ վերաբերյալ Շահթախթինսկին վախենալու ոչինչ չունի, առայժմ այնտեղ ոչ մի շարժում չկա, իսկ հետո կտեսնենք: Հաշտության պայմանագրի կնքման ժամանակ կարելի է վերապահություն անել»³ (ընդգծումը մերն է - է. Ջ.):

Օգոստոսյան այդ օրերին Նախիջևանի գավառի հայերին մնացած մասը և Շահթախթին գրավելու ուղղությամբ որոշ փորձեր արվեցին: Ընդամենը երկու օր էր անցնել Լենինի հետ Բեքիր Սամի-բեյի հանդիպումից, երբ 11-րդ բանակի հրամանատարությունը ամբողջ Նախիջևանի գավառը գրավելու հրաման է ստանում: Վերջինս էլ իր հերթին օգոստոսի 16-ին հեռագրում է Լեզրանին. «11-րդ բանակի ռազմահեղափոխական խորհուրդը՝ հայկական զորքերի հետ ընդհարումներից խուսափելու նպատակով, խնդրում է Ձեզ կապվել Հայաստանի կա-

⁸² “Геноцид армян...”, стр. 133.

⁸² Նույն տեղում. էջ 133-134:

⁸³ Նույն տեղում. էջ 138:

¹ РГАСПИ, ф. 5, оп. 1, д. 2796, л. 1-2.

ուավարութեան հետ, որպեսզի իր զորքերին Նախիջևանի գավառի վարչական սահմաններից հետ քաշվելու կարգադրութիւն անի: Զորքերին համապատասխան հրաման է տրվում: Բանակցութիւնների արդյունքների մասին խնդրում են տեղեկացնել»¹: Հաջորդ օրը՝ 17-ին, Բաքվից նոր հեռագիր է ստացվում. «Զիչերինի հաղորդման համաձայն, - ասված է հեռագրում, - թուրքերը պնդում են Շահթախթին գրավելու վրա, քանի որ հակառակ դեպքում այդ կետով անցնող ճանապարհը կտրվում է: Ստիպված ենք սխալմամբ գրավել Շահթախթին (ընդգծումը մերն է - է. Զ.)»²:

Սակայն ռուսական զորքերով Շահթախթին գրավելու խնդիրը չուտով օրակարգից հանվեց, որում դեր են խաղացել երկու հանգամանք. 1. Լեզրանի բուն բողոքները օգոստոսի 10-ի համաձայնագրի նման խախտման դեմ, 2. Կրեմլը վերջապես տեղի տվեց Բեքիր Սամիի պատվիրակութեան համառ պնդումներին և համաձայնեց, որ Շահթախթին ու Սարիղամիշը գրավվեն թուրքական ուժերի կողմից:

Նախ ծանոթանանք Լեզրանի դիրքորոշմանը: Օգոստոսի 18-ին Չիչերինին ուղարկած հեռագրում նա դժգոհում է, որ Չիչերինը դեռևս չի հայտնել իր կարծիքը օգոստոսի 10-ի համաձայնագրի մասին, ինչը փաստորեն բարդացնում է դրութիւնը և նվազեցնում վստահութիւնը իր կողմից տարվող քաղաքական ուղեգծի նկատմամբ: Այնուհետև տեղեկացնում է, որ օգոստոսի 12-13-ին Բաքվում տեղի ունեցած խորհրդակցութեան ժամանակ որոշվել էր փոխել Հայաստանի նկատմամբ տարվող մարտավարութիւնը և այն պայմանավորել վերջինիս կողմից դեպի Թուրքիա Ռուսաստանին ազատ տրանզիտի իրավունք տալու համաձայնութեամբ: Սակայն այժմ Օրջոնիկիձեից և 11-րդ Կարմիր բանակի Ռազմահեղափոխական խորհրդից ստացել է հաղորդագրութիւն, որ թուրքերի պահանջով բանակին հրաման է տրված գրավել Շահթախթին և ամբողջ Նախիջևանի գավառը, որոնք օգոստոսի 10-ի համաձայնագրով մնացել էին Հայաստանին: Լեզրանը Չիչերինին հայտնում է նաև Օրջոնիկիձեին ուղարկած իր պատասխան հեռագրի մասին, որում խնդրել է Օրջոնիկիձեին չխախտել օգոստոսի 10-ի համաձայնագիրը և հրաժարվել Շահթախթին գեներլ ուժով գրավելու մտադրութիւնից, քանի դեռ չի պարզվել Հայաստանի տարածքով ազատ տրանզիտ ստանալու հարցը: «Եթե դուք մձնականորեն պնդում

եք ձեր պլանի վրա, խնդրում են անհապաղ հայտնել ինձ, - ասված է Օրջոնիկիձեին ուղարկած Լեզրանի հեռագրում: Այդ դեպքում ես կհեռագրեմ էրիվան Նախիջևանի գավառը հայկական զորքերից մաքրելու անհրաժեշտութեան մասին, միաժամանակ կտեղեկացնեմ հետագա բանակցութիւնները վաղիկավկազ տեղափոխելու մասին և այնուհետև՝ համարելով իմ առաքելութիւնը կատարված, կմեկնեմ Պորհ. Ռուսաստան: Պատասխանը խնդրում են հաղորդել անհապաղ»¹ (ընդգծումը մերն է - է. Զ.):

Չենք կարող չընդգծել Լեզրանի սկզբունքային դիրքորոշումը և համարձակ կեցվածքը իր ստորագրած համաձայնագրի պայմանները անխախտ պահելու խնդրում: Նա չի խորշում արտահայտել իր վրդովմունքը և սպառնալ պաշտոնաթողութեամբ, եթե իր առաջարկը չընդունվի և համաձայնագիրը չեղյալ հայտարարվի: Նա փորձում է ազդել նաև Չիչերինի վրա՝ օգոստոսի 20-ին հեռագրելով նրան. «...եթե Դուք իսկապես հաղորդել եք Սերգոյին թուրքերի պահանջով Շահթախթին գրավելու անհրաժեշտութեան մասին՝ խախտելով խորհրդային կառավարութեան անունից օգոստոսի 10-ին Հայաստանի հետ իմ ստորագրած համաձայնագիրը, ինձ ուրիշ ոչինչ չի մնում անել, քան թախանձազին խնդրել Ձեզ և Կենտկոմին անհապաղ ինձ հետ կանչել... Նախիջևանի գավառի հանձնումը քեմալականներին և Շահթախթիի գրավումով օգոստոսի 10-ի համաձայնագրի բացահայտ խախտումը հավասարազոր է Հայաստանի հետ խաղաղ հարաբերութիւնների խզմանը և ենթադրում է մի շարք հետագա միջոցառումներ Հայաստանի նկատմամբ, ինչը ինձ ամեն դեպքում անտեղի ու անժամանակ է թվում: Այդ հիմնական հարցերի վերաբերյալ Ձեր դեկավար ցուցումների բացակայութեան հետևանքով արտակարգ խճճված վիճակ է ստեղծվում և պարզ չէ, թե իսկապես ո՞վ է Հայաստանի նկատմամբ քաղաքականութիւնը վարում, մե՞նք թե՞ Բաքուն»² (ընդգծումը մերն է - է. Զ.):

Ինչպես տեսնում ենք, Չիչերինին հասցեագրած այս հեռագրում ոչ միայն դժգոհութիւն կա, այլև նախատինք այն բանի համար, որ Մոսկվան չի տնօրինում կովկասյան գործերը և Հայաստանի հարցում հստակ քաղաքականութիւն չի վարում, որից մեծապես օգտվում է Բաքվի դեկավարութիւնը սեփական ազգայնական ու զավթողական

¹ РГАСПИ, ф. 5, оп. 14, д. 10, л. 2:

² Նույն տեղում:

¹ «ՀՀ-ն 1918-1920թթ., փաստաթղթերի և նյութերի ժողովածու», էջ 254:

² Նույն տեղում:

ծրագրերը իրագործելու համար: Հեռագրում Լեզրանը անդրադառնում է նաև Զանգեզուրում Հայաստանի պառլամենտի անդամներ Վահան Խորենու և Արշակ Շիրինյանի գնդակահարություն, Վլադիկավկազում Հայաստանի հյուպատոսի ձերբակալության փաստերին, խորհուրդ տալիս գնդակահարությունների կապակցությամբ անպայման հետաքննություն կատարել, իսկ հյուպատոսին ազատ արձակել: Վերջում կրկին վերադառնում է ցավոտ խնդրին՝ Նախիջևանի հարցին, ավելացնում. «...խնդրում եմ հայտնել Նախիջևանի վերաբերյալ հատկապես ինչպիսի՞ հրահանգ է տվել գլխավոր հրամանատարը օգոստոսի 10-ի մեր համաձայնագրից հետո»¹:

Կովկասում գործող պետական-կուսակցական գործիչների շարքում կային մարդիկ, որոնք հասկանում ու տեսնում էին Բաքվի ղեկավարության հակահայկական քաղաքականությունն անբարեխղճ, հայկական տարածքները անպայման կլանելու և մինչև Թուրքիա ձգվող մեծ Ադրբեջան ստեղծելու անդուսպ ձգտումը: Դրանց թվում էին նաև Օրջոնիկիձեն, Կիրովը, մարդիկ, որոնք կուսակցական-պետական վերին էջերիննեում մեծ հեղինակություն և դիրք ունեին: Սակայն դրանցից և ոչ մեկը բացեիբաց չի արտահայտել իր դժգոհությունը ո՛չ Նարիմանովի խմբի գործունեությունից, ո՛չ առանձին հարցերում Մոսկվայի դիրքորոշումից այնպես, ինչպես դա անում էր Լեզրանը և մասամբ Ս. Տեր-Գաբրիելյանը: Վերջինս Ձիչերինի հետ հեռախոսային ուղիղ խոսակցության ժամանակ (օգոստոսի 22-ին) դժգոհում է Բաքվի ղեկավարների գործելակերպից, հայտնում, որ նրանք «Ձեր անունից հեռագրերով խճճում են իրենց»: «Եթե դուք իսկապես չեք ուզում խղել խաղաղ հարաբերությունները Հայաստանի հետ, - ասել է Ս. Տեր-Գաբրիելյանը, - թախանձագին խնդրում ենք Ձեզ, ԿԿ-ին, Ռազմ-հեղխորհրդին, Ժողկոմխորհրդին՝ կարգադրել Բաքվին..., ճշտորեն պահպանելու օգոստոսի 10-ի համաձայնագիրը, որը մեր համոզմամբ, ինչի հետ համաձայն է և Կիրովը, միակ հնարավորն է հանդիսանում»²: Հակադրվելով Ձիչերինի այն կարծիքին, ըստ որի Շահթախթիի հանձնումը Հայաստանին ոչ միայն Ռուսաստանին և Ադրբեջանին կտրել է Թուրքիայի հետ անմիջական կապի հնարավորությունից, այլև Պարսկաստան տանող ճանապարհներից, որի հետևանքով իրենք զրկվում են Մակվի խանությունից պարենի հսկայական պաշարներից, Ս. Տեր-

Գաբրիելյանը ավելացնում է. «Ձրկել Հայաստանը այդ ճանապարհից, հավասարազոր է հայերին քաղցի և բնաջնջման դատապարտելուն: Մակվի խանությունում պարենային հսկայական պաշարներ չկան: Դա թուրքերի և ադրբեջանցիների համար պատրվակ է Նախիջևանի գավառին ամբողջությամբ տիրելու համար»¹ (ընդգծումը մերն է - է. Զ.):

Դառնալով Լեզրանի դիրքորոշմանը, հարկ ենք համարում ընդգծել, որ նրա կեցվածքն այս հարցում ավելի վճռական էր: Ս. Տեր-Գաբրիելյանից տեղեկանալով, որ հեռախոսային խոսակցության ժամանակ Ձիչերինը դժգոհել է, որ օգոստոսի 10-ի համաձայնագրով Շահթախթիից Ալաշկերտ տանող նեղուղի երկաթգիծը մնացել է հայերին և իրենք զրկվել են Մակվի խանության անսպառ հարստություններից, Լեզրանը Ձիչերինին հեռագրում է. «Ո՛չ Ձեզնից, ո՛չ Օրջոնիկիձեից, որի հետ զրուցել եմ Համաձայնագրի ստորագրումից մի քանի ժամ առաջ, ո՛չ Կիրովից ինձ հայտնի չէր Շահթախթիով անցնող նեղուղի երկաթգծի մասին, ինչպես նաև Մակվի խանության պարենային անսպառ պաշարների վերաբերյալ Մոսկվայի հաշվարկների մասին, որի մասին Դուք հայտնել եք ընկ. Տերին...»² (ընդգծումը մերն է - է. Զ.):

Անչուշտ, այս տողերի մեջ հեզնանք կա, քանի որ Մակուն բոլորովին էլ «անսպառ պաշարների» չունեն և Իրանի աղքատ խանությունների թվին էր պատկանում: Բայց ինչպես երևում է, Կրեմլում հավատացել էին Բ. Շահթախթինսկու հրամայած լեզնեղին ու ընկել կորցրածը վերադարձնելու փնտրտունքի մեջ: Ուստի Լեզրանը շտապում է հանգստացնել Ձիչերինին: Նա գրում է. «Ես կարծում եմ, որ Հայաստանի հետ խաղաղ բանակցություններում, որոնք կսկսվեն իմ Երևան հասնելուն պես, սկզբունքորեն կլուծվի Հայաստանի երկաթուղիներով մեզ ազատ տրանզիտ տալու և Անգորայի հետ կապի հարցը: Մենք առաջին հերթին դրել ենք երկաթուղու, «Նախիջևան-Շահթախթի» տեղամասի օգտագործման և Շահթախթից գնացող նեղուղի երկաթգծի շարժակազմը և շահագործումը մեզ կամ թուրքերին հանձնելու հարցը»: Լավ հասկանալով, որ այդ ամենը առանց վիճելի համարվող տարածքների հարցի լուծման հնարավոր չէ, Լեզրանը շարունակում է. «Մինչև այդ բանակցությունները անհրաժեշտ է ունենալ Ձեր վերջ-

¹ Նույն տեղում, էջ 255:

² «Коммунист», 23 декабря 1989г.

¹ Գ. Գալոյան, Հայաստանը և մեծ տերությունները 1917-1923թթ., Եր. 1999, էջ 259:

² «ՀՀ-ն 1918-1920թթ., փաստաթղթերի և նյութերի ժողովածու», էջ 252:

նական որոշումը վիճելի տարածքների ճակատագրի մասին: Ես հակված եմ ճանաչելու Նախիջևանի մարզը Հայաստանին, ամբողջ Ղարաբաղը՝ Ադրբեջանին: Զանգեզուրի հարցը այնպես սերտ է կապված Նախիջևանի հետ, որ Նախիջևանը Հայաստանին ճանաչելու դեպքում, ըստ երևույթին, հարկ կլինի թողնել նաև Զանգեզուրը: Այդ ամենը, հասկանալի է, տրանզիտի մասին հիմնական հարցի բարեհաջող զարգացման դեպքում: Հակառակ դեպքում հարկ կլինի դաշնակների վրա ճնշում գործադրել, ինչը 11-րդ բանակի աջակցությամբ, որն այդ բանում հիմնավոր հակում է բավականաչափ հնարավորություն ունի, միանգամայն իրագործելի է»¹ (ընդգծումը մերն է - է. Զ.):

Ինչպես տեսնում ենք, Լեզրանը հաստատակամորեն կանգնած էր Նախիջևանի գավառը Հայաստանի մաս ճանաչելու տեսակետի վրա և այդ միտքը աշխատում էր ներարկել նաև Չիչերինին: Վերջինս ևս, ինչպես արդեն նշել ենք, հակված էր վիճելի համարվող տարածքների հարցի լուծման այդ տարբերակին: Սակայն օգոստոսյան այդ նույն օրերին դեպքերն այլ կերպ էին զարգանում. Սարհրդային կառավարությունը ի վերջո տեղի տալով դաշնակից քեմալական Թուրքիայի համառ պահանջին, համաձայնեց, որ Թուրքերը Հայաստանի տարածքում գրավեն Շահթախթին ու Սարիղամիշը՝ իբրև թե Նախիջևան մտած Կարմիր բանակի հետ կապ հաստատելու և օգնություն ստանալու նպատակով: Եվ դարձյալ Հայաստանի համար ճակատագրական նշանակություն ստացած այդ հարցի լուծման գործում իր սև դերը խաղաց Ստալինը: Բանն այն է, որ Շահթախթին և Սարիղամիշի կապակցությամբ Չիչերինի համառ պնդումներին պատասխանելու համար Օրջոնիկիձեն խնդրել էր Ստալինի կարծիքը, իսկ վերջինս էլ Չիչերինի միջոցով տվել էր հետևյալ պատասխանը. «Չենք խառնվում, չգիտենք պլանները, հնարավոր չենք համարում խանգարել»² (ընդգծումը մերն է - է. Զ.): Չիչերինն իր հերթին Ստալինի այդ կարծիքը չիֆրով հաղորդել էր Լեզրանին, որը սակայն տեղ չէր հասել: Ուստի օգոստոսի 28-ին Չիչերինը նորից է հաղորդում Ստալինի կարծիքը՝ այս անգամ արդեն Օրջոնիկիձենի ուղարկած հեռագրով: Այդ օրերին³ ուղիղ հեռագրաթելով Չիչերինի և Օրջոնիկիձեի միջև տեղի էր ունեցել հետևյալ խոսակցությունը (մեջբերում ենք ամբողջությամբ).

«Չիչերին. ընկ Օրջոնիկիձե, ուրեմն Դուք չեք առարկում այն բանի

դեմ, որ մենք հայտնենք մեր համաձայնությունը գրավելու նշված տեղերը առանց մեր մասնակցություն: Հարցնում եմ նրա համար, որ առաջ դրա դեմ Դուք առարկել եք, բայց Ձեր առարկությունը մեզ չի հասել:

Օրջոնիկիձե. Առաջ և հիմա իմ առարկությունները հանգում էին կոտորածի վախին, որը իհարկե, հիմա էլ բացառված չէ, բայց, նախ ես կարծում եմ, որ Թուրքերը հոխորտում են և ոչինչ չեն գրավի, իսկ երբ գրավեն ու կոտորած սկսվի, մենք կխառնվենք և կղաղարեցնենք: Այդպիսով, ես չեմ առարկում:

Չիչերին. ընկ. Օրջոնիկիձե, ինձ անհրաժեշտ է անհապաղ ստանալ Ձեր պատճառաբանությունը Շահթախթինի և Սարիղամիշի վերաբերյալ: Խնդրում եմ հաղորդեք այն անհապաղ:

Օրջոնիկիձե. ընկ. Չիչերին, մի քանի անգամ հաղորդել եմ, ուր է կորել, զարմանում եմ»¹:

Հեռախոսային այս խոսակցությունից հետո Չիչերինը ստացավ Օրջոնիկիձեի հետևյալ գրությունը. «Ստեղծված իրադրության պատճառով ես հրաժարվում եմ իմ նախորդ առաջարկությունից՝ գրավել և այս, և այն: Ըստ իս, Թուրքերը իրենց ուժերով չեն կարողանալու գրավել, նրանք այնտեղ շատ քիչ ուժ ունեն: Թուրքերի կողմից այդ կետերի գրավումը հայերի համար՝ իհարկե, բնաջնջում է, բայց քանի որ նրանք ուժեր չունեն, ապա մենք ոչինչ ոխակի չենք ենթարկում: Խնդրում եմ հայտնել, պահանջվո՞ւմ է ինձնից էլի ինչ-որ բան այդ հարցի վերաբերյալ»² (ընդգծումը մերն է - է. Զ.):

Անհետաքրքիր չէ իմանալ, որ այդ կարևոր խնդրի լուծման հարցում Չիչերինը անհրաժեշտ չէր համարել հարցնել նաև Հայաստանում իր կողմից լիազոր ներկայացուցիչ նշանակված Լեզրանի կարծիքը և վերջինս այդ մասին իմացել էր միայն Օրջոնիկիձեին ուղարկած Չիչերինի հեռագրից: Եվ պատճառը միայն այն չէր, որ կովկասյան գործերում Օրջոնիկիձեն անվիճելի հեղինակություն էր, այլև այն, որ Չիչերինը քաջատեղյակ էր Հայ-Թուրքական կնճռի հարցում Լեզրանի մտտեցումներին: Բայցևայնպես, քանի որ Լեզրանը բողոքեց Թուրքերի հետ կայացված համաձայնության առթիվ՝ համարելով այն օգոստոսի 10-ին կնքված համաձայնագրի խախտում, ուստի օգոստոսի 22-ին Չիչերինը հարցնում է նաև նրա կարծիքը՝ միաժամանակ փորձելով հիմնավորել, թե Թուրքերի կողմից Շահթախթինի և Սարիղամիշի

¹ Նույն տեղում:

² „Геноцид армян...“, стр. 155.

³ Ամսաթիվը չի ճշտված:

¹ „Геноцид армян...“, стр. 155-156.

² Նույն տեղում, էջ 156:

գրավումը «չէր լինի պայմանագրի խախտում, քանի որ մենք չենք պարտավորվել պաշտպանել այդ տեղերը թուրքերից»¹:

Այսպես, Ստալինի ազդեցությունն առաջին հերթին վերցրեց Շահթախթին և Սարիղամիշը ոչ թե թուրքական, այլ ռուսական զորքերով գրավելու վերաբերյալ իր առաջարկությունը: Մինչդեռ իրադարձությունների հետագա զարգացման լույսի տակ դժվար չէ եզրակացնել, որ նրա ծրագրի ընդունումը և իրագործումը կլինե՞ր չարիքների փոքրագույնը (գուցե և կանխվե՞ր թուրքական արշավանքը, տարածքային, և որ առավել կարևոր է՝ մարդկային քիչ կորուստներ ունենային): Այլ կերպ ասած, ստեղծված պայմաններում, երբ թուրք-քեմալականները և ռուս-բոլշևիկները եղբայրացել էին և ձգտում էին Շահթախթիի վրայով իրար ձեռք սեղմել, այդպիսի պայմաններում թուրքական գազանի գայլային ախորժակին հազուրտ չտալու միակ հնարավոր միջոցը, ըստ երևույթին, Օրջոնիկիձեի առաջարկած տարբերակն էր: Սակայն չի կարող զարմանք չառաջացնել թուրքերի «չատ քիչ ուժեր ունենալու» մասին Օրջոնիկիձեի կարծիքը: Դա առավել քան տարօրինակ է, քանի որ նա քաջ գիտեր, որ թուրքերը Հայաստանի վրա հարձակվել պատրաստվում էին դեռևս զարնանը: Իսկ առանց ուժերի գերազանցություն ստեղծելու, նրանք այդ քայլին չէին գնա:

Օրջոնիկիձեի համաձայնությունը ստանալուց հետո (Կիրովը իր համաձայնության մասին հայտնել էր օգոստոսի 23-ին) Ջիչերինը կարող էր կանաչ լույս վառել թուրքերի առաջ: Իսկ Լեգրանի կարծիքը ոչ մեկին չէր հետաքրքրում:

Ահա քաղաքականության անբարոյականության տիպիկ օրինակ. մեկի հետ կնքած պայմանագրով կարող ես ճանաչել նրա իրավունքը այս կամ այն տարածքի վրա, իսկ մյուսի հետ էլ համաձայնել այդ նույն տարածքները գրավելու մասին ու դա չհամարել պայմանագրի խախտում: Մենք, իհարկե, այն կարծիքին չենք, թե Ջիչերինը կողմնակից էր թուրքերի ներխուժմանը Հայաստան, դրա ապացույցը նա բազմիցս է տվել: Նա կատարող էր և ոչ վճռող, իսկ վճռող կայացնում էր Քաղբյուրոն: Կան փաստեր, որ նույնիսկ Շահթախթիի և Սարիղամիշի մասին թուրքերին տված համաձայնությունից հետո էլ Ջիչերինը ձգտել է կանխել թուրքական արշավանքը Հայաստան: Օգոստոսի 22-ին Սահակ Տեր-Գաբրիելյանին ուղարկած գրություն մեջ, չեչտելով օգոստոսի

10-ի համաձայնագրի պահպանման անհրաժեշտության մասին, նա միաժամանակ ավելացնում է. «Լեգրանը պետք է մեկնի Երևան: Անհրաժեշտ է ամենաեռանդուն կերպով ստանալ տրանզիտ Հայաստանով դեպի Թուրքիա: Ամեն դեպքում անհրաժեշտ է անհապաղ դիվանագիտական սուրհանդակների իրավունք կորզել, որպեսզի մենք կարողանանք սուրհանդակներ ուղարկել Հայաստան և Հայաստանով՝ Թուրքիա: Նմանապես ձեռք բերեք հեռագրական կապ Անգորայի հետ Քեմալի կառավարության հետ»¹: Պարզ է, որ Ջիչերինը՝ տրանզիտի իրավունք ստանալու միջոցով փորձում էր լուծել Անատոլիայի և Նորհրդային Ռուսաստանի միջև կապի ստեղծման անհրաժեշտության մասին քեմալականների համառ պահանջը և դրանով իսկ կանխել նրանց արշավանքը Հայաստան:

Լեգրանը Երևան մեկնել չէր կարող, քանի դեռ Մոսկվայից չէր վերադարձել Շանթի պատվիրակությունը (Համո Օհանջանյանի կառավարությունը Շանթի պատվիրակությանն էր հանձնարարել Լեգրանի հետ բանակցությունների վարումը): Բայց դատելով Ջիչերինի ուղարկած օգոստոսի 24-ի հեռագրից, խիստ անհանգստացել էր Շահթախթիի և Սարիղամիշի վերաբերյալ կայացած համաձայնությունից: «Թուրքերի հարձակումը Շահթախթիի վրա ներկայումս չափազանց անցանկալի է, - գրում է Լեգրանը: - Նկատի առնելով մեր զորքերի ներկայությունը Նախիջևանում, որոնց հետ մեկտեղ գտնվում են նաև որոշ թուրքական զորամասեր, թուրքերի գործողությունը կրկնակվի որպես մեզ դաշնակից զորքերի գործողություններ և մենք կամա թե ակամա հարկադրված կլինենք պատասխանատվություն կրել դրա համար: Նման պարագայում ավելի դյուրին կլինե՞ր Շահթախթին գրավել մեր զորամասերով: Սակայն ինչպիսին էլ որ լինեն մեր կողմից ռազմական գործողությունները, համարում եմ անպայման վաղաժամ այնքան ժամանակ, քանի դեռ չի պարզվել Հայաստանի վրայով մեզ ազատ տրանզիտ տրամադրելու Հայաստանի կառավարության համաձայնության հարցը: Մասնավորապես մենք կարող ենք առաջին հերթին պնդել մեզ կամ թուրքերին Շահթախթիում նեղուղի երկաթուղու օգտագործման և Նախիջևան- Շահթախթիի հատվածում ազատ տրանզիտի վրա»² (ընդգծումը մերն է - է. Զ.):

Հեռագրի ընդգծված տողերը ցույց են տալիս, որ Լեգրանը ան-

¹ է. Ա. Զոհրաբյան, 1920թ., թուրք-հայկական պատերազմը... էջ 141:

¹ «ՀՀ-ն 1918-1920թթ., փաստաթղթերի և նյութերի ժողովածու», էջ 256:

² Նույն տեղում, էջ 260:

կեղծորեն փորձում էր կանխել պատերազմը Թուրքիայի և Հայաստանի հանրապետությունների միջև, որի համար էլ Չիչերինին հուշում էր, թե ինչպես կարելի է թուրքական կեղծ պատճառաբանությունները քողագերծ անել, որովհետև եթե իսկապես թուրքերին հետաքրքրողը Նախիջևանում գտնվող Կարմիր բանակի հետ կապի հաստատումն էր, ապա դա հեշտությամբ կարելի էր իրականացնել Շահթախթից Ալաշկերտի հովիտ մտնող նեղուղի երկաթուղիով, որը կառուցվել էր ռուսների կողմից Առաջին աշխարհամարտի տարիներին: Հեռագրի վերջում Լեգրանը անդրադառնում է նաև Սարիղամիշը գրավելու խնդրին և չեղտում. «...ինչ վերաբերում է Սարիղամիշի գրավմանը, ապա մինչև Հայաստանի երկաթուղիների մասին հիմնական հարցի լուծումը, Սարիղամիշի գրավումը նշանակություն չի կարող ունենալ: Թուրքերի հարձակման փաստն իսկ և նրանց կողմից Հայկական տարածքների գավթումը, խիստ անբարենպաստ կանդրադառնա մեր ընդհանուր քաղաքականության վրա»¹ (ընդգծումը մերն է - է. Ջ.): Լեգրանը առաջարկում է օգտագործել ազդեցություն բոլոր հնարավորությունները թուրքերին հանգստացնելու համար:

Հանգստացնել թուրքերին Չիչերինն այլևս չէր կարող և չփորձեց էլ: Շահթախթին և Սարիղամիշը թուրքական ուժերով գրավելու մասին համաձայնությունը, որով դուռ էր բացվում թուրք-հայկական նոր պատերազմի համար, մնաց ուժի մեջ: Թե ինչպե՞ս և ե՞րբ պետք է այդ համաձայնությունը գործի վերածվեր, որոշելու էր Անկարայի կառավարությունը: Իսկ Մոսկվան արդեն կարող էր հանգիստ սպասել իրադարձությունների հետագա զարգացմանը ու կովկասյան իր իշխանություններին հրահանգել՝ «խստորեն խուսափել Հայաստանի հետ ամեն մի ռազմական ընդհարումից...: Պայմանագրով հաստատված գծից այն կողմ՝ մասնավորապես Շահթախթի վրա հետագա առաջխաղացումը անհապաղ կանգնեցնել»²:

Ավելին, այդ նույն օրը՝ օգոստոսի 24-ին Մոսկվայում տեղի ունեցավ ռուս-թուրքական պայմանագրի նախագծի նախաստորագրումը, որի առաջին հոդվածով Ռուսաստանը պարտավորվում էր ոչ միայն չճանաչել միջազգային որևէ ակտ, որը չի ճանաչվել Թուրքիայի ազգային մեծ ժողովի կողմից, այլև ընդունում էր, որ Թուրքիա ասելով պետք է հասկանալ այն տարածքները, որոնք մտցված են օսմանյան

մեջլիսի կողմից ընդունած «Ազգային ուխտի» գծած սահմանների մեջ: Մինչդեռ «ուխտը» թուրքական մայր հող էր հռչակել և՛ Արևմտյան Հայաստանը, և՛ Կարսի ու Բաթումի մարզերը:

Բանն այն է, որ ձգտելով հարթել հայ-թուրքական կնճիղը, Չիչերինը առաջ էր քաշել ազգագրական սահմանի սկզբունքը (մինչև Առաջին աշխարհամարտը հայկական մեծամասնություն ունեցող տարածքները անցնում են Հայաստանին, իսկ մուսուլմանական մեծամասնությամբ տարածքները՝ Թուրքիային), ինչին չէր համաձայնում Բեքիր Սամի-բեյը և համառորեն առաջ էր քաշում Ռուսաստանի կողմից թուրքական «Ազգային ուխտի» ճանաչումը՝ պատճառաբանելով, թե դա անհրաժեշտ է «ուխտի» միջազգային ճանաչման համար նախադրյալ ստեղծելու նպատակով: Թե որքան անկեղծ էր Բեքիր Սամին իր այդ պատճառաբանության հարցում, երևաց պայմանագրի նախագծի նախաստորագրման հաջորդ օրը՝ օգոստոսի 25-ին, երբ Բեքիր Սամին հայտարարեց, թե «ուխտի» ճանաչումով ռուսական կառավարությունը դրանով իսկ ընդունել է Կարսի և Բաթումի մարզերի անցումը Թուրքիային: Չիչերինի առարկումները արդյունք չտվեցին: Բեքիր Սամին անդրդվելի էր:

Ճանաչելով «Ազգային ուխտը»՝ ռուսները չէին կարող չհասկանալ, որ Թուրքիան սկսելով պատերազմ, չի բավականանա Շահթախթի ու Սարիղամիշի գրավումով, այլ կձգտի տիրանալ Կարսի մարզին ամբողջությամբ: Եվ տարօրինակն այն է, որ այդ հոդվածի առթիվ որևէ վերապահություն կամ հայտարարություն չի արվել, թե Ռուսաստանը՝ ճանաչելով հանդերձ թուրքական «Ազգային ուխտը», այնուամենայնիվ Կարսի և Բաթումի մարզերի հարցում այլ դիրքորոշում ունի: Ստացվում է անտրամաբանական մի վիճակ. մի կողմից՝ ռուսական կառավարությունը փորձում է կանխել թուրք-հայկական հնարավոր պատերազմը, բայց մյուս կողմից՝ այնպիսի հարցերում է ընդառաջում թուրքերին, որ պատերազմը դառնում է անխուսափելի:

Մեր պատմագիտական գրականության մեջ տիրապետում է այն տեսակետը, որ Մոսկվայի ռուս-թուրքական առաջին կոնֆերանսը ավարտվել է անհաջողությամբ, քանի որ պայմանագիր չի ստորագրվել: Ոչինչ չի ասվում այն մասին, որ այդ կոնֆերանսում թուրքական դիվանագիտությունը լուրջ հաջողություններ է արձանագրել (ռուսական կառավարությունը 1. չի ճանաչում Սևրի պայմանագիրը, 2. ճանաչում է թուրքական «Ազգային ուխտը», 3. թույլ է տալիս գրավելու Շահթախթին և Սարիղամիշը, 4. պարտավորվում է մատակարարել գեներ, զինամթերք և այլն): Իսկ որ պայմանագրի ստորագրությունը

¹ Նույն տեղում:

² «Коммунист», 23 декабря 1989г.

հետաձգվեց, քանի որ «ուխտը», ճանաչելուց հետո էլ Չիչերինը շարունակում էր պնդել ազգագրական սահմանի ստեղծման և Բաթումի նավահանգիստը Կովկասին թողնելու անհրաժեշտությունը վրա, դրանից խնդրի էությունը չի փոխվում: Այդ հարցերի վրա մենք կանգ չենք առնում, քանի որ դա մեր անմիջական խնդիրը չէ, բայց նայնպես ընթերցողին համոզելու համար մի փոքրիկ մեջբերում կատարենք հենց իրենից՝ Չիչերինից: 1920թ. դեկտեմբերի 5-ին Շ. էլիավային ուղարկած նամակում անդրադառնալով այդ խնդրին, նա գրում է. «Մենք տարածայն ենք երկու կետում. մենք չենք ընդունում թուրքական սահմանի որոշելը ըստ ազգային ուխտի, որը համարյա վերարտադրում է Բրեստ-Լիտովսկյան սահմանները և մենք պահանջում ենք Թուրքա-Հայաստանի թեկուզ որոշ մասի անկախություն սկզբունքային ճանաչում, որը բավարար կլինի Թուրքա-Հայաստանի հայկական ծագումով բնակչության համար»¹:

Վերադառնալով Շահթախթիի խնդրին, հարկ ենք համարում նշելու, որ դեպի Մակու և այնտեղից Թուրքիա տանող նեղուղի երկաթգծի օգտագործման մասին Մոսկվայից Կովկաս հղած և ոչ մի հեռագրում հիշատակություն չկա: Սակայն արխիվային մի փաստաթղթից տեղեկանում ենք, որ այն գործարկելու ուղղությամբ Մակվի սարդարի հետ, այնուամենայնիվ որոշ բանակցություններ վարվել են, բայց ոչ պետական մակարդակով: Այդ, ինչպես նաև Մակվի խանություն տնտեսական դրություն և Մակու քաղաքում մնացած հայերի վիճակի մասին խիստ ուշագրավ տեղեկություններ է հայտնել «Кавказское слово» թերթի թղթակից Սորոչինսկին, որը Մակվից վերադառնալով Թիֆլիս, սեպտեմբերի 1-ին Երևանում այցելել է Արտգործնախարարություն և ընդունվել ընդհանուր քարտուղարի կողմից: Վերջինս էլ կայացած գրույցի բովանդակությունը սղագրել ու ներկայացրել է արտգործնախարարին: Փաստաթուղթը երկարաչուն է, ուստի մենք կմեջբերենք միայն այն մասերը, որոնք առնչվում են մեր հետապնդած խնդրին.

- «Ամսուս 24-ին (24/VIII) երբ ես Մակուի սարդարի մոտ էի, Մակու եկան Նախիջևանից 1) 28-րդ կովկասյան առանձին բրիգադի զինվորական կոմիսար Միխ. Միխ. Գերշովիչը (հրեա), 2) Նախիջևանի պարետ Դմ. Ալ. Շտոյը (ռուս), 3) Ուայլի փաշան յուր աղյուտանտով, 4) Թուրքիայում Ռևոյալ լիազոր ներկայացուցչություն առաջին քարտու-

ղար Ուպման-Անգարսկին (լատիչ), 5) նույն միասիայի զինվորական կցորդ Բագիրովը (թաթար):

Այս բոլոր անձինք մնացին այստեղ երկու օր, ապա մեկնեցին դեպի Բայազեդ, որտեղից պիտի ուղարկվեին դեպի Անգորա: Մի քանի օրից պիտի ճանապարհավեր և լիազոր ներկայացուցիչ էլիավան, որը գտնվում է առայժմ Գորիսում²: Գնացողները ունեին իրենց հետ արող, որը իբրև թե տանում էր տելեֆոնի ապարատներ, բայց կասկած կա, որ նոքա տանում էին ոսկի: Այդ արողը ուղեկցում էին 10 ռուսներ, որոնցից հինգը կանայք, և 15-20 տաճկական զինվորներ և սպաներ:

Այդ երկու օրվա ընթացքում նոքա բանակցություններ էին վարում սարդարի հետ հացի և երկաթուղագծի մասին: Ոչ մի հարցի առթիվ համաձայնություն չեկան: Հացի համար սարդարը պահանջում էր ոսկի, արծաթ կամ ապրանք: Բոլշևիկները առաջարկում էին թղթագրամ, այդ պատճառով համաձայնություն չեկան: Երկրորդ հարցի առթիվ սարդարը հայտնեց, որ նա հնարավորություն չունի բանեցնել Մակվա երկաթուղագիծը, որովհետև չունի ոչ մագուլթ և ոչ էլ տեխնիկական պերսոնալ»² (ընդգծումը մերն է - է. Զ.):

Ու՞մ հանձնարարությամբ էին բանակցում երկաթգծի գործարկման շուրջ, Մոսկվայի՞ թե՞ Բաքվի, հայտնի չէ: Հնարավոր է, որ դա Կովկասի բոլշևիկյան իշխանությունների, կամ էլ Թուրքերի նախաձեռնության արդյունք էր: Հայտնի չէ նաև, թե Լեզրանը, որը, ինչպես վերը տեսանք, այդ երկաթգծի գործարկման ջատագովն էր, տեղեկացա՞վ բանակցությունների արդյունքի մասին: Դժվար է նաև ասել, թե սարդարը իսկապե՞ս երկաթգիծը գործարկելու հնարավորություն չունեի, թե՞ մերժման պատճառը վախն էր բոլշևիկների խանություն թափանցելուց, ինչի մասին վկայություն կա վերոհիշյալ փաստաթղթում: «Ինքը՝ սարդարը լավ է ըմբռնում այն մեծ վտանգը, որ նրան սպառնում է բոլշևիկների կողմից, - ասել է Սորոչինսկին: Նա գիտեի, որ նրանց Մակվում երևալը նրա մահն է: Սարդարը հավաստիացրել է, որ բոլշևիկները ոչ մի կերպ այդ սահմաններում չեն մտնի Պարսկաստան: Ցույց կտրվի ուժեղ զինազրույթություն: Նա իր տրամադրությունն ատկ ունի մոտ տասը հազար ձիավոր զինված մարդ՝ լավ հրացաններով, մեծաքանակ փամփուշտներով և բավական թվով զնդացիրներով»³:

¹ էլիավան մնացել էր Գորիսում հիվանդանալու պատճառով, իսկ ապաքինվելուց հետո չմեկնեց Թուրքիա, այլ վերադարձավ Բաքու:

² ՀԱԱ, ֆ. 200, ց. 1, գ. 423, թ. 12-13:

³ Նույն տեղում, թ. 14:

¹ „Геноцид армян...“, стр. 305.

Այս փաստաթղթում մի այլ ուշագրավ վկայություն էլ կա, որը նմանապես ուզում ենք ներկայացնել ընթերցողի ուշադրությանը. «Պ. Սորոզինսկին ունեցել է խոսակցություն Հայաստանի մասին բոլշևիկների և Նալի փաշայի հետ: Վերջինս հայտնել է, որ նոքա ոչինչ չունեն հայ ժողովրդի հետ, բայց նոքա պիտի կռվեն դաշնակների դեմ, որոնք Անտանտի գործակալներն են, այն Անտանտի, որի դեմ նոքա կռվում են: Իսկ բոլշևիկները հայտնել են, որ Հայաստանի համար պատրաստվում են նոր պիլյուսներ, որ Նախիջևանում կենտրոնանում են սովետական գործքեր, որոնք պիտի գրավեն Շահթախթին և ապա Շարուրն ու Երևանը»¹:

Այսպիսին էր Թուրքիա գործուղված խորհրդային պատվիրակության տրամադրվածությունը Հայաստանի հարցում: Պատերազմեցի՞ր խորհրդային գործքերը Հայաստանի դեմ Շահթախթիում և Շարուրում, ինչպիսի՞ր ընթացք ունեցան ռազմական գործողություններն այդ շրջաններում, խորհրդային թե՞ թուրքական գործքերի կողմից նրանք գրավվեցին, անդրադառնանք հաջորդ գլխում: Իսկ մինչ այդ՝ հակիրճ անդրադառնանք Հայաստանի համար Շարուրի տնտեսական նշանակության հարցին:

* * *

Շարուրի գավառի գրավումը և օգոստոսի 10-ի Լեզրան-Ջամայան համաձայնագրով Հայաստանին ամրակցումը ոչ միայն ռազմաքաղաքական, այլև տնտեսական կարևոր նշանակություն ստացան: Դա նախ Պարսկաստանի հետ առևտրատնտեսական կապերի վերականգնման անհրաժեշտությունն էր և ապա գաղթականության մի մասին Շարուրում վերաբնակեցնելու հնարավորությունը: Եթե հիշենք, որ պարենային սուր ճգնաժամ ապրող հանրապետությունը ողողված էր աշխատանք և մշտական բնակության վայր չունեցող գաղթականներով (այդ թվում և Շարուր-Նախիջևանից), ապա կրնդունենք, որ այդ երկու խնդիրներն էլ կառավարության առաջ ծառայած և առաջնահերթ լուծում պահանջող հարցերից էին: Ահա թե ինչու, տիրելով Շարուրին և դրանով իսկ կրկին սահմանակից դառնալով Պարսկաստանի հյուսիսարևմտյան շրջանում գտնվող Մակվի խանությունը, Հայաստանի կառավարությունը իսկույն ևեթ քայլեր ձեռնարկեց ոչ վաղ անցյալի կապերը վերականգնելու ուղղությամբ:

Նախ ասենք, որ պարսկական շուկան միակն էր, որտեղ կարելի էր հացամթերքների և անասունների գնումներ կատարել և ինչ-որ չափով լրացնել հանրապետության սուղ պաշարները: «Ժողովուրդ» օրաթերթը, կարևորելով այդ իրողությունը, 1920թ. հուլիսի 21-ի համարում գրել է. «Երբ առաջին անգամ անգլիացիների աջակցությամբ կցվեց մեր երկրին Նախիջևանը, կառավարությունը կարծես չկարողացավ գնահատել այդ շրջանի ահագին տնտեսական և ռազմական նշանակությունը մեր պետության համար, չգործադրեց ամեն մի միջոց պահպանելու նրան մեր ձեռքին: Սակայն մի տարվա ընթացքում Պարսկաստանից մեր կտրված լինելը արևի պես պարզեց, թե ինչպես անկախ Հայաստանին դժվար է ապրել՝ չլինելով սահմանակից դրացի և բարեկամ Պարսկաստանին: Այժմ կարծես պարզվել է, որ այդ սահմանակցությունը և Ջուլֆա կայարանը ոչ պակաս կարևոր են մեր հանրապետության համար և նորմալ զարգացման համար, որքան և ելքը դեպի ծով և սեփական նավահանգիստ ունենալը»:

Այս տողերում, անշուշտ առկա է որոշ չափազանցություն, բայց որ ընդհանուր առմամբ Հայաստանի համար պարսկական շուկայի դերն ու նշանակությունը ճիշտ է ներկայացված, դա անտարակուսելի է: Ուղղակի ասվածին պետք է ավելացնել, որ շահագրգռվածությունը փոխադարձ էր, քանի որ պարսից վաճառականները գյուղատնտեսական ապրանքներ արտահանելու ավելի մոտիկ և հարմար շուկա չունեին:

Մակվի խանության և Ատրպատականի նահանգի հետ առևտրատնտեսական կապերի մեջ մտնելու ուղղությամբ առաջին քայլերը ձեռնարկվել էին դեռևս 1919թ. գարնանը, հենց որ Անդրկովկասի բրիտանական հրամանատարությունը Շարուր-Նախիջևանի կառավարումը հանձնեց Հայաստանի Հանրապետությանը: Այն ժամանակ ձեռք էին բերվել որոշ պայմանավորվածություններ¹, որոնք, սակայն, չիրագործվեցին Շարուր-Նախիջևանում ծագած հակահայկական ապստամբության և հանրապետության գործքերի՝ այդ շրջաններից հետ քաշվելու պատճառով, որով և խզվեց կապը Պարսկաստանի հետ: Այժմ, երբ Շարուրն ամբողջովին մաքրվեց թուրք-ադրբեջանական հրոսակախմբերից և միացվեց Հայաստանին, Մակվի խանության հետ ոչ վաղ անցյալի առևտրատնտեսական կապերի վերականգնման հնարավորություն առաջացավ: Շահագրգռվածությունը, ինչպես վերը

¹ Նույն տեղում, թ. 17:

¹ Տես է. Ա. Զոհրաբյան, Սովետական Ռուսաստանը և Հայ-իրանական հարաբերությունները 1920-1922թթ., Եր. 1985, էջ 48-49:

նչեցինք, փոխադարձ էր, և կարճ ժամանակամիջոցում այդ բնագավառում լուրջ հաջողություններ արձանագրվեցին: Ավելացնենք, որ բոլշևիկներին՝ Նախիջևան մտնելուց հետո Մակվի սարդարը ավելի բայրացական էր դարձել Հայաստանի նկատմամբ: «Кавказское общество» թերթի թղթակից Սորոչինսկին, վերադառնալով Մակվից, սեպտեմբերի 1-ին այցելել էր ՀՀ արտգործնախարարություն և ասել. «Սարդարը խնդրել է հայտնել Հայաստանի կառավարությանը, որ նա մնում է նույնպիսի բարեկամ, ինչպես մինչև այժմ և տալիս է հավաստիացումներ, որ Մակվա կողմից դեպի Հայաստան չի արձակվի և ոչ մի զնդակ»¹: Հենց այդ բայրացականությամբ պետք է բացատրել այն հանգամանքը, որ սկսված թուրք-հայկական պատերազմի պայմաններում, երբ Հայաստանը պարենային սուր պակաս էր զգում, կառավարությունը Հոկտեմբերի 4-ին Մակու գործուղեց մի պատվիրակություն, որը չուտով (Հոկտեմբերի 23-ին) Սարդարի հետ կնքեց պայմանագիր, որով վերջինս պարտավորվում էր 15 օրվա ընթացքում Հայաստանին վաճառել 300.000 փ. ցորեն և 100.000 փ. գարի: Ուշագրավ է, որ Սարդարը պարտավորվում էր առանց Հայաստանի համաձայնության թուրքերին հաց չվաճառել, իսկ Հայաստանի նկատմամբ ստանձնած պարտավորություններից ազատվում էր միայն այն դեպքում, եթե Մակվի և Նոյի շրջաններում հեղաշրջում կատարվի, կամ էլ հայկական զորքերը հեռանան Ծահթախթիից և դրանով իսկ Հայաստանը զրկվի հացամթերքներ ընդունելու հնարավորությունից²:

Շարուրի դաշտի արգավանդ հողերը, ինչպես նաև բազմաթիվ լքված գյուղերի առկայությունը, հայ գաղթականների մի մասին այդ շրջանում տեղավորելու և նրանց ֆիզիկական գոյությունն ապահովելու հնարավորություն են տալիս: Վերաբնակեցումն անհրաժեշտ էր նաև շարուրաբնակ հայերի թիվը բազմապատկելու առումով, քանի որ անցյալի փորձը ցույց էր տվել, որ տեղի մահմեդական ազգաբնակչությունը հայերի և Հայաստանի նկատմամբ իր թշնամական վերաբերմունքից չի հրաժարվի: Դա հասկանում էր կառավարությունը, հասկանում էր նաև հասարակությունը: Ահա ինչու դեռևս շարունակվող կռիվների շրջանում այդ հարցը լայնորեն քննարկվում էր մամուլի էջերում: «Թուրք ազգաբնակչության մեծամասնությունը վերջին տարվա ընթացքում այնպիսի անհանդուրժելի ընթացք էր բռնել մեր հանրապետության վերաբերմամբ, որ այժմ նա կարելի չի համարում

մնալ Հայաստանի հպատակ, այլ փախչում է արտասահման, - կարողում ենք «Ժողովուրդ» օրաթերթի 1920թ. Հուլիսի 16-ի համարում, - Նման պայմաններում՝ պետական շահերի տեսակետից, կենսական անհրաժեշտություն է բնակեցնել այդ խիստ հարուստ և պտղաբեր գավառները հայ ազգաբնակչությանը: Կառավարությունը, և մասնավորապես գյուղատնտեսության մինիստրությունը, պիտի մանրամասն ծրագիր մշակեն այս գավառները փոխադրելու հողագուրկ կամ սակավահող հայ գյուղացիությունը Հայաստանի այլ վայրերից կամ արտասահմանից»:

Հասկանալի է, որ Շարուրի բնակեցման հարցում առաջնահերթությունը պետք է տրվեր այն գաղթական բնիկ հայերին, որոնք 1918-1919թթ. նախ օսմանյան զորքերի և ապա թաթարական հրոսակախմբերի կազմակերպած ջարդերի հետևանքով ստիպված լքել էին իրենց բնակավայրերը և հաստատվել Երևանում, էջմիածնում և Հայաստանի Հանրապետության այլ վայրերում: Ուստի կառավարությունը, տեղական իշխանությունները և հայրենակցական միությունները կոչով դիմում են նրանց՝ առաջարկելով վերադառնալ և հաստատվել հայրենի գյուղերում: Սեպտեմբերի 4-ին «Նոր աշխատավոր» օրաթերթը հրապարակել էր Գողթանի և Նախիջևանի հայրենակցական միության դիմումը բոլոր գաղթականներին, որով կոչ էր արվում վերադառնալ հայրենիք, շենացնել դատարկ գյուղերը: Իսկ «Ժողովուրդ» օրաթերթի օգոստոսի 5-ի համարում տպագրված Երևանի գավառական ինքնավարության վարչության հայտարարության մեջ ուղղակի ասված էր. «Հայտարարում ենք ի գիտություն Երևանի գավառում ապրող Շարուրի, Նախիջևանի և Գողթանի գաղթականության, որ վերադառնան և բնակություն հաստատեն՝ շարուրցիներն ու նախիջևանցիները՝ Շարուրում, իսկ գողթանցիները՝ Գողթանում»:

Ժամանակի մամուլի էջերում տեղ գտած հաղորդագրություններից նաև պարզ է դառնում, որ կառավարությունը հնարավորինս օժանդակում էր Շարուրում բնակություն մեկնողներին՝ տրամադրելով նպաստ, ճանապարհածախս և որոշ դեպքերում՝ նույնիսկ փոխադրամիջոց: Այդ ամենի հետևանքով բավականին աշխույժ շարժում սկսվեց, և Շարուր գնացողների թիվը կարճ ժամանակամիջոցում բազմապատկվեց: Անշուշտ, դրանց մեջ քիչ չէին նաև այնպիսիք, որոնք գնում էին ոչ թե մշտական բնակություն հաստատելու, այլ չհնձված ցորենի արտերին ու լքված գույքին տիրանալու նպատակով: Հենց նրանք, ինչպես նաև կլիմայական պայմաններին չհարմարվողներն ու հատկապես արևմտահայ գաղթականները, չուտով սկսեցին հեռանալ Շարուրից՝

¹ Տե՛ս ՀԱԱ, ֆ. 200, ց. 1, գ. 423, թ. 14:

² Տե՛ս ՀԱԱ, ֆ. 114, ց. 1, գ. 3, թ. 3:

իրենց հետ տանելով այն ամենը, ինչ կարող էին: Բացի այդ, շուտով նաև պարզվեց, որ վերաբնակիչներին Շարուրում պահելու և նրանց համար շատ թե քիչ տանելի պայմաններ ստեղծելու նպատակով կառավարության ձեռնարկած քայլերը բավարար չեն: Այդ մասին ուշագրավ տեղեկություններ կան Արարատյան նահանգի նահանգապետին ուղարկած Վայոց Ձորի գավառապետ Յապոնի սեպտեմբերի 28-ի զեկուցագրում: Նրանում ասված է, որ «Շարուրը գրավելուց հետո գանազան շրջաններից (այստեղ) շտապեցին մի քանի հազար մարդիկ: Երկար ժամանակ Շարուրում բացակայում էր իշխանությունը և գանազան հիմնարկությունների կողմից տրված իրար հակասող վկայականները ստեղծեցին մի քառասյին դրություն, որից գլխավորապես օգտվում էին ճարպիկները, ուժեղները, սպեկուլյանտները և, ընդհանրապես՝ տուժում չարքաչ աշխատավորությունը և գաղթականությունը, որը զուրկ էր ցորեն ծեծելու հարմարությունից՝ լծկաններ չունենալու պատճառով: Մնդատու կայանների և բժշկական օգնություն իսպառ բացակայությունը պարարտ հող ստեղծեցին գանազան հիվանդությունների, գլխավորապես «մալարիա», որը ահագին զոհեր խլեց ժողովրդից: Տիրող դրության հետևանքով սկսվեց արտագաղթը Շարուրից, որը հասավ հսկայական չափերի և մի քանի շաբաթվա ընթացքում դատարկվեց Շարուրը»¹:

Տեղում մնացել էին միայն նախկին շարուրցիներն ու նախիջևանցիները, որոնք տեղավորվել էին շուրջ 10 գյուղերում: Վտանգ կար, որ սրանք էլ կհեռանան, ուստի վերոհիշյալ զեկուցագրում Յապոնը առաջարկում է իրականացնել միջոցառումների մի ամբողջ շարք (աննդատու կայանների ստեղծում, Շարուրի կենտրոն Բաշ-Նորաչենում 50 մահճակալով հիվանդանոցի հիմնում, երկու կետերում ֆելդչերական կայանների հաստատում, գյուղացիներին քարշող ուժով և գութաններով ապահովում և այլն) տեղում մնացածների գոյությունը և ֆիզիկական անվտանգությունն ապահովելու համար: «Շարուրում բոլոր բնակավոդներն անգեն են և ենթակա պատահականությունների, - գրում է Յապոնը: Անհրաժեշտ է տեղացիներից կազմել ինքնապաշտպանական խմբեր: Դրա համար անհրաժեշտ է փութացնել (գենք) ուղարկելու գործը, որը խոստացել է ՆՊՄ-ն: Առաջին հերթին հնարավոր է երեք հարյուր (300) հրացան լավ տեսակի»²:

Բայն այն է, որ թեև ամբողջ Շարուրի գավառակը և Նախիջևանի

գավառի մի մասը գրավված էին հայկական զորքերի կողմից և օգոստոսի 10-ի համաձայնագրով անցել էին Հայաստանին, բայց ևս այնպես ինչպես սահմանների վրա, այնպես էլ գավառում հաճախակի տեղի էին ունենում մահճակալական հրոսակախմբերի ավազակային հարձակումներ, խժոժություններ և այլ կարգի հանցագործություններ, որով սպառնալից վիճակ էր ստեղծվում ազգաբնակչության համար: Վկայաբերենք դրանցից մի քանիսը, որ քաղվածաբար վերցրել ենք Արտգործնախարարության սեպտեմբերյան տեղեկագրի 4-րդ հավելվածից.

«Օգոստոսի 10-ին Շարուրի ուղղությամբ մերոնք մաքրել են Արաքս գետի ձախ ափը Ենգիջա գյուղից արևմուտք՝ թաթարական ավազակներից, որոնք թալան և կողոպուտ էին անում անվերջ: Մենք կորուստ չունենք, թուրքերից սպանված են և վիրավոր 30 հոգի:

...Օգոստոսի 14-ի գիշերը թաթարական խուզարկու խմբերը Դարալագյազի դրունքի մոտ հրացանաձգության են բռնվում մեր պահակների հետ: Նույն գիշերը թաթար ձիավոր խմբերը հրացանաձգություն են սկսում Ազնաբերդ գյուղի շրջանում՝ մեր դիրքերի վրա:

...Օգոստոսի 21-ին 20 հետևակ թաթարներ հրացանաձգության են ենթարկում Շարուրում մեր պահակներին Պայիս գյուղի մոտ և... հրացանային կրակի են մատնում մեր դիրքերը Սենջափ գյուղի հարավային կողմից, կես ժամից հետ են քաշվում:

...Օգոստոսի 29-ին Շարուրում, Դիադինի կողմից 30 թաթար ձիավորներ փորձում են անցնել Արաքս գետը, բայց մեր կրակով հետ են չպրտվում՝ թողնելով 3 դիակ: Նույն օրը Սենջափ գյուղի մոտ թաթարական հետախույզները հրացանաձգության են բռնվում մեր առաջապահների հետ:

...Օգոստոսի 30-ին նույն տեղը 50 հոգի թաթարներ՝ զնդացիներով զինված, փորձում էին ձեռքել մեր առաջավոր մասերը, բայց չզիմանալով մեր կրակին, նահանջում են Ջահրի գյուղը»¹:

Ինչպես տեսնում ենք, իրադրությունը Շարուրում իսկապես հանգիստ չէր, և դրա պատճառը չղաղարող այն հարձակումներն էին, որ կատարվում էին ուսական վերահսկողության տակ գտնվող տարածքներից: Քիչ չէին նաև հենց ուսական զորամասերի կողմից կատարված հարձակումները, ինչի մասին խոսվում է Լեզրանին հասցեագրած Համո Օհանջանյանի սեպտեմբերի 5-ի բողոքի նոտայում: Նրանում ասված է, որ օգոստոսի 10-ի համաձայնագրից հետո հայկական զորքերը ոչ մի անգամ չեն խախտել ղեմարկացիոն գիծը, մինչդեռ ուսական

¹ ՀԱԱ, ֆ. 201, ց. 2, գ. 623, թ. 27:

² Նույն տեղում, թ. 29:

¹ ՀԱԱ, ֆ. 201, ց. 1, գ. 607, թ. 38-39:

գորքերը միմիայն Նախիջևանի չրջանում մի շարք ակտիվ գործողություններ են ձեռնարկել Հայկական ուժերի դեմ օգոստոսի 13-ի, 20-ի, 24-ի, 29-ի, 31-ի, սեպտեմբերի 1-ի և 3-ի ընթացքում: Հ. Օհանջանյանը հետագա բարդություններից խուսափելու համար իր կառավարությունն անունից առաջարկում է Նախիջևանի չրջանում տեղաբաշխված Հայկական և ռուսական զորքերի միջև հատուկ չեզոք գոտի ստեղծել: Ըստ որում, առաջարկվում է այսպիսի տարբերակ. Հայկական զորքերը մնում են օգոստոսի 10-ի համաձայնագրով հաստատված գծի վրա, այն է՝ Շահթախթի-Դարալագյազի և Նախիջևանի գավառների նախկին վարչական սահմանը՝ մինչ Զանգեզուրի գավառի նախկին վարչական սահմանի հետ հատվելը: Ռուսական զորքերը զբաղեցնում են Կորգալուղի լեռնանցք-Թազըուչան, Դուզդաղ-Շայթանբաղ-Թարեշ-Բադամլու-Ներքին Իրամաչեն-Զիրենել գյուղեր-Ախդաբան լեռ գիծը¹:

Նոտայում հատկապես նշված էր, որ «վերջին ժամանակների իրադարձությունները ցույց տվեցին, որ միմիայն նշված չեզոք գոտու հաստատումով հնարավոր կլինի ապահովել հանգստությունը Նախիջևանի չրջանում»²:

Թեև Համո Օհանջանյանը նաև խնդրել էր շտապ տեղեկացնել, թե ռուսական զորքերի հրամանատարությունը ինչպես է վերաբերվում չեզոք գոտի ստեղծելու մասին իր առաջարկին, սակայն Լեզրանից այդպես էլ որևէ պատասխան չստացավ: Համենայն դեպս, ոչ արխիվներում ու փաստաթղթերի ժողովածուներում, ոչ էլ պատմագիտական գրականության մեջ չենք հանդիպել Լեզրանի պատասխանի մասին որևէ վկայություն: Իսկ չպատասխանել՝ նշանակում է համաձայն չլինել արված առաջարկին: Ասենք, սեպտեմբերյան այդ օրերին, երբ Բաքվում և Անկարայում ծրագրվում ու նախապատրաստվում էր մեծ պատերազմ՝ ընդհանուր արշավանք դեպի Հայաստան, իսկ Մոսկվան ձգտում էր լուծել Հայաստանով դեպի Թուրքիա տրանզիտի հարցը, որով կկանխվեր Թուրք-Հայկական պատերազմը, Շարուրի սահմաններում տեղի ունեցող մանր ընդհանրումները այլևս չէին կարող լուրջ ուշադրության արժանանալ: Սակայն տրանզիտի իրավունք ստանալու միջոցով Թուրք-Հայկական պատերազմը կանխելու փորձը հաջողություն չունեցավ: Այդ հարցը կարող էր լուծվել Երևանում Հայաստանի կառավարության հետ Լեզրանի անմիջական բանակցությունների միջոցով: Մինչդեռ վերջինս Երևան ժամանեց ոչ թե օգոստոսին կամ էլ սեպտեմբերին, այլ միայն հոկտեմբերի 11-ին, երբ պատերազմը վաղուց սկսված էր:

Ինչ հետևություններ կարելի է անել այս գլխի շարադրանքից.

1. Կովկասում գործող բոլշևիկյան ղեկավար գործիչների շարքում Բ. Լեզրանը միակն էր, որ հաստատապես կանգնած էր Շարուր-Նախիջևանը Հայաստանի Հանրապետության մաս ճանաչելու տեսակետի վրա: Այդ են վկայում ոչ միայն նրա բազմաթիվ Հայտարարությունները, այլև օգոստոսի 10-ի համաձայնագիրը, որով Շարուրից բացի Հայաստանին էր հանձնվում նաև Շահթախթի-Ջուլֆա երկաթուղու շահագործման իրավունքը: Մի հանգամանք, որն առաջ բերեց ոչ միայն Բաքվի և Անկարայի, այլ նաև Մոսկվայի դժգոհությունը:

2. Կովկասում գործող գլխավոր կոմունիստը՝ Գ. Օրջոնիկիձեն, թեև տեսնում ու հասկանում էր Ադրբեջանի ղեկավարություն մոտ հակահայկական ազգայնական տրամադրությունների առկայությունը, բայց և այնպես գործնականում պաշտպանում էր Նարիմանովի խմբի շահերը: Առաջ քաշելով Ղարաբաղը և Զանգեզուրը՝ Ադրբեջանին, իսկ Շարուր-Նախիջևանը՝ Հայաստանին տարբերակը, միաժամանակ պահանջում էր ռուսական զորքերով օկուպացնել Շարուր-Նախիջևանը՝ Անատոլիայի հետ կապի հաստատման և ազգամիջյան ընդհարումները կանխելու պատրվակով:

3. Ադրբեջանի ղեկավարությունը՝ հանձին Ն. Նարիմանովի և նրա խմբի, Հայաստանի նկատմամբ վարում էր նույն թշնամական, զավթողական քաղաքականությունը, ինչ և մուսավաթական կառավարությունը: Բոլոր վիճելի տարածքները համարելով իրենցը՝ Բաքվի ղեկավարները օգտագործում էին ռուսական զորքերով օկուպացված չրջաններում ազատորեն գործելու հնարավորությունները (քարոզչություն, կաշառք, սպառնալիք և այլն) այդ տարածքները Ադրբեջանին ամրակցելու համար և խուսափում հայ-ադրբեջանական կոնֆերանս գումարելու Հայաստանի կառավարության առաջարկությունից:

4. 1920թ. հուլիս-օգոստոսին Հայաստանի Հանրապետության արևելյան (Ղազախ, Շամշադին, Զանգեզուր) և արևմտյան (Օլթի, Մերդենեկ) սահմաններում ստեղծված պատերազմական բարդ իրադրության պայմաններում, երբ Հայկական ուժերը ուժասպառ էին լինում անհավասար մարտերում, իսկ 11-րդ բանակի հրամանատարությունը սպառնում էր լայնամասշտաբ հարձակմամբ, Լեզրանի հետ բանակցություններ սկսելը և հաշտության համաձայնագրի ստորագրումը, հրամայական անհրաժեշտություն էր:

5. Լեզրան-Ջամայան համաձայնագիրը, ըստ էության, կոմպրոմիս էր, խելամիտ կոմպրոմիս և դիվանագիտական հաջողություն, որով վերջ էր տրվում պատերազմին: Հայաստանը՝ համաձայնելով Զանգե-

¹ Տե՛ս «Բանբեր Հայաստանի արխիվների», 1993թ., N 1-2, էջ 296-297:
² Նույն տեղում, թ. 297:

գուրի և Նախիջևանի ժամանակավոր օկուպացիային (մինչև այդ գավառների ճակատագրի վերջնական լուծումը առաջիկայում կնքվելիք ռուս-հայկական պայմանագրով), փոխարենը ստանում էր Շարուրի գավառակը և Շահթախթի-Ջուլֆա երկաթուղու շահագործման իրավունքը ու դրանով իսկ լուծում կենսական նշանակության կարևորագույն հարց՝ Իրանի հետ առևտրատնտեսական կապերի վերականգնման հնարավորություն:

6. Օգոստոսի 10-ի համաձայնագրից դժգոհ մնացին Հայաստանի թե՛ «ղաշնակիցները»՝ Անգլիան և Ֆրանսիան, թե՛ թշնամիները՝ Թուրքիան և Ադրբեջանը:

Ռուսաստանի դեմ փաստական պատերազմի մեջ գտնվող փոքրիկ և ուժասպառ Հայաստանին որևէ իրական օգնություն ցույց չտված Անգլիայի և Ֆրանսիայի անդրկովկասյան ներկայացուցիչների շտապ ժամանումը Երևան, սպառնալից Հայտարարությունները և Ռուսաստանի դեմ պատերազմը շարունակելու պահանջը, ակնհայտ դարձրեց, որ Հայաստանը նրանց հետաքրքրում է միայն որպես հակառուսական ճակատ և ոչ ավելի: Այնուամենայնիվ, Հայաստանի կառավարությունը իր քաղաքական կողմնորոշումը չփոխեց: Վարչապետ Հ. Օհանջանյանը հավաստիացրեց «ղաշնակիցներին», որ կնքված համաձայնագիրը միայն ժամանակավոր զինադադար է և ուրիշ ոչինչ:

Համաձայնագրի ստորագրման կապակցությամբ Բաքվում և Անկարայում բարձրացված աղմուկն ու բողոքը, Մոսկվայում գտնվող նրանց ներկայացուցիչների (Բ.Շահթախթինսկի, Բեքիր Սամի բեյ) դիմումները Լենինին անհետևանք չմնացին: Նախիջևանում գտնվող Կարմիր բանակի հետ կապի հաստատման նպատակով Թուրքական զորքերի կողմից Սարիղամիշը և Շահթախթին գրավելու վերաբերյալ Մոսկվայի համաձայնությունը, ինչպես նաև Թուրքական «Ազգային ուխտի» ճանաչումը, դուռ էին բացում Հայաստանի վրա Թուրքիայի ավազակային հարձակման համար:

7. Շարուրի գավառակի միացումը Հայաստանի Հանրապետությանը ռազմաքաղաքականից գատ ունեցավ նաև տնտեսական կարևոր նշանակություն, քանի որ դա հնարավորություն տվեց. ա) Շարուր-Նախիջևանի գաղթականության մի մասին վերաբնակեցնել այդ շրջանում և դրանով իսկ ինչ-որ չափով թեթևացնել կառավարության ուսերին ծանրացած գաղթականական ծանր բեռը, բ) վերականգնել առևտրատնտեսական կապերը Իրանի հյուսիս-արևմտյան շրջանների հետ և Մակվի խանության հետ կնքել առևտրական նպաստավոր պայմանագիր:

ԳԼՈՒՆ ԵՐՐՈՐԴ

Իրադրությունը Շարուրի ճակատում Թուրք-հայկական պատերազմի շրջանում: Նախիջևանյան հիմնահարցը Ալեքսանդրապոլի կոնֆերանսում

Մոսկվայի նոր դիրքորոշումը վիճելի տարածքների և դեպի Թուրքիա տրանզիտի հարցում Հայաստանի դեմ քեմալականների պատերազմական նախապատրաստությունը շրջանում:

Իրադրությունը Շարուրի ճակատում Թուրք-հայկական պատերազմի առաջին ամիսներին (սեպտեմբեր-հոկտեմբեր): Շահթախթի-Ջուլֆա երկաթուղագծի գրավումը Նախիջևանի Թուրքական զորամասի կողմից:

Վիճելի տարածքների հարցը Լ. Շանթի և Բ. Լեզրանի պատվիրակությունների Երևանյան բանակցություններում: Հայ-ռուսական պայմանագրի նախագծի մերժումը Ադրբեջանի ղեկավարության և Ստալինի կողմից: Ջիզերինի վերաբերմունքը:

Ռազմական գործողությունները Շարուրի ճակատում պատերազմի ավարտական փուլում: Հայկական զորամասի համառ դիմադրությունը և հարկադրական նահանջը Շարուրից:

Տարածքային սահմանագծման հարցերը Ալեքսանդրապոլի կոնֆերանսում: Թուրքական դիվանագիտության հեռահար նպատակները. Սևրի պայմանագիրը չեղյալ հայտարարելու և հայկական զորամիավորումները Շարուրի հարակից շրջաններից հետ քաշելու Կարաբեքիրի պահանջը:

Տարածքային սահմանագծման Սատիսյանի պատվիրակության կազմած քարտեզը: Թուրքական հակաառաջարկները. Արփաչայը և Արաքսը սահմանագիծ:

Հայաստանի խորհրդայնացման խնդիրը և Թուրքական դիվանագիտությունը, Շարուր-Նախիջևանի նկատմամբ հովանավորության պահանջը:

Վրացյանի կառավարության դիրքորոշումը Հայաստանի խորհրդայնացման և Թուրքական պայմանագրի ստորա-

գրման հարցում: Ալեքսանդրապոլի պայմանագրի ստորագրման առեղծվածը: Շարուր-Նախիջևանն ըստ Ալեքսանդրապոլի պայմանագրի:

Խորհրդահայ պատմագիտական գրականության մեջ վաղուց ձևավորված կարծիք կա, ըստ որի՝ Բ. Լեզրանի պատվիրակության Երևան ժամանելու ուշացման հարցում մեղավոր է բացառապես Համո Օհանջանյանի կառավարությունը, որ եթե բանակցություններն ավելի շուտ սկսվեին, պայմանագիր ստորագրվեր, կիսուսափեինք այդ կորստաբեր պատերազմից: Մինչդեռ արխիվային փաստաթղթերի ուսումնասիրությունը պարզորոշ ցույց է տալիս, որ բանակցությունների ուշացման հարցում «մեղավորություն» իր բաժինն ունի նաև Խորհրդային Ռուսաստանի կառավարությունը: Պարզվում է, որ եթե Հուլիս-օգոստոսին Հայաստանի կառավարությունն էր հետաձգում Լեզրանի ժամանումը Երևան՝ այն էլ բավականին հիմնավոր պատճառաբանությամբ, ապա սեպտեմբերին արդեն Ռուսաստանի: Ինչո՞ւ, փորձենք պարզել:

Դեռևս օգոստոսի 22-ին Ջիչերինը Ս. Տեր-Գաբրիելյանին հանձնարարել էր հաղորդել Լեզրանին, որ պետք է շտապ մեկնել Երևան՝ Հայաստանի կառավարության հետ լուծելու դեպի Թուրքիա ազատ տրանզիտի իրավունք ստանալու և Անկարայի կառավարության հետ հեռախոսային ուղիղ կապ ստեղծելու խնդիրը: Մեկ շաբաթ անց՝ օգոստոսի 30-ին, Լեզրանը պատվիրակության քարտուղար Իստոմինին գործուղում է Երևան՝ պատվիրակության Երևան ժամանելու հարցը կառավարության հետ համաձայնեցնելու և անհրաժեշտ պայմաններ նախապատրաստելու համար: Սակայն Հայաստանի կառավարությունը չի շտապում լուծել այդ հարցը՝ պատճառաբանելով, որ Շանթի պատվիրակությունը դեռ չի վերադարձել, և բացի այդ, 50 հոգուց բաղկացած պատվիրակության համար Երևանում համապատասխան չենք չկա: Այս ամենի մասին հայտնելով Ջիչերինին՝ Լեզրանը սեպտեմբերի 15-ին մի ընդարձակ գրություն է ուղարկում Մոսկվա, որում տեղեկացնում է, որ ինքը վերջին օրերին Հայաստանի կառավարությանը վճռական հարցում է արել, թե կարո՞ղ է մոտ օրերը պատվիրակության համար Երևանում անհրաժեշտ չենք տրամադրել, թե ոչ, հակառակ դեպքում՝ առաջարկելով բանակցությունները փոխադրել Ռուսաստան:

Լեզրանը վստահ էր, որ այս անգամ Հայաստանի կառավարությունը դրական պատասխան կտա, և նաև գտնում էր, որ տրանզիտի

խնդիրը Դաշնակցություն կուսակցության շարքերում պառակտում կմտցնի: Թե ինչո՞ւ, նա չի ասում: Մենք էլ դրան չենք անդրադառնում, քանի որ այն դուրս է մեր թեմայի շրջանակներից: Այլ է տրանզիտի իրականացման հնարավոր ուղիների հարցը, որն անմիջական կապ ունի մեր թեմայի հետ և որի մասին խոսվում է այդ գրության մեջ: «Հայաստանի տարածքում երկու ուղի կա դեպի Թուրքիա, - գրում է Լեզրանը, - 1) Սարիղամիչ - էրզրում և 2) Նախիջևան - Շահթախթի - Մակու - Բայազետ - Ղարաքիլիս¹ - էրզրում: Առաջինը, որ ուղիղ կապ է հանդիսանում Անատոլիայի և անմիջականորեն՝ Անգորայի հետ, Հայաստանի համար պակաս վտանգավոր է, քանի որ պաշտպանված է բնական արգելքներով և Կարս ամրոցով: Երկրորդ ուղին գնում է Հայաստանի հարավային սահմանի երկայնքով և Նախիջևանի կողմից ուղիղ մուտք է բացում դեպի Հայաստան՝ Երևանի ուղղությամբ Արաքսի հովտով»²:

Անատոլիայի հետ ուղիղ կապի հաստատման տեսակետից այս երկրորդ ուղին Լեզրանը օգտակար չի համարում, քանի որ շրջանց ճանապարհով այն կրկին դուրս է բերում էրզրումի տրակտը, ընդ որում՝ որոշ հատվածում նեղուղի երկաթգծի գոյությունը վիճակը առանձնապես չի փոխում: Դրա փոխարեն՝ ըստ Լեզրանի. «Փոքր Ասիայի հյուսիս-արևելյան մասում և Հայաստանի դեմ ինքնուրույն օպերացիաների համար այդ ուղղությունը կարող է վճռորոշ նշանակություն ունենալ: Հավասարապես Նախիջևանից ճանապարհ է բացվում դեպի Պարսկաստան՝ Թավրիզ»³: Ուստի առաջարկում է որոշել այն քաղաքական նպատակները, որ պետք է հետապնդել հաղորդակցության ուղիների վերաբերյալ Հայաստանին ներկայացվելիք պահանջների կապակցությամբ:

«Եթե Մոսկվան նպատակ կդնի ինքնուրույն օպերացիաներ զարգացնել մեզ մոտիկ Թուրքիայում և Պարսկաստանում, - շարունակում է Լեզրանը, - ապա տարածքային հարցերի լուծումը հարկ կլինի երկարաձգել՝ Նախիջևանի հանգույցը մեր տիրապետության տակ պահելու համար և մի շարք քայլեր ձեռնարկել՝ տիրանալու Շահթախթի հանգույցին և նեղուղի երկաթգծին: Այդ դեպքում, պարզ միամտություն կլինի հուսալ, թե Հայաստանը կհամաձայնի մեզ տրանզիտ տրամադ-

¹ Գտնվում է Արևմտյան Հայաստանի տարածքում, Մեծ Ղարաքիլիսից (այժմ՝ Վանաձոր) տարրերելու համար անվանում էին նաև Փոքր Ղարաքիլիս:

² «ՀՀ-ն 1918-1920թթ., փաստաթղթերի... ժողովածու», էջ 279:

³ Նույն տեղում, էջ 280:

րել Կարա-Սարիղամիչ գծով: Դա ստիպված կլինենք հետաձգել մինչև Հայաստանի խորհրդայնացումը:

Եթե խնդիրը քեմալական կառավարության հետ ուղիղ կապի հաստատումն է, նրան անհրաժեշտ պաշարներ մատակարարելը, ինձ թվում է, կարելի է սահմանափակվել Սարիղամիչի ուղղությունով, առավել ևս, որ Կովկասում մեր ուժերի ունեւ չհաշվարկի դեպքում Թավրիզի և Բայազետի ուղղությունների իրական օգտագործման հույս չենք կարող ունենալ:

Այդ դեպքում հնարավոր կլինեն մի քանի տարածքային զիջումների միջոցով Հայաստանի հետ համաձայնության գալ և լուծել տրանզիտի հարցը խաղաղ ճանապարհով»¹:

Ինչպես տեսնում ենք, Լեզրանը նախկինի պես խնդրի խաղաղ լուծման և Ադրբեջանի հետ վիճելի համարվող որոշ տարածքներ Հայաստանին զիջելու ջատագով էր: Իսկ թե ինչ տարածքներ նկատի ուներ նա, դժվար չէ գուշակել, թեև կոնկրետ այդ գրություն մեջ ոչինչ նշված չէ: Խոսքը Զանգեզուրի և Նախիջևանի մասին կարող էր լինել: Վերջում Լեզրանը հնարավոր թյուրիմացություններից խուսափելու համար խնդրում է ցուցումներ տալ այդ հարցի մասին և ավելացնում. «...վերջին ժամանակներս Հայկական կառավարությունը որոշել է ձեռնարկել Շահթախթի-Ջուլֆա երկաթգծային տեղամասի շահագործումը: Երկրում վառելիքի բացակայության պատճառով, գործը, հավանաբար, կսահմանափակվի նախապատրաստական աշխատանքներով, թեև բացառված չէ, որ կառավարությունը այդտեղ քարածուխ հասցնի, որի արդյունահանումը Օլթիի շրջանում վերջերս է սկսվել»²:

Շահթախթի-Ջուլֆա երկաթգծի շահագործման վերաբերյալ Հայաստանի կառավարության մտադրության մասին Լեզրանն իմացել էր Համո Օհանջանյանի սեպտեմբերի 6-ի հեռագրից, որում վերջինս, հայտնելով իր կառավարության այդ մտադրության մասին, միաժամանակ խնդրել էր օգոստոսի 10-ի համաձայնագրից բխող համապատասխան ցուցում տալ տեղի իշխանություններին և Նախիջևանի տարածքում տեղաբաշխված ռուսական զորամասերին՝ արգելքներ չհարուցել Հայաստանի երկաթուղային վարչության աշխատանքներին³:

Լեզրանը Հ. Օհանջանյանի այս հեռագրին չէր պատասխանել, այլ, ինչպես վերը տեսանք, բավարարվել էր այդ խնդրի մասին իր կառա-

վարությունը տեղեկացնելով: Նա արդեն գիտեր, որ Օրջոնիկիձեն ևս դեմ է թուլյատրելու Հայաստանին շահագործել Շահթախթի-Ջուլֆա երկաթուղագիծը: Նախորդ օրը՝ սեպտեմբերի 14-ին նա Բաքվից ստացել էր 11-րդ բանակի հրամանատարի հեռագիրը, որում ասված էր, թե Բաքվում գտնվելու ժամանակ Օրջոնիկիձեն ասել է, թե «համաձայնագրի երկաթուղագծի մասին կետը կարելի է չկատարել», որ ռազմական տեսակետից անթույլատրելի է Հայկական զորամասերի հայտնվելը Շահթախթիից արևելք՝ հատկապես նկատի առնելով այնտեղ թուրքական զորաջոկատների առկայությունը¹: Սա ակնհայտորեն անբավարար պատճառաբանություն էր, քանի որ երկաթուղագծի շահագործումը իրականացնում են երկաթուղային վարչության աշխատակիցները և ոչ զորամասերը: Խոսելով երկաթգծի գործարկման նպատակով հայկական զորամասերի Շահթախթիից արևելք հայտնվելու և թուրքական զորաջոկատների հետ ընդհարման վտանգի մասին՝ 11-րդ բանակի հրամանատարությունը դիտավորյալ խտացնում էր գույները: Լեզրանը դա չնկատել չէր կարող և արտահայտելով իր դժգոհությունը, 11-րդ բանակի Ռազմահեղափոխական խորհրդին ուղարկած պատասխան հեռագրում նա գրում է. «Չիչերինի կողմից ինձ տրված հրահանգների համաձայն Հայաստանի հետ օգոստոսի 10-ի համաձայնագիրը ենթակա է պահպանման նրա բոլոր մասերով...: Եթե Հայաստանի երկաթուղային վարչության գործակալների հետ Նախիջևանի թուրքական զորամասերի թշնամական ընդհարման վտանգ գոյություն ունի, Ռազմահեղափոխորդի պարտականությունն է ներգործող միջոցներ ձեռնարկել այդպիսի հնարավորությունը կանխելու համար: Հույժ կարևոր է, որ Նախիջևանը ամուր գրավված լինի մեր կարմիր զորամասերով: Ադրբեջանի սահմանների վրա մեր կողմից օգոստոսի պայմանագրի պահպանման ամբողջ պատասխանատվությունն ընկած է 11-ի Ռազմահեղափոխորդի վրա և ոչ թուրքական զորամասերի պետերի»²:

Ի՞նչ ազդեցություն ունեցավ զինվորականների վրա Լեզրանի այս բավականին կոշտ պատասխանը: Միայն այն, որ հարցի լուծումը փոխադրվեց Մոսկվա: Ինչ վերաբերում է Շահթախթի-Ջուլֆա երկաթուղագիծը գործարկելուն, ապա Լեզրանի այն ենթադրությունը, որ Հայաստանի կառավարությունը չի կարողանա գործարկել Երևան-Շահթախթի-Ջուլֆա երկաթուղագիծը, ճիշտ դուրս եկավ, բայց

¹ Նույն տեղում:

² Նույն տեղում:

³ Տե՛ս ՀԱԱ, ֆ. 276, ց. 1, գ. 191, թ. 6:

¹ Տե՛ս „Генерал армян...“, стр. 165.

² Նույն տեղում, էջ 168:

պատճառը ոչ թե վառելիքի բացակայությունն էր (Հայաստանում չոգեքարչերը հիմնականում աշխատում էին Սարիղամիչի անտառների փայտով), այլ սկսված Թուրք-Հայկական պատերազմը: Նա չէր սխալվել նաև իրեն վիզա տալու հարցում: Սեպտեմբերի 14-ին Շանթի պատվիրակությունը վերադարձավ Երևան, իսկ 19-ին Հ. Օհանջանյանն իր կառավարության անունից Լեզրանին հրավիրում է Երևան՝ Մոսկվայում ընդհատված բանակցությունները վերսկսելու և հաշտության պայմանագիր կնքելու նպատակով: Վերջինս էլ՝ ոգևորված մոտ օրերը բանակցությունները սկսելու հնարավորությամբ, սեպտեմբերի 23-ին ընդարձակ հեռագրով դիմում է Չիչերինին և Լենինին, տեղեկացնում, որ Վլադիկավկազից Ս. Տեր-Գաբրիելյանի վերադառնալուն պես մեկնելու են Երևան, խնդրում վերջնական կարծիք հայտնել հետևյալ երեք հարցերի վերաբերյալ (ներկայացնում ենք որոշ կրճատումներով)।

«Առաջին - Արդյո՞ք ուժի մեջ է Չիչերինի կողմից ինձ հաղորդած ԿԿ-ի հրահանգը՝ դիվանագիտական ճանապարհով ստանալու Հայաստանի համաձայնությունը դեպի Թուրքիա մեզ ազատ տրանզիտ տրամադրելու և այդ կապակցությամբ մեր կնքած 10/VIII համաձայնագրի անվերապահ պարտադրականության մասին: Ռազմհեղխորհուրդը նորից համառ կերպով հարց է հարուցում նշված պայմանագրի պահպանման անցանկալիության մասին՝ այս անգամ Շահթախթի-Ջուլֆա տեղամասի շահագործումը Հայաստանի երկաթուղային վարչությունը թույլատրելու առումով: ...Անհրաժեշտ է վճռական քայլեր ձեռնարկել, որպեսզի բանակային հրամանատարությունը հրաժարվի Հայաստանի նկատմամբ ինքնուրույն քաղաքականություն վարելուց, կամ էլ մեզ ազատել մեր վրա դրած հանձնարարությունից:

Երկրորդ - Պե՞տք է մենք անպայման ձգտենք ստանալ երկու ուղիներն էլ՝ Սարիղամիչյան և Նախիջևան-Շահթախթի-Բայազեդյան: Կիրովի հետ ուղարկած իմ զեկուցագրում ես ցույց եմ տվել, թե որքան պրոբլեմատիկ է երկրորդ ուղու վերաբերյալ Հայաստանի հետ համաձայնության հաշվարկը և որքան այդ երկրորդ ուղին մեզ քիչ է տալիս՝ Անատոլիայի հետ ուղիղ կապի իմաստով: Աղբրեջանի և Ռազմհեղխորհրդի համառ ձգտումը՝ տիրանալու այդ ուղուն, բացատրվում է ոչ այլ ինչով, քան ձգտումով՝ ամուր պահել մեր զբաղված Ջանգեզուրի և Նախիջևանի վիճելի մարզերը և հասնել նրանց միացմանը Աղբրեջանին: Դրա հետ մեկտեղ այդ քաղաքականությունը մեզ տանելու է դեպի արկածախնդրական ձեռնարկումներ Թավրիզի և Բայազեդի ուղիղություններով: Կարծում եմ, որ մեր անմիջական նպատակների տեսա-

կետից՝ Հայաստանի միջոցով երկաթուղային ուղիղ կապի հաստատում էրգրումի և այնուհետև Անգորայի հետ, մենք կարող էինք սահմանափակվել միայն Սարիղամիչի ուղիով:

Երրորդ - Հայաստանին ի՞նչ տարածքային զիջումների ենք մենք պատրաստ՝ մեզ տրանզիտ տրամադրելու պայմանով: Կարծում եմ չպետք է վախենալ Հայաստանին հանձնելու Ջանգեզուրը և Նախիջևանը: Նախ, այդ մարզերը մեզ պետք կլինեին միայն որպես երման կետեր մեր ձավոր Թուրքիայում և Թավրիզի ուղղությամբ ինքնուրույն օպերացիաների համար, որը, կրկնում եմ, Աղբրեջանում մեր ռազմական և խորհրդային ուժերի դրություն պայմաններում, մաքուր ուսուպիա է: Երկրորդ, Ջանգեզուրը իսկապես հայկական մարզ է, որտեղ մեր իշխանությունը ներկա պահին բնակչությանը թշնամի օկուպացիայի բնույթ է կրում, որը հատկապես զրսևտրվեց Գորիսի դեպքերի ժամանակ: Երրորդ, չի կարելի հաշվի նստել Աղբրեջանի տարածքային հավակնությունների հետ, քանի որ եթե ոչինչ չզիջվի Հայաստանին, ապա պետք չէ սպասել զիջում նրա կողմից տրանզիտի հարցում: Տարածքային հարցում օրյեկտիվ քաղաքական հաշվարկներով հիմնավորված՝ Մոսկվայի ամեն մի որոշում, անկասկած ընդունելի կլինի Աղբրեջանի համար: Ինչ վերաբերում է Ղարաբաղին, կարելի է պնդել նրա միացման վրա Աղբրեջանին»¹ (ընդգծումը մերն է - է. Ջ.):

Վերջում Լեզրանն ավելացնում է, որ Մոսկվայի կողմից իր առաջ քաշած դրույթների ընդունման դեպքում միայն կարելի է հուսալ, որ հնարավոր կլինի Հայաստանի հետ խաղաղ համաձայնությամբ ցանկալի արդյունքի հասնել ու խնդրում սպառիչ պատասխան տալ իր առաջադրած բոլոր երեք հարցերին:

Թվում էր, թե բոլոր արգելքները հաղթահարված են, և այժմ արդեն ոչինչ չի կարող խանգարել Լեզրանին շտապ մեկնելու Երևան, ինչին նա համատորեն ձգտում էր այդքան երկար ժամանակ: Բայց ո՛չ, չուտով պարզվեց, որ Չիչերինին չէր ոգևորել բանակցությունները վերսկսելու Հայաստանի կառավարության պատրաստակամությունը: Լեզրանի և Չիչերինի միջև հեռագրերի փոխանակությունից պարզ է դառնում, որ Հայաստանի հետ պայմանագրի հարցը Մոսկվային հիմա առանձնապես չի հետաքրքրում: Նա նաև չի հավատում, թե Երևանը անչեղորեն կիրազորի կնքված պայմանագիրը կամ ընդհանրապես պայմանագիր կկնքի: Եվ որ առավել տարօրինակ է, Մոսկվան այլևս

¹ Նույն տեղում, էջ 174:

չէր ուզում զիջումներ անել տարածքային հարցում, մասնավորապես Զանգեզուրի և Նախիջևանի խնդրում, և գտնում էր, որ այդ շրջանները առայժմ չպետք է հանձնել Հայաստանին: Մինչդեռ առանց դրա, առանց այդ երկու կարևոր գավառները ստանալու, Օհանջանյանի կառավարությունը պայմանագրի մասին լսել անգամ չէր ցանկանա: Դա գաղտնիք չէր ո՛չ Լեզրանի և ո՛չ էլ Մոսկվայի համար: Ուրեմն ի՞նչն էր պատճառը, ինչո՞ւ Մոսկվան հանկարծ փոխեց իր դիրքորոշումը Հայաստանի հետ հաշտության պայմանագրի կնքման հարցում, մի բան, որ նախատեսված էր օգոստոսի 10-ի համաձայնագրով: Բոլոր փաստերը վկայում են, որ միակ պատճառը սեպտեմբերին ուրվագծվող Թուրք-Հայկական պատերազմն էր, որ նախապատրաստում էր Անկարան և որի մասին քաջատեղյակ էին Մոսկվայում:

«Իմպերիալիստական Հայաստանը» ոչնչացնելու առաջին բացահայտ ու հրապարակային կոչերը հնչեցին սեպտեմբերի առաջին օրերին Արևելքի ժողովուրդների Բաքվի համագումարում (սեպտեմբերի 1-7): Տասն օր անց՝ սեպտեմբերի 17-ին, համագումարի կողմից ստեղծված «Արևելքի ժողովուրդների քարոզչություն և գործողության խորհրդի» նախագահություն (Օրջոնիկիձե, Նարիմանով, Ստասովա և այլն) ընդունած հատուկ որոշման մեջ երկար-բարակ դատողություններ են արվում Արևելքում (հատկապես իսլամի աշխարհում)՝ հեղափոխական շարժումների ծավալման գործում Թուրքիայի խաղաղած դերի, Հայաստանի կողմից այդ շարժումներին և Ադրբեջանին սպառնացող վտանգի մասին ու Թուրքիայի հետ միասին Հայաստանի վրա գրոհելու որոշում ընդունում¹: Այդ փաստաթուղթը ընթերցողի վրա թողնում է այն տպավորությունը, որ Արևելքի ժողովուրդների ճակատագիրը կախված է այն բանից, թե որքան շուտ կջախջախվի «իմպերիալիստական Հայաստանը», որն իբր Անգլիայի օգնությամբ և Իրանի ու Վրաստանի հետ դաշնակցած, պատրաստվում է հարձակվել Խորհրդային Ադրբեջանի վրա: Այդ է պատճառը, որ այն չտապ ուղարկվել էր Երրորդ ինտերնացիոնալի գործադիր կոմիտե, ՌԿ(Բ)Կ Կենտկոմ և ՌԽՖՍՀ արտգործօղկոմատ: Հենց այդ օրերին էլ Անկարան, որի ռազմական նախապատրաստությունները վաղուց էին ավարտվել, Կարմիր բանակին համատեղ Հայաստան արշավելու առաջարկ էր արել: Ճիշտ է, Մոսկվան դիվանագիտորեն խուսափել էր հա-

մատեղ արշավանքի գաղափարից (չէր ուզում աշխարհի աչքին ագրեսոր երևալ), քեմալականներին էլ այդ քայլից հետ պահելու մի թույլ փորձ էր արել՝ հանձնարարելով Ջիչերինին հեռագրել Լեզրանին (սեպտեմբերի 17-ին), թե «Կարաբեքիրի առաջարկությունները ներկա պահին անժամանակ են, իրադրությունը չի նպաստում, թող նա ներկայումս ձեռնպահ մնա այդպիսի գործողություններից»²: Նույնիսկ Հայտնի չէ, թե Լեզրանը Մոսկվայի այդ կարծիքը հաղորդե՞լ է Անկարային, թե՞ ոչ (Անկարայի հետ հեռագրական ուղիղ կապ չկար): Անգամ եթե հաղորդել է, միևնույն է, ոչ մի նշանակություն այն չի ունեցել. Վրաստանի բարյացակամ չեզոքության մասին հավաստիացումներ ստանալուց հետո՝ Անկարան որոշեց գործի անցնել: Ջիչերինի վերոհիշյալ հեռագրից 6-7 օր անց, սեպտեմբերի 23-ից լույս 24-ի գիշերը Կարաբեքիրի գլխավորած զորամասերը անցան ընդհանուր հարձակման² (սահմանային ընդհարումներ և ոչ մեծ մասշտաբի ռազմական գործողություններ մղվում էին սկսած հունիս ամսից):

Մեր պատմագիտական գրականության մեջ տարածված տեսակետների շարքում է նաև այն, թե իբր Մոսկվան անտեղյակ էր Անկարայի կողմից պատերազմի նախապատրաստությունը, որ սկսված արշավանքի մասին իմացել է միմիայն հոկտեմբերի սկզբին և այլն: Մինչդեռ փաստերը ցույց են տալիս, որ Մոսկվայում լավ էլ գիտեին նախապատրաստվող պատերազմի մասին և եթե ինչ-որ բան չգիտեին, ապա դա այն սկսելու կոնկրետ օրը կարող էր լինել: Վերը արդեն այդ բանը վկայող որոշ փաստերի ծանոթացանք, բայց կան և ուրիշ փաստեր, որոնք ցույց են տալիս, որ թեև Մոսկվան հրաժարվեց համատեղ արշավանքից, սակայն ոչ միայն այն կանխելու փորձ չարեց, այլ հակառակը՝ խրախուսեց ագրեսորին և զենքով ու զինամթերքով օգնելու որոշում կայացրեց: Այսպես, Բաքվից ստացած տեղեկությունների ազդեցության տակ սեպտեմբերի 20-ին ՌԿ(Բ)Կ Կենտկոմի պլենումը քննարկում է Կովկասում ստեղծված դրություն և Արևելքում խորհրդային պետության արտաքին քաղաքականությունը հարցերը, իսկ հաջորդ օրը՝ 21-ին, որոշում «երկարատև աշխատանքի համար Կովկաս գործուղել ընկ. Ստալինին», որտեղ նրա առաջնահերթ

¹ Մանրամասն տես **Է. Ա. Զոհրաբյան**, 1920թ. Թուրք-Հայկական պատերազմը..., էջ 153-154: Տես նաև «ՀՀ-ն 1918-1920թթ.», էջ 281-286:

¹ **Р. Казанджян** «Советско-кемалистские отношения в 1920г. и вопрос Армении в свете секретных документов московских архивов», «Մերձավոր և Միջին Արևելքի երկրներ և ժողովուրդներ» ժողովածու, N 21, Եր. 2002, էջ 104-105:

² Պատերազմի սկզբի մասին տարբեր տեսակետների մասին մանրամասն տես **Է. Ա. Զոհրաբյան**, 1920թ. Թուրք-Հայկական պատերազմը..., էջ 160-166:

խնդիրները էր լինելու «կարգավորել մեր ամբողջ քաղաքականությունը Կովկասում և Արևելքում»¹:

Թե ինչպես, ինչ մեթոդներով «կարգավորեց» Ստալինը Սորհրդային Ռուսաստանի քաղաքականությունը Կովկասում և Արևելքում, կտեսնենք հետագա շարադրանքում: Այստեղ միայն ավելացնենք, որ Ստալինի գործուղումը Կովկաս ճակատագրական եղավ նախ և առաջ հայ ժողովրդի համար:

Սեպտեմբերի 28-ին արտգործոժողկոմ Գ. Չիչերինը մի գրություն է ուղարկում ՌԿ(Բ)Կ Կենտկոմի Քաղբյուրո, որում մասնավորապես ասված էր. «Հայաստանում մեր ներկայացուցիչ ընկ. Լեզրանը առաջարկում է բանակցություններ սկսել Դաշնակցական կառավարության հետ՝ Հայաստանով ռազմական նյութերի տրանզիտի վերաբերյալ, այն հաշվով, որ փոխարենը մենք Հայաստանին հանձնենք որոշ վիճելի մարզեր, մասնավորապես Ջանգեղուրը և Նախիջևանը: Ընկ. էլիավան և Կիրովը գտնում են, որ միանգամայն անհույս է դաշնակցական կատավարությունից ձեռք բերել դեպի Թուրքիա ռազմական հանդերձանքի անցկացման թույլտվություն և որ այդ կերպ մենք միմիայն կարող ենք թակարդ ընկնել: Իսկ այդ մարզերի հանձնումը դաշնակցներին անթույլատրելի են համարում նկատի առնելով Ադրբեջանի հետ անխուսափելի սկանդալը: Պետք է հաշվի առնել այն, որ Լեզրանի հարցին բացասական պատասխանը անկասկած Հայաստանի վրայով խաղաղ ճանապարհով տրանզիտի ձեռքբերման անհնարինություն է նշանակում»² (ընդգծումը մերն է - է. Ջ.):

Ինչպես տեսնում ենք, այս գրության մեջ Չիչերինը իր սեփական կարծիքը չի արտահայտել, այլ ներկայացրել է միայն Լեզրանի առաջարկը, որին հակադրել է էլիավայի ու Կիրովի կարծիքը և Ադրբեջանի հետ սկանդալի անխուսափելիությունը, որով փաստորեն կանխորոշել էր Քաղբյուրոյի դիրքորոշումը Հայաստանի հետ բանակցությունների հարցում: Գրության վերջին նախադասությունից նաև չի երևում, թե Չիչերինը պաշտպանում էր Լեզրանի առաջարկը, ինչպես դա ներկայացնում է Գ. Գալոյանը³: Ուշագրավ է, որ հաջորդ օրը՝ սեպտեմբերի 29-ին, Քաղբյուրոյի նիստում Հայաստանի հետ բանակցությունների և Ջանգեղուրն ու Նախիջևանը նրան հանձնելու նպատակահարմարու-

թյան հարցը քննարկելիս Չիչերինին համարել են ոչ թե Լեզրանի, այլ էլիավայի և Կիրովի կարծիքի կողմնակից: Նիստի արձանագրությունում մեջ ասված է.

«Լսեցին. – Հայաստանի հետ բանակցությունների վերաբերյալ ընկ. Չիչերինի, էլիավայի և Կիրովի առաջարկությունը:

Որոշեցին – Հավանություն տալ ընկ. Չիչերինի, էլիավայի և Կիրովի առաջարկությունը»¹:

Այսքանը միայն, ոչինչ չի ասված, թե ինչպես է ընթացել քննարկումը, և ինչ էր ասված քննարկվող առաջարկության մեջ: Սակայն այդ նույն նիստում կայացրած մեկ այլ որոշում լրացնում է այդ բացը:

Ահա այն.

«ա) Անհրաժեշտ համարել 11-րդ բանակի համալրումը և ուժեղացումը:

բ) Քեմալականներին փաստական օգնություն ցույց տալ փողով և զենքով:

գ) Հաստատել Ադրբեջանի հետ պայմանագիրը»²:

Կարծում ենք, ընթերցողն էլ կհամաձայնի, որ խաղաղ ճանապարհով հարցի լուծման կողմնակից պետությունը սկսված պատերազմի պայմաններում ագրեսորին «փողով և զենքով» օգնելու որոշում չէր ընդունի: Ուրեմն անհիմն են մեր այն պատմաբանների պնդումները, ովքեր փորձում են համոզել, թե Սորհրդային Ռուսաստանը դեմ է եղել քեմալական Թուրքիայի սեպտեմբերյան արշավանքին և ամեն միջոց գործադրել է այն կանգնեցնելու համար: Ճշմարտությունն այն է, որ Ռուսաստանի կառավարությունն ընդհուպ մինչև նոյեմբեր թուրքական արշավանքը կանգնեցնելու ուղղությամբ վճռական քայլեր չձեռնարկեց:

* * *

Ռազմական գործողություններն ընթանում էին հիմնականում երկու ճակատներում՝ Կարսի և Սուրմալուի: Իսկ Շարուրի ճակատում, որտեղ տեղաբաշխված էր զեն. Շելկովնիկովի (Շելկովնիկյան) չուրջ երեք հազարանոց զորաջոկատը, ակտիվ գործողություններ չձավալվեցին ո՛չ սեպտեմբերին և ո՛չ էլ հոկտեմբերին: Այստեղ նախկինի պես

¹ «ՀՀ-ն 1918-1920թթ.», փաստաթղթերի... ժողովածու, էջ 289:

² Նույն տեղում, էջ 290-291:

³ Տե՛ս Գ. Գալոյան, Հայաստանը և մեծ տերությունները 1917-1923, Եր., 1999, էջ 295-296:

¹ «ՀՀ-ն 1918-1920թթ.», փաստաթղթերի... ժողովածու, էջ 291:

² Նույն տեղում, էջ 292:

սահմանային մանր ընդհարումներ էին տեղի ունենում: Պատճառը, կարծում ենք, միայն այն չէր, որ թուրքական հրամանատարությունն իր ուժերի մեծագույն մասը կենտրոնացրել էր Կարսի ճակատում և ձգտում էր օր առաջ գրավել անառիկ ամրոցի համբավ ունեցող Կարսը, որով և կվճռվեր պատերազմի ելքը: Այլ հավանաբար նաև այն, որ Նախիջևանում գտնվող թուրքական զորամասը, թվապես զիջելով հայկական ուժերին, չէր համարձակվում հարձակողական գործողություններ սկսել: Բայց նաև անգործություն չէին մատնվել: Մասնավորապես, օգտվելով Նախիջևանի ոռոսական հրամանատարության թույլտվությունից, սեպտեմբերի վերջին օրերին գավթել էին օգոստոսի 10-համաձայնագրով Հայաստանին տրված Շահթախթի-Ջուլֆա երկաթուղին ամբողջ երկարությամբ: Տարօրինակն ու զարմանալի սակայն այն չէ, որ Հայաստանի դեմ պատերազմի մեջ գտնվող թուրքերը գրավել են երկաթուղին, այլ այն, որ դա արել են մի տարածքում, որն այդ նույն համաձայնագրով հանձնված էր ոռոսական օկուպացիայի: Իսկ դա նշանակում է, որ Ռուսաստանը պատասխանատու էր այն ամենի համար, ինչ կատարվում էր իր հսկողությունը հանձնված տարածքում: Առավել ևս, որ ոռոսական զորքերի Նախիջևան մտնելուց հետո այնտեղ կազմավորված հեղկոմը հայտարարել էր, թե երկրամասում հաստատվում է խորհրդային իշխանություն: Եվ եթե թուրքական զորամասը Նախիջևանի տարածքում ազատորեն գործելու հնարավորություն էր ստացել, ուրեմն դա կատարվել է առնվազն Նախիջևանի ոռոսական հրամանատարության համաձայնությամբ, եթե չասենք թելադրանքով: Մինչդեռ Չիչերինը սեպտեմբերի 27-ի հեռագրում, որն ի դեպ, կրկնել է սեպտեմբերի 29-ին, կատարվածը հետևյալ կերպ է մեկնաբանել. «Շահթախթի-Ջուլֆա երկաթուղին թուրք ապստամբների ձեռքին է: Մենք այն չենք գրավելու, մեր գործը չէ յուրացնել այն հայերի համար: Պայմանագիրը մեզնից չի պահանջում պատերազմ թուրքերի հետ: Քանի որ երկաթուղին մենք չենք գրավում, մենք լվանում ենք մեր ձեռքերը: ...Վիճելի մարզերը առայժմ պետք է մնան մեր ռազմակալման տակ՝ առանց այս կամ մյուս երկրին հանձնելու»¹: Բ. Լեգրանը Չիչերինի այս կարծիքին անդրադարձել է հոկտեմբերի 8-ի նամակում: Իսկ մինչ այդ նա այդ հարցը քննարկել է նաև Օրջոնիկիձեի հետ սեպտեմբերի 30-ի հեռախոսային խոսակցություն ժամանակ: Պատասխանելով վերջինիս այն բացատրությունը, որ

Շահթախթի-Ջուլֆա երկաթուղագծի շահագործումը Հայաստանին հանձնել հնարավոր չէ այնտեղ թուրքական զորաջոկատների ներկայություն պատճառով, Լեգրանն ասել էր. «Ձեր մտավախությունն ինձ անհասկանալի է: Եթե թուրքերը խանգարում են, նրանց պետք է առաջարկել հեռանալ Նախիջևանի գավառից»¹ (ընդգծումը մերն է - է. Ջ.):

Չիչերինին ուղարկած նամակում ևս Լեգրանը վճռականորեն դեմ է արտահայտվում օգոստոսի 10-ի համաձայնագրի 5-րդ կետի չկատարումը Շահթախթի-Ջուլֆա երկաթուղագիծը թուրքերի կողմից գրավված լինելու փաստով պատճառաբանելու պաշտոնական վարկածին: Վկայակոչելով Նախիջևանի գրավման մասին գլխավոր հրամանատարության ղրբեկտիվները և այն իրողությունը, որ Նախիջևանում գտնվող թուրքական զորաջոկատները փաստորեն ենթարկված են Կարմիր բանակի հրամանատարությանը, Լեգրանը տարօրինակ է համարում նման պատճառաբանությունը և հատուկ ընդգծում. «Նախիջևանի գավառը, որի կազմում է գտնվում նաև Ջուլֆան, գրավելու իրավունքը հայերի հետ համաձայնագրով տրված էր, հասկանալի է, ոչ թե թուրքերին, այլ մեզ»²: Բոլոր այդ շինծու պատճառաբանությունների հետևում Լեգրանը տեսնում է Ադրբեջանը: «Իմ կարծիքն այն է, - գրում է Լեգրանը, - որ այդ տեղամասի շահագործմանը հայերին թույլ տալու դեմ ադրբեջանցիների առարկության միակ հիմքը, ըստ էության, վախն է, որ դրանով կարող է կանխորոշվել Նախիջևանի պատկանելիությունը հայերին: Ես գրել եմ Ձեզ, որ արդյունքը ինձ բնական է թվում, ավելի շուտ ցանկալի, քան վտանգավոր»³:

Այսպիսին էր Լեգրանի դիրքորոշումը ինչպես Նախիջևանի երկրամասի պատկանելիության, այնպես էլ Շահթախթի-Ջուլֆա երկաթուղու շահագործման խնդրում: Ինչպես տեսնում ենք, հատկապես վերջին հարցում նրա և Չիչերինի մոտեցումները խիստ տարբեր են: Չիչերինը ճիշտ է միայն մի բանում, իսկապես օգոստոսի 10-ի համաձայնագրով Ռուսաստանը չի պարտավորվել պատերազմել թուրքերի դեմ ի պաշտպանություն Հայաստանի: Բայց չէ՞ որ համաձայնագրում նաև չէր ասված, թե Ռուսաստանը, օկուպացնելով Նախիջևանը, պարտավորություն չունի պաշտպանելու նրա տարածքով անցնող, բայց չա-

¹ Геноцид армян... т. 2, ч. I, М. 2003., стр. 176-177.

¹ Նույն տեղում, էջ 272:

² Նույն տեղում, էջ 183:

³ Նույն տեղում, էջ 183-184:

Հագործման իրավունքը Հայաստանին Հանձնած երկաթուղին օտար նվաճողներին: Համաձայնագրում նաև չէր ասված, որ երկաթուղու տարածքը իր ամբողջ երկարությամբ չեզոք գոտի է: Եվ մի՞թե Ռուսաստանի կառավարությունը նույն կերպ «ձեռքերը կլվանար», եթե երկաթուղին գրավեին ոչ թե թուրքերը, այլ, ասենք պարսիկները: Համոզված ենք, որ ո՛չ, նա անմիջապես գեներլ կղիմեր՝ առանց վայրկյան անգամ հապաղելու: Մնում է գուշակել, թե ինչո՞ւ էր Չիչերինն իր դիվանագիտական ներկայացուցչից փորձում թաքցնել իսկությունը, ինչը, ի դեպ, չի արել նրա տեղակալ Լևոն Կարախանը: Վերջինս, Մոսկվայում Հայաստանի Հանրապետության լիազոր ներկայացուցիչ Եղիազար Եղիազարյանի հետ զրույցի ժամանակ անդրադառնալով Շահթախթի-Նախիջևան երկաթուղու՝ թուրքերի կողմից գրավելու փաստին, անկեղծորեն ասել էր, որ այդ «երկաթուղին խիստ անհրաժեշտ է Ռուսաստանի համար՝ Անտանտի դեմ Մուստաֆա Քեմալին օգնելու գործում»¹:

Ավելի արժեքավոր վկայություն այն բանի, որ երկաթուղու գրավումը ռուս-թուրքական գործակցության արդյունք էր, հազիվ թե փնտրելու հարկ կա. երկաթուղին անհրաժեշտ էր Ռուսաստանին, բայց նա կաշկանդված էր օգոստոսի 10-ի համաձայնագրով: Ուրիշ ու՞մ միջոցով կարելի է ձեռք գցել այն, եթե ոչ թուրքերի: Ինչ վերաբերում է Անտանտի դեմ պայքարում Մուստաֆա Քեմալին օգնելուն, ապա այդ չրջանում նա պատերազմում էր ոչ Անտանտի և ոչ էլ Հունաստանի դեմ (Հունական ճակատում 1920թ. ամռանից մինչև 1921թ. սկիզբը ռազմական գործողություններ չմղվեցին), այլ Հայաստանի: Հետևապես Քեմալին տրված օգնությունն անտարակույս ուղղվելու էր Հայաստանի դեմ: Կարախանը չէր կարող դա չհասկանալ:

Ոստելով Շահթախթի-Նախիջևան երկաթուղու գրավման մասին՝ իրավամբ հարց է ծագում, թե ինչո՞ւ Հայաստանի կառավարությունն անմիջապես չի բողոքել Ռուսաստանի կողմից օգոստոսի 10-ի համաձայնագրի այդ ակնհայտ խախտման դեմ և երկաթուղու նկատմամբ իր իրավունքները վերականգնելու պահանջ չի դրել: Ո՛չ արխիվներում, ո՛չ մամուլում և ո՛չ էլ ժամանակակիցների հուշերում չենք հանդիպել նման փաստի:

Հոկտեմբերի 4-ին Համո Օհանջանյանը Ադրբեջանի իր դիվանագիտական ներկայացուցիչ Մարտիրոս Հարությունյանից տեղեկու-

թյուն է ստանում, որ Նախիջևանում գտնվող թուրքական զորամասը համալրելու նպատակով Բաքվում նախկին թուրք ռազմագերիներից զորամաս են կազմավորում: «Հավաստի աղբյուրներից կարող ենք հաղորդել Ձեզ, – ասված էր այդ գեկույցում, – որ Ադրբեջանի սովետական իշխանությունը, տաճիկ ներկայացուցիչների անմիջական մասնակցությամբ ու գործակցությամբ, Սիբիրից վերադարձող բոլոր տաճիկ գերիներին կազմակերպում ու զինում են այստեղ: Արդեն զուտ տաճիկ գերիներից այստեղ մի գունդ է կազմված՝ մոտավորապես 300 հոգուց բաղկացած ու ամեն օր զինավարժություն են անում, շարունակելով նորանոր խմբերի կազմակերպությունը: Ինչպես տեղեկացանք, կազմակերպվող տաճիկ զորամասերը մտադրություն ունեն Ջանգեզուրի վրայով Նախիջևան ուղարկելու, որպեսզի տեղական զարնիզուր ուժեղացնելով, որոշ գործողություններ ձեռնարկեն Հայաստանի դեմ և միանան Տաճկաստանում գործող զորամասերի հետ...»¹ (ընդգծումը մերն է – է. Ջ.): Ինչպես տեսնում ենք, այս տեղեկությունը կառավարությանը հուշում էր, որ չուտով Նախիջևանի ճակատը լուրջ նշանակություն էր ստանալու: Սակայն վեց օր հետո միայն կառավարությունն անդրադարձավ այս խնդրին և մի ընդարձակ բողոքի նոտա հղեց Չիչերինին, որում վկայակոչում էր Թիֆլիսում կնքված համաձայնագիրը, ըստ որի՝ Հայաստանի և Ադրբեջանի միջև վիճելի տարածքները ճանաչվել են չեզոք և ենթակա ժամանակավոր օկուպացիայի ռուսական զորքերի կողմից՝ որպես չեզոք ուժի, մինչև հարցի վերջնական լուծումը: «Ինքը՝ չեզոքություն հասկացությունը, – ասված է նոտայում, – բնականաբար Ոորհրդային իշխանության վրա պարտավորություն է դրել խստորեն հետևել, որ այդ չեզոքությունը չխախտվի ո՛չ Հայաստանի Հանրապետությունը թշնամի ուժերի անցումով նշված շրջանները, ո՛չ առավել ևս իրենց՝ խորհրդային զորքերի գործողություններով: Մինչդեռ ռուսաստանյան խորհրդային զորքերով նշված շրջանների օկուպացման սկզբից ևեթ ադրբեջանական զորքերը և թուրք-թաթարական բանդաները լայնորեն մուտք գործեցին ինչպես Ղարաբաղի, այնպես էլ Ջանգեզուրի և Նախիջևանի սահմաններ: Միաժամանակ այդպիսի հնարավորություն տրվեց թուրքական ազգային ուժերին և նրանց գործիչներին՝ Ուայլ-փաշայի գլխավորությամբ»²:

Հեռագրում խոսվում է նաև այն մասին, որ Ջանգեզուրում թուրք

¹ Գ. Գալոյան, նշվ. աշխ. էջ 299:

¹ ՀԱԱ, ֆ. 200, ց. 1, գ. 571, թ. 21:

² Նույն տեղում, գ. 581, թ. 332:

ասկյարները բնաջնջման սպառնալիքի տակ հայ գյուղացիներին հարկադրում են ստորագրություններ տալ Ադրբեջանի իշխանության տակ անցնելու իրենց ցանկության մասին, թվարկվում են այն գյուղերի անունները (մեկ տասնյակից ավելի), որոնցում ջարդեր են կազմակերպվել՝ նրանց այդ պահանջը մերժելու համար: Փաստելով նաև այն իրողությունը, որ հայ երիտասարդներին հարկադրական գորակոչի են ենթարկում, արտգործնախարար Համո Օհանջանյանը հետևություն է անում, թե Հայաստանի Հանրապետության կառավարությունը չի կարող չբողոքել խորհրդային իշխանությունների կողմից օգոստոսի 10-ի համաձայնագրով ստանձնած պարտավորությունների այդօրինակ խախտումների դեմ և կոչ անում «անհապաղ կարգադրություն անել... նշված շրջաններից հեռացնելու Հայաստանի Հանրապետությանը թշնամի ջոկատներին և Ուալիլ-փաշայի գլխավորած թուրքական և ադրբեջանական ազգային գործիչներին»¹:

Նախորդ շարադրանքում արդեն արձանագրել ենք այն իրողությունը, որ սեպտեմբերին, երբ արդեն ուրվագծվում էր Թուրք-Հայկական պատերազմը, Մոսկվան կորցրեց Հայաստանի նկատմամբ հետաքրքրությունը, այլևս նախկինի պես չէր պնդում հաշտության պայմանագրի կնքման ու դեպի Թուրքիա տրանզիտի իրավունք ստանալու վրա և նաև որոշել էր անորոշ ժամանակով հետաձգել հայ-ադրբեջանական տարածքային վեճերի լուծումը: Այդ է պատճառը, որ մերժում էր Երևան գնալու և Հայաստանի կառավարության հետ բանակցություններ սկսելու վերաբերյալ Լեզրանի բոլոր առաջարկությունները: Արևիվային փաստաթղթերը աներկբա վկայում են, որ հոկտեմբերին Մոսկվան դեռևս չէր հրաժարվել իր այդ դիրքորոշումից: Լեզրանի և Չիչերինի միջև հեռագրերի փոխանակությունը, որ տեղի ունեցավ հոկտեմբերի առաջին օրերի ընթացքում, և որոնք մենք այստեղ չենք մեջբերում մեր բուն խնդրից շատ հեռացած չլինելու նկատառումով, ցույց է տալիս, որ հիմա արդեն Մոսկվային ավելի շատ հետաքրքրում էր Հայաստանի խորհրդայնացման խնդիրը²: Նույնիսկ այն բանից հետո, երբ Լեզրանի համառ պնդումների արդյունքում Մոսկվան տեղի տվեց, և հոկտեմբերի 9-ին Չիչերինը հեռագրեց նրան, թե կարող է բանակցություններ սկսել Երևանում, Հայաստանի խորհրդայնացումը օրակարգից չհանվեց: Չսպասելով Երևանում դեռ

նոր ծայր առած (հոկտեմբերի 13-ին) բանակցությունների ավարտին՝ հոկտեմբերի 14-ին Մոսկվայում ՌԿ(Բ)Կ Կենտկոմի Քաղբյուրոն Չիչերինի առաջարկությամբ քննարկեց և հավանություն տվեց «Հայաստանում խորհրդային իշխանության հաստատման համար վճռական գործողությունների անհրաժեշտություն» վերաբերյալ ՌԿ(Բ)Կ Կենտկոմի կովկասյան բյուրոյի և Հայաստանի կոմկուսի կենտկոմի առաջարկությունը¹: Ճիշտ է, որոշման մեջ խոսվում էր նաև «նոր, խորհրդային կառավարությանն օժանդակելու» և «թուրքերի հետագա առաջխաղացումը կանգնեցնելու համար նրան քաղաքական օգնություն ցույց տալու» մասին, սակայն այդ ամենը մնաց թղթի վրա. Մոսկվան զերադասեց սպասել մինչև պատերազմում Հայաստանի վերջնական պարտությունը և ընդհուպ մինչև նոյեմբերի վերջը Հայաստանը խորհրդայնացնելու ուղղությամբ վճռական քայլեր չձեռնարկեց: Սակայն տվյալ դեպքում մեզ հետաքրքրող ոչ թե դա է (վերջին հաշվով Մոսկվան կարող էր իր կայացրած որոշումից հրաժարվել կամ ուղղակի չիրականացնել), այլ այն քաղաքական վարքագիծը, որը չի կարելի այլ կերպ բնութագրել, քան անբարոյական: Պայմանագիր կնքելու նպատակով բանակցություններ է սկսում ու միաժամանակ այդ նույն կառավարությունը տապալելու որոշում կայացնում: Առավել ևս, որ Լեզրանը հիմնավոր փաստարկներով մերժել էր ստեղծված պայմաններում Հայաստանի խորհրդայնացման հնարավորությունն ու նպատակահարմարությունը և Չիչերինին ուղարկած հոկտեմբերի 7-ի և 8-ի հեռագրերում պայմանագրի ստորագրման ու ռազմական գործողությունները դադարեցնելու վերաբերյալ թուրքերին ներկայացվելիք պահանջի համար առաջ էր քաշել երեք հիմնական պայման, այն է՝ Հայաստանը պետք է պաշտոնական հայտարարություն անի Թուրքա-Հայաստանը ռազմական ուժով գրավելու մտադրությունից հրաժարվելու մասին, ընդունի Ռուսաստանի միջնորդությունը Թուրքիայի հետ սահմանագծման հարցում, Հայաստանի երկաթուղիներով Ռուսաստանին ռազմական տրանզիտի իրավունք վերապահի²:

Ինչպես արդեն նշեցինք, հայ-ռուսական երևանյան բանակցությունները սկսվեցին հոկտեմբերի 13-ին և շարունակեցին մինչև նույն ամսվա 28-ը: Հայաստանը բանակցություններում ներկայացնում էին 1920թ. ամռանը Մոսկվայում բանակցություններ վարած նույն պատվիրակները՝ Լ. Շանթը, Հ. Տերտերյանը և Լ. Զարաֆյանը (քարտուղար

¹ Նույն տեղում:
² Տե՛ս է. Ա. Զոհրաբյան, նշվ. աշխ. էջ 219-221:

¹ Տե՛ս Վ. Ի. Լենին, ԵԼԺ, հ. 54, էջ 858-859:
² Տե՛ս ПГАСПИ, ф. 85, оп. 14, д. 17, л. 3.

Յակուլով), իսկ Ռուսաստանը՝ Բ. Լեգրանը, Ս. Տեր-Փարրիեյանը, Օ. Սիլինը և Ա. Բորրիչչևը (քարտուղար՝ Շիֆֆերս): Բանակցությունների ընթացքի վրա մենք չենք ծանրանա, քանի որ դրանք մանրամասն վերլուծված են Թուրք-Հայկական պատերազմին նվիրված մեր աշխատությունում¹: Միայն նշենք, որ այդ բանակցությունների մասին շատ քիչ նյութ է պահպանվել թե՛ արխիվներում և թե՛ ժամանակակիցների հուշերում: Զարմանալի է, որ Շանթի պատվիրակության անդամ Համբարձում Տերտերյանը, իր հուշերում բավականաչափ տեղ հատկացնելով մոսկովյան բանակցություններին, երևանյան բանակցությունների մասին մանրամասներ չի հաղորդում: Օրինակ, Լեգրանի՝ Մոսկվա ուղարկած հեռագրերից ու զեկույցներից մեզ հայտնի է, որ վիճարանություններ հարուցող հարցերից մեկն էլ Ադրբեջանի հետ վիճելի տարածքների հարցն էր: Բայց ինչպե՞ս էր այն ընթացել, կողմերի դիրքորոշումը ի՞նչ փոփոխությունների է ենթարկվել բանակցությունների ընթացքում, մնում է անհայտ: Ֆինանսների նախարարության աշխատակից Մարտին Շաթրյանը, որը հավանաբար փորձագետի կարգավիճակով մասնակցել է բանակցություններին, Աբրահամ Գյուլյանի հասցեագրած նամակում Ադրբեջանի հետ վիճելի տարածքների հարցի կապակցությամբ գրում է, թե «երկար վիճելուց հետո հարցրեց (Լեգրանը - է. Ջ.), եթե այս ռոպելիս մենք տանք ձեզ Նախիջևանն ու Զանգեզուրը, կհրաժարվե՞ք Ղարաբաղից հօգուտ Ադրբեջանի»² (ընդգծումը մերն է - է. Ջ.): Բայց ոչինչ չի ասում վիճող կողմերի փաստարկների ու նաև այն մասին, թե հայ պատվիրակները ինչ պատասխան են տվել Լեգրանի հարցին: Չեն պահանջվել նաև սղագրությունները, հավանաբար այդպիսիք չեն էլ կազմվել:

Ըստ Մարտին Շաթրյանի՝ Լեգրանն ընդհանրապես բայրացակամորեն էր տրամադրված և բոլոր հարցերում ձգտում էր համաձայնություն գալ: Համբարձում Տերտերյանը նմանապես նույն կարծիքն է հայտնում:

Հասկանալի է, որ Լեգրանին առավելապես հետաքրքրողը դեպի Թուրքիա տրանզիտի իրավունք ստանալու հարցն էր: Հայկական կողմն էլ, համաձայնելով դրան, առաջ էր քաշում քեմալական զորքերը մինչև Երզնկա հետ քաշելու, Ղարաբաղը վիճելի ճանաչելու և Զանգեզուրն ու Նախիջևանը Հայաստանին հանձնելու պահանջ (պահանջ-

վում էր նաև ճանաչել Հայաստանի Հանրապետության անկախությունը, տրանզիտով Թուրքիա տարվող զենքի ու զինամթերքի կեսը թողնել Հայաստանին, օգնություն ցույց տալ Հինգ միլիոն ոսկի ուսուլու չափով, Հայաստանը ազատել Ռուսաստանի արտաքին պարտքի վճարմանը մասնակցելու պարտականությունից և այլն):

Մինչև Երզնկա թուրքական զորքերի հետքաշումը համարելով անիրական՝ Լեգրանն առաջարկում էր համաձայնել մինչև 1914թ. սահմանը հետ քաշելու հետ: Իսկ Ադրբեջանի հետ վիճելի տարածքների խնդրի լուծման հարցում՝ կաշկանդված լինելով Մոսկվայում կայացրած որոշումով, համոզում էր հայերին կտրուկ պահանջ չդնել, այլ համաձայնել ռուսական ժամանակավոր օկուպացիային՝ մինչև Ռուսաստանի ներկայացուցչի մասնակցությամբ այդ խնդրի վերջնական լուծումը՝ առաջիկայում գումարվելիք Հայ-ադրբեջանական կոնֆերանսում: Դա նրա համոզմունքը չէր, բայց նա այլ բան առաջարկել չէր կարող, թեև անձամբ Զանգեզուրը և Նախիջևանը Հայաստանին հանձնելու կողմնակից էր: Հենց բանակցությունների այդ նույն օրերին Ջիզերինի մի հեռագրից տեղեկացել էր, որ իր կառավարությունը կրկին վիճելի տարածքների հարցի լուծումը հետաձգելու որոշում է կայացրել: Հեռագրում ասված էր, որ Ղարաբաղը, Զանգեզուրը և Նախիջևանը Հայաստանին հանձնելու Սահակ Տեր-Փարրիեյանի առաջարկությունը Բաքվում ողբերգություն է առաջացրել, թե այնտեղ «տիրում է այնպիսի տրամադրություն, որ հարցի նման լուծումը կարող է հանգեցնել որևէ աղետի», և երկար ու տանջալից քննարկումներից հետո իրենք հանգել են եզրակացության, որ ներկայումս «հնարավորություն չկա վիճելի վայրերը Հայաստանին տալու և ընդհանրապես դրանց մասին հարցը պետք է դեռևս բաց մնա»¹:

Հոկտեմբերի 24-ին Ջիզերինին ուղարկած զեկույցում Լեգրանը հայտնում է, որ հայկական պատվիրակությունը հիմնականում արդեն համաձայնել է Ռուսաստանին դեպի Թուրքիա ուղղման տրանզիտի իրավունք տալ, համաձայնել է նաև Ղարաբաղը թողնել Ադրբեջանին, բայց պահանջում է անհապաղ Զանգեզուրը և Նախիջևանը ճանաչել Հայաստանի անբաժանելի մաս: Ինչ խոսք, որ նա պարտավոր էր կատարել իր կառավարության հրահանգը և պնդել խնդրի լուծումը հետաձգելու անհրաժեշտության վրա, ինչը և փորձում էր անել: Բայց որ նա հակված էր բավարարելու հայերի պահանջը ու նաև փորձում էր

¹ Տես է. Ա. Զոհրաբյան, նշվ. աշխ., էջ 221-234:

² Նույն տեղում, էջ 229:

¹ Գ. Գալոյան, նշվ. աշխ., էջ 316:

ինչ-որ ձևով ազդել Մոսկվայի դիրքորոշման վրա, դա ակնառու երևում է այդ նույն օրը կազմված մեկ այլ զեկուլցից, որում խոսելով այն մասին, որ իր բանակցությունները առաջ են բերել Անտանտի լարված ուշադրությունը, որ կրկին Երևան է եկել անգլիական կոմիսար Ստոքսը և անդրկովկասյան կոնֆեդերացիայի ստեղծման առաջարկ արել ու օգնության խոստումներ տվել, Լեզրանը վերջում հատուկ ընդգծում է. «...հայերը Անգլիայի հետ համաձայնությունից ձեռնպահ են մնում, քանի որ անգլիացիները հրաժարվում են այդ վիճելի մարզերը ճանաչել Հայաստանին, նրանք գերադասում են դրանք զիջել մուսավաթականներին: Հայերը Նորհրդային Ռուսաստանի հետ այդ մարզերի հարցի ավելի բարենպաստ լուծման հույս ունեն»¹ (ընդգծումը մերն է - է. Զ.): Կարծում ենք, որ այս տողերը պատահաբար չեն հայտնվել Մոսկվա ուղարկած զեկուլցում:

Բանակցություններն ավարտվեցին հոկտեմբերի 28-ին: Կազմվել էր ՌՆՖՍՀ և Հայաստանի Հանրապետության միջև հաշտության պայմանագրի նախագիծ՝ բաղկացած 17 հոդվածներից, որի ստորագրումը, սակայն, հետաձգվում էր մինչև երկու պատվիրակությունների համաձայնությամբ ընդունված և այդ նույն օրը ստորագրած «Եզրափակիչ որոշման արձանագրության» մեջ արտացոլված նախնական պայմանների կատարումը:

Պայմանագրի նախագծում տեղ գտած հոդվածները բավականին նպաստավոր էին Հայաստանի համար: Ռուսաստանը ճանաչում էր Հայաստանի Հանրապետության անկախությունը, արդարացի համարում Թուրքա-Հայաստանի մարզերի կամ նրանց որոշ մասերի միացումը Հայաստանի Հանրապետությանը, պարտավորվում վերադարձնել Առաջին աշխարհամարտի տարիներին Հայաստանից տարած եկեղեցական գույքը, տրամադրել նավթ և նավթամթերք՝ նրա տարեկան պահանջի չափով, ինչպես նաև վագոններ, բամբակի վերամշակման սարքավորումներ և այլն: Ինչ վերաբերում է մեզ հետաքրքրող խնդրին, ապա այն իր արտացոլումն էր գտել նախագծի 3-րդ և 4-րդ հոդվածներում: 3-րդում խոսվում է Հայաստանի և Ադրբեյջանի միջև պետական սահմանի մասին և չեղարկում, որ այն պետք է որոշվի պայմանագրի ստորագրումից հետո անհապաղ գումարված հայ-ադրբեյջանական կոնֆերանսում՝ Ռուսաստանի ներկայացուցչի մասնակցությամբ: Համաձայնություն չկայանալու դեպքում՝ հարցը լուծվելու է

Հանրաքվեով: Իսկ 4-րդ հոդվածում ուղղակի ասված էր. «Ռուսաստանը անպայման Հայաստանի պետության կազմի մեջ մտած է ճանաչում նախկին Ռուսաստանյան կայսրության ներքոհիշյալ նահանգները և մարզերը. Երևանի և Կարսի՝ իրենց կազմի բոլոր գավառներով և օկրուգներով, բացառությամբ Նախիջևանի գավառի, ինչպես նաև Ելիզավետպոլի նահանգի Ղազախի գավառի հարավային մասը՝ Քարվանսարա և Դիլիջան քաղաքներով:

Հայաստանի և Ադրբեյջանի միջև վիճելի մարզերի, այսպես կոչված Ղարաբաղի, Զանգեզուրի և Նախիջևանի գավառների պետական պատկանելիության հարցը՝ անմիջական համաձայնության բացակայության դեպքում, որոշվում է Հանրաքվեով»¹:

Այսպես էր պայմանագրի նախագծում, մինչդեռ «Եզրափակիչ որոշման արձանագրության մեջ» այդ խնդիրը մի քիչ այլ կերպ է ներկայացված, ահա այն.

«ՌՆՖՍՀ կառավարությունը՝ մի կողմից, և Հայաստանի Հանրապետության կառավարությունը՝ մյուս, իրենց վրա պարտավորություն են վերցնում ստորագրել սույն արձանագրությանը կից հաշտության պայմանագրի նախագիծը, նրան վերաբերող բոլոր լրացումներով, պայմանով.

1. Որ ՌՆՖՍՀ կառավարությունը և ԱՆՍՀ կառավարությունը ճանաչում են Հայաստանի Հանրապետության անքակտելի իրավունքները վիճելի մարզերի տարածքների՝ Նախիջևանի և Զանգեզուրի գավառների վրա, և այդ գավառների սահմաններից դուրս են բերում ՌՆՖՍՀ և ԱՆՍՀ հրամանատարության ենթակայության տակ գտնվող զորամասերը:

Որ Հայաստանի Հանրապետության կառավարությունը՝ մի կողմից, անվերապահորեն հրաժարվում է այսպես կոչված Ղարաբաղի մարզի նկատմամբ ամեն մի հավակնությունից՝ բացառությամբ այն անկյան, որ առաջանում է Նոր Բայազետի գավառի արևելյան սահմանով և Շարուր-Դարայլազյազի արևելյան սահմանի մի մասով, Զանգեզուրի գավառի Հյուսիսային սահմանի հետ՝ Գինալդաղ և Զիչակլի լեռների պայմանական գծով:

Որ ՌՆՖՍՀ-ը՝ ուշադրության առնելով Հայաստանի աշխատավոր բնակչության աղետալի դրությունը, անվերադարձ վարկ է տալիս երկուս և կես միլիոն ռուբլի ոսկով»²:

¹ РГАСПИ, ф. 64, оп. 1, д. 21, л. 189.

¹ ՀԱԱ, ֆ. 200, ց. 1, գ. 12, թ. 30:

² Նույն տեղում, ֆ. 4/114, ց. 2, գ. 132, թ. 2:

Պայմանագրի նախագիծն ուներ նաև երկու լրացումներ (Հայաստանի վրայով տրանզիտի իրականացման պայմանների, փոստ-հեռագրի օգտագործման և այլ հարակից հարցերի մասին), որոնցում եզրափակիչ արձանագրության Հայ-ադրբեջանական տարածքային խնդրին վերաբերող մասը նույնությամբ կրկնվում էր:

«Եզրափակիչ որոշման արձանագրության» երկրորդ մասը վերաբերում էր Հայ-թուրքական հարաբերություններին: Այնտեղ ասված էր, որ Հայաստանի Հանրապետությունը պատրաստ է ընդունելու ՌՆՖՍՀ կառավարության բարեկամական աջակցությունը թուրքիայի ազգային մեծ ժողովի կառավարության հետ տարածքային հարցերի լուծման հարցում այն բանից հետո, երբ վերջինս իր գործերը հետ կքաշի մինչև 1914թ. սահմանը, կհրաժարվի Բրեստ-Լիտովսկի պայմանագրից և Բաթումի կոնվենցիայից, կձանաչի Հայաստանի Հանրապետության անկախությունն այն սահմաններում, որ կորոշվեն ՌՆՖՍՀ և Հայաստանի Հանրապետության միջև կնքված պայմանագրով:

Կարծում ենք, ընթերցողն էլ կընդունի, որ Ադրբեջանի հետ վիճելի համարվող տարածքների խնդրում «Եզրափակիչ որոշման արձանագրության» մեջ տեղ գտած և Լեզրանի հավանությանն արժանացած նախնական պայմանները, անշուշտ, Մոսկվայի և Բաքվի համաձայնության դեպքում մի առաջընթաց քայլ կլինեին հարցի շատ թե քիչ Հայաստանում լուծման գործում: Դա ակնհայտ է, քանզի բոլոր վիճելի տարածքներում պայմանագրի նախագծով նախատեսվող հանրաքվեի արդյունքները խորհրդային գործերի (ոուսական և ադրբեջանական) ներկայության պայմաններում հազիվ թե Հայաստանի օգտին լինեին: Մինչդեռ «Եզրափակիչ որոշման արձանագրությունը» փաստորեն Նախիջևանը և Ջանգեզուրը տալիս է Հայաստանին, քանի որ ճանաչում է վերջինիս անքակտելի իրավունքը այդ գավառների վրա և պարտավորեցնում խորհրդային գործերը դուրս բերել այդ օկուպացված շրջաններից: Ճիշտ է, փոխարենը Հայաստանը հրաժարվում էր Ղարաբաղի նկատմամբ հավակնությունից, բայց ստեղծված պայմաններում երևի դա չարիքների փոքրագույնն էր: Ուշագրավ է, որ նրանում վիճելի տարածքների նկատմամբ Ադրբեջանի իրավունքների մասին որևէ հիշատակություն չկա, նույնիսկ Ղարաբաղի հարցում, որի նկատմամբ հավակնությունից Հայաստանը հրաժարվում էր հօգուտ Ադրբեջանի: Իսկ հավակնությունից հրաժարվել նշանակում է զիջել և ոչ թե իրավունք չունենալ:

Նախորդ շարադրանքում արդեն նշել ենք, որ Լեզրանն ընդհանրապես բայրացականորեն էր տրամադրված և քննարկված բոլոր հար-

ցերում աշխատում էր համաձայնության եզր գտնել: Այդ են վկայում Հ. Տերտերյանը, Մ. Շաթրյանը: Այդ մասին վկայություն կա նաև Թիֆլիս՝ Տ. Բեկզադյանին ուղարկած արտգործնախարարության հոկտեմբերի 29-ի հեռագրում «Երեկ երկու կողմից ստորագրվեցան արձանագրություններ, որոնց հիման վրա, ընդունելու դեպքում, Լեզրանի վերադառնալուց հետո պիտի ստորագրվի հաշտարար պայմանագիրը մեր և Սովետական Ռուսաստանի մեջ, - ասված է նրանում: - Ռուբենի առաջարկը՝ ընդունվեց Լեզրանի կողմից համարյա անփոփոխ, ПОДРОБОС-ТЯ ПОЧТОЙ»² (ընդգծումը մերն է - է. Ջ.): Հենց Լեզրանի նման վերաբերմունքով պետք է բացատրել «Եզրափակիչ որոշման արձանագրության» մեջ այնպիսի պայմանների առկայությունը, որոնց վերաբերյալ իր կառավարությունից նախնական համաձայնություն չէր ստացել, բայց ընդունել էր հայկական կողմի առաջարկները՝ հուսալով, որ հետագայում իրեն կհաջողվի համոզել Ջիչերինին համաձայնելու հարցի նման լուծման անհրաժեշտությանը: Դա հատկապես վերաբերում է Ադրբեջանի հետ վիճելի տարածքների խնդրին: Այստեղ, անկասկած, նա գործել էր ինքնուրույնաբար՝ առանց նախնական պայմանավորվածությունների: Այդ է վկայում թեկուզ այն փաստը, որ հոկտեմբերի 29-ին, երբ Մոսկվայում դեռ տեղեկություններ չունեին բանակցությունների ավարտի մասին, Լեզրանին ուղարկած նամակ-հրահանգում Ջիչերինը դարձյալ խոսում է Ադրբեջանի հետ վիճելի տարածքների հարցի լուծումը հետաձգելու և դրանց օկուպացիան շարունակելու անհրաժեշտության մասին:

Լեզրանը ոգևորվել էր ձեռք բերած համաձայնությամբ և նույն օրը՝ հոկտեմբերի 28-ին, վարչապետ Համո Օհանջանյանին ներկայացրեց մի գրություն, որում հայտնում էր, որ ինքը շտապ մեկնելու է Բաքու՝ իր կառավարության հետ կապվելու և համապատասխան բացատրություններ տալու նպատակով, և որ իր բացակայության ժամանակամիջոցում Հայաստանում ՌՆՖՍՀ լիազոր ներկայացուցչի պարտականությունները ժամանակավորապես դնում է լիազոր ներկայացուցչության խորհրդական Օտտո Միլինի վրա: Նա նաև շտապ հեռագրեր ուղարկեց Ջիչերինին՝ պայմանագրի նախագծի և Եզրափակիչ որոշման արձանագրության բովանդակության մասին իր մեկնաբանություններով և դրանք անպայման ընդունելու վերաբերյալ անհրա-

¹ Ռուբեն Տեր-Մինասյանի մասին է խոսքը, որի առաջարկը, անտարակույս, վերաբերել է թուրքական գործերը Հայաստանից հետ քաշելուն:

² ՀԱԱ, ֆ. 276, ց. 1, գ.19, թ.34:

ժեշտ փաստարկներով: Լեզրանը գտնում էր, որ պայմանագիրը պետք է կնքել, նույնիսկ եթե Անկարան դեմ լինի, քանի որ այն Անտանտին կզրկի Հայաստանն իր նպատակների համար օգտագործելու հնարավորությունից, կամրապնդի Սարհրդային Ռուսաստանի ազդեցությունը Հարավային Կովկասում, կնպաստի Իրանում և Թուրքիայում ակտիվ քաղաքականության ծավալմանը, կձախողի հայ-վրացական հակախորհրդային դաշինքի ստեղծումը և այլն: Իսկ Ադրբեջանի հարցում խորհուրդ էր տալիս կայուն լինել և նրա ճնշմանը տեղի չտալ:

Սակայն Բաքու ժամանած Լեզրանը խորը հիասթափություն ապրեց. առաջին իսկ շփումները ցույց տվեցին, որ պայմանագիրը ընդունելի չէ ոչ միայն Ադրբեջանի ղեկավարության համար, ինչը անսպասելի չէր, այլև Քաղբյուրոյի անդամ Ի. Ստալինի, որը, ինչպես արդեն նշել ենք, Կովկասյան գործերը տնօրինելու լիազորություն ուներ: Նույնների 4-ին նրա մասնակցությամբ գումարվեց ՌԿ(բ)Կ Կենտկոմի Կովկասյան բյուրոյի և Ադրբեջանի կոմկուսի կենտկոմի Քաղբյուրոյի նիստ որտեղ լավեց Լեզրանի հաղորդումը Երևանում կազմված հաշտության պայմանագրի նախագծի և ստորագրած «Եզրափակիչ որոշման արձանագրության» մասին: Թե ինչու հարցի քննարկումը միացյալ նիստ փոխադրվեց և ում առաջարկությամբ, դժվար է ասել, բայց որ դա պատահական չէր, և դրանով իսկ կանխորոշվել էր ընդունվելիք որոշումը, ակնհայտ է: Փաստաթուղթը ներկայացնենք ամբողջությամբ.

«Լսեցին – Ընկ. Լեզրանի ղեկուցումը Հայաստանի դրություն մասին:

Որոշեցին – ա) Հայաստանին ներկայացված պայմանագրի մասին վերջնական որոշում չկայացնել՝ մինչև ՌԿԿ ԿԿ-ի հետ այդ հարցի վերաբերյալ բանակցելը, որի վարումը հանձնարարել ընկ. Ստալինին:

բ) Միաժամանակ հայտնել Քաղբյուրոյի կարծիքը, որ նախիջևանը և Ջանգեղուրը Հայաստանին հանձնելու մասին պայմանագրի առաջարկվող կետը օգտավետ չէ ոչ քաղաքական, ոչ ռազմավարական տեսակետից և կարող է ընդունելի լինել ծայրահեղ դեպքում:

գ) Անհրաժեշտ համարել ընկ. Լեզրանի մեկնումը Մոսկվա՝ Հայաստանի հետ կապված հարցը պարզելու համար:

դ) Նախիջևանի և Ջանգեղուրի մասին Քաղբյուրոյի կարծիքի հիմնավորումը հանձնարարել ընկ. Ն-ին...՝:

ե) Ընկ. Դովլաթովին Հայաստան չուղարկել¹:

Դատելով միացյալ նիստի արձանագրությունից հանված այս քաղվածքից՝ կարող է թվալ, թե պայմանագրի նախագծի մերժման միակ պատճառը Նախիջևանի և Ջանգեղուրի գավառների հարցն էր: Բայց իրո՞ք այդպես էր, իրո՞ք դա էր միակ պատճառը, թե՞ կային և այլ պատճառներ, որոնք ինչ-ինչ նպատակներով արձանագրության մեջ տեղ չեն գտել: Մեզ հայտնի արխիվային փաստաթղթերն այդ հարցին չեն պատասխանում (հնարավոր է, որ նիստի մասնակիցների ելույթները չեն սղագրվել), բացի մեկից: Դա նույնների 6-ին Երևան՝ Սիլինին ուղարկած Լեզրանի շտապ հաղորդագրությունն է, որը և լույս է սփռում այդ խնդրի վրա: Ելնելով փաստաթղթի կարևորությունից՝ նպատակահարմար ենք համարում այն ներկայացնել ամբողջությամբ. «Ստալինի մասնակցությամբ Բաքվի խորհրդակցությունում բացահայտվեց բացասական վերաբերմունք մեր պայմանագրի նկատմամբ. առաջին՝ թուրքերի հետ բարդությունների (առաջացման – է. Զ.) երկյուղից՝ մինչև 1914թ. սահմանը նրանց զորքերի հետքաչման առնչությամբ: Երկրորդ, վիճելի տարածքների պատճառով, որոնց տիրելը խիստ կարևոր են համարում Պարսկաստանում իրադարձությունների ընթացքի վրա ազդելու համար: Դրա հետ մեկտեղ գտնում են, որ փաստորեն մենք ոչինչ չենք կարող ձեռնարկել թուրքերի հարձակման առթիվ, թեև մեր վերաբերմունքը դրան նախկինի պես բացասական է: Զևականորեն թուրքիան մեզ հետ կապված չէ պայմանագրով և մենք նրան պահանջներ ներկայացնել չենք կարող: Ինչ վերաբերում է տրանզիտին, ներկա դրություն և Թուրքիայից ինֆորմացիայի բացակայության պայմաններում, այդ հարցը կորցնում է սրությունը: Բացի այդ, ենթադրում են, որ Հայաստանի հետ հաշտություն կնքելու դեպքում, թուրքերն իրենք առանց դժվարության տրանզիտ կկարողանան ստանալ, մինչդեռ տրանզիտի փոխարեն վիճելի տարածքները Հայաստանին հանձնելը թանկ գին է հանդիսանում: Շտապ ինֆորմացիայի համար ընկ. Բուդուն² գործուղվում է քեմալականների մոտ: Բոլոր հարցերն ամբողջությամբ հանձնվում են ԿԿ-ի որոշմանը Մոսկվայում, ուր վաղը մեկնում են: Շատ կարևոր է Զեզնից տեղեկություններ ունենալ ռազմաճակատի դրություն մասին: Օգտվեցեք հեռագրից և ռադիոյից միաժամանակ: Բաքվի ռադիոկայանին կարգադրված է կապ պահպանել Երևանի հետ»³:

¹ Սուքը Նարիման Նարիմանովի մասին է:

¹ «ՀՀ-ն 1918-1920թթ., փաստաթղթերի...», էջ 327:

² Սուքը Պրոկոֆի (Բուդուն) Մդիվանու մասին է:

³ «ՀՀ-ն 1918-1920թթ., փաստաթղթերի...ժողովածու», էջ 330-331:

Ինչպես տեսնում ենք, Բաբվում Հաչտուժյան պայմանագրի նախագծի դեմ առաջ էր քաշվել ոչ թե մեկ, ինչպես միացյալ նիստի արձանագրություն մեջ է ասված, այլ մի քանի փաստարկ: Ըստ որում, առաջին պլանի վրա Թուրքիային առնչվող փաստարկն է եղել և ոչ թե Նախիջևանի ու Զանգեզուրի: Իսկ թե ինչու այն չի արձանագրվել, հստակ ասել հնարավոր չէ, թեև կարելի է ենթադրել, որ ըստ երևույթին նիստը վարողները զգուշացել են Թուրքիայի վերաբերյալ արտահայտված կարծիքների արտահայտից: Հնարավոր է նաև, որ հենց այդ նկատառումով նիստում միայն մի փաստարկ է վկայակոչվել: Դրա հավանականությունը մեծ է նաև այն առումով, որ Լեզրանը վերը մեջբերած հաղորդագրություն մեջ վկայակոչում է խորհրդակցությունը և ոչ թե նիստը:

Դառնալով միացյալ նիստին՝ հարկ ենք համարում ընդգծել, որ պայմանագրի ճակատագրի, հետևապես ինչ-որ չափով նաև Հայաստանի Հանրապետության ճակատագրի հարցի լուծումը հանձնվել է հակահայ տրամադրություններով երկու գործիչների՝ Ստալինին և Նարիմանովին, որոնք և սկսում են ակտիվ կերպով Մոսկվային տրամադրել ընդդեմ Լեզրանի և նրա ներկայացրած պայմանագրի նախագծի: Նիստի հաջորդ օրը՝ նոյեմբերի 5-ին, Ստալինի և Օրջոնիկիձեի ստորագրությունները (պատճեններ՝ Լենինին) է ուղարկվում հետևյալ հեռագիրը. «Եկել է Լեզրանը պայմանագրի նախագծով, նրա կողմից ոչ մի վերջնագիր հայկական կառավարությունը ներկայացված չի եղել: Պայմանագրի նախագիծը Նախիջևանի և Զանգեզուրի գավառները հանձնում է Հայաստանին, մենք իրավունք ենք ստանում Թուրքիա փոխադրել զենք և այլն, եթե մեր ճնշման տակ Թուրքերը հետ քաշվեն 1914թ. սահմանը: Նախագիծը չի կարող անմիջապես ստորագրվել և մանրամասն քննարկման և հսկայական փոփոխությունների կարիք ունի: Հարկ էր, որ ընկ. Լեզրանը բացատրությունների համար մեկնեի Մոսկվա»¹: Այդ նույն օրը Ստալինը մի առանձին ու բավականին ընդարձակ հեռագիր է հղում Չիչերինին (պատճեններ՝ Լենինին), որում հայտնում է Կարսի անկման, Հայաստանում տիրող դրություն, ինֆորմացիա ստանալու նպատակով Թուրքական հրամանատարության մոտ ներկայացուցիչ ուղարկելու անհրաժեշտություն մասին (առաջարկում է ուղարկել Մդիվանուն՝ Կորխմազովի և Շահթախ-թինսկու հետ միասին) և կրկին անդրադառնում Լեզրանի և Հայաս-

տանի հետ պայմանագրի խնդրին. «Ուղարկել Լեզրանին այդ նույն նպատակի համար (Թուրքիա - է. Զ.) հարմար չէ, քանի դեռ Հայաստանի հետ պայմանագիր չի ստորագրված, - գրում է Ստալինը, - ավելի լավ է կանչեցեք Լեզրանին Մոսկվա՝ պայմանագրի նախագծի գործի մասին բացատրություն տալու համար»²:

Դժվար չէ տեսնել, որ Ստալինը համառորեն ձգտում էր հեռացնել Լեզրանին Անդրկովկասից և Հայաստանի գործերին խառնվելուց: Ստալինին պետք չէին մարդիկ, որոնք փորձեին փրկել Հայաստանը, նրան այլ բան էր հետաքրքրում՝ հանրապետության խորհրդայնացումը, անգամ նրա շուրջ կեսի կորստյան գնով: Այդ միտքը պարզորոշ արտահայտված է այդ նույն հեռագրի հետևյալ տողերում. «Դրությունները Հայաստանում այնպիսին է, որ եթե Ալեքսանդրապոլը կորցնեն, չի բացավում դաշնակների կողմից իշխանությունը մեզ հանձնելու հնարավորությունը՝ Ադրբեյջանի օրինակով»³: Ուրեմն ո՛չ պայմանագիր ստորագրել է պետք և ո՛չ էլ միջամտել՝ Թուրքական առաջխաղացումը կանգնեցնելու համար, այլ պետք է սպասել Ալեքսանդրապոլի անկմանը: Այսպիսին էր Ստալինի դիրքորոշումը, որն իր կոնկրետ արտացոլումն էր գտել Լենինին հասցեագրած նոյեմբերի 5-ի հեռագրում. «Հաղորդում եմ Ձեզ կողմնորոշվելու համար... Դրությունը Թուրքիայում պարզ չէ, այն կարող է վտանգավոր դառնալ, եթե տեղի ունենա Քեմալի համաձայնությունը Անտանտի հետ, քանի որ Քեմալի չեզոքացումը կհեշտացնի Անտանտի արշավանքը դեպի Բաբու, ուստի առանց մանրակրկիտ հետազոտության և Թուրքիայում դրությունը պարզելու, պետք չէ Հայաստանի հետ կնքել պայմանագիր, որը Հայաստանին, նշանակում է՝ Անտանտին կհանձնի կարևորագույն ստրատեգիական մի շրջան՝ մահմեդական ազգաբնակչությանը և մեզ կնքաքաջի կոնֆլիկտի մեջ Թուրքիայի հետ: Հայաստանի հետ պայմանագրի կնքումը առայժմ պետք է ձգձգել, ձևացնել, թե ցանկանում ենք Հայաստանի համար ձեռնառու հաշտություն, իսկ հետո ամեն ինչ կպարզվի»³ (ընդգծումը մերն է - է. Զ.):

Ընթերցողի ուշադրությունը հրավիրելով ընդգծված տողերի վրա՝ ուզում ենք, որ նա էլ խորհի ու համոզվի, թե ինչպիսին էր Ստալինը իր հակահայկական կեցվածքում: Մենք դեռ հետո էլ առիթ կունենանք նման փաստի ծանոթանալու, բայց կարծում ենք՝ այս մեջբերումն էլ

¹ Նույն տեղում, էջ 328:

² Նույն տեղում, էջ 329:

³ Նույն տեղում:

³ РГАСПИ, ф. 558, оп. 1, д. 1987, л. 1:

խոսուն է: Ընդամենը մի քանի նախադասություն, բայց ամբողջովին հակահայկական թույնով լցված: Եվ խնդիրը միայն այն չէ, որ նա համոզում է Լենինին հետաձգել պայմանագրի կնքումը, որով թուրքերին հնարավորություն կտրվի ավարտին հասցնել Հայաստանի ջախջախումը: Այլև այն, որ Հայաստանը և Անտանտը նույնացնում է և մահամեղաբնակ հոչակում ստրատեգիական այն շրջանը՝ լինի դա Նախիջևան-Չանգեզուրը թե Կարսի մարզը՝ ամենաանխիղճ կերպով կեղծելով իրականությունը (հեռագրում շրջանը չի նշված, ավելի հավանականը Նախիջևան-Չանգեզուրն է, որը ստրատեգիական էր հոչակել ինքը՝ Ստալինը, Բաքվի միացյալ նիստում):

Ձեռքերը ծալած չէր նստել նաև Նարիմանովը: Նոյեմբերի 6-ին նրա նախագահությունը գումարված Ադրբեջանի հեղկոմի նիստում քննարկվում է Հայաստանի հետ հաշտության պայմանագիր ստորագրելու Լեզրանի ներկայացրած նախագիծը և ընդունվում հետևյալ որոշումը. «Ադրբեջանի կառավարությունը՝ քննության առնելով Հայաստանում ՌՆՖՍՀ լիազոր ներկայացուցիչ ընկ. Լեզրանի Հայաստանի հետ կնքած պայմանագիրը, գտնում է այն միանգամայն անթույլատրելի, քանի որ Հայաստանի դաշնակցական կառավարության հետ նման պայմանագրի կնքումը նշանակում է հրաժարում արևելյան քաղաքականությունից, ինչպես նաև Ադրբեջանը հանձնում է դաշնակների ջախջախմանը: Ուստի ԱՆՍՀ կառավարությունը թախանձագին առաջարկում է հրաժարվել պայմանագրի ստորագրումից»¹ (ընդգծումը մերն է - է. Ջ.): Մնում է ավելացնել, որ այս որոշումը ևս չտապ ուղարկվել է Մոսկվա:

Ինչ վերաբերում է Լեզրանին, ապա հարկ ենք համարում ընդգծել, որ նա հեշտությամբ չէր զիջել դիրքերը, տեղի չէր տվել: Նա դժգոհել էր, բողոքել, Սահակ Տեր-Գաբրիելյանի հետ միասին չէր ստորագրել միացյալ նիստում ընդունված որոշման տակ, անմիջապես կապվել էր Ջիչերինի հետ և պահանջել արտահայտել իր կարծիքը Բաքվում ընդունված որոշման մասին, ու նաև ճշգրտված հրահանգներ տալ Հայաստանում իր անելիքների մասին և այլն: Սակայն շուտով պարզվեց, որ ոչ միայն Բաքուն, Մոսկվան էլ է դեմ պայմանագրի ստորագրմանը: Մենք այստեղ չենք անդրադառնա բոլոր այն հեռագրերին և հեռախոսազրույցներին, որոնք այդ օրերին փոխանակվեցին Լեզրանի և Ջիչերինին միջև՝ մեր բուն խնդրից շատ չչեղվելու նպատակով, բայց նաև

պես, որպեսզի ընթերցողի մոտ Մոսկվայի դիրքորոշման մասին ևս պատկերացնում կազմվի, վկայաբերենք մեկ-երկուսը: Նախ ասենք, որ Մոսկվա մեկնելու և պայմանագրի նախագծի վերաբերյալ բացատրություն տալու Լեզրանի պահանջը Ջիչերինը սկզբից ևեթ մերժել էր՝ պատասխանելով, թե Մոսկվա գալու հարկ չկա, պետք է վերադառնալ Հայաստան և միջոցներ ձեռնարկել թուրքերի առաջխաղացումը կանգնեցնելու համար: Իսկ երբ Լեզրանը ծածկագիր հեռագրով կրկին պնդում է, որ միակ ելքը Հայաստանի հետ հաշտության պայմանագրի կնքումն է և միջնորդությունը՝ թուրքական զորքերը գրաված տարածքներից հետ քաշվելու վերաբերյալ, ապա դրան հետևում է Ջիչերինի հետևյալ պատասխանը. «Հայաստանի հետ Ձեր պայմանագրի նախագիծը հնացել է: Իրադարձություններն առաջ են անցել, մնում է միայն միջնորդությունը, որպեսզի կանգնեցվի թուրքերի հարձակումը: Երբ թուրքերը դադարեցնեն հարձակումը, մնացածը կքննարկենք աստիճանաբար»²: Հեռախոսային այդ խոսակցությունն ժամանակ նաև ասել էր, թե «Չանգեզուրի և Նախիջևանի հարցը դեռևս պետք է բաց մնա»: Նույն օրը՝ նոյեմբերի 7-ին, Լեզրանին ուղարկած ծածկագրում հայտնելով այն մասին, որ թուրքերին զենքի հետագա հանձնումը կամ չհանձնումը կախված կլինի Ստալինի ցուցումներից, վերջում ավելացնում է, թե «առայժմ չպիտի խոսել 1914թ. սահմանից այն կողմ նահանջելու մասին, այլ միայն հարձակումը դադարեցնելու և զինադադարի մասին»²:

Կարծում ենք, այսքանն էլ բավական է համոզվելու համար, որ նոյեմբերյան այդ օրերին Հայաստանի հետ հաշտության պայմանագիր կնքելուն դեմ էին ոչ միայն Ստալինն ու Բաքուն, այլև Մոսկվան, իսկ Լեզրանը հաստատուն կերպով կանգնած էր Երևանում մշակված պայմանների ընդունման ու պայմանագրի ստորագրման դիրքերում: Բայց նա ընդամենը դեպպան էր և ազդել իր երկրի կառավարության քաղաքականության վրա, հասկանալի է, չէր կարող: Մինչդեռ մեր օրերում մամուլում և ոչ-մասնագիտական գրականության էջերում երբեմն հայտնվում է կարծիք, որ իբր Լեզրանը խաբում էր հայերին, բանակցությունները վարում էր ոչ թե պայմանագիր կնքելու, այլ Հայաստանի կառավարության ուշադրությունը շեղելու և թուրքերին ժամանակ շահելու ու նոր հարձակում սկսելու հնարավորություն ընձեռե-

¹ ՀԱԱ, ֆ.4033, ց. 2, գ.1141, փ. 10, թ. 1:

¹ Գ. Գալոյան, նշվ. աշխ. էջ 334:

² РГАСПИ, ф. 64, оп. 2, д. 11, л. 211:

լու նպատակով: Ըստ որում, իրենց այդ կարծիքը հաստատող որևէ հիմնավոր փաստարկ չեն բերում: Կարծում ենք, վերը բերված արխիվային փաստաթղթերը, ինպես նաև այն իրողությունը, որ բանակցությունների ժամանակաշրջանում ռազմական գործողությունները երբևէ չեն դադարել, իսկ հոկտեմբերի 14-ին և 25-ին Կարսի ճակատում հայկական զորքերը ընդհանուր հակահարձակում են ձեռնարկել, որոնք դժբախտաբար հաջողություն չեն ունեցել, փաստում են, որ այդ կարծիքը չինժու է և իրականությունը բոլորովին չի համապատասխանում:

* * *

Նոյեմբերին թուրք-հայկական պատերազմը թևակոխեց իր ավարտական փուլը, և Հենց այդ շրջանում էլ լուրջ իրադարձություններ տեղի ունեցան նաև Շարուրում: Նախորդ շարադրանքում մենք արդեն նշել ենք, որ Շարուրի ճակատում ո՛չ սեպտեմբերին և ո՛չ էլ հոկտեմբերին թշնամին որոշակի ակտիվություն չէր ցուցաբերել: Պատճառը նախ հավանաբար այն էր, որ այստեղ գտնվող թուրքական զորամասը թվապես խիստ զիջում էր հայկական ուժերին (պատերազմը սկսելու պահին այդ զորամասում հաշվվում էր շուրջ 400 ասկյար) և Հետո՝ Նախիջևանում տեղաբաշխված ռուսական զորամասը, որը համապատասխան հրաման չունենալով, չէր մասնակցել ռազմական գործողությունների: Ավելորդ չենք համարում նշելու, որ այդ հարցում ևս Լեգրանը որոշակի դեր է խաղացել: Սեպտեմբերի 30-ին¹ Թիֆլիսից հեռախոսակապով Բաքվում գտնվող Օրջոնիկիձեին հայտնելով թուրքական հարձակման և Սարիղամիշը գրավելու մասին՝ Լեգրանը, միաժամանակ, անթույլատրելի է համարում Նախիջևանի կողմից որևէ ռազմական գործողություն: «Նկատի ունենալով թուրքերի ներկայությունը Նախիջևանում, - ասել է Լեգրանը, - անհրաժեշտ է ձեռնարկել բոլոր միջոցները, որպեսզի անհնարին դառնա թուրքերի որևէ հարձակում Նախիջևանի կողմից, որը ըստ պայմանագրի գտնվում է կարմիր զորքերի պաշտպանության տակ: Դա շատ կարևոր է, խնդրում եմ դրա վրա հրավիրել 11-րդ բանակի հատուկ ուշադրությունը»²:

Ուշագրավ է, որ Օրջոնիկիձեին Լեգրանի այս առաջարկությունը որևէ կերպ չի արձագանքել, այլ առաջարկել է Շահթախթիի երկա-

թուղային հանգույցի վերաբերյալ Մոսկվայի Հետ բանակցելուց առաջ նախ խոսել իրենց Հետ, որպեսզի անհարմար վիճակ չստեղծվի: Ամեն դեպքում փաստը մնում է փաստ. Շարուրի ճակատում, սեպտեմբեր-հոկտեմբերին համեմատաբար հանգիստ էր, և դա այն դեպքում, երբ հարևան Սուրմալուի ճակատում Դրոյի գլխավորած հայկական ուժերը համառ և անզիջում կռիվներ էին մղում թվապես գերազանցող թուրքերի կողմից: Բանն այն է, որ հայկական հրամանատարությունը Շարուրի ճակատը կարևոր էր համարում, քանի որ թշնամին այդտեղից հեշտությամբ կարող էր ներխուժել Արարատյան դաշտ և սպառնալ մայրաքաղաք Երևանին: Այդ պատճառով էլ այստեղից զորքերի փոխադրություն այլ ռազմաճակատ սկզբնական շրջանում չէր կատարվել: Զինվորական նախարար Ռուբեն Տեր-Մինասյանի կազմած տեղեկագրում ասված է, որ «Նախիջևանի ուղղությամբ կանգնած են՝ 3-րդ գունդը - 2000 սվին, 2-րդ գունդը (երկու բատալիոն) - 1000 սվին: Ընդամենը՝ 3000 սվին»³:

Տեղեկագիրը կազմվել էր պատերազմի առաջին օրերին, հետագայում դրությունը բավականին փոխվել էր: Հայկական ուժերի մի մասը փոխադրվել էր այլ ռազմաճակատ, իսկ թուրքական զորամասը, ընդհակառակը, հոկտեմբերին զգալի համալրում էր ստացել ի հաշիվ Ռուսաստանում եղած թուրք նախկին ռազմագերիներից Բաքվում կազմավորված զորամասերի: Որոշրդարանի անդամ Հակոբ Տեր-Հակոբյանը, որը, որպես քաջատեղյակ և ականատես անձնավորություն, թուրք-հայկական պատերազմի մասին ուշագրավ աշխատություն է հրատարակել դեռևս 1921թ.⁴ անդրադառնալով Հայաստանի դեմ նետած և տարբեր ճակատներում գործող թշնամական ուժերի թվաքանակին, գրում է, որ Նախիջևանի ճակատում գործում էին «տաճկական 1500 զորք, երկու ազրբեջանյան հեծելազնդի և ռուսական մեկ հեծելազնդի հետ...»²: Իսկ գեն. Շելկովնիկյանի և զինկոմ Մխչյանի ստորագրությամբ դեկտեմբերի 25-ին Երևան՝ հայկական կարմիր բանակի հրամանատարությունն ուղարկված հեռագրում հայտնվում էր, որ «Շահթախթիում և Նորաչենում գտնվում են մեկական թուրքական զնդեր: Աբաս-Կուլի բեկը³ գտնվում է Սաղարակում»⁴:

¹ Ս. Վրացյան, նշվ. աշխ. էջ 435:

² Հ. Տեր-Հակոբյան, Հայաստանի վերջին աղետը, Կ. Պոլիս 1921, էջ 93:

³ Աբաս-Կուլի բեկը ազրբեջանցիներից կազմավորված այսպես կոչված «Կարմիր տարրի» հրամանատարն էր:

⁴ ՀԱԱ, ֆ. 114, ց. 1, գ. 67, թ. 19:

¹ Յու. Բարսեղովի հրատարակած փաստաթղթերի ժողովածուում որպես այս խոսակցության ամսաթիվ սխալմամբ նշված է նոյեմբերի 30-ը:

² „Геноцид армян...“, стр. 272.

Ինչպես տեսնում ենք, Հոկտեմբերին թշնամին կարողացել էր այս ճակատում ևս ուժերի գերազանցություն ստեղծել: Չնայած դրան՝ հակառակորդը դեռևս ակտիվություն չէր ցուցաբերում, և Հոկտեմբերին գնն. Շելկովնիկյանի զորամասը, թեև թվական արդեն նոսրացած, բայց շարունակում էր իր հսկողության տակ պահել Շահթախթին և ամբողջ Շարուրի դաշտը: Այդ է վկայում թեկուզ այն փաստը, որ Մակվի խանությունը հետ առևտրական պայմանագրի կնքման ժամանակ, այսինքն՝ Հոկտեմբերի 23-ին, Շահթախթին դեռևս գտնվում էր հայերի ձեռքին: Եվ միայն այն բանից հետո, երբ Հոկտեմբերի 30-ին ընկավ Կարսը, և նոյեմբերի սկզբին թուրքական բանակը մոտեցավ Ալեքսանդրապոլին, Շարուրի ճակատում ևս թշնամին սկսեց ակտիվանալ և տեղական ուժերի ու ռուսական զորամասի օգնությամբ անցավ վճռական գործողությունների: Արխիվներում պահպանված օպերատիվ հաղորդագրությունները ցույց են տալիս, որ ռազմական ակտիվ գործողությունները տեղի են ունեցել նոյեմբերի 5-7-ը և 11-18-ը:

Նոյեմբերի 8-ին Հայաստանի Հանրապետության զորքերի գլխավոր հրամանատար գնն. Նազարբեկյանը Շարուրի ճակատի հրամանատար գնն. Շելկովնիկյանի նոյեմբերի 5-ի, 6-ի և 7-ի օպերատիվ հաղորդագրությունները ուղարկում է վարչապետ և արտգործնախարար Հ. Օհանջանյանին և առաջարկում բողոք ներկայացնել ՌՆՖՍՀ կառավարությանը օգոստոսի 10-ի համաձայնագրի նման խախտման կապակցությամբ: Պարզվում է, որ այդ օրերին թշնամական ուժերը բազմիցս փորձել են գրավել Դարալագյազի դարպասները, ձեռք բերել հայկական ուժերի ձախ թևը և Շահթախթին կտրել թիկունքից: Դարալագյազի ուղղությամբ թշնամու բոլոր գրոհները հետ էին չպրտվել, Խոկ և Կիվրազ գյուղերի վրա հարձակումները ևս կասեցվել էին նոյեմբերի 5-ին և 6-ին¹: Սակայն 7-ի առավոտյան դրությունը փոխվում է. հակառակորդի հեծելազորին հաջողվում է հանկարծակի և սրընթաց հարձակումով նախ գրավել Խոկը, այնուհետև Կիվրազը, Ղարաբաղարը, իսկ երեկոյան կողմ՝ նաև Փուսխանը: Դա մեր զորքերի համար լուրջ պարտություն էր: Ճիշտ է, հայկական ուժերի մեծ մասին հաջողվեց նահանջել դեպի Դարալագյազ և դիրքեր գրավել Ուլխա-Նորաշենում, բայց քիչ չէին նաև կորուստները: Ուշագրավ է, որ գնն. Շելկովնիկյանը իր շտաբով 7-ի առավոտյան 8 անց կեսին դեռևս գտնվում էր Շահթախթիում, իսկ երեկոյան ժամը 9 անց 10 ժամին արդեն հաստատվել

էր Նորաշեն կայարանում, որտեղից էլ գնդ. Պրիտոմանովի հետ հեռախոսային ուղի կապով հաղորդել էր վերոհիշյալ իրադարձությունների մասին: Իսկ դա նշանակում է, որ Շահթախթիում գտնվող իր շտաբով և այնտեղի չորս վաշտով ու հրետանային մարտկոցով հանդերձ նահանջել ու հաստատվել էր Նորաշեն կայարանում: Անհետաքրքիր չէ իմանալ, որ հակառակորդը հարձակվում էր կարմիր դրոշներ պարզած. «Ես ինքս տեսա, թե ինչպես բոլշևիկյան հեծելազորը սլանում էր կարմիր դրոշներով»¹, - ասել է Շելկովնիկյանը վերոհիշյալ հեռախոսագրությունում: Ընթերցողին թյուրիմացություն մեջ չզցցելու համար ավելացնենք, որ Շելկովնիկյանը «բոլշևիկյան» ասելով նկատի չունեցրե՞լ միայն ռուսներին: Նա իր հաղորդագրություններում ընդհանրապես այդ ճակատում կոպող թշնամական բոլոր ուժերին (թուրք-թաթարական, ռուսական) բոլշևիկյան էր անվանում հավանաբար նրա համար, որ Նախիջևանը հայտարարվել էր խորհրդային, և թշնամին էլ հարձակվում էր կարմիր դրոշներով: Իսկ որ նոյեմբերի 7-ի հարձակմանը մասնակցել է նաև Նախիջևանում հաստատված ռուսական հեծյալ բրիգադը, դա փաստ է, և այդ մասին կա նաև Նախիջևանում ՌԿ(Բ)Կ Կովկասյան բյուրոյի և 11-րդ բանակի ռազմահեղափոխական խորհրդի կողմից արտակարգ կոմիսար նշանակված Վելիբեկովի մի գեկուցագրում. «Նոյեմբերի 7-ին հեծյալ բրիգադը թուրքերի և ապրստամբ փախստականների հետ միասին հարձակման անցան Շարուրում, - գրում է Վելիբեկովը: - Բախտը ժպտաց, Շարուրը մաքրվեց»²:

Ինչպես հայտնի է, նոյեմբերի 7-ին Հայաստանի կառավարությունն ընդունեց Կարաբեքի փաշայի ներկայացրած զինադադարի պայմանները, և բոլոր ռազմաճակատներում (Կարս-Ալեքսանդրապոլի, Սուրմալուի, Շարուրի) կրակը դադարեց: Սակայն նոյեմբերի 8-ին Անկարայի կառավարությունը զինադադարի նոր պայմաններ ներկայացրեց, որոնք չափազանց ծանր էին և հավասարազոր էին կապիտուլյացիայի³: Նոյեմբերի 10-ին Հայաստանի կառավարությունը մերժեց այդ նոր պայմանները և ժողովրդին կոչ արեց լարել բոլոր ուժերը անարգ թշնամուն հակահարված տալու համար: 11-ին ռազմական գործողությունները բոլոր ճակատներում վերսկսվեցին: Այդ օրը՝ ժամը 16 անց 15 ժամին, բանակի հրամանատարին ուղարկած հեռագրում գնն. Շելկովնիկյանը հայտնում է, որ առավոտյան երկրորդ գնդի վաշ-

¹ Տե՛ս ՀԱԱ, ֆ. 200, ց. 1, գ. 597, թ. 132-133:

¹ Նույն տեղում, էջ 133:

² ՀԱԱ, ֆ. 114, ց. 2, գ. 25, թ. 24:

³ Մանրամասն տե՛ս է. Ա. Զոհրաբյան, նշվ. աշխ. էջ 291-295:

տերից մեկը Հարձակման է անցել Կուչչի-Դեմուրչի գյուղի ուղղութեամբ, սակայն հակառակորդը, մարտը չընդունելով, հետ է քաշվել Մախտա-Դուղանգայի շրջան, և որ գյուղի մատուցներում ընդառաջ է եկել մի հայ երեխա և հանձնել նամակ հետևյալ բովանդակությամբ. «Շարուրում գործող հայկական ուժերի հրամանատարությունը. Հայաստանի և Կարմիր Թուրքիայի միջև զինադադարի վերականգնման մասին իմ բարձր հրամանատարություն կողմից ինձ տեղեկացնելուց հետո, իմ կողմից հարձակումը դադարեցված է: Ձեր կողմից իմ շրջանում ռազմական գործողությունները դեռևս շարունակվում են: Ներկա գրությունը պատճենը հայտնելով իմ հրամանատարությունը, դրանով հայտարարում եմ, որ եթե Ձեր կողմից ռազմական գործողությունները չդադարեցվեն, ապա զինադադարի խախտման պատասխանատվությունը կրնկնի Ձեզ վրա»¹:

Նամակի տակ զրված էր Շարուրում գործող թուրքական ուժերի հրամանատարի ստորագրությունը: Այստեղ, իհարկե, որևէ թյուրիմացություն չկա, ուղղակի վատ կապի պատճառով Շարուրի թուրքերը տեղեկացված չէին ռազմական գործողությունները վերսկսելու մասին: Ավելացնենք, որ նամակաբեր հայ երեխան այլ տեղեկություններ էլ էր հայտնել: Նա մասնավորապես ասել էր, որ Նորաչեն կայարանում շատ զորք կա, և նրանց մեջ նաև շատ ռուսներ կան, որոնք «10 փախստական հայերի պաշտպանել են թուրքերից, իսկ մնացած 10-15 հայերին թուրքերը և թաթարները սպանեցին»²: Հեռագրում Շելկովնիկյանը նաև հայտնում է, որ երկրորդ գնդի հրամանատարին հրամայել է մեկ վաչտով և Մակեդոնի հեծյալներով թշնամուն դուրս քշել Արփաչայի ափով Դարալագյազ տանող ուղուց, գրավել Ջեյվա, Մախտա Դուղանգա գյուղերը, ամրացնել Ուլիա-Նորաչենից մինչև Կուչչի-Դեմուրչի ձգվող բարձունքները:

Ռազմական հաղորդագրությունից դժվար չէ տեսնել, որ հաջորդ օրերին՝ մինչև նոյեմբերի 16-ը, Կուչչի-Դեմուրչին և շրջակա գյուղերը ձեռքից ձեռք են անցել: Նոյեմբերի 15-ի առավոտյան հայկական ուժերը հակահարձակման են անցնում և թշնամուն դուրս քշում Կուչչի-Դեմուրչիից, բայց այդ օրը երեկոյան թշնամուն հաջողվում է շրջանցել հայկական ուժերի ձախ թևը և հարկադրել վերջիններիս նահանջելու դեպի Գայլի Դրունք: Եվ քանի որ ճակատը ձեղքվել էր, և թշնամին դուրս էր եկել Սադարակ գյուղի վրա, ուստի Շելկովնիկյանի հրամա-

նով հայկական ուժերը հետ են քաշվում և դիրքեր բռնում «Սմոքենդ-628 բարձունք-Ջինջիրլու-Կաղըլու գծի վրա»: Գեն. Շելկովնիկյանը նոյեմբերի 16-ին տվյալներ է հաղորդում նաև իր հրամանատարություն տակ գտնվող ուժերի մասին, այն է. «Երրորդ գնդի 4 վաչտ, երկրորդ գնդի մոտ 6 վաչտ, սահմանապահ ջոկից 80 սվին, միլիցիայի պահեստային ուժերից 40 սվին, 6 հրանոթ և զրահագնացքը»¹: Հայտնելով այս ամենի մասին և տեղեկացնելով, որ ինքը իր շտաբով հաստատվելու է Ավչարում, Շելկովնիկյանը վերջում ավելացնում է. «...գեկուցում եմ, որ զինվորները բոլորովին չեն կոպում, ամբողջ վաչտերով փախչում են՝ հենց որ երևում են հակառակորդի հեծելազորի ոչ մեծ խմբեր Լյուիս գնդացիներով և կարմիր դրոշներով»²:

Ի դեպ է ասել, որ թուրքերի կողմից կարմիր դրոշների օգտագործումը թե՛ Կարսի և թե՛ Շարուրի ճակատներում որոշակի ազդեցություն էր թողնում հայ զինվորների վրա այն առումով, որ նրանց դիտում էին որպես ռուս բոլշևիկների դաշնակից: Նման մտածելակերպը գնալով ավելի ու ավելի էր արմատավորվում պատերազմի վերջին օրերին: Նոյեմբերի 15-ին Օրթլու-Թագաքենդ գյուղի մոտ տեղի ունեցած կռիվներից հետո մարտադաշտում մնացել էր սպանված ռուս զինվորի դիակ: Այս դեպքը ավելի ամրապնդեց թշնամու կողմից ռուսների մասնակցություն մասին տարածված կարծիքը: Ինչ վերաբերում է Լյուիս տիպի ձեռքի գնդացիներին, որոնցով զինված էր թուրքական հեծելազորը, ապա դա էլ առավելություն էր տալիս մարտ վարելու տեսանկյունից (հայ հեծելազորայինները զինված էին հրացաններով): Վրաստանում ՌՆՖՍՀ լիազոր ներկայացուցչության զինվորական կցորդ Սիտինը իր ղեկավարությունը ներկայացրած գեկուցագրում, վերլուծելով պատերազմում հայկական բանակի պարտություն պատճառները և նշելով այն իրողությունը, որ Հայաստան ներխուժած թուրքական բանակը թե՛ զինվածություն, թե՛ մարտական պատրաստվածություն և թե՛ թվական կազմով գերազանցում էր հայկական բանակին, հատկապես առանձնացնում է թուրքական հեծելազորը, որը զինված էր ձեռքի գնդացիներով և մարտի ժամանակ շրջանցում էր հակառակորդին թևերից և գնդացրային անկանոն և ուժեղ կրակով առաջացնում խուճապ³:

¹ Նույն տեղում, էջ 300:

² Նույն տեղում:

³ Հայկական բանակի պարտության պատճառների վերլուծությունը տես է. Ա. Զոհրաբյան, նշվ. աշխ., էջ 347-355:

¹ ՀԱԱ, ֆ. 200, ց. 1, գ. 602, թ. 250:

² Նույն տեղում:

Ինչևէ, Շարուրի ճակատից ուղղակի գործողությունների մասին վերջին հաղորդագրությունը ստացվել է նոյեմբերի 17-ի երեկոյան: Նրանում ասված էր, որ խճուղու ուղղությունը և Սարայ-բուլաղ լեռնաշղթայի արևելյան լանջերով հակառակորդի առաջխաղացման բոլոր փորձերը հաջողությամբ հետ են մղված: Սակայն հաղորդագրությունն զգալի մասը նվիրված է այն ախտին՝ դասալքությունը, որ համակել էր Հայկական բանակը Կարսի անկումից հետո. «Երկրորդ գնդում առավոտյան ժամը 10-ի դրությամբ մնացել է մոտ 100 զինվոր, - կարգում ենք գեներալը: Շեկովնիկովյանի այդ հեռագրում, - գեներալը ընթացքում դասալքել են 70 զինվոր: Ըստ Մակեդոնի զեկուցման, նրա մոտ մնացել են 25 ձիեր, մնացածը ուղարկվում են Ղամարլու պայտելու համար: Մակեդոնի անձնական զեկուցումով, 2-րդ գնդի զինվորները՝ իր հեծելազորայինների հետ խոսելիս, հայտարարել են, որ իրենք չեն կոպելու, որովհետև իրենց դիմաց ոուս բուլչեիկներ են և նույնիսկ քարոզել են իր հեծելազորայինների մեջ: Երկրորդ գնդի հրամանատարը հայտնում է, որ իր գունդը միանգամայն անմարտունակ է և իր միակ հույսը Աղաբեկի ձիավորներն են և սպասվող կամավորականները: Ղամարլուում և չրջանում կազմակերպվել է դասալքների որս, բայց գեներալներով դասալքում են, կոմիսարի միջոցով իմ կողմից բոլոր միջոցները ձեռնարկված են, բայց դրական արդյունքներ չկան»¹ (ընդգծումը մերն է - է. Ջ.):

Անշուշտ, մեր խնդիրը չէ անդրադառնալ մյուս ուղղակի ատենություն ստեղծված իրադրությունը, ուստի բավարարվում ենք արձանագրելով, որ նոյեմբերյան այդ օրերին հաղորդագրություններ ստացվում էին նաև մյուս ուղղակի ատեններից: Դասալքությունը, զինվորների և սպանների միջև ծայր առած անվստահությունը և մի շարք այլ հանգամանքներ, որոնց դարձյալ մենք չենք անդրադառնում թեմայից չհեղվելու պատճառով, իսկապես որ հայկական զինված ուժերը դարձրել էին անմարտունակ, պատերազմի շարունակումը՝ անհեռանկարային: Այսպիսի պայմաններում նոյեմբերի 15-ից լույս 16-ի գեներալը Հայաստանի կառավարությունը որոշում է ընդունել զինադադարի՝ նոյեմբերի 8-ի թուրքական խիստ ծանր պայմանները², որոնք, ինչպես արդեն նշել ենք, հավասարազոր էին կապիտուլյացիայի և կնքել զինադադար: Այդ խնդրի իրագործումը հանձնարարվում է ներքին գործերի նախարար

Սարգիս Արարատյանին, որը և նոյեմբերի 16-ին մեկնում է ուղղակի կատ: Հաջորդ օրը՝ 17-ին, Ալեքսանդրապոլ է ուղարկվում կապիտան Յարլոկովը (Պնձորյան)՝ կառավարության որոշումը և Կարաբեքիրին ուղղված գեներալը: Նազարբեկյանի նամակը թուրքական հրամանատարությանը հանձնելու համար: Նոյեմբերի 18-ի առավոտյան Ս. Արարատյանը Ադրիսից Հ. Օհանջանյանին հեռագրով տեղեկացնում է, որ արդեն վերադարձել է կապիտան Յարլոկովը և բերել Կարաբեքիր փաշայի պատասխան նամակը գեներալին: Նազարբեկյանին, որ թեև ուղղակի գործողությունների դադարեցնելու մասին հրամանը պետք է տրվի երկու կողմից միաժամանակ, բայց Քյազիմ Կարաբեքիրը արդեն իր գործերին հրամայել է դադարեցնել հարձակումը: Ս. Արարատյանը նաև հայտնում է, որ ինքը անհապաղ մեկնում է Ալեքսանդրապոլ՝ գեներալի համաձայնագիրը ստորագրելու, և ավելացնում. «...նկատի ունենալով Շարուրում գործող թուրքական բանակի գորամասերի հետ կապի բացակայությունը, Քյազիմ Կարաբեքիրը խնդրել է մեզ անհապաղ բանագնացներ ուղարկել և թուրքական գորամասերին տեղեկացնել զինադադարի կնքման մասին»¹:

Զինադադարի համաձայնագիրը Ս. Արարատյանը և Քյազիմ Կարաբեքիր փաշան ստորագրեցին նոյեմբերի 18-ի երեկոյան Ալեքսանդրապոլում: Այդ նույն օրը Հայկական բանակի գլխավոր հրամանատարը հրաման արձակեց ուղղակի գործողությունները դադարեցնելու և զինադադարի պայմաններով նախատեսված նոր դիրքեր հետ քաշվելու մասին (թուրքական զորքերը մնում էին իրենց գրաված դիրքերում): Կրակը դադարեցվեց նաև Շարուրի ճակատում, որտեղ մինչև նոյեմբերի վերջը հայկական ուժերը մնացին իրենց զբաղեցրած դիրքերում: Սակայն նոյեմբերի 27-ին Կարաբեքիրը պահանջեց, որ հայերը հետ քաշվեն նաև Շարուրին հարող տարածքներից, ինչը և կատարվեց:

Պատերազմն ավարտվեց, հրանոթները լուցին, բայց խնդիրները մնացին ու փոխադրվեցին զիվանագիտության բնագավառ: Հայ զիվանագիտության առաջ ղեկավարագույն խնդիր էր ծառայել. կկարողանա՞ բանակի կորցրածից փրկել, ետ բերել ինչ-որ բան, հայ ժողովրդի գոյապահպանության համար ապահովել անհրաժեշտ պայմաններ: Այդ հարցերի պատասխանը Ալեքսանդրապոլում գումարվելիք կոնֆերանսը պետք է տար:

¹ ՀԱԱ, ֆ. 200, ց. 1, գ. 602, թ. 315:

² Տե՛ս է. Ա. Զոհրաբյան, նշվ. աշխ., էջ 291-301:

¹ ՀԱԱ, ֆ. 200, ց. 1, գ. 602, թ. 329:

* * *

Ձինադադարի նույնժամերի 18-ի համաձայնագրով նախատեսվում էր դարձյալ Ալեքսանդրապոլում, մեկ շաբաթվա ընթացքում գումարել կոնֆերանս, որտեղ կմշակվեն հաշտության պայմանները ու կկնքվի երկու երկրների հարաբերությունները կարգավորող համապատասխան պայմանագիր: Անշուշտ, մեր խնդիրը չէ լուսաբանել կոնֆերանսի աշխատանքներն ամբողջությամբ¹, ուստի կանդորադառնանք միմիայն տարածքային սահմանագծման հարցերին այնքանով, որքանով որ դրանք կառնչվեն մեր հետապնդած խնդրին: Բայց նախ տեսնենք, թե այդ հարցում պատվիրակությունն ինչ հրահանգավորում էր ստացել իր կառավարությունից:

Պատվիրակության ղեկավար² Ալ. Սատիսյանն իր հայտնի գրքում էր գրում է.

«Բանակցությունները վարելու համար մշակված էին հրահանգներ: Որոշված էր այն նվազագույն սահմանագիծը թուրքաց Հայաստանի, որմե ավելի կառավարությունը չէր ուզեր զիջումներ ընել: Բայց մյուս կողմն հրահանգ տրված էր անպատճառ հաշտության պայմանագիր կնքել:

Այդպիսի հրահանգները, հարկավ, դրած էին պատվիրակությանը ծանր դրության մեջ. անհրաժեշտ զիջումներու մեջ որոշ սահմաններ պահել, բայց միևնույն ժամանակ հնարավորություն չունենալով գեների զորությամբ շարունակել պատերազմական գործողությունները՝ այնուամենայնիվ կնքել հաշտություն»³ (ընդգծումը մերն է – է. Ջ.):

Այսքանը միայն, և ընթերցողին այդպես էլ անհայտ է մնում, թե ո՞րն էր այն նվազագույն սահմանագիծը, որից ավելի կառավարությունը չէր ուզում զիջել: Ինչպես նաև ոչինչ չի ասում առավելագույն պահանջների մասին և դրանով իսկ ստեղծում տպավորություն, թե այդ խնդրի լուծումը կառավարությունը թողել է պատվիրակության

¹ Կոնֆերանսի աշխատանքների մանրամասն վերլուծությունը տե՛ս է. Ա. Ջոհրաբյան, Սովետական Ռուսաստանը և Հայ-թուրքական հարաբերությունները (1920–1922), Եր., 1979, էջ 92–120:

² Պատվիրակության կազմում էին Ա. Գյուլյանդանյանը (ֆինանսների նախարար) և Ստ. Ղորղանյանը (Կարսի նահանգապետ): Պատվիրակության հետ Ալեքսանդրապոլ էին մեկնել նաև խորհրդականներ, փորձագետներ, թարգմանիչներ (ընդհանուր թվով՝ 16 հոգի):

³ Ալ. Սատիսյան, Հայաստանի Հանրապետության ծագումն ու զարգացումը, Աթենք 1930, էջ 257:

Հայեցողությունը: Մինչդեռ Սորհրդարանի անդամ Հակոբ Տեր-Հակոբյանը ավելի կոնկրետ տեղեկություններ է հայտնում: Նա վկայում է, որ Համո Օհանջանյանի կառավարությունը պատվիրակությանը հրահանգել էր «պաշտպանել առավելագույն պահանջները, թուրքերը պետք է պարպեն մինչև 914 թվի սահմանները, իսկ թուրքա-Հայաստանեն պիտի պահանջվեն Վան, Մուշ և այդ գծով մինչև Րիզե: Եթե անոնք համաձայն են մեր այս առավելագույն առաջարկներուն, այն ատեն միայն դաշնագիրը պիտի ստորագրվեր՝ իբրև հավասար կողմ: Եթե թուրքերը առաջ չենթախին այդ առաջարկին, այն ատեն երևան պիտի բերվեր Պրեստ-Լիտովսկի դաշնագիրը և ստորագրելով հանդերձ պայմանագիրը, պիտի ավելացնեն, որ այդ ոչ թե համաձայնություն է, այլ պարզ հանձնատվության ենթարկումը ուժին և հաղթողին»¹ (ընդգծումը մերն է – է. Ջ.):

Այսպես ուրեմն, առավելագույն պահանջ՝ Վան, Մուշ և ելք դեպի Սև ծով Րիզե նավահանգստով (այսինքն՝ հրաժարում Սևրի պայմանագրով նախանշված տարածքների մեծ մասից) և, նվազագույն պահանջ՝ Բրեստ-Լիտովսկի պայմանագրով որոշված սահմանագիծ (այսինքն՝ Կարսի մարզի հանձնում թուրքերին) և ոչ ավելին: Այլ կերպ ասած, պատվիրակությունը լիազորված չէր Կարսի մարզից դատ Ռուսա-Հայաստանից այլ տարածքներ (Սուրմալու, Շարուր-Նախիջևան) զիջելու թուրքիային:

Ինչպե՞ս լուծեց պատվիրակությունն իր ստանձնած պարտականությունները կտեսնենք իր տեղում: Իսկ այժմ նշենք, որ այս հրահանգները մնացել էին անփոփոխ, թեև պատվիրակության Ալեքսանդրապոլ հասնելու նույն օրը՝ 24-ին, Երևանում կազմավորվել էր նոր կառավարություն Սիմոն Վրացյանի գլխավորությամբ: Վերջինս պատվիրակության լիազորությունների մասին որևէ հայտարարություն չէր արել, իսկ Սատիսյանն էլ միայն նույնժամերի 27-ին էր նման հարցումով դիմել կառավարությանը և ստացել նրա համաձայնությունը նախորդ կառավարության մշակած պայմաններին:

Մինչդեռ դրանից երկու օր առաջ՝ նույնժամերի 25-ին, պատվիրակությունն արդեն պատրաստել էր տարածքային հարցերում այն պահանջները, որ պետք է ներկայացվեին թուրքերին: Դա տեղի էր ունեցել Կարաբեքիրի փոխայցելությունից (նույնժամերի 25-ի առավոտյան)²

¹ Է. Տեր-Հակոբյան, Հայաստանի վերջին աղետը, Կ. Պոլս, 1921, էջ 119:

² Հայ պատվիրակները այցելել էին Կարաբեքիրին Ալեքսանդրապոլ հասնելու նույն օրը՝ նույնժամերի 24-ին:

հետո, որի ժամանակ էլ պայմանավորվել էին առաջին պաշտոնական նիստը գումարել նույն օրը ժամը 5-ին: «Երբ թուրքերը գնացին, – գրում է Սատիսյանը, – մեր պատվիրակությունը զբաղվեցավ այն պայմաններու ձևակերպութեամբ, որոնք պետք է պաշտպաներ խորհրդաժողովի միջոցին»¹: Իսկ նիստի մասին խոսելիս, ավելացնում է. «...մենք պատրաստեք էինք մեր հայտարարությունները ֆրանսերեն լեզվով և նույնպես քարտես մը նախագծած սահմաններով»²: Սակայն առաջին պաշտոնական նիստը հայ պատվիրակների համար անսպասելի ընթացք է ստանում: Սատիսյանի իսկ առաջարկությունները կոնֆերանսում նախագահողի պարտականությունները ստանձնած Կարաբեքիրը աշխատանքները տանում է իր նախագծած սցենարով և իսկույն ևեթ՝ որպես բանակցությունները շարունակելու նախապայման, առաջ քաշում Սևրի պայմանագրից հրաժարվելու պահանջ: Սատիսյանի բոլոր փորձերը՝ համոզելու թուրքական պատվիրակությանը, որ «Սևրի դաշնագրից հրաժարվելուց առաջ Հայաստանի կառավարությունը պետք է գիտենա, թե ինչպես են որոշվում կոնֆերանսի հիմնական հարցերը, օրինակ տերիտորիայի հարցը՝ ինչպես Տաճկահայաստանում, նույնպես և Ռուսահայաստանում, ելքը դեպի ծով և այլն», արդյունք չեն տալիս³: Կարաբեքիրը պնդում է իր պահանջի վրա և հայ պատվիրակները ստիպված են լինում ժամանակ խնդրել՝ Երևանի համաձայնությունը ստանալու համար:

Կոնֆերանսի աշխատանքների հետ ծանոթությունը ցույց է տալիս, որ Սատիսյանի բնութագրմամբ «արտաբուստ չափազանց սիրալիր ու քաղաքավարի» այդ թուրք գինվորականը՝ Կարաբեքիր փաշան, նաև բավականին թրժված դիվանագետ էր, գործում էր խիստ նպատակասլաց, ժամանակից շուտ չէր բացում իր խաղաթղթերը: Պատվիրակության անդամ Վահան Մինախոյանը վկայում է, որ առաջին ոչ պաշտոնական հանդիպումների (նոյեմբերի 24-ի և 25-ի) ժամանակ նա ավելի շատ խոսում էր ազգերի ինքնորոշման իրավունքի, հանրաքվե կատարելու, փոխադարձ տրանզիտի, գաղթականների վերադարձի, նույնիսկ Հայաստանին պարենով օգնելու մասին և այլն: Ճիշտ է, նա խոսում էր նաև «Թուրքիո ապահովություն իրական երաշխիքի» մասին⁴, բայց առանց պարզաբանելու, թե ինչ է դա նշանակում: Հետո

միայն պիտի պարզվեր, որ դա նշանակում էր Սևրի պայմանագրից հրաժարում և Հայաստանի Հանրապետության անդամահատում այն աստիճանի, որ նա այլևս Թուրքիայի համար որևէ վտանգ չներկայացնի: Ահա ինչու միայն այն բանից հետո, երբ նոյեմբերի 27-ին՝ կոնֆերանսի երկրորդ նիստում, լսեց Սատիսյանի հայտարարությունն այն մասին, որ Հայաստանի կառավարությունը «ցանկանալով նոր էջ բաց անել երկու պետությունների փոխհարաբերությունների մեջ և երկարատև դաշինքով բարեկամական հարաբերություններ հաստատել Տաճկաստանի և Հայաստանի միջև, – հրաժարվում է Սևրի դաշնագրից»¹, համաձայնեց լսել հայոց պահանջների մասին: Այդ օրը կողմերը պայմանավորվեցին մինչև հաջորդ նիստի գումարումը մշակել տարածքային սահմանագծման վերաբերյալ նախագիծ և բացատրական զեկուցագրի հետ մեկտեղ ներկայացնել միմյանց: Ըստ որում, հաջորդ նիստի գումարման օրվա մասին որևէ հայտարարություն չէր արվել:

«27-ին մինչև ուշ գիշեր, – գրում է Սատիսյանը, – մենք կը գրեինք մեր բացատրական զեկուցագիրը և կը գծեինք քարտեսի վրա մեր պահանջած սահմանները»²: «Բացատրական զեկուցագրին» մենք չենք անդրադառնա, քանի որ նրանում արծարծված հարցերը (զանազան երկրներից հայերի Հայաստան վերադարձողների հնարավոր թվաքանակի և այլն) դուրս են մեր հետաքրքրություններից: Ինչ վերաբերում է տարածքային պահանջներին, որոնք զետեղված էին քարտեզի վրա, ապա այդ մասին կա Սատիսյանի հետևյալ վկայությունը. «Հայաստանի կառավարութեան կողմէ մեզի տրված հրահանգներուն համաձայն, մենք վճռել էինք պաշտպանել Հայաստանի սահմանները՝ մտցնելով անոնց մեջ ամբողջ ռուսական Հայաստանը, Վան, Մուշ, ամբողջ Վանա լիճը, Բիզե նավահանգստով՝ թողնելով էրզրումը և Տրապիզոնը թուրքերուն: Էրզրումը և Տրապիզոնը թուրքերուն թողնելը մենք կը համարեինք իբրև գիշում մեր կողմէն»³:

Թե ինչպես է արձագանքել Կարաբեքիրը Սատիսյանի ներկայացրած քարտեզին (հանձնվել էր նոյեմբերի 28-ին), կտեսնենք քիչ հետո, իսկ հիմա նախ փորձենք պարզել ներկայացված պահանջների վերաբերյալ Սատիսյանի հիմնավորումը. «Իհարկե, եթե պատվիրակությունը այդ ժամանակ կանգնած լիներ բացառապես հաղթողներու և պարտվածներու տեսակետի վրա, և այդ պարագային Հայաստանը,

¹ Ալ. Սատիսյան, նշվ. աշխ., էջ 263:

² Նույն տեղում, էջ 264:

³ ՀԱԱ, ֆ. 200, ց. 1, գ. 636, մաս I, թ. 47:

⁴ Նույն տեղում, գ. 636, թ. 1:

¹ Նույն տեղում, գ. 636, մաս 1-ին, թ. 64:

² Ալ. Սատիսյան, նշվ. աշխ., էջ 267:

³ Նույն տեղում, էջ 263:

իհարկե, պարտված կողմն էր, ան պետք է համաձայնեիր, որ խոսք կարող է լինել միայն ամենահամեստ սահմաններու մասին: ...Բայց մեր պատվիրակությունը կը կարծեիր, որ թուրքերը կը ցանկանան կենսունակ Հայաստանի մը ստեղծումը. որը օգտակար էր իրենց պետական շահերու տեսակետեն, ինչպես որ այդ մասին շարունակ կը հայտարարեին թուրք պետական գործիչները»¹ (ընդգծումը մերն է – է. Զ.):

Ինչպես տեսնում ենք, թուրքական դիվանագիտության գործադրած ջանքերը՝ հայ քաղաքական գործիչների մոտ առաջ բերելու մտայնություն, որ իբր իրենք չահագրգռված են, որ Հայաստանը կենսունակ լինի, անտեղի չէր անցել: Արդյո՞ք դա հայ քաղաքական և պետական գործիչների դուրահավատության, թե մեկ այլ բանի հետևանք էր, այստեղ մենք չենք քննարկի, այլ կբավարարվենք միայն արձանագրելով, որ ոչ վաղ անցյալի դեպքերը և հենց զինադադարի թուրքական ահավոր ծանր պայմանները, որոնք հավասարազոր էին կապիտուլյացիայի, նրանց պետք է հակառակի մեջ համոզեին:

Ոստելով տարածքային-սահմանային խնդիրների վերաբերյալ հայկական պատվիրակության կազմած քարտեզի մասին, չենք կարող շրջանցել մի հարց ևս, այն է. ինչո՞ւ են հայ պատվիրակները Կարաբեքիրին ներկայացրել Հայաստանի ամբողջական քարտեզը՝ նրա մեջ ներառելով Ռուսա-Հայաստանն ամբողջությամբ, և ոչ թե միայն թուրքիայի հետ իրենց պահանջած սահմանագիծը: Դա մեզ տարօրինակ է թվում այն պարզ պատճառով, որ Հայաստանը տարածքային խնդիրներ ուներ նաև Վրաստանի և Ադրբեջանի հետ ու թուրքիայի գործը չէր, թե ինչպես դրանք կլուծվեն նշված հարևանների հետ, կամ կլուծվե՞ն, թե՞ ոչ: Մնում է ենթադրել, որ դիմելով այդ քայլին, հայ պատվիրակները, ըստ երևույթին, ցանկացել են հասնել նրան, որ թուրքիան ճանաչի Հայաստանի իրավունքները Անդրկովկասյան հանրապետությունների հետ վիճելի համարվող տարածքների վրա: Ինչ էլ որ լինեիր հայ պատվիրակների նպատակը, մի բան փաստ է. Կարաբեքիրը հենց այդպես է հասկացել ու պատասխանել. «Վրաստանի և Ադրբեջանի տերիտորիայում գտնվող պահանջված հողամասերը այստեղ խնդրո առարկա դարձնելը մենք նպատահարմար չենք գտնում՝ ի նկատի ունենալով թուրքիայի խաղաղասիրական քաղաքականությունը»²:

Ինչ խոսք, որ եթե թուրքիան իրոք անչահախնդիր լիներ ու չեզոքություն պահանջներ կովկասյան հանրապետությունների միջև տա-

րածքային վեճերի հարցում, ապա գուցե կարելի լիներ նրա վարած քաղաքականությունը որակել որպես «խաղաղասիրական»: Բայց խնդիրն էլ հենց այն է, որ թուրքիան՝ ո՛չ անցյալում և ո՛չ էլ այդ օրերին, անչահախնդիր ու չեզոք չէր, այլ հակառակը՝ հենց ինքն էր հրահրում և օգտագործում տարածքային հավակնությունների պատճառով ծագած հակասությունները՝ սեփական զավթողական նպատակների իրականացման համար: Հիշենք, թեկուզ, 1919 հուլիս-օգոստոսին թուրքիայի հրահրանքով և ակտիվ մասնակցությամբ Շարուր-Նախիջևանում ծագած հակահայկական ապստամբությունը: Դա ավելի քան մեկ տարի առաջ էր, Կարաբեքիրը գուցե «մոռացել» էր այդ մասին: Բայց ի՞նչ որակում տանք Հայաստանի դեմ պատերազմի սանձազերծման գործում հայ-վրացական տարածքային վեճն Անկարայի կողմից օգտագործելու փաստին, որի մասին տեղեկությունը հայտնել էր ինքը՝ Կարաբեքիրը նախորդ օրը, նոյեմբերի 29-ի երեկոյան Սատիսյանի հետ առանձին տեսակցության ժամանակ: Որպեսզի ընթերցողն էլ տեսնի, թե ինչի մասին է խոսքը, ու նաև համոզվի թե որքան կեղծիք ու երկդիմություն կար Կարաբեքիրի վերը մեջբերված պատասխանում, հարկադրված ենք մի փոքր շեղվել և անդրադառնալ այդ առանձնագրույցին:

Նախ ասենք, որ առանձին տեսակցության նախաձեռնողը Կարաբեքիրն էր, իսկ նպատակը՝ դատելով գրույցի բովանդակությունից, Սատիսյանի վրա բարոյա-հոգեբանական ճնշում գործադրելը և ներկայացվելիք թուրքական ծանր պայմանները ընդունելու օգտին տրամադրելը: Դրա համար էլ չուրջ երեք ժամ տևած գրույցի ժամանակ «Կարաբեքիր փաշան կաշխատեիր համոզել, որ հայերը լքված են և պետք է փնտրեն ամեն կերպ մոտենալ թուրքերին: Ան կանգ առավ Ազգերու լիգայի մեջ արտասանած ապարդյուն ճառերու վրա՝ չեչտելով, որ Եվրոպան օգտագործած է մեզ արդեն և այլևս մեր կարիքը չունի: Ըսավ, թե Ռուսաստանը, իր պատմական առաջխաղացման մեջ դեպի հարավ և տաք ծով, կը կլանե Կովկասը և թե առանց թուրքիո օգնության և հովանավորության մենք պիտի չկարողանանք պահել մեր գոյությունը»¹:

Ասել, թե Կարաբեքիրի այս խոսքերը հեռու էին իրականությունից, ճիշտ չի լինի: Հայաստանն իսկապես լքված էր բոլորի կողմից, և դա Սատիսյանի համար նորություն չէր, բայց ահա Վրաստանի մասին նրա ասածը Սատիսյանին շատ դարմացրեց.

¹ Նույն տեղում:

² ՀԱԱ, ֆ. 200, ց. 1, գ. 602, թ. 427:

¹ Ալ. Սատիսյան, նշվ. աշխ. էջ 267:

«Ոտուելով մեր հարեաններու մասին, - գրում է Սատիսյանը, - Կարարեքիրը կանգ առավ Վրաստանի վրա: Վրաստանի մասին անոր ըսածը առանձնապես ուշագրավ էր.

- Դեռ հայերու դեմ պատերազմական գործողություններ սկսելէ առաջ, - ըսավ ան, - Անգորայի ներկայացուցիչները՝ ի դեմս Յուսուֆ Քեմալ բեյի և Ալի Ֆուաթ փաշայի, 1920 թվի ամռանը եղան Թիֆլիս և վրաց կառավարության հետ դաշն կապեցին, որի գործով Վրաստանը հայ-թուրքական պատերազմ ծագելու պարագային պետք է չեզոքություն պահէր և ասոր փոխարեն պետք է ստանար Բորչալուի և Ախալքալաքի գավառները և Արդահանի շրջանը: Կարարեքիրը նույնիսկ ցույց տվավ այն քարտեզը, որուն վրա գծված էին Վրաստանի սահմանները, համաձայն չեզոքության մասին կնքված դաշնագրի»¹:

Կարծում ենք՝ Կարարեքիրից ստացած այս տեղեկությունը Սատիսյանի համար ոչ «առանձնապես ուշագրավ» և ոչ էլ զարմանալի պետք է լինեին, քանի որ Անկարայի և Թիֆլիսի միջև կայացած այդ հակահայկական համաձայնության մասին ժամանակին ընդարձակ հաղորդագրություն էր տպագրվել Ստամբուլում լույս տեսնող Փրանսալեզու «Ժուռնալ դե Օրիանը» (հոկտեմբերի 19-ի համարում), որը և թարգմանաբար հրատարակել էր նաև «Մշակը» նոյեմբերի 5-ի և 11-ի համարներում: Այլապես պետք է ընդունենք, որ մամուլում տպագրված նման կարևոր տեղեկությունները հայ դիվանագետների ուշադրությանը չէին արժանանում: Սակայն վերադառնանք Կարարեքիր-Սատիսյան առանձնագրույցին և տեսնենք, թե ինչ նպատակով էր թուրք գործվարը նման պետական գաղտնիքը հայտնում Սատիսյանին. «Այդ պատմությունը վերջացնելով, - շարունակում է Սատիսյանը, - Կարարեքիր փաշան ակնարկեց, որ թուրք-վրացական պատերազմի պարագային, Հայաստանի հետ խաղաղություն կնքելէ հետո, հայերը Հայաստանի չեզոքությանը կարող են ստանալ Ախալքալաքի գավառը և Բորչալուի գավառի մեկ մասը»²:

Ուշադիր ընթերցողը անպայման կնկատի, որ թուրքերը վրացիներին ավելի շատ բան էին խոստացել, քան հայերին էին առաջարկում: Բայց մենք սահմանափակվենք այսքանով և վերադառնանք մեր բուն խնդրին՝ մի անգամ ևս չեչտելով, որ թուրք-վրացական գործարքի մասին վերը շարադրածը ակնհայտորեն ցույց է տալիս, որ Վրաստանի և Ադրբեջանի հետ Հայաստանի տարածքային վեճերին չանդրադառնալը

«Թուրքիայի խաղաղասիրական քաղաքականությունը» պատճառաբանելը բացահայտ կեղծիք էր:

Սիրալիրությունը և քաղաքավարությունը սկսված առանձնագրույցը միանգամայն այլ ավարտ ունեցավ: Սահմանային հարցերի մասին խոսելիս՝ Կարարեքիրը մի կողմ էր դրել քաղաքավարությունը, խոսում էր հարձակողական տոնով, Սատիսյանին սպառնում «ցրիվ տալ» նրա պատվիրակությունը, անկարելի համարում հայկական պահանջների քննարկումը: Սատիսյանը հետևյալ կերպ է նկարագրել գրույցի այդ հատվածը.

«Ապա Կարարեքիրը անցավ խաղաղության մեր պայմաններուն և հուզված բացականչեց.

- Ձեր պայմանները մեզ ուղղակի ապշեցուցին: Եվ դուք՝ նստած Ալեքսանդրապոլ՝ պարտություն կրեեէ հետո կը պահանջեք Մուշ և Վան: Ի՞նչ կը լինեք, եթե դուք նստած ըլլայիք Վան: Ի՞նչ կը մնար Թուրքիային: Հավատացեք, որ ձեր պայմանները մենք պետք է ծածկելինք մեր սպաններն և զինվորներն, ապա թե ոչ անոնք ցրիվ պիտի տային ձեր պատվիրակությունը: Իմ սպայակույտի սպանները պահեցին գաղտնիքը: Քննության առնել ձեր այս պայմանները անկարելի է: Մտածեցեք»¹:

Ձենք կարծում, թե նոր և նորագույն ժամանակների դիվանագիտության պատմությանը հայտնի լինի դեպք, երբ բանակցող կողմերից մեկը մյուսին սպառնացել է ֆիզիկական հաշվեհարկով: Կարարեքիրը գործում է միջնադարյան մեթոդներով, նա նաև առարկություններ չի ընդունում (Սատիսյանը փորձել էր հիմնավորել, որ նման սահմանագծումը անհրաժեշտ է հայ ժողովրդի «գոյության և ապագայի համար», որ նույնիսկ «Թուրքիո համար կարևոր է ունենալ իբրև հարևան կենսունակ Հայաստանը մը»), այլ հայտարարում է, որ վաղն ևեթ «կուղարկե իր առարկությունները կետ առ կետ և իր հակաառաջարկները»:

Հայաստանի ազգային արխիվում հայերեն թարգմանությունը պահպանվել է այն փաստաթուղթը, որն իր խոստման համաձայն նոյեմբերի 30-ին Կարարեքիրն ուղարկել է հայ պատվիրակներին: Այն կրում է «Հայաստանի Հանրապետության հաշտության պատվիրակության նախագահության» խորագիրը և բավականին ընդարձակ է (տպագիր 8 էջ) ու բազմաբնույթ²: Նրանում չոչափված են պատմա-

¹ Նույն տեղում, էջ 268:

² Նույն տեղում:

¹ Նույն տեղում:

² Տե՛ս ՀԱԱ, ֆ. 200, ց. 1, գ. 602, թ. 424-427:

կան, ազգագրական, մշակութային, առևտրական և այլ կարգի հարցեր՝ ամբողջովին հակահայկական դիրքերից (Ուրարտական պետությունը հիմնադրել են թուրանյան ցեղերը, հայկական երաժշտությունը թուրքական արմատներ ունի և այլն, և այլն): Մենք դրանց չենք անդրադառնա, քանի որ դա մեզ շատ կշեղի ու հեռուն կտանի: Մեզ հետաքրքրող սահմանային-տարածքային հարցերը տեղ են գտել փաստաթղթի վերջին՝ 8-րդ էջում: Այստեղ Կարաբեքիրը նախ պատերազմի սանձազերծման մեղքը ամբողջովին Հայաստանի վրա է բարդում՝ գրելով.

«Հիմնապես այս պատերազմը հիշելու մղող պատճառները երկու կետերի մեջ են կայանում.

Ա. Մեր հողային ամբողջությունը քաղաքական և զինվորական արտաքին սպառնալիքներից պաշտպանելը և

Բ. Հայաստանին ոչ իրավացի ձևով կցված թուրք և մահմեդական հողամասերի վրա Հանրապետության կողմից ձեռք առած և գործադրած սպանություն և ոչնչացման քաղաքականության դեմ հարկ եղած մարդկային պարտականություն կատարելը»¹:

Պարզվում է, որ «մարդկային պարտականություն» կատարող Կարաբեքիրի համար անկասկած է, որ «Երևանի կառավարությունը այդ երկու դրդապատճառները պատրաստել է մի կողմից (Թուրքիայի - է. Զ.) սահմանների վրա կատարած զինյալ հարձակումով, և մյուս կողմից սահմաններից ներս ըրած կոտորածներով»: Հետևապես «տեական մի հաշտություն հաստատելու և երկու ազգերի խաղաղությունը ապահովելու համար սույն երկու դրդապատճառները չկրկնելը անհրաժեշտ գրավականը լինելով և Թուրքիո ապահովությունը և մահմեդական ժողովուրդների կյանքի պահպանությունը ապահովելու համար ուժեղ և գործնական ապահովություններ ստանալը կենսական պարտավորություն է»²:

Այսպես է Կարաբեքիրը նախապատրաստել այն, ինչը իրավամբ կարող ենք անվանել Հայաստանի Հանրապետության անդամահատում: «Ինչպես որ Ղարսի վիլայեթում մեր գերիշխանությունը հայտնապես, պատմականորեն և ցեղագրությունը չէ կարելի հերքել, - ասված է գրություն շարունակության մեջ, - նույնպես միևնույն հաստատ պատճառներով անհրաժեշտ է նաև Երասխ գետը սահման համարել»³:

Նախ ասենք, թեկուզ հակիրճ, որ Կարսի մարզի վերաբերյալ վկա-

յակոչված հիմնավորումներն ամբողջովին կեղծ են և իրականությունը չեն համապատասխանում: Կարսում ամենամեծ էթնիկ խումբը միշտ էլ հայերն են եղել: Դրանում համոզվելու համար բավական է նայել արխիվներում պահվող «Կովկասյան կալենդար»-ի (ոուսերեն) 1916թ. համարը: Ինչ վերաբերում է Արաքս գետը սահման հաստատելու հիմնավորմանը, ապա այստեղ այնքան էլ հստակ չէ, թե «միևնույն հաստատ պատճառներ» ասելով Կարաբեքիրը ո՞ր հիմնավորումները նկատի ունի, արդյո՞ք Կարսի մարզի համար վկայակոչվածները, թե՞ «ուժեղ և գործնական ապահովություններ» ստանալը: Դա մնում է Կարաբեքիրի գաղտնիքը: Բայց նաև չենք կարող ընթերցողին չհիշեցնել, որ Արաքսի աջ ափին գտնվող Սուրմալուի գավառը երբեք Թուրքիայի տիրապետության տակ չէր եղել և, որպես Երևանի խանություն մաս, Ռուսաստանին էր անցել Թուրքմենչայի պայմանագրով: Հենց այդ պատճառով էլ գավառում էթնիկ թուրքեր համարյա չկային, այն հիմնականում բնակեցված էր հայերով և քրդերով: Ավելին, այդ գավառը նույնիսկ տեղ չէր գտել 1920թ. հունվարի 28-ին օսմանյան պառլամենտի ընդունած և քեմալականների համար գործողության ուղեցույց դարձած «Ազգային ուխտի» գծած սահմաններում: Չնայած դրան, չնայած այդ ամենին, Արաքս գետը սահման հռչակելով, Կարաբեքիրը Սուրմալուի գավառը ևս կտրում էր Հայաստանից և միացնում Թուրքիային: Բայց դրանով էլ չի բավարարվում և որոշում է ձախ ափից էլ մի համեղ պատառ պոկել: Իհարկե, խոսքը Նախիջևանի երկրամասի մասին է:

Հանրահայտ է, որ Նախիջևանի երկրամասի նկատմամբ Թուրքիայի և Ադրբեջանի հետաքրքրությունը միշտ էլ պայմանավորված է եղել ոչ թե տնտեսական, այլ քաղաքական գործոնով: Հակիրճ լինելու համար միայն նշենք, որ դա մի կամուրջ է, որի վրայով այդ երկու թուրքական պետությունները կարող են կապվել միմյանց հետ: Այդ է պատճառը, որ թուրքերը միշտ էլ սևեռուն հետևել են Նախիջևանի երկրամասում և նրա շուրջ կատարվող իրադարձություններին, հիվանդագին արձագանքել ու ամեն ջանք գործադրել խանգարելու նրա միացմանը Հայաստանին: Հիշենք թեկուզ 1919թ. ամառային իրադարձությունները Շարուր-Նախիջևանում և այն աղմուկն ու բողբոլը, որ բարձրացրին Թուրքիան և Ադրբեջանը 1920թ. օգոստոսի 10-ի Լեզրան-Ջամալյան համաձայնագրի կապակցությամբ: Սակայն բոլոր այդ դեպքերում թուրքերը երբևէ չեն ակնարկել, թե իրենք էլ կարող են հավակնել Շարուր-Նախիջևանի երկրամասի վրա, նրանք հանդես էին գալիս Ադրբեջանի շահերի պաշտպանությունը: Եվ թվում էր, թե

¹ Նույն տեղում, թ. 427:

² Նույն տեղում:

³ Նույն տեղում:

Ալեքսանդրապոլի կոնֆերանսում չպետք է շոշափվեր Շարուր-Նախիջևանի հարցը, նախ որովհետև այն ոչ թե հայ-թուրքական, այլ հայ-ադրբեջանական վեճի առարկա էր և հետո՝ պաշտոնապես հռչակված էր ուսական օկուպացիայի տակ գտնվող տարածք: Բայց նոյեմբերի վերջին օրերին հանկարծ պարզվում է, որ Անկարային հետաքրքրում է նաև այդ հարցը: Նախ նոյեմբերի 27-ին Կարաբեքիրը հայկական հրամանատարությունից պահանջում է զորքերը հետ քաշել Շարուրի գավառակի և հարակից շրջանների այն մասերից, որոնք դեռևս գտնվում էին հայերի հսկողությունից տակ, իսկ այնուհետև՝ նոյեմբերի 30-ին, հայկական պատվիրակությունը ներկայացրած հակառակ-ջարկների շարքում ավելացնում հետևյալ պահանջը. «Երկու տարուց ի վեր իրենց ազգային գոյություն համար շարունակաբար վեճի առարկա դարձած Նախիջևանը, Ծա՛թախիթը, Շարուրը և նրանց կից հողամասերը, շատ իրավացիորեն իրենց կյանքի պահպանությունը մարդկային մի պարտականություն լինելով, մինչև որ ընդհանուր քվեով ճակատագիրը որոշվի, բնական և ստիպողական գտնում է, որ այն տեղերը Թուրքիո պաշտպանություն ներքո հիմնվի մի ինքնավար վարչություն»¹ (ընդգծումը մերն է - է. Զ.):

Մեզ շատ տարօրինակ և անբացատրելի է թվում, թե Անկարան ինչպե՞ս է հանդգնել տիրանալու մի երկրամասի, որտեղ դեռևս հուլիսի վերջին՝ ուսական զորամասի Նախիջևան մուտք գործելուց առաջ, հեղկոմ էր ստեղծվել, երկրամասում խորհրդային իշխանություն հաստատելու մասին հայտարարություն էր արվել և որտեղ թուրքական ուժերի հետ մեկտեղ ուսական մեկ զորամաս կար, մի երկրամասի, որի նկատմամբ չէր կարող վկայակոչել ո՛չ պատմական, ո՛չ իրավական, ո՛չ մեկ այլ իրավունք և որը վեճի առարկա է եղել ո՛չ թե Հայաստանի և Թուրքիայի, այլ Հայաստանի և Ադրբեջանի միջև: Թվում էր, թե Խորհրդային Ռուսաստանի նյութական, ֆինանսական օգնությունն ու քաղաքական աջակցությունը վայելող քեմալական Թուրքիան չպետք է ձեռնարկի գործողություններ, որոնք կհակասեն իր դաշնակցի շահերին: Մինչդեռ, ինչպես տեսնում ենք, Անկարային բոլորովին չէր մտահոգել այն հանգամանքը, որ իր այդ քայլով կարող է առաջ բերել Մոսկվայի դժգոհությունը և հակագործողությունները՝ թեկուզ հենց այն պատճառով, որ օգոստոսի 10-ի հայ-ուսական համաձայնագրով Շարուրի գավառը ճանաչել էր Հայաստանի մաս, իսկ Նախիջևանի գավառը՝ ժամանակավոր օկուպացիայի տակ գտնվող տարածք, որի

պատկանելիությունը հարցը պետք է լուծվեր Մոսկվայի ներկայացուցչի մասնակցությամբ գումարվելիք հայ-ադրբեջանական կոնֆերանսում:

Անտարակույս է, որ Անկարան իր այդ քայլով կոպտորեն ոտնահարում էր ոչ միայն Հայաստանի և Ադրբեջանի, այլ նաև Ռուսաստանի իրավունքներն ու շահերը: Պարտված Հայաստանը ի վիճակի չէր պայքարելու իր իրավունքների համար, Թուրքիան պայմանները նրան թեւադրում էր և ոչ թե նրա հետ քննարկում: Ադրբեջանը, հասկանալի է, չէր դժգոհի կամ բողոքի, քանի որ Նախիջևանի հարցի նման լուծումը նրա համար ավելի ընդունելի էր, քան անցումը Հայաստանին: Մնում էր Խորհրդային Ռուսաստանը, միակ շահագրգիռ կողմը, որն այդ երկրամասին տիրացել էր շուրջ մեկ դար առաջ Պարսկաստանի հետ կնքած Թուրքմենչայի պայմանագրով: Որպես ցարական Ռուսաստանի իրավահաջորդ, միջազգային իրավունքի տեսակետից նա չէր կորցրել իր իրավունքն այդ երկրամասի վրա: Ուստի Ռուսաստանի խորհրդային կառավարությունը ոչ միայն կարող էր բողոքել, այլև դուրս քշել Թուրքերին Շարուր-Նախիջևանից: Դժբախտաբար դա նա չարեց՝ Անտանտի դեմ պայքարողի քողի տակ հանդես եկող իր դաշնակցին չնեղացնելու համար: Բոլշևիկյան ղեկավարությունը հետագայում միայն պետք է հասկանար, թե որքան մեծ սխալ է թույլ տվել քեմալական Թուրքիայի նկատմամբ հանդուրժողական քաղաքականություն վարելով:

Կովկասում գործող բոլշևիկյան գործիչների շարքում Լեգրանը միակն էր, որ Մդիվանու հեռագրերից տեղեկանալով, որ Կարաբեքիրը գտնում է, որ Նախիջևանը չի կարելի տալ Հայաստանին, անմիջապես դիմում է իր կառավարությունը և պահանջում միջամտել ու չափավորել Թուրքերի ախորժակը: Նոյեմբերի 28-ին Ջիզերինին հասցեագրած հեռագրում խոսելով այն մասին, որ Մդիվանուց ստացած տեղեկությունները ցույց են տալիս, որ Թուրքերը Հայաստանին ծանր պայմաններ են ներկայացնելու, հետևապես անհրաժեշտ է Մդիվանուն ցուցումներ տալ, թե ինչպիսի պահանջներ հետագայում պետք է պաշտպանել հօգուտ Հայաստանի, միաժամանակ ավելացնում է. «...մեր շահերի համար խիստ անհրաժեշտ են համարում Ղարաքիլիսա-Ալեքսանդրապոլ-Երևան-Նախիջևան երկաթուղագիծը պահելը»¹ (ընդգծումը մերն է - է. Զ.): Այդ նույն հեռագրում Լեգրանը նաև Ջիզերինի ուշադրություն է հրավիրում Անկարայի քողարկված հակաուսական

¹ Նույն տեղում:

¹ «Հայաստանի Հանրապետությունը 1918-1920թթ. փաստաթղթերի...», էջ 364:

քաղաքականություն վրա, որ նա գործադրում էր Հայաստանում. «Միջնորդությունից հրաժարվելը, թուրքերի կողմից Հայկական հեղկոմի կազմավորումը, նոր պահանջները, որ նրանք ներկայացրել են Հայկական հրամանատարությունը՝ Շահթախթիին հարող Շարուրի գավառի հարավ-արևելյան մասից զորքերը հետ քաշելու մասին, այդ ամենը վկայում են մեզ մեկուսացնելու և նախաձեռնությունը իրենց ձեռքում պահելու թուրքերի ձգտման մասին»¹ (ընդգծումը մերն է - է. Զ): Լեզրանը նաև պահանջում է արագ ու վճռական որոշումներ ընդունել, ինչպես նաև Կովկասում գործունեություն ինքնուրույն ծրագիր մշակել, որի հետ թուրքերը ստիպված լինեն հաշվի նստել: Իսկ Մոզովանու վարքագիծը համարում է անորոշ, գտնում, որ նա ամբողջովին ընկել է թուրքական պլանների ազդեցություն տակ:

Ինչպես տեսնում ենք, Նախիջևանը Հայաստանին թողնելը Լեզրանը դիտում էր Ռուսաստանի շահերի տեսանկյունից: Բայց դա համապատասխանում էր նաև հայ ժողովրդի շահերին, եթե, իհարկե, հարցը դրական լուծում ստանար: Ի միջի այլոց, նույն ոգով մի հեռագիր էլ Լեզրանը նոյեմբերի 29-ին ուղարկել էր Մոզովանուն. «Թուրքերը ի՞նչ պայմաններով են մտածում հաշտություն կնքել Հայաստանի հետ, նրանք ի՞նչ են հաղորդել Ձեզ այդ մասին, Ձեր կողմից ի՞նչ հայտարարություններ են արվել: Ձի կարելի Հայաստանի հարցից մեզ մեկուսացնելու թուրքերի ձգտմանը պասիվ վերաբերվել: Կարաբեքլը լրացուցիչ պահանջել է զորքերը հետ քաշել Շահթախթի շրջանից և Շարուրի գավառի մի մասից՝ թուրքերը Նախիջևանն ազատում են իրենց համար»² (ընդգծումը մերն է - է. Զ):

Դժբախտաբար, ինչպես և մի շարք այլ դեպքերում, այս անգամ էլ Լեզրանի ջանքերը դրական հետևանքների չհանգեցրին: Նոյեմբերի 30-ին Օրջոնիկիձեն Լենինի և Ստալինի ստորագրությամբ մի հեռագիր ստացավ, որում ասված էր. «Կարսի պատճառով քեմալականների հետ կովել պետք չէ, բայց ամեն ինչում ուղղակի զիջել նմանապես չի կարելի: Անհրաժեշտ է քեմալականներից Ալեքսանդրապոլը ստանալ Հայաստանի համար, որը խորհրդային է դառնում: Եթե միջնորդությունից խուսափելը բացառում է մեր մասնակցությունը Հայաստանի և Թուրքիայի միջև հաշտության բանակցություններին, ուրեմն հարկավոր է ինչպես թուրքերին, այնպես էլ հայերին հիշեցնել, որ այդ դեպքում

Ձանգեզուրի և Նախիջևանի հարցը չի կարող հայ-թուրքական կոնֆերանսի քննարկման առարկա լինել, քանի որ այդ երկու մարզերը վիճելի են հանդիսանում Հայաստանի և Ադրբեջանի միջև, որի հետ Ռուսաստանը դաշինքի մեջ է գտնվում»¹ (ընդգծումը մերն է - է. Զ):

Այսքանը միայն, թույլ ու անվճռական: Ուրիշ ի՞նչ որակում կարելի է տալ այս հեռագրին, որում խոսվում է միայն «հիշեցնելու» մասին: Չկա բողոք, չկա պահանջ: Չկա նաև փաստ, թե Օրջոնիկիձեն որևէ քայլ է ձեռնարկել այդ ուղղությամբ, այլապես արխիվներում որևէ տեղեկություն կպահպանվեր (Հայաստանի և Թուրքիայի կառավարություններին Օրջոնիկիձեն կարող էր դիմել Երևանում գտնվող Լեզրանի միջոցով): Անգամ եթե Օրջոնիկիձեն դիմեր Թուրքիայի և Հայաստանի կառավարություններին, ի՞նչ ազդեցություն դա կունենար: Չէ՞ որ նա ոչ պետություն ղեկավար էր, ոչ էլ արտաքին գործերի ժողկոմ: Ինչո՞ւ այդպիսի կարևոր հարցում Չիչերինը չէր դիմում համապատասխան կառավարություններին: Սրանք հարցեր են, որոնք զայիս են վկայելու, որ Մոսկվան այդ կարևոր խնդրին լրջությամբ չի վերաբերվել: Իսկ Օրջոնիկիձեն էլ այդ օրերին զբաղված էր Հայաստանի խորհրդայնացումով, ինչի մասին տեղյակ էին նաև Մոսկվայում:

Մի հարց ևս. նույն օրը՝ նոյեմբերի 30-ին, Բաքվում Ադրբեջանի կոմկուսի Կենտկոմի Քաղբյուրոյի և Կազմբյուրոյի միացյալ նիստում, որին մասնակցում էին նաև Օրջոնիկիձեն, Ստասովան և այլ հայտնի բոլշևիկներ, Հայաստանի խորհրդայնացման կապակցությամբ վիճելի տարածքների վերաբերյալ կայացվել է որոշում, որով Ձանգեզուրը և Նախիջևանը հռչակվում էին Հայաստանի մաս, իսկ Լեոնային Ղարաբաղի ազգաբնակչությանը ինքնորոշման իրավունք էր վերապահվում: Կասկած չի կարող լինել, որ նման որոշում կայացնելու գաղափարը հենց այդ նիստում կամ այդ օրը չի ծագել, այլ հավանաբար օրեր առաջ, Հայաստանի խորհրդայնացումը նախապատրաստելու ժամանակաշրջանում: Ճիշտ է, մեր ձեռքի տակ ներկայումս կոնկրետ վկայություններ չկան (այդպիսիք կարող են լինել Բաքվի արխիվներում), բայց նիստերի և նման այլ միջոցառումների աշխատանքներին առընչված յուրաքանչյուր ոք կհաստատի, որ նման կարևոր հարցերը նախապատրաստվում են օրեր առաջ, հաճախ նաև շատ երկար: Անտարակույս է նաև, որ նախապատրաստելով Հայաստանի խորհրդայնացումը, Մոսկվան և Կովկասում գործող ղեկավար բոլշևիկները (Օրջո-

¹ Նույն տեղում:

² Նույն տեղում, էջ. 366:

¹ Նույն տեղում, էջ. 378:

նրկիձե, Կիրով, Ստասովա և ուրիշներ) չէին կարող բավարարվել միայն Հայաստան գործեր ուղարկելով: Նրանք նաև պետք է քայլեր ձեռնարկեին խորհրդային իշխանությունների հանդեպ Հայ ժողովրդի համակրանքը չահելու ուղղությամբ: Առավել ևս, որ Թուրք-Հայկական պատերազմի չրջանում Հայոց մեջ արմատավորվել էր այն կարծիքը, որ քեմալական թուրքերը ոռու բուլղերի կաշնակիցներն են և գործում են նրանց գիտություններ: Իսկ ի՞նչը կարող էր Հայ մարդու համար ավելի սրտամոտ լինել, քան տարածքային վեճերի հայանպաստ լուծումը:

Բաքվում կայացված վերոհիշյալ որոշմանը և դրան հաջորդած Նարիմանովի հայտնի դեկրետին և նրա հետ առնչվող հարցերին մենք այստեղ չենք անդրադառնում, դա Հայաստանի խորհրդայնացմանն առնչվող խնդիր է: Բայց չենք կարող չըջանցել մեկ այլ հարց, այն է. կա՞ր արդյոք կապ Բաքվում նախապատրաստվող որոշման և Կարաբեքիրի կողմից Նախիջևանի երկրամասի նկատմամբ ներկայացված պահանջի միջև: Այլ կերպ ասած, Անկարան տեղյա՞կ էր Բաքվում ընդունելիք որոշման մասին, թե՞ ոչ: Դարձյալ մենք կոնկրետ փաստեր չունենք, բայց նախ լսենք, թե ինչ է ասել Ս. Վրացյանը այդ օրերի իրադարձությունների վերաբերյալ թուրքերի տեղեկացվածություն մասին. «Ընկ. Սատիսյանը խնդրում էր առանց ուշացնելու տալ հրահանգներ, որովհետև տաճիկները շատ են շտապում, - գրում է Ս. Վրացյանը: - Երևանում կատարվող դեպքերը, որոնց մասին նրանք զարմանալի կերպով լավ էին տեղյակ, ջղայնացնում էին նրանց: Տաճիկները, ըստ երևույթին, վախենում էին իրենց դաշնակից բալչևիկների խաղերից և շտապում էին օր առաջ ստորագրել հաշտությունը»¹ (ընդգծումը մերն է - է. Ջ): Դե, եթե Երևանում կատարվող դեպքերին «լավ էին տեղյակ», որտեղ, ի դեպ, ոչ մի ներկայացուցիչ չունեին, ապա որքան ավելի լավատեղյակ կլինեին Բաքվի անցուղարձին, որտեղ վաղուց (1919թ.) լեզալ գործող կոմիտե ունեին և այլ կարգի ներկայացուցիչներ, որոնց հետ մշտական կապերի մեջ էին և կանոնավոր կերպով տեղեկություններ էին ստանում Բաքվի անցուղարձի մասին: Եվ ինչո՞ւ այդ տեղեկատվությունը չէր կարող բխել հենց Նարիմանովից կամ նրա չրջապատից, որոնց տարածքային հարցերի լուծման նման հեռանկարը, հասկանալի է, չէր բավարարում, և դրա դեմ հակամիջոցներ պետք է գտնեին ու պայքարեին, ինչ և արեցին որոշ ժամանակ անց: Պատահականություն չպետք է համարել և այն, որ Նախիջևանի երկրամասը

Հայաստանին թողնելու անթույլատրելիության մասին հարցը չոչափվել էր Կարաբեքիր-Մղիվանի գրույցների ժամանակ, մարդ, որը գործուղվել էր Ռուսաստանի կողմից որպես միջնորդ և պարտավորություն ուներ պաշտպանելու Հայաստանի շահերը, բայց չուտով ընկել էր Կարաբեքիրի ազդեցության տակ և, ըստ էության, բացասական դեր խաղացել այդ խնդրում²:

Մղիվանու այդօրինակ գործունեության մասին վկայություններ կան Սատիսյանի հուշերում, Լեգրանի հեռագրերում, և մեր պատմաբանները հիմնավոր փաստերով վաղուց ապացուցել են, որ Մղիվանին և նրա խումբը՝ Կարաբեքիրին խորհուրդ էին տալիս ուժեղացնել ճնշումը հայերի վրա՝ Հայաստանում իշխանափոխություն առաջ բերելու նպատակով: Հենց այդ օրերին էր Օրջոնիկիձե ուղիղ հեռագրակապով Մղիվանուն հրահանգում. «Ուրիշ ինչպես կարող եք, հարկավոր է պայթեցնել, իսկ հետո՝ օգնել, հասկացար, օգնել»³: Իսկ թե Մղիվանին ինչպես էր ուզում «պայթեցնել» Հայաստանը, վկայություն կա Կարաբեքիրի մոտ: «Երբ մենք Ալեքսանդրապոլում դաշնակների հետ բանակցություններ էինք վարում հաշտության մասին, - գրում է Կարաբեքիրը, - Անկարայում Ռուսաստանի դեսպան ընկեր Մղիվանին ինձ ասաց. «Ինչո՞ւ դուք միայն Արաքս (Արփաչայ) գետն եք առաջարկում որպես ապագա սահման»: Հասկանալով նրա առաջարկը, ես պատասխանեցի. «Պատմության, արդարության, ռասայի, տնտեսության, կարճ՝ բոլոր տեսակետներից մենք մեր սահմաններն անց ենք կացնում այնպես, որ հավակնում ենք միայն այն տարածքների նկատմամբ, որոնք պատկանում են մեզ: Մենք չենք պատրաստվում (օտար) հողեր զավթել»³ (ընդգծումը մերն է - է. Ջ):

Մի կողմ թողնելով օտար հողեր չզավթելու վերաբերյալ Կարաբեքիրի ճամարտակությունները՝ արձանագրենք, որ Մղիվանու մասին թուրք փաշայի պատմաժը միանգամայն համահունչ է նրա գործունեության Լեգրանի բնութագրությունը: Անտարակույս է, որ Մղիվանին իր այդ վարքագծով մեծապես նպաստել է Հայաստանի Հանրապետության անդամահատմանը: Ինչ վերաբերվում է մեզ հետաքրքրող Շարուր-Նախիջևանի խնդրին, ապա թեև վերը մեջբերած գրույցից

¹ «Հայրենիք» ամսագիր, Բոստոն 1923, XI, թիվ 1, էջ 71:

² Կոնֆերանսի առաջին իսկ նիստում Կարաբեքիրը մերժել էր նրա մասնակցությունը կոնֆերանսին, որից հետո նա մնացել էր Ալեքսանդրապոլում որպես Ռուսաստանի ներկայացուցիչ:

³ „Геноцид армян...“, стр. 339.

³ Նույն տեղում, էջ. 290:

կարելի է հետևություն անել, որ այդ պահին Կարաբեքիրն Արաքսի ձախ ափի վրա դեռ աչք չէր գցել, բայց կայնապես չենք կարող միանշանակ պնդել, թե Շարուր-Նախիջևանը թուրքական տարածքային պահանջների մեջ է ներառվել հենց Մղիվանու և Կարաբեքիրի գրույցի արդյունքում: Չենք կարող պնդել, որովհետև Կարաբեքիրն ուրիշ ոչինչ չի ավելացնում և որ կարևոր է, ամսաթիվ չի նշում: Կարծում ենք ամսաթիվ չնշելու պատճառներից մեկն էլ այն է, որ նրանք այնքան հաճախ էին հանդիպում (ըստ Սատիսյանի՝ համարյա ամեն օր), որ դժվար թե Կարաբեքիրը կարողանար մտաբերել նշված գրույցի կոնկրետ օրը: Իսկ որ այդ գրույցների ժամանակ չոչափվել է նաև Նախիջևանի հարցը, այդ մասին հիշատակություն կա հենց իր՝ Մղիվանու մի հեռագրում: Դեկտեմբերի 3-ին Լեզրանին հասցեագրած հեռագրում խոսելով Հայաստանում խորհրդային իշխանության հաստատման հարցում Կարաբեքիրի վերաբերմունքի, թուրքերի ներկայացրած պայմանագիրը Սատիսյանի կողմից ստորագրելու, ինչպես և այն մասին, որ թուրքերը ընդհանրապես հայերին չեն վստահում, Մղիվանին ավելացնում է. «Հայերի նկատմամբ անվստահություն արդյունք է նրանց (թուրքերի) համառությունը Նախիջևանի հարցում, որը նրանց կարծիքով չի կարելի տալ հայերին»¹:

Շարուր-Նախիջևանը Հայաստանին չտալու հարցում Մղիվանու պատվիրակության կազմում առավել շահագրգռված անձ կար, քան ինքը Մղիվանին էր: Դա Աղրբեջանի հեղկոմի անդամ Բեհբուլթ Շահ-թախթինսկին² էր, այն նույն մարդը, որ առաջինն էր դեռևս օգոստոսի 13-ին Լենինին ուղարկած նամակում բողոքել Շարուրը Հայաստանին թողնելու դեմ և առաջարկել չեղյալ հայտարարել Լեզրանի ստորագրած օգոստոսի 10-ի համաձայնագիրը: Այդպիսի հակվածությամբ անձը չէր կարող թուրքական պատվիրակության հետ չփվելու հնարավորությունը չօգտագործել կանխելու Շարուր-Նախիջևանի անցումը Հայաստանին: Արխիվներում դժբախտաբար չատ բան չի պահպանվել Կարաբեքիրի հետ Շահ-թախթինսկու հանդիպումների և վարած գրույցների մասին: Բայց մի շատ ուշագրավ ու բավականին խոսուն փաստաթուղթ, այնուամենայնիվ, պահպանվել է: Դա նոյեմբերի 28-ին նրանց միջև կայացած գրույցի ժամանակ Կարաբեքիրի խոսքի հակիրճ սղագրությունն է, որը Շահ-թախթինսկին ուղարկել էր Օրջո-

նիկիձեին: Կարաբեքիրը դժգոհում է Ռուսաստանի վարած քաղաքականությունից, որն իբրև թե պաշտպանում է հայերին, ուզում է թուրքական վիլայեթների հաշվին ստեղծել Մեծ Հայաստան, մինչդեռ Հայաստանը Անտանտի հավատարիմ դաշնակիցն է և միշտ դանակ է խրել թուրքիայի թիկունքին: Զրուցակիցները բնականաբար անդրադարձել են նաև Շահ-թախթինսկուն հուզող խնդրին՝ Նախիջևանին: «Ռուսաստանը Նախիջևանի երկրամասը տվեց հայերին¹, - ասել է Կարաբեքիրը: - Դա միակ միջանցքն էր, որով թուրքերը կապ էին պահպանում Ռուսաստանի հետ: Ռուսաստանի այդ քայլով թուրքական հեղափոխությունը գլխավորող բոլոր գործիչները համարյա գինաթափվեցին թուրքական զանգվածի առաջ, որը կորցրեց հավատը Ռուսաստանի որևէ աջակցության հանդեպ... Վերջապես Ռուսաստանը մեզ թույլ տվեց գրավել Սարիղամիշը և Նախիջևանը՝ չցանկանալով այդ օպերացիայում մեզ որևէ ռազմական օգնություն ցույց տալ»²:

Եթե հիշենք, որ այս գրույցը կայացել է նոյեմբերի 28-ին, այսինքն՝ այն օրը, երբ Սատիսյանը Կարաբեքիրին էր հանձնել թուրք-հայկական տարածքային սահմանագատման վերաբերյալ իր պատվիրակության կազմած քարտեզը, ապա դժվար չի լինի գուշակել, թե ուրիշ ինչ հարցեր չոչափած կլինեն զրուցակիցները և ինչ կարծիքներ արտահայտած, որոնց մասին սակայն Շահ-թախթինսկին գերադասում է լռել: Շատ ժամանակ չէր անցել, երբ Օրջոնիկիձեին ուղարկած իր մեկ այլ նամակում Շահ-թախթինսկին կրկին անդրադառնում է Կարաբեքիրի հետ ունեցած իրենց հանդիպմանը և դառնացած գրում. «Ձանգեզուրը և Նախիջևանի շրջանը Հայաստանին զիջելու մասին Աղրհեղկոմի ակտը Կարաբեքիրի վրա ճնշող տպավորություն թողեց: ...Կարաբեքիրն առանձնապես կտրուկ չի արձագանքում այդ ակտին, բայց գտնում է, որ տակտիկական նկատառումներով Աղրբեջանը չպետք է շտապեր այդ հարցի լուծման գործում՝ թեկուզ մինչև կոնֆերանսի ավարտը, քանի որ այդ ակտը վերագրվում է Ռուսաստանի ազդեցությանը»³ (ընդգծումը մերն է - է. Ջ.):

Շահ-թախթինսկին չի ասում, թե ե՞րբ և ո՞վ է Կարաբեքիրին հայտնել վիճելի տարածքների վերաբերյալ Նարիմանովի հռչակագրի մասին, բայց պարզից էլ պարզ է, որ այն տեղի է ունեցել տաք հետքե-

¹ Նույն տեղում, էջ. 296:

² Ստալինի առաջարկությամբ Մղիվանու հետ որպես խորհրդականներ Ալեքսանդրապոլ էին մեկնել նաև Շահ-թախթինսկին և Ջ. Կորյանգովը:

¹ Զրուցակիցները նկատի են ունեցել օգոստոսի 10-ի համաձայնագիրը:

² „Геноцид армян...“, стр. 206.

³ Նույն տեղում, էջ 405:

րով և իր ներկայությունը՝ եթե, իհարկե, լուրը հայտնողը հենց ինքը չէ:

Ինչևէ, մի կողմ թողնելով տեղեկատվության հնարավոր ուղիների մասին ենթադրությունները, ուզում ենք արձանագրել, որ իրադարձությունների տրամաբանությունը և Նախիջևանի հիմնախնդրի հետագա արժարժումներն ու զարգացումները, որոնց ընթացքում պարզ դարձավ, որ Բաքուն և Անկարան գործում են ձեռք-ձեռքի տված, մեզ բերում են այն համոզման, որ Շարուր-Նախիջևանի նկատմամբ Կարաբեքիրի առաջ քաշած պահանջը թուրք-ադրբեջանյան հակահայկական դավադրության շղթայի օղակներից մեկն էր: Անգամ եթե վիճելի տարածքների վերաբերյալ Բաքվում նախապատրաստվող ղեկավարացիայի մասին թուրքերը տեղեկացված չլինեին, ապա միևնույն է, Հայաստանի խորհրդայնացման լուրը, ինչի մասին նրանք իմացել էին արդեն նոյեմբերի 30-ին, չէր կարող թուրքական դիվանագիտության ուշադրությունն իսկույն ևեթ չբեկեռել Շարուր-Նախիջևանի վրա: Անկարան չէր կարող չհասկանալ, որ այդ տարածքները Ռուսաստանը կարող էր ուղղակի հանձնել իրեն դաշնակից դարձած Հայաստանին: Մինչդեռ Բաքվի հետ մեկտեղ որքա՞ն ջանք ու եռանդ էին թափել համոզելու Մոսկվային՝ չեղյալ հայտարարել օգոստոսի 10-ի Լեզրան-Ջամայյան համաձայնագրով Շարուրի անցումը Հայաստանին և օկուպացնել ռուսական զորքերով: Հայաստանի խորհրդայնացումը սակայն մասամբ իրադրությունը փոխում էր. Բաքուն արդեն բացահայտորեն գործել չէր կարող, բայց Անկարան կարող էր և նա գործի անցավ:

Ի միջի այլոց, Նախիջևանի վերաբերյալ Կարաբեքիրի պահանջը Ոստիսյանը իր հայտնի աշխատության մեջ մի քիչ այլ կերպ է ներկայացնում: Նա գրում է. «Նոյեմբերի 30-ին թուրքերը ուղարկեցին դաշնագրի իրենց նախագիծը՝ սահմաններով: Անոնց ծրագրով Հայաստանին կը թողվեր 27 000 քառ. քիլոմետր. Կարսի նահանգը և Սուրմալուի գավառը կանցնեին Թուրքիո, իսկ Նախիջևանն ու Ջանգեղուրը կը դրվեին Ատրպեճանի հովանավորության տակ»¹ (ընդգծումը մերն է - է. Ջ.):

Տարօրինակ ու զարմանալի, այլ բան չես կարող ասել: Ինչո՞ւ է Ոստիսյանը խոսում նաև Ջանգեղուրի մասին, մի բան, որ ինչպես նախորդ շարադրանքում տեսանք, Կարաբեքիրի գրություն մեջ չկար, և ինչու է ասում, թե Ջանգեղուրը և Նախիջևանը Ադրբեջանի հովանա-

վորություն տակ էր դրվում: Մեղադրել Ոստիսյանին մոռացկոտություն մեջ չենք կարող, քանզի ուրիշ շատ ավելի մանր ու պակաս կարևորություն ներկայացնող հարցեր նա մոռացություն չի տվել: Ուրեմն ինչո՞ւ այդպիսի անհամապատասխանություն Կարաբեքիրի պահանջի և Ոստիսյանի վկայության միջև, մնում է անբացատրելի:

Թուրքական քարտեզի մեկնաբանության խնդրում թյուրիմացություն պահ կա նաև պատվիրակության անդամ Ստ. Ղորղանյանի մոտ: «Մշակ» թերթի խմբագրությունը նա ասել է. «Հայկական քարտեզին Անգորայի պատվիրակությունը հակադրեց իր քարտեզը՝ կցելով նրան մի հիշատակագիր, որի մեջ աչքի ընկնող հայտարարությունն այն էր, որ թեև հայերը համարում են իրենց առանձին կուլտուրայի տեր ժողովուրդ, բայց այդ ճիշտ չէ. ապացույց երաժշտությունը, որը բաղկացած է Արևելքից բերած մոտիվներից: Իսկ քարտեզի վրա գծագրված էին Հայաստանի համար այսպիսի սահմաններ. - արևմուտքում Արփաչայը, հարավում Արաքսը՝ մինչև Գայլի Դուռ անցքը: Այսպիսով միլիոններին են անցնում Կարսի նահագը և Սուրմալուի գավառը: Թուրքերը՝ կատարելով այդպիսի անդամահատություն, դեռ բավական չափով վեհանմունքներ են ձգտում Հայտարարելով, թե նրանք անկարելի են համարում թեյադրել Հայաստանին 1918թ. Բաթումի դաշնագրի սահմանները, որոնք չափազանց անձուկ են, ուստի հայերին են թողնում Ալեքսանդրապոլը և երկաթուղու գիծը դեպի Երևան»¹ (ընդգծումը մերն է - է. Ջ.): Ինչպես տեսնում ենք, Ղորղանյանը Հայաստանի Հանրապետությունից անջատված տարածքների շարքում չի նշում Շարուրի, որը պատերազմը սկսելու պահին գտնվում էր հայերի ձեռքին, և Ադրբեջանի հետ վեճի առարկա եղող Նախիջևանի անունները: Թե ինչո՞ւ, մնում է անհայտ: Ճիշտ այդպես էլ նոյեմբերի 30-ի ու զգիչերին ստանալով Կարաբեքիրի հակառաջարկները և կազմած քարտեզը, ու այդ մասին իսկույն հեռագրելով Երևան, պատվիրակությունը Շարուրի և Նախիջևանի մասին ոչինչ չէր ասել: Դա պարզորոշ երևում է Ս. Վրացյանի մի վկայությունից, որ նա արել էր 1923թ. «Հայրենիք», ամսագրում հրապարակված հոդվածում: Անդրադառնալով Հայաստանի խորհրդայնացման վերաբերյալ Բ. Լեզրանի ներկայացրած պահանջին պատասխանելու նպատակով ՀՅԴ Բյուրոյի, Որհնորդանի ղեկավարության, կառավարության անդամների և մի շարք այլ պատասխանատու պետական գործիչների մասնակցությամբ նոյեմբերի 30-ի լույս

¹ Ալ. Ոստիսյան, նշվ. աշխ. էջ 269:

¹ «Մշակ», 23 դեկտեմբերի 1920թ.:

ղեկտեմբերի 1-ի գիշերը գումարված նիստին՝ Ս. Վրացյանը գրում է. «Կես գիշեր էր արդեն, երբ ինձ կանչեցին ուղիղ հեռագրաթելի մոտ: Ալեքսանդրապոլից մեր հաշտարար պատվիրակությունն նախագահ ընկ. Ա. Սատիսյանը հաղորդեց, որ տաճիկները ներկայացրել են հաշտության պայմանները և տվել են վերջնագիր՝ 48 ժամում ընդունելու կամ մերժելու...: Երբ ես վերադարձա հեռագրատնից և կարդացի Քյազիմ Կարաբեքիրի վերջնագիրը և հաշտության պայմանները, սենյակում մի պահ տիրեց խորին լռություն, այնքան ծանր պայման ոչ ոք չէր սպասում: Չգիտեմ ինչու՞ առանձնապես սաստիկ վրդովում առաջ բերեց Սուրմալուի պահանջը: Այդ նշանակում է, որ տաճիկները չեն ուզում հաշտվել անկախ Հայաստանի գոյություն հետ...»¹:

Ինչ խոսք, որ Սուրմալուի գավառը (Արաքսի աջ ափը՝ Մասիսներով հանդերձ) Հայաստանի Հանրապետության համար կարևոր նշանակություն ուներ թեկուզ հենց այն պատճառով, որ նրա անջատումով և Արաքս գետը սահման դարձնելով, մայրաքաղաք Երևանը փաստորեն վեր էր ածվում սահմանային քաղաքի: Բայց նաև չենք կարծում, թե Շարուր-Նախիջևանը իր աշխարհագրական դիրքով ու ռազմավարական նշանակությամբ, ինչպես նաև Իրանի հետ երկաթուղային հաղորդակցման հնարավորությամբ, Հայաստանի համար պակաս կարևորություն ուներ, քան Սուրմալուն: Նաև ավելացնենք, որ նույնմբերի 30-ին Կարաբեքիրը վերջնագիր չէր ներկայացրել և առավել ևս ժամկետ չէր նշանակել, ինչպես Ս. Վրացյանն է ասում այս հոդվածում², այլ ուղղակի վերջում ավելացրել էր, որ պահանջում էր իր պայմաններն ընդունել անփոփոխ: Ահա այն. «Հիմնվելով հայտնած խորհրդածությունների վրա. մեր պատվիրակությունը Ձեր բարձր պահանջները և մտածումները անիրագործելի է գտնում և համաձայն հաշտարար հիմունքների իրավասություն և ապագայում ընդհանուր քվեարկության դիմելու պայմանով, ներփակ ստվերագծում (croquis) նշանակված սահմանները առանց վեճի ընդունելը կտրուկ կերպով պահանջում և իմ անկեղծ հարգանքները հայտնում եմ»³:

Դեկտեմբերի 1-ին առավոտյան ժամը 11-ին Կարաբեքիրը գումարում

ընդունեց կոնֆերանսի երրորդ՝ նախավերջին նիստը և վերջնագրի կարգով ներկայացնելով հաշտության պայմանագրի իրենց կազմած նախագիծը, պահանջում է ստորագրել՝ սպառնալով հակառակ պարագայում անմիջապես վերսկսել ռազմական գործողությունները: «Մենք առարկություններ ըրինք թուրքերուն, - գրում է Սատիսյանը, - և որոշեցինք, որ համենայն դեպս պետք է դաշնագրի գլխավոր կետերը հաղորդենք Երևան և սպասենք հրահանգներ մեր կառավարությունէն»¹:

Թուրք պատվիրակները չէին կարող չհամաձայնել հայերի այդ պահանջին, քանի որ հակառակ պարագայում միջազգային հանրությունը պարզ կդառնար, որ պայմանագիրը ոչ թե ընդունվել, այլ թելադրվել է: Բայց քանի որ նրանք շատ էին շտապում, ինչպես Ս. Վրացյանն է նշում, «վախենում էին իրենց դաշնակից բուլղարիկների խաղերից և շտապում էին օր առաջ ստորագրել հաշտությունը», ուստի պայմանագրի նախագծին ծանոթանալու և կառավարության համաձայնությունը ստանալու համար տրամադրում են ընդամենը մեկ օր ժամանակ և հաջորդ նիստը նշանակում դեկտեմբերի 2-ին: Հայ պատվիրակները կարող էին չհամաձայնել և պատասխանի համար 2 կամ 3 օր ժամանակ պահանջել (գինադադարի ժամկետը լրանում էր դեկտեմբերի 4-ի երեկոյան), բայց բանն էլ հենց այն է, որ ինչպես կոնֆերանսի ընթացքն է ցույց տալիս, Կարաբեքիրն օգտվում էր նախագահողի իր իրավունքից և նիստեր գումարում, երբ ուզում էր: Դրանում համոզվելու համար բավական է մի հայացք գցել կոնֆերանսի ընթացքի և նիստերի գումարման շարժառիթների վրա:

Կոնֆերանսի աշխատանքները պայմանականորեն կարելի է բաժանել երկու փուլի՝ մինչև նոյեմբերի 30-ը և դեկտեմբերի 1-2-ը: Առաջին փուլում, որը տևում է չորս մեկ շաբաթ, Կարաբեքիրը բոլորովին չի շտապում. 24-ին նիստ չի գումարում «այն պատճառով, որ Երևանեն քանի մը ժամ ուշացել էր այն գնացքը, որ կը բերեր գինադադարի պայմաններու համաձայն Թուրքիո տրվելիք ռազմամթերքը»²: Առաջին նիստում (նոյեմբերի 25) Կարաբեքիրը հայտարարում է, թե մինչև հայաստանը չհրաժարվի Սևրի պայմանագրից, կոնֆերանսը չի շարունակվի: Նոյեմբերի 27-ին (2-րդ նիստ) լսում է Սևրի պայմանագրից հրաժարվելու մասին Սատիսյանի հայտարարությունը և առանց

¹ «Հայրենիք» ամսագիր, Բոստոն, 1923, թիվ 1, էջ 71:
² Հետագայում, 1953թ. Բեյրութում հրատարակած «Հայաստանը բուլղարիկյան մուրճի և թուրքական սալի միջև» գրքում, Ս. Վրացյանը ուղղել է իր սխալը՝ գրելով, որ նոյեմբերի 30-ի երեկոյան Կարաբեքիրը ներկայացրեց իր պայմանները, իսկ հաջորդ օրն առավոտյան վերջնագրի կարգով պահանջեց ընդունել այն:
³ ՀԱԱ, ֆ. 200, ց. 1, գ. 602, թ. 427:

¹ Ալ. Սատիսյան, նշվ. աշխ. էջ 270:
² Նույն տեղում, էջ. 265:

Հաջորդ նիստի օր նշանակելու առաջարկում, որ կողմերից յուրաքանչ-յուրը «կը մշակե սահմանները և բացատրական զեկուցագիր մը այդ մասին և Հետո փոխադարձաբար կը կծանոթացնեն իրենց պայմաններուն»¹: 28-ին Կարաբեքիրը ստանում է հայոց պահանջները, բայց իրենցը ներկայացնելու փոխարեն 29-ին (երեկոյան) Սատիսյանին հրավիրում է առանձնագրույցի, աշխատում հերքել հայկական պահանջների արդարացիությունը, հայտարարում, որ վաղը ևեթ կ'ներկայացնի իր հակաառաջարկները ու նաև առաջին անգամ խոսում «բանակցությունները շուտով վերջացնելու պետքի» մասին, ակնարկում, որ «հակառակ պարագային ան ստիպված պիտի լինի գնալ Երևանի վրա»²:

Այսպես հանգիստ է ընթացել կոնֆերանսը մինչև նոյեմբերի 30-ը: Ամեն ինչ փոխվեց նոյեմբերի 30-ից հետո միայն: Այդ օրը՝ երեկոյան ներկայացնելով իր հակաառաջարկները, Կարաբեքիրը նախկինի պես հանգիստ չի սպասում, այլ հաջորդ օրն առավոտյան (ժ. 11-ին) գումարում է նիստ, ներկայացնում իրենց պատրաստած պայմանագրի նախագիծը և այդ շատ ավելի բարդ ու բազմաբնույթ խնդիրներ պարունակող փաստաթղթի ընդունման համար տալիս ընդամենը մեկ օր ժամանակ: Ինչո՞ւ նման շտապողականություն այդ վերջին օրերին: Ս. Վրացյանը՝ անդարդառնալով այդ օրերի իրադարձություններին (Լեզրանի հետ վարվող բանակցությունները, Կարաբեքիրի ներկայացրած վերջնագիրը), ուշագրավ վկայություն է անում. «Թուրքերը հեկհե հետևում էին Երևանի դեպքերին և շտապում էին կանխել: Նոյեմբերի 30-ի երեկոյան Քյազիմ Կարաբեքիր փաշան Հայաստանի պատվիրակության ներկայացրեց թրքական պայմանները և հաջորդ առավոտյան վերջնագրի ձևով պահանջեց այդ պայմանների ընդունումը, հակառակ պարագայում սպառնալով վերսկսել պատերազմական գործողությունները»³ (ընդգծումը մերն է - է. Չ): Մեկնաբանությունները, ինչպես ընդունված է ասել, այստեղ ավելորդ են: Կարաբեքիրը շտապում էր ստորագրել տալ պայմանագիրը, քանի դեռ իշխանությունը չի փոխանցվել:

Որ Հայաստանը պետք է խորհրդայնացվի, դա Կարաբեքիրի համար գաղտնիք չէր: Այդ հարցը նախապատրաստվում էր շատ վաղուց,

¹ Նույն տեղում, էջ 266:

² Նույն տեղում, էջ 269:

³ Ս. Վրացյան, Հայաստանը բոլշևիկյան մոլոտով..., էջ 141: Տե՛ս նաև նույնի «Հայաստանի Հանրապետությունը», Եր., 1993, էջ 535:

և Անկարան քաջատեղյակ էր բոլոր անցուղարձերին: Ինքը՝ Կարաբեքիրը, կոնֆերանսի օրերին մեկ անգամ չէ անդրադարձել Հայաստանի խորհրդայնացման խնդրին Ալեքսանդրապոլում գտնվող Սորհրդային Ռուսաստանի ներկայացուցչի՝ Բուդու Մդիվանու հետ զրույցներում՝ ըստ այդմ առաջարկելով այդ նպատակի համար օգտագործել իր ստեղծած Ալեքսանդրապոլի հեղկոմը, որն իրեն հորջորջում էր որպես «Հայաստանի հեղկոմ», և նրա հրավերով Կարմիր բանակի զորքեր մտցնել Հայաստան: Հասկանալի է, որ նպատակը խորհրդայնացած Հայաստանը ամբողջովին Անկարայի վերահսկողության ենթարկելն էր: Սակայն թուրքական դիվանագիտությունը իրեն հավատարիմ չէր լինի, եթե գործեր միայն մի ուղղությամբ: Հայաստանի հետ մեկտեղ Անկարան առաջ էր քաշել նաև Վրաստանի խորհրդայնացման հարցը՝ խոստանալով օգնություն ռազմական ուժով: Դա նախ Ռուսաստանի ուշադրությունը մասամբ կշեղեր Հայաստանից ու կրեևոք ավելի բարդ խնդրի՝ Վրաստանի վրա, և հետո՝ հնարավորություն կստեղծվեր տարածքային կորզումներ կատարել նաև Վրաստանից (Բաթումի մարզը): Ահա ինչու չբավարարվելով Կարաբեքիրի գործունեությամբ՝ Անկարան շուտով Ալեքսանդրապոլ գործուղեց նաև Թուրքիայի ազգային մեծ ժողովի (ԹԱՄԺ) երկու պատվիրակների, որոնք Մդիվանու հետ երկարատև զրույցներում աշխատում էին հիմնավորել այդ ծրագրի իրագործման նպատակահարմարությունը: Իսկ Մդիվանին էլ իր հերթին աշխատում էր համոզել Մոսկվային, որը, սակայն, Անդրկովկասի հարցում իր սեփական ծրագրերն ուներ: Եվ երբ Կարաբեքիրը նոյեմբերի 30-ին տեղեկացավ Հայհեղկոմի նոյեմբերի 29-ի ակտի մասին, ինչը վկայությունն էր այն բանի, որ ուսները սեփական ծրագրերն են իրագործելու, անհանգստացավ և որոշեց օր առաջ ստորագրել տալ իրենց նախապատրաստած պայմանագիրը:

Գեկտեմբերի 1-ի երեկոյան Վրացյանի կառավարությունը տվեց իր համաձայնությունը և Սատիսյանին հանձնարարեց ստորագրել թուրքերի ներկայացրած հաշտության պայմանագիրը: Եվ դա այն դեպքում, երբ այդ նույն օրը Լեզրանի հետ բանակցություններում (կառավարության կողմից այն վարում էին Դրոն և Ն. Տերտեյանը) կայացվել էր որոշում հաջորդ օրը իշխանությունը բուլշևիկներին փոխանցելու մասին: Ինչո՞ւ Վրացյանն այդպես վարվեց, ինչո՞ւ պայմանագրի ստորագրումը չթողեց նրանց, ում հանձնում էր իշխանությունը, դա բոլորովին այլ հարց է և այստեղ չենք քննարկել: Միայն նշենք, որ դա այնքան արտասովոր էր ու անտրամաբանական, որ Սատիսյանը դեկտեմբերի 2-ին տեղեկանալով իշխանափոխության մասին, իս-

կույն դիմում է Դրոյին (իշխանությունը փոխանցվել էր նրան մինչև Հեղկոմի Երևան ժամանելը) և պահանջում ցուցումներ, սակայն վերջինս խուսափողական պատասխան է տալիս՝ պայմանագրի ստորագրելը կամ չստորագրելը թողնում պատվիրակության հայեցողությանը և խոստանում կոնկրետ պատասխանը տալ հաջորդ օրը՝ ղեկտեմբերի 3-ի առավոտյան: Դրոյի այս վարքագիծը ևս այդ օրերի առեղծվածների թվին է պատկանում (դժբախտաբար նա հետագայում այդ հարցին չի անդրադարձել և որևէ բացատրություն չի տվել): Առեղծված է, որովհետև ընդամենը մեկ օր առաջ՝ ղեկտեմբերի 1-ին, նա դեմ է եղել թուրքական պայմաններն ընդունելուն: Այդ մասին կա Վրացյանի վկայությունը, որը ղեկտեմբերի 1-ին ժամը 2-ն անց կեսին, Սատիսյանին տեղեկացնելով Հայաստանի խորհրդայնացման նպատակով Լեզրանի հետ վարվող բանակցությունների մասին, միաժամանակ ավելացրել էր. «Սահմանների մասին կառավարությունը համաձայն է պայմանով, որ այդ համաձայնությունը կվերանա, եթե մյուս կետերի մասին համաձայնություն չլինի: ...Դրո հակառակ է համաձայնություն տալ տաճիկներին»¹ (ընդգծումը մերն է - է. Ջ.): Թե ինչու մեկ օր հետո իշխանության ղեկը ստանձնած Դրոն դարձել էր անվճռական, գաղտնիք է առաջօր:

Առեղծված է նաև Սատիսյանի պատվիրակության վարքագիծը: Նա կարող էր խուսափել պայմանագրի ստորագրումից, քանի որ իրեն լիազորություն տված կառավարությունն այլևս չկար, կարող էր նաև պահանջել Կարաբեքիրից հետաձգելու պայմանագրի ստորագրումը մինչև հաջորդ օրը, մինչև Դրոյից հստակ հրահանգավորում ստանալը: Բայց պատվիրակությունն այդ հնարավորություններից օգտվելու փոխարեն որոշում է ընդունել թուրքերի պահանջը և ստորագրել պայմանագիրը: Մեզ նույնիսկ հայտնի չէ, թե Դրոյի հետ իր հեռախոսագրույցի և վերջինիս տված պատասխանի մասին հայտնե՞լ է թուրքական պատվիրակությանը, թե՞ ոչ: Նա այդ մասին ոչինչ չի ասում: Կարծում ենք՝ Սատիսյանը Կարաբեքիրին ոչինչ չի ասել:

Տարօրինակ ու նաև ինչ-որ չափով անբացատրելի է մնում Լեզրանի վարքագիծն այս հարցում, մարդ, որը մինչ այդ քանիցս ՀՀ կառավարությանն առաջարկել էր (թե՛ չ. Օհանջանյանի, թե՛ Ս. Վրացյանի) խզել բանակցությունները թուրքերի հետ, հետ կանչել Սատիսյանի պատվիրակությանն Ալեքսանդրապոլից և ուսական զորքեր

մտցնել Հայաստան: Թվում էր, թե իշխանափոխությունից հետո նրա առաջին գործը Սատիսյանին լիազորությունից զրկելը պիտի լիներ, որի համար, ի դեպ, բավականին ժամանակ կար (նախնական պայմանավորվածությամբ իշխանության փոխանցումը պետք է կատարվեր ղեկտեմբերի 2-ի գիշերը՝ ժամը 12-ին, բայց Լեզրանը՝ պատճառաբանելով, որ որոշ դաշնակ գործիչներ, որոնց պետք է ձերբակալեն, պատրաստվում են փախչել Հայաստանից, պայմանաժամը փոխում է և իշխանության փոխանցումը կատարվում է ղեկտեմբերի 2-ին կեսօրվա ժամը 4-ին), բայց ոչ, խորհրդավոր կերպով նա այդ ուղղությամբ այդ օրը քայլեր չի ձեռնարկել¹: Ինչո՞ւ, դա ևս այդ օրվա առեղծվածների թվին է պատկանում և անբացատրելի է մնացել առ այսօր:

Առաջին հայացքից առեղծվածային կարող է թվալ նաև Կարաբեքիրի վարքագիծը: Քաջատեղյակ Երևանում կատարված իշխանափոխությունը՝ նա այնուամենայնիվ հարկադրում է ու ստորագրում պայմանագիր իշխանությունն արդեն կորցրած կառավարության պատվիրակության հետ:

Ավելին, Կարաբեքիրը նախագգուչական քայլեր է ձեռնարկում, որպեսզի Հայաստանի խորհրդայնացման հետևանքով չկանխվի Սատիսյանի պատվիրակության հետ պայմանագրի ստորագրումը: Նա իսկույն իր «անկեղծ» գոհունակությունն է հայտնում Կարմիր բանակի առաջխաղացման և Հայհեղկոմի Դիլիջան հասնելու կապակցությամբ: Դեկտեմբերի 2-ին Դիլիջանից Բաքու ուղարկած հաղորդագրության մեջ ասված է, որ Ալեքսանդրապոլից՝ Կարաբեքիրի ստորագրությամբ, ստացված է հետևյալ հեռագիրը. «Ինձ ուրախություն պատճառեց կարմիր զորքերի Դիլիջան հասնելու լուրը: Ձեզ բարեկամ ու դաշնակից տաճիկական բանակի կողմից ողջունում եմ Ձեր Դիլիջան գալը և հաղթություն եմ ցանկանում իմպերիալիզմի դեմ հանուն աշխատավոր պրոլետարիատի բարօրության ու երջանկության: Արդեն կարգադրել եմ, որ մեր մեջ անմիջական կապ հաստատվի»²: Այդ նույն օրը 11-րդ Կարմիր բանակի գլխավոր շտաբում ստացվում է նաև Մղիվանու շտապ հեռագիրը, որում ասված էր, որ Կարաբեքիրը խնդրել է իրեն շտապ միջոցներ ձեռնարկել, որպեսզի Կարմիր բանակի զորամասերը

¹ ՀԱԱ, ֆ. 200, ց. 1, գ. 621, թ. 81:

¹ ՀԱԱ-ում պահվում է Սատիսյանի պատվիրակությանը լիազորություններից զրկող Դրոյի և կոմիսար Սիլինի ստորագրությամբ մի հեռագիր, որը սակայն թվագրված է ղեկտեմբերի 3-ով:

² ՀԱԱ, ֆ. 4033, ց. 1, գ. 969, փ. 10, թ. 1:

չանցնեն թուրքական զորքերի զբաղեցրած գիծը մինչև Հաշտության պայմանագրի ստորագրումը¹:

Ինչո՞ւ, ի՞նչ սպասելիքներ կարող էր ունենալ Թուրքիան մի պայմանագրից, որի անօրինականությունն ակնհայտ էր արդեն այն ստորագրելու պահին: Թվում էր, թե ոչինչ: Թվում էր, թե Հայաստանում հաստատված նոր իշխանությունը՝ չճանաչելով այդ պայմանագիրը, իսկույն ևեթ թուրքերի հետ կնստի նոր բանակցությունների ու կստորագրի նրանից էապես տարբերվող նոր պայմանագիր: Այսպես կարծում էին շատերը: Եվ միայն հետագա իրադարձությունները և հատկապես Մոսկվայի և Լոնդոնի կոնֆերանսները, ուր թուրքերը գնացին այդ պայմանագիրը ձեռքներին, եկան պարզելու, թե թուրքական դիվանագիտությունն ինչ հեռահար նպատակներ է ունեցել ու որքան ավելի հեռուն է նայել, քան կարելի էր կարծել:

Ինչպես տեսնում ենք առեղծվածները շատ են, բայց ասել, թե ամբողջովին անբացատրելի են, ճիշտ չի լինի²: Ուղղակի դա մի առանձին ուսումնասիրություն խնդիր է, որի մեջ խորանայլ մեզ խիստ կշեղի մեր թեմայից: Ուստի բավարարվենք այսքանով և վերադառնանք կոնֆերանսի վերջին նիստին:

Գեկտեմբերի 2-ի երեկոյան գումարվում է կոնֆերանսի վերջին՝ չորրորդ նիստը, որտեղ Ռատիսյանը հայտարարում է, որ ընդունում են ներկայացված պայմանագիրը: Այնուհետև սկսվում է քննարկումը, որն, ըստ երևույթին, սուր բնույթ չի կրել: Այդպես մտածել է տալիս նաև այն, որ մի նիստի ընթացքում 18 հոդված քննարկելը դյուրին գործ չէ, և հետո՝ պայմանագրում էական փոփոխություններ չեն կատարվել: Ռատիսյանն ինքն է ասում, թե «քննության միջոցին մեզ հաջողվեցավ մասնակի մանր փոփոխություններ մտցնել հօգուտ մեզ, ինչպես օրինակ, Աղբաբայի մի մասը (Կարսի նահանգեն) Հայաստանի սահմանների մեջ մտցնելը, զորքի քանակը 1200-ից մինչև 1500 բարձրացնելը: Երկար վիճաբանություններ եղան Անիի, Նախիջևանի, Սուրմալուի մասին, բայց թուրքերը այդ խնդիրներու մեջ ոչ մի զիջում չըրին: Գիշերվա ժամը 2-ին (գեկտեմբերի 2-են լույս 3-ը) դաշնագիրը ստորագրվեցավ երկու պատվիրակություններու կողմեն»³ (ընդգծումը մերն է - է. Զ.):

¹ Տե՛ս „Генотид армян...“, стр. 288.

² Այդ առեղծվածները մասամբ մեկնարկված են մեր «Սովետական Ռուսաստանը և Հայ-թուրքական հարաբերությունները» գրքում (տե՛ս էջ 130-164):

³ Ալ. Ռատիսյան, նշվ. աշխ. էջ 271:

Այսքանը միայն, Ռատիսյանը ոչինչ չի ասում թե ինչո՞ւ երեկոյան սկսված նիստը շարունակվեց մինչև գիշերվա ժամը 2-ը, ինչո՞ւ այն չի հետաձգվել հաջորդ օրվան, ո՞վ էր շահագրգռված, որ պայմանագիրը ստորագրվի հենց այդ օրը, ինչո՞ւ ինքը նիստի աշխատանքների մի մասը և պայմանագրի ստորագրումը հաջորդ օրվան հետաձգելու պահանջ չի դրել: Ո՛չ ինքը, ո՛չ Ղորղանյանը այդ մասին ոչինչ չեն ասում: Նրանք ոչինչ չեն ասում նաև Անիի, Նախիջևանի և Սուրմալուի շուրջ ծավալված «երկար վիճաբանությունների» մասին: Եվ այդպես էլ անհայտ է մնում, թե թուրքական պատվիրակությունը որևէ ձևով հիմնավորե՞լ է Նախիջևանի և Սուրմալուի գավառների նկատմամբ իր երկրի իրավունքը, գավառներ, որոնք, ինչպես արդեն նշել ենք, մինչ այդ երբեք Թուրքիայի կազմում չէին եղել: Հետաքրքիր կլինի նաև իմանալ, թե Հայ պատվիրակներն ինչ փաստարկներ էին վկայաբերում «երկար վիճաբանությունների» ընթացքում: Ինչևէ, կնքված պայմանագրի հոդվածներն այստեղ մենք մանրամասնությամբ չենք վերլուծի, բայց որպեսզի ընթերցողը պատկերացում կազմի այդ չարաբաստիկ պայմանագրի մասին, ստիպված ենք անդրադառնալ դրանց բովանդակությանը՝ թեկուզ հակիրճ:

Ինչպես վերը նշեցինք, պայմանագիրը բաղկացած էր 18 հոդվածներից, որոնցից առաջինում ասված էր, որ «պատերազմը Հայաստանի և Թուրքիայի միջև ավարտված է»: Հայաստանը զրկվում էր ընդհանուր պարտադիր զինվորական ծառայություն մտցնելու և բանակ պահելու իրավունքից: Նա կարող էր ունենալ միայն 1500 հոգուց բաղկացած մի ջոկատ՝ 8 թնդանով թվ 20 զնդացրով (հոդված 4): Թուրքիային իրավունք էր վերապահվում իր հայեցողությամբ տեսչություն և հետաքննություն կատարել վերը նշված պայմաններին վերաբերող հարցերի կապակցությամբ: Փոխարենը Թուրքիան պարտավորվում էր զինված օգնություն ցույց տալ Հայաստանին՝ ինչպես արտաքին, այնպես էլ ներքին վտանգի դեպքում (հոդված 5): Հայաստանը հրաժարվում էր Սևրի պայմանագրից, պարտավորվում հետ կանչել Եվրոպայից իր պատվիրակներին (հոդված 10), անվավեր ճանաչում բոլոր այն պայմանագրերը, որ «կարող են կնքվել և առնչություն ունենալ Թուրքիայի հետ, ճիշտ այնպես, ինչպես և բոլոր այն պայմանագրերը, որ կկնքվեն ի վնաս Թուրքիայի շահերի (հոդված 14): Թուրքիան նաև իրավունք էր ստանում վերահսկել Հայաստանի երկաթուղիներն ու ճանապարհները (հոդված 12), «ռազմական միջոցառումներ ձեռնարկել Հայաստանի տարածքում» (հոդված 13), իսկ այն տարածքները, որոնք պայմանագրով Հայաստանի մաս են ճանաչվել, բայց օկուպաց-

ված են թուրքական զորքերով (Ալեքսանդրապոլի գավառ և այլն), ապա նրանց օկուպացիան պետք է վերանա միմիայն «Հայաստանի կողմից ներկա պայմանագրի բոլոր պայմանների կատարման դեպքում» (Հոդված 17): Պայմանագրում Հոդվածներ կային գաղթականների վերադարձի իրավունքի (Հոդված 6), որը սակայն սահմանափակվում էր մեկ տարի ժամկետով (Հոդված 7), համաշխարհային պատերազմի ժամանակ կրած վնասները հատուցելու պահանջից հրաժարվելու (Հոդված 8), Հայաստանի մահմեդական ազգաբնակչության իրավունքների (Հոդված 11), դիվանագիտական և հյուպատոսական ներկայացուցիչների (Հոդված 15), փոստ-հեռագրական կապերի հաստատման մասին (Հոդված 16): Իսկ վերջին՝ 18-րդ Հոդվածում ասված էր, որ պայմանագիրը պետք է վավերացվի մեկ ամսվա ընթացքում, և որ այն կազմված է երկու օրինակից՝ թուրքերեն և ֆրանսերեն լեզուներով, 1920թ. դեկտեմբերի 2-ին Ալեքսանդրապոլ քաղաքում¹:

Ընթերցողը հավանաբար նկատեց, որ թվարկած Հոդվածների շարքում բացակայում են 2-րդը և 3-րդը: Մենք այդ երկու Հոդվածները առանձնացրեցինք, քանի որ մեզ հետաքրքրող սահմանային հարցերը իրենց արտացոլումն են գտել հենց այդ Հոդվածներում: Դրանցից առաջինում՝ այսինքն երկրորդ Հոդվածում, սահմանագծումը ներկայացված է հետևյալ կերպ. «Սահմանը Հայաստանի և Թուրքիայի միջև սկսվում է Արաքսի մեջ Կարա-սու գետի թափվելու տեղից՝ մինչև Տիրսիսի հյուսիս-արևմտյան մասը, Մեծ Կեմլիի արևմտյան, Կիզիլթայի արևմտյան (մասով) մինչև Մ. Աղբարան...»²:

Ինչպես տեսնում ենք, Հոդվածի այս նկարագրությունը համընկնում է Արաքս և Արփաչայ (Ախուրյան) գետերի հոսանքին: Իսկ դա նշանակում է, որ Թուրքիայի օգտին Հայաստանից անջատվում են Կարսի մարզը և Սուրմալուի գավառը: Սակայն Հայաստանի անդամահատումը դրանով չի ավարտվում: Սահմանագծի նկարագրության շարունակությունից պարզ է դառնում, որ Հայաստանից անջատվում է նաև Շարուր-Նախիջևանը: Նույն Հոդվածի շարունակության մեջ ասված է, որ սահմանն այնուհետև անցնում է «Շարուր-Նախիջևանի և Շահթախթի շրջաններով, որոնք գտնվում են Կյուկի-դաղ՝ 10282, 8262 բարձունք, Կամասու լեռ՝ 8160, Ղուրդ-Ղուլաղ գյուղ,

¹ ՀԱԱ, ֆ. 4/144, ց. 2, գ. 13, թ. 100-102 (պայմանագրի տեքստը ողուներեն է, թարգմանվել է, հավանաբար, թուրքերեն օրինակից):

² Նույն տեղում, թ. 100:

Սահաթ լեռ՝ 7868, կետ 3680, Արփաչայ գետով, Սարայ-բուլաղ՝ 8711, Արարատ կայարան մինչև Արաքս գետն այն տեղում, որտեղ Կարասու գետը թափվում է Արաքսի մեջ»¹:

Սահմանի այս նկարագրությունը գետեղելով քարտեզի վրա, կհամոզվենք, որ պայմանագրով Հայաստանից անջատվում են ոչ միայն Նախիջևանի գավառը և Շարուրի գավառակը, այլև Դարալագյազից մի հատված և Երևանի գավառի հարավ-արևելյան հատվածը՝ սկսած Արարատ կայարանից մինչև Գայլի Դրունք կոչված վայրը: Շարուր-Նախիջևանի այդ հսկա տարածաշրջանը սակայն միանգամից չէր միացվում և չէր հայտարարվում Թուրքիայի անբաժան մաս, այլ հռչակվում էր որպես, ժամանակավորապես՝ մինչև հարցի վերջնական լուծումը, ի դեպ առանց Հայաստանի մասնակցություն, Թուրքիայի պաշտպանություն տակ գտնվող տարածաշրջան: «Նախիջևանի, Շարուրի և Շահթախթի շրջաններում, - ասված է 2-րդ Հոդվածի վերջին պարբերությունում, - որտեղ հետագայում հանրաքվեի միջոցով հատուկ աղմինիստրացիա կհաստատվի, Հայաստանը պարտավորվում է չմիջամտել այդ աղմինիստրացիայի կարգին, անկախ այն բանից, թե ինչպիսի ձև կստանա այդ աղմինիստրացիան: Այդ շրջանները ժամանակավորապես կգտնվեն Թուրքիայի պաշտպանության տակ»² (ընդգծումը մերն է - է. Ջ): Մնում է ավելացնել, որ երկրորդ Հոդվածն ավարտվում էր նրանով, որ երկու կողմերին պարտավորեցնում էր պայմանագրի ստորագրումից հետո երկու շաբաթվա ընթացքում կազմել խառը հանձնաժողով՝ տեղում սահմանների վերջնական հաստատման նպատակով:

Ինչո՞ւ Թուրքիան Շարուր-Նախիջևանը զավթելու այդ ձևն ընտրեց, ինչո՞ւ նա միանգամից դրանք Թուրքիայի մաս չհռչակեց: Սրանք հարցեր են, որոնց մասին ոչ կոնֆերանսի նյութերում և ոչ էլ մեկ այլ տեղ բացատրություն չի պահպանվել: Բայց դա նաև չի նշանակում, թե դա լուսաբանել հնարավոր չէ, ո՛չ: Այդ հարցը հեշտ հասկանալի կդառնա, եթե հիշենք, թե ինչ կարգավիճակ ուներ Նախիջևանը և ինչպիսին էր իրադրությունը այդ երկրամասում տվյալ ժամանակամիջոցում: Հենց այդ իրողություններից ելնելով էլ՝ կարելի է հետևություն անել, որ Շարուր-Նախիջևանի երկրամասը Թուրքիային միացված հայտարարելուն խանգարել կարող էր նախ այն, որ այնտեղ ողու բոլշևիկյան զորքեր ևս կային, որոնցից ազատվելու հնարավոր այլ մի-

¹ Նույն տեղում:

² Նույն տեղում:

Չոց չկար: Այնուհետև, Նախիջևանի գավառում հաստատված վարչութուն կար՝ հանձին Նախիջևանի հեղկոմի, որը և գավառում խորհրդային կարգեր հաստատելու հայտարարություն էր արել դեռևս հուլիսի վերջին՝ ուսական գործերի այնտեղ մուտք գործելու պահին: Վերջապես նա չէր կարող այդ միացումը ինչ-որ ձևով արդարացնող պատմական, իրավական հիմնավորումներ վկայակոչել, ինչպես նաև մատնացույց անել Թուրքական «Ազգային ուխտը», որի գծած սահմանների մեջ Ծարուր-Նախիջևանը մտցնել, հասկանալի է, չէին կարող: Ճիշտ է, այստեղ մեզ կարող են առարկել, որ նույնպիսի հիմնավորումներ չունենին նաև Սուրմալուի գավառի հարցում, բայց բռնազավթեցին: Ուղղակի պետք է նկատի ունենալ, որ Սուրմալուի դեպքում Թուրքիան գործ ուներ պատերազմում պարտված Հայաստանի հետ, որի հետ, ինչպես արդեն տեսանք, պայմանները ոչ թե քննարկում, այլ թելադրում էր: Մինչդեռ Ծարուր-Նախիջևանի խնդրում չահագրգռված կողմ էին նաև Ռուսաստանն ու Ադրբեյջանը՝ իր դաշնակիցները, որոնց համաձայնությունը և օգնությունը արչավեց Հայաստան, և որոնցից շարունակում էր օգնություն ստանալ: Ուրեմն Ծարուր-Նախիջևանի հարցում նա զգույշ ու ձկուն գործելակերպ պետք է ընտրեր, որպեսզի առաջ չբերեր իր դաշնակիցների դժգոհությունը:

Այսքանով կարելի էր սահմանափակվել, բայց մեր խոսքը թերի կլինի, եթե չանդրադառնանք, թեկուզ հակիրճ, նաև 3-րդ հոդվածին: Նախ նրա համար, որ այդ հոդվածը առնչվում է տարածքային խնդիրներին և հետո՝ ընթերցողը կտեսնի ու կհամոզվի, թե որքանով ճիշտ են այն հեղինակները (օր. Ս. Վրացյանը), ովքեր վկայակոչելով այդ հոդվածը, փորձում են համոզել, թե Հայաստանը դեռևս կարող էր հանրաքվեի միջոցով ինչ-որ բան փոխել անջատված տարածքների ճակատագրի հարցում: Ուրեմն, նախ տեսնենք, թե ինչ էր ասված այդ հոդվածում. «ԹԱՄԺ-ի կառավարությունը, նախկին և 2-րդ հոդվածում նշված ներկա սահմանների միջև ընկած շրջաններում, այսինքն՝ ներկա պայմանագրով Թուրքիային զիջած շրջաններում, որոնք անվիճելի պատմական, ազգագրական և իրավական կապ ունեն Թուրքիայի հետ, հանրաքվե կատարելու իրավունք է վերապահում այն դեպքում, եթե Հայաստանի Հանրապետությունը ցանկանա այդպիսին կատարել»¹ (ընդգծումը մերն է - է. Զ.):

Ուշադիր ընթերցողը չի կարող չնկատել, որ հանրաքվե կատարելու իրավունքի մասին այս հոդվածում ասվածը անլուրջ ու անիրական

է, քանզի չի կարող հայկական կողմը լրջորեն հանրաքվեի պահանջ դնել, եթե այդ նույն հոդվածով ընդունել է, որ այդ տարածքները «անվիճելի, պատմական, ազգագրական և իրավական կապ ունեն Թուրքիայի հետ»: Այնինչ, Ս. Վրացյանը, ձեռքի տակ չունենալով պայմանագրի տեքստը և հենվելով Ալ. Սատիսյանի կատարած ինչ-որ ամփոփումների վրա, գրում է, թե «Ալեքսանդրապոլի պայմանագրով Կարսի նահանգը և Սուրմալուն համարվում էին վիճելի մինչև երեք տարի, որի ընթացքում հայոց կառավարությունը կարող է հայտարարել հանրաքվե՝ որոշելու համար վերջնական բախտը այդ նահանգներին: Հանրաքվեի ժամանակ պետք է մտնե այնտեղ խառն հայ-թուրքական ժանդարմերիա»²: Մինչդեռ պայմանագրում, ինչպես տեսանք, ոչ երեք տարվա մասին խոսք կար, ոչ խառն ժանդարմերիայի և ոչ էլ այդ տարածքների վիճելի լինելու մասին:

Ի միջի այլոց Ծարուր-Նախիջևանի հարցում ևս Վրացյանը խեղաթյուրված է ներկայացնում պայմանագրում ասվածը: Նա գրում է. «Ծարուրը և Նախիջևանը ժամանակավորապես օժտվում էին ինքնավարությունը՝ գտնվելով Թուրքիայի հովանավորություն տակ, մինչև որ որոշվի նրանց բախտը»²: Նրա այս ձևակերպումը ընթերցողի մոտ կարող է ստեղծել սոսկալորություն, թե Ծարուր-Նախիջևանի «բախտը» կարող էր և որոշվել հօգուտ Հայաստանի: Մինչդեռ, ինչպես վերը տեսանք, պայմանագրի 2-րդ հոդվածում հստակ ասված էր, որ այդ շրջաններում «հետագայում հանրաքվեի միջոցով հատուկ ազմինիստորացիա կհաստատվի: Հայաստանը պարտավորվում է չմիջամտել այդ ազմինիստորացիայի կարգին, անկախ այն բանից, թե ինչպիսի ձև կընդունի այդ ազմինիստորացիան»: Այլ կերպ ասած, ըստ պայմանագրի Հայաստանը ոչ հավակնել կարող էր Ծարուր-Նախիջևանի նկատմամբ, ոչ էլ միջամտել նրա «բախտի» որոշմանը:

Այսպիսի լուծում էր ստացել Նախիջևանյան հիմնահարցը Ալեքսանդրապոլի պայմանագրում: Ի՞նչ կատարվեց հետագայում, ինչպիսի՞ր ընթացք ստացավ այն, ի՞նչ դեր խաղաց Ալեքսանդրապոլի պայմանագիրը Ծարուրի և Նախիջևանի շրջանների ճակատագրի որոշման խնդրում: Սրանք հարցեր են, որոնց կանդրադառնանք հաջորդ գլխում:

¹ Ս. Վրացյան, Հայաստանը բոլշևիկյան մուրճի..., էջ 162: Նույնի «Հայաստանի Հանրապետությունը», Եր., 1993, էջ 536:

² Նույն տեղում:

¹ Նույն տեղում:

* * *

Ամփոփելով մեր խոսքը կարող ենք արձանագրել, որ

1. Սարիղամիշը և Շահթախթին թուրքական գործերով գրավելու մասին կայացված համաձայնությունից հետո, Մոսկվան կորցրեց հետաքրքրությունը Հայաստանի Հանրապետության հետ պայմանագրի ստորագրման և դեպի Թուրքիա տրանզիտի իրավունք ստանալու նկատմամբ: Այդ է պատճառը, որ Հայաստանի կառավարության հետ բանակցություններ սկսելու վերաբերյալ Լեզրանի առաջարկությունները Ջիչերինը մերժում էր կամ հետաձգում: Հետաձգվում էր նաև Հայաստանի և Ադրբեյջանի միջև վիճելի տարածքների հարցի լուծումը:
2. Բ. Լեզրանի և Լ. Շանթի պատվիրակությունների երևանյան բանակցությունների արդյունքում կազմած հայ-ոսմական պայմանագրի նախագիծը և ստորագրած եզրափակիչ որոշման արձանագրությունն ընդհանուր առմամբ նպաստավոր էին Հայաստանի Հանրապետության համար: Սակայն նրանք մեռելածին էին, քանի որ նրանցում նախանշված պայմաններն անընդունելի էին և՛ Բաքվի, և՛ Անկարայի համար: Մոսկվան ևս չհազարգուվածություն չցուցաբերեց, որի համար էլ Ստալինից և Նարիմանովից մեծ ջանքեր չպահանջվեցին համոզելու կրեմլին մերժել պայմանագրի նախագիծը: Լեզրանի բողոքը և Ջիչերինին ուղղված դիմումները արդյունք տալ չէին կարող:
3. Շարուրի ճակատում ռազմական լուրջ գործողություններ ծավալվել են թուրք-հայկական պատերազմի երրորդ փուլում միայն՝ նոյեմբերին: Չնայած թշնամու թվական գերազանցությունը, Շարուրի համար մղված մարտերում, հայկական ուժերը ցուցաբերել են կամք, կովելու ունակություն: Սակայն Կարսի անկումից հետո Հայկական բանակում ծայր առած դասալքությունը իր բացասական հետևանքներն ունեցավ նաև Շարուրի ճակատում: Թշնամու գերազանց ուժերի ճնշման տակ հայկական ուժերը ստիպված էին թողնել Շահթախթին և Շարուրի դաշտը ու հետ քաշվել: Այնուամենայնիվ զինադադարի հաստատման պահին (նոյեմբերի 18) Շարուրի որոշ մասեր և հարակից չրջանները դեռևս գտնվում էին հայկական ուժերի հսկողության տակ:
4. Սկսելով պատերազմ, ազգայնական Թուրքիան, ամեն ինչից զատ, որոշակիորեն հետապնդում էր նաև դիվանագիտական երկակի նպատակ.

ա) Անտանտին ցույց տալ, որ Հայաստանը և Վրաստանը բոլշևիկյան հեղեղի առաջ պատեն լինել չեն կարող, որ ինքն այդ խնդիրն ավելի հեշտությամբ կարող է լուծել:

բ) Համոզել Ռուսաստանին, որ Թուրքիան հնարավորություն ունի ջախջախել Անգլիայի կովկասյան հովանավորյալներին և տարածաչրջանում հակաիմպերիալիստական լուրջ ուժ դառնալ, եթե, իհարկե, ստանա Ռուսաստանի ռազմատեխնիկական ու ֆինանսական օգնությունը:

Թուրք-հայկական պատերազմի նկատմամբ արևմտյան տերությունների ու Ռուսաստանի վերաբերմունքից դժվար չէր եզրակացնել, որ Անկարան հասել էր իր նպատակին և կարող էր աներկյուղ ձեռնամուխ լինել զոհի հռչակմանը:

5. Ալեքսանդրապոլի կոնֆերանսն ընթացել է թուրքական դիվանագիտության նախանշած սցենարով: Կարաբեքիր փաշան մեծագույն հմտությամբ օգտագործեց նախագահողի իր իրավունքներն ու հնարավորությունները, կոնֆերանսի աշխատանքները տարավ նպատակասլաց հունով և հասավ Թուրքիայի համար ցանկալի արդյունքի: Առանց վարանելու կարելի է արձանագրել, որ Ալեքսանդրապոլի կոնֆերանսը և կնքված պայմանագիրը դիվանագիտության ասպարեզում քեմալական Թուրքիայի առաջին լուրջ հաջողությունն էր: Հայաստանի հարցում քեմալականների նախանշած ծրագիրը գերակատարվեց: Հայաստանից նրանք ավելին պոկեցին, քան նույնիսկ թուրքական «Ազգային ուխտն» էր սահմանել (Սուրմալու, Շարուր-Նախիջևան):

6. Պարտվածի հոգեբանական բարդույթից չձերբազատված հայ պատվիրակները ոչնչով աչքի չընկան և փաստորեն վերածվեցին Կարաբեքիրի կամակատարների: Դրանով պետք է բացատրել այն իրողությունը, որ նրանք իրենց ստորագրությունը դրեցին Կարաբեքիրի հրամայած պայմանագրի տակ այն ժամանակ, երբ կառավարությունը, որին ներկայացնում էին, արդեն գոյություն չուներ: Ալեքսանդրապոլի պայմանագիրը դարձավ նորագույն ժամանակների հայ դիվանագիտության ամենաառեղծվածային ու ձախողված դրվագներից մեկը:

7. Հայաստանի խորհրդայնացումը և պանթուրքիզմի ծրագրերի տեսակետից մեծ կարևորություն ունեցող Նախիջևանի գավառի հնարավոր անցումը Հայաստանին՝ չէր կարող չանհանգստացնել Բաքվին և Անկարային: Շարուր-Նախիջևանի

նկատմամբ Կարաբեքիլի առաջ քաշած պահանջը թուրք-ադրբեջանական հակահայկական դավադրության արդյունքն էր, որն իրականություն դարձավ Սորհրդային Ռուսաստանի լուռ համաձայնությունը: Հայաստանի տիրապետության տակ գտնվող Շարուրը, Սուրմալուն կարող էին թուրք-հայկական բանակցությունների առարկա լինել, բայց Նախիջևանի գավառը՝ ոչ, քանի որ գտնվում էր Ռուսաստանի փաստական տիրապետության տակ: Մինչդեռ վերջինս չբողոքեց և չկանխեց այն: Դա լուրջ բացթողում էր ոռոսական դիվանագիտության կողմից, ինչը ակնառու դարձավ շատ շուտով՝ Մոսկվայի ոռու-թուրքական երկրորդ կոնֆերանսում Նախիջևանի հարցի քննարկումների ժամանակ:

ՄԱՍ ԵՐԿՐՈՐԴ

**ՇԱՐՈՒՐ-ՆԱԽԻՋԵՎԱՆԻ ԽՆԴԻՐԸ
ԹՈՒՐԳ-ԽՈՐՀՐԴԱՑԻՆ ՀԱՐԱԲԵՐՈՒԹՅՈՒՆՆԵՐՈՒՄ
(1920 թ. ԴԵԿՏԵՄԲԵՐ - 1921 թ. ՀՈԿՏԵՄԲԵՐ)**

ԳԼՈՒԽ ԶՈՐՐՈՐԴ

**Իրադրությունը Շարուր-Նախիջևանում Հայաստանում
խորհրդային իշխանության առաջին ամիսներին:
Թուրք-ադրբեջանյան հակահայկական և հակախորհրդային
խժղժությունները (1920թ. դեկտեմբեր-1921թ. փետրվար)**

Հայաստանը խորհրդայնացնելու խնդիրը և վիճելի տարածքների (Ղարաբաղ, Ջանգեղուր, Նախիջևան) վերաբերյալ Ադրբեջանի հեղկոմի հռչակագիրը: Հռչակագրի ընդունման իրական նպատակը:

Շարուր-Նախիջևանի՝ Հայաստանին անցումը կանխելու ուղղությունը ձեռնարկված քայլերը. Ադրհեղկոմի անդամ Բ. Շահթախթինսկու գործուղումը Նախիջևան, նրա հակահայկական գործունեությունը և թուրքամետ քարոզչությունը: Նախիջևանի արտակարգ կոմիսար Վելիբեկովի բանակցությունները Երևանում. Նախիջևանին ինքնորոշման իրավունք տալու Հայհեղկոմի հռչակագիրը, գաղթականության շահերի անտեսումը:

Նախիջևանում իշխանությունը դավթելու թուրքական զորամասի հրամանատար Վեյսալ-բեյի դեկտեմբերյան փորձը, Երևանի և Նախիջևանի միջև հաղորդակցությունը խզելու ուղղությամբ նրա ձեռնարկած քայլերը: Թուրք գործակալների կողմից Հայաստանից ժամանած գործիչների Նախիջևան քաղաքում կազմակերպած միտինգի (հունվ. 7) ձախողումը: Վեյսալ-բեյի՝ Վելիբեկովին ներկայացրած պահանջները, վերջինիս մեղադրելը հայամետության մեջ: Ադրբեջանի Կոմկուսի ԿԿ-ի Քաղբյուրոյի և Կազմբյուրոյի միացյալ նիստի (1921թ. հունվ.12) որոշումների հակահայկական էությունը:

Նախիջևանում իշխանությունը ձեռք գցելու Վեյսալ-բեյի նոր փորձը: Ջահրիի հակախորհրդային խռովությունը (հունվ. 28): Կարաբեքիր փաչայի փետրվարյան հակահայկական նամակները 11-րդ բանակի հրամանատարությունը: Նախիջևանի երկրամասում լարված իրադրության համար մեղավորության բարդումը հայերի վրա: Նախիջևանում իշխանությունը դավթելու թուրքերի նոր փորձերը փետրվարին. Նախիջևանի

նուսական գործամասերը իր հրամանատարությունների տակ դնելու վեյսյալ-բեյի պահանջը, Ղարաջուղ և Բունյան գյուղերում կազմակերպած ապստամբության և Նախիջևան քաղաքը գրավելու փորձի ձախողումը:

1920թ. նոյեմբերի 29-ի վաղ առավոտյան Հայաստանի հեղափոխական կոմիտեն (Հայհեղկոմ), որը նախապես կազմավորվել էր Բաքվում, այսպես կոչված Հայկական ապստամբական զնդի և ուսական 11-րդ Կարմիր բանակի մի գործամասի ուղեկցությամբ Ղազախից մտավ Քարվանսարա (այժմ՝ Իջևան) և հրապարակեց մի հռչակագիր, որով Հայաստանը հայտարարվում էր խորհրդային սոցիալիստական Հանրապետություն: Ինչպե՞ս դա նախապատրաստվեց և իրականացվեց: Այդ հարցին այստեղ չենք անդրադառնա, քանզի այս դեպքում մեզ հետաքրքրողը ոչ թե խորհրդայնացման բուն գործընթացն է, այլ Ադրբեջանի և Հայաստանի միջև վիճելի համարվող տարածքների, հատկապես Շարուր-Նախիջևանի հիմնախնդրի լուծման հարցում այն նոր արժարժույթներն ու զարգացումները, որ ծայր առան Հայաստանի խորհրդայնացման հետ մեկտեղ և շարունակվեցին մինչև Մոսկվայի ուս-թուրքական երկրորդ կոնֆերանսը:

Հազիվ մեկ օր էր անցել Հայհեղկոմի հռչակագրի հրապարակումից, երբ արդեն հաջորդ օրը՝ նոյեմբերի 30-ին, չսպասելով դեպքերի հետագա զարգացմանը և ամբողջ երկրում իշխանությունը Հայհեղկոմին անցնելուն¹, Ադրբեջանի Կոմկուսի կենտրոնի Քաղբյուրոյի և Կազմբյուրոյի միացյալ նիստում լսվում է «Հայաստանում խորհրդային իշխանության հռչակման վերաբերյալ Հայհեղկոմի հեռագրի մասին» հարցը և որոշվում հանձնարարել Ադրբեջանի հեղկոմին հատուկ հռչակագրով դիմելու հայ ժողովրդին, հայտարարելու երկու հանրապետությունների միջև սահմանների վերացման, Հայաստանի դեմ պատերազմական գործողությունները դադարեցնելու, վերջինիս հետ սերտ ռազմական և տնտեսական դաշինք կնքելու մասին: Միացյալ նիստը, բնականաբար, պետք է անդրադառնար նաև վիճելի տարածքների խնդրին. Ադրբեջանը, Ջանգեզուրը և Նախիջևանը² «մեծահոգաբար» հռչակում

էր Հայաստանի անբաժանելի մաս, իսկ Լեռնային Ղարաբաղին ինքնուրույն իրավունք էր վերապահում: Միացյալ նիստի այդ որոշումն իր կոնկրետ արտացոլումն էր գտել նույն օրը՝ նոյեմբերի 30-ին, Ադրբեջանի հեղկոմի նախագահ Նարիմանովի և արտգործոցը կոմ Հուսեյնովի ստորագրությամբ հրապարակված Ադրբեջանի հեղկոմի ողջունի հայտարարության մեջ, որտեղ ուղղակի ասված էր. «Բոլորին, բոլորին, Ադրբեջանի Սորհրդային Սոցիալիստական Հանրապետության անունից հայտարարեք Հայ ժողովրդին Ադրբեջանի հեղկոմի նոյեմբերի 30-ին կայացրած հետևյալ որոշումը.

Ադրբեջանի բանվոր-գյուղացիական կառավարությունը ստանալով ապստամբած գյուղացիների անունից Հայաստանը սոցիալիստական խորհրդային հանրապետություն հայտարարելու ուրախալի լուրը, ողջունում է եղբայրական ժողովրդի հաղթությունը: Այսօրվանից Հայաստանի և Ադրբեջանի միջև եղած սահմանավեճերը հայտարարվում են վերացված: Լեռնային Ղարաբաղը, Ջանգեզուրը և Նախիջևանը համարվում են Հայաստանի Սոցիալիստական Հանրապետության մասը...»¹ (ընդգծումը մերն է - է. Ջ.):

Ադրբեջանի և Հայաստանի միջև վիճելի համարվող տարածքների շուրջ Բաքվում ծայր առած հայտարարությունները դրանով չեն ավարտվում: Այդ նույն նոյեմբերի 30-ին Լեզրանին ուղարկված պատասխան հեռագրում Օրջոնիկիձեն, մերժելով Հայհեղկոմի առաջադրված մինչև դեկտեմբերի 3-ը հետաձգելու նրա առաջարկությունը, միաժամանակ ավելացնում է. «Ադրբեջանը արդեն արձագանքել է և Նախիջևանը, Ջանգեզուրը և Լեռնային Ղարաբաղը հանձնել է Սորհրդային Հայաստանին»²: Իսկ դեկտեմբերի 1-ին Բաքվի խորհրդի հանդիսավոր նիստում՝ նվիրված Հայաստանում խորհրդային իշխանության հաստատմանը, Նարիմանովը հրապարակում է Ադրհեղկոմի դեկլարացիան, որում հավաստվում էր, որ այսուհետ տարածքային հարցերը չեն կարող երկու դարավոր հարևան ժողովուրդների միջև

պես, 1989թ. Բաքվում լույս տեսած փաստաթղթերի ժողովածուում Ադրկոմկուսի Կենտկոմի Քաղբյուրոյի և Կազմբյուրոյի միացյալ նիստի արձանագրությունից հանված է «Նախիջևան» բառը, իսկ Ն. Նարիմանովի հայտնի դեկլարացիայից՝ Նախիջևանը և Ջանգեզուրը Հայաստանի մաս ճանաչելու մասին նախադասությունը (տե՛ս «К истории образования НКАО Аз. ССР, 1918-1925», документы и материалы, Баку, 1989, էջ 64,65):

¹ ՀԱԱ, ֆ. 4033, ց. 1, գ. 967, փ. 10, թ.1:

² «Հայաստանի Հանրապետությունը 1918-1920թթ.», փաստաթղթերի և նյութերի ժողովածու, Եր., 2000, էջ 379:

արյունահեղությունն պատճառ դառնալ, որ «Ջանգեղուրի և Նախիջևանի գավառների տարածքները Սորհրդային Հայաստանի անբաժանելի մաս են կազմում, իսկ Լեոնային Ղարաբաղի աշխատավոր գյուղացիությանը ինքնորոշվելու լիակատար իրավունք է տրվում, Ջանգեղուրի սահմաններում բոլոր ռազմական գործողությունները դադարեցվում են, իսկ Սորհրդային Ադրբեջանի զորքերը դուրս են բերվում»¹:

Սորհրդի նիստում ելույթ ունեցան և Ադրհեղկոմի ղեկավարացիան ողջունեցին Այ. Բեկզադյանը (Հայհեղկոմի անունից), Օրջոնիկիձեն և Միխայլովը (11-րդ Կարմիր բանակի ռազմահեղափոխական խորհրդի կողմից), Կամինսկին (Ադրկոմկուսի Կենտկոմի անունից) և ուրիշներ: Ընդունվել էր բանաձև, որը ողջունում ու հավանություն էր տալիս Ադրբեջանի ղեկավարության որոշմանը, այն համարում պատմական, որով մեկընդմիջտ վերջ կդրվեր ազգամիջյան ընդհարումներին և արյունահեղ պատերազմներին Հայաստանի և մուսուլմանական աշխարհի միջև²: Հաջորդ օրը՝ դեկտեմբերի 2-ին, Օրջոնիկիձեն հաղորդագրություն է ուղարկում Մոսկվա, որում ասված էր. «Հայտնեցեք ընկ. Լենինին և Ստալինին հետևյալը. Հենց նոր Երևանից ստացվել է հաղորդագրություն, որ Երևանում հռչակված է խորհրդային իշխանություն, հին կառավարությունը վերացած է...: Հեղկոմը ներկայումս Դիլիջանում է, վաղն առավոտյան կգնա Երևան...: Ադրբեջանը երեկ հռչակել է Նախիջևանը, Ջանգեղուրը և Լեոնային Ղարաբաղը Սորհրդային Հայաստանին հանձնելու օգտին»³ (ընդգծումը մերն է - է. Ջ.):

Ստանալով Օրջոնիկիձեի այս հաղորդագրությունը՝ Ի. Վ. Ստալինը դեկտեմբերի 4-ին «Պրավդա» թերթում հրապարակում է «Կեցցե Սորհրդային Հայաստանը» խորագրով հոդվածը, որտեղ խոսում է այն մասին, որ խորհրդային կարգերի հաստատումով «Հայաստանի և նրան չըջապատող մուսուլմանների միջև եղած դարավոր թշնամությունը լուծվեց մեկ հարվածով», և ի հաստատումն ասվածի վկայաբերում է Ադրբեջանի ղեկավարության վերոհիշյալ որոշումը՝ հատուկ չեղտագրությամբ ավելացնելով. «...դեկտեմբերի 1-ին Սորհրդային Ադրբեջանը հոժարակամ հրաժարվում է վիճելի տարածքներից և

Հայտարարում է Ջանգեղուրը, Նախիջևանը, Լեոնային Ղարաբաղը¹ Սորհրդային Հայաստանին հանձնելու մասին»:

Այսպես, Հայաստանի խորհրդայնացման կապակցությամբ հրապարակ հանվեց ու լայնորեն քարոզվեց Հայաստանի և Ադրբեջանի միջև վիճելի համարվող տարածքների վերաբերյալ վերջինիս ղեկավարության նոր, «ինտերնացիոնալիստական» հռչակված մոտեցումը, որը, ինչ խոսք, կարող էր մեկընդմիջտ լուծել երկու ժողովուրդների միջև թշնամանք առաջացնող այդ հիրավի բարդ խնդիրը, եթե, իհարկե, Ադրբեջանի ղեկավարությունն իսկապես անկեղծորեն ու հոժարակամ էր հրաժարվել վիճելի տարածքներից, ինչպես Ի. Ստալինն էր գրում, եթե նրա այդ քայլը պարտադրված չէր բոլշևիկյան ղեկավարության կողմից, ժամանակավոր բնույթ չունենալու և չէր հետապնդում բացառապես մի նպատակ՝ նպաստել Հայաստանում խորհրդային իշխանության հաստատմանն ու ամրապնդմանը, Կոմկուսի չուրջը Հայերի համախմբմանը:

Իրադարձությունների հետագա ընթացքն է մեզ բերում այդ համոզմանը: Շատ ժամանակ չէր անցել այդ «պատմական» օրերից, երբ պարզ դարձավ, որ Սորհրդային Ադրբեջանի ղեկավարները բոլորովին էլ չեն հրաժարվել վիճելի տարածքներին տեղ դառնալու մտադրությունից: Սուրբ հատկապես ադրբեջանական ծագումով ղեկավարները՝ Նարիմանովի, Հուսեյնովի, Կարաևի, Կասումովի և նրանց չուրջը համախմբվածների մասին է: Ճիշտ է, ձեռքի տակ չունենալով Ադրբեջանի Կոմունիստական կուսակցության Կենտկոմի Քաղբյուրոյի և Կազմբյուրոյի նոյեմբերի 30-ի միացյալ նիստի սղագրությունները, չենք կարող ասել, թե ինչպիսին էր նրանց վերաբերմունքը վիճելի տարածքների վերաբերյալ կայացրած որոշման հարցում, թեև վստահ ենք, որ այդ նիստում լինելով փոքրամասնություն², ընդունված որոշումների վրա ազդել նրանք չէին կարող: Ճիշտ է նաև այն, որ Հայաստանի խորհրդայնացումից հետո Նարիմանովը և նրա խումբը այլևս ղեկին ասպավինել չէին կարող, բայց չէ՞ որ կային այլ միջոցներ ևս (չանտաժ,

¹ Ինքնորոշման իրավունքի փոխարեն Լեոնային Ղարաբաղը Հայաստանին հանձնելու վերաբերյալ որոշ փաստաթղթերում տեղ գտած դրույթը հավանաբար հետևանք էր այն մտայնության, որ հիմնականում հայաբնակ այդ մարզը հանրապետի ղեկավարում կարտահայտվեր Հայաստանի օգտին:

² Նիստի տասը մասնակիցներից միայն չորսն էին ազգությամբ ադրբեջանցի՝ Նարիմանովը, Հուսեյնովը, Կարաևը և Կասումովը: Նիստի մյուս մասնակիցներն էին՝ Օրջոնիկիձեն, Ստասովան, Կամինսկին, Սարգիսը, Եզրովը և Սերբերովսկին (Տե՛ս «К истории образования НКАО...», էջ 63):

¹ ՀԱԱ, ֆ.4033, ց.1, գ. 973, փ. 10, թ.1-3:

² Նույն տեղում:

³ «Բանբեր Հայաստանի արխիվների», 1993, էջ 318-319:

կաշառք, ցեղակից Թուրքիա և այլն): Թե ինչպես Նարիմանովն օգտագործեց նավթի գործոնը և շանտաժը՝ Լեոնային Ղարաբաղի հարցը հօգուտ Ադրբեջանի լուծելու համար, հանրահայտ է: Այդ մասին հրապարակի վրա պատմագիտական բաղմամբով ուսումնասիրություններ կան թե՛ հայերեն և թե՛ օտար լեզուներով:

Վերջին տարիներին քիչ չի գրվել ու խոսվել նաև զանգեզուրցիներին հերոսական կեցվածքի, երկրամասը խորհրդայնացնելու միջոցով Ադրբեջանին կցելու նարիմանովյան խմբի բոլոր փորձերին միահամուռ հակահարված տալու, այդ գործում Գ. Նժդեհի խաղացած անուրանալի դերի մասին: Զանգեզուրի հարցում Ադրբեջանի ձեռքերը իսկապես որ կարճ դուրս եկան: Արդյունք չտվեցին նույնիսկ Զանգեզուրի խորհրդային ղեկավար գործիչներին կաշառելու միջոցով Ադրբեջանի կողմը թեքելու, Կարմիր բանակի հրամանատարությունը զանգեզուրցիների դեմ տրամադրելու նպատակով ոռու գինավորականներ սպանելու և մեղքը հայերի վրա բարդելու ուղղությամբ Նարիմանովի խմբի անդամների ձեռնարկած քայլերը, ինչի մասին վկայություններ կան արխիվային որոշ փաստաթղթերում¹:

Պատկերն այլ է Նախիջևանի հարցում: Մեր պատմագիտական գրականության մեջ Մոսկվայի և Կարսի պայմանագրերի համապատասխան հոդվածները վկայակոչելուց և Ադրբեջանի օգտին կայացրած համաձայնությունների գործում Թուրքիայի խաղացած դերը մատնանշելուց բացի՝ այլ բան գրեթե չկա: Բաքվում լույս տեսած ուսուլեզու ուսումնասիրություններում ևս ոչինչ չի ասված այդ հարցում Ադրբեջանի ղեկավարության խաղացած դերի մասին: Եվ ստեղծվում է տպավորություն, թե առանց ջանքեր թափելու, առանց նրա մասնակցություն և նույնիսկ գիտություն Ադրբեջանը Մոսկվայի կոնֆերանսից նվեր է ստացել մի ամբողջ երկրամաս: Մինչդեռ իրականությունը բոլորովին այլ է. Ադրբեջանն այդ ամենին հասել է Թուրքիայի հետ ձեռք ձեռքի տված, երկարատև ու համառ պայքարի արդյունքում ոչ միայն կոնֆերանսի օրերին, այլև նրան նախորդած ամիսների ընթացքում:

Այն, որ ադրբեջանցի պատմաբանները Նախիջևանի խնդրում Նարիմանովի խմբի հակահայկական գործունեությունից մասին չպետք է գրեին, պարզ է ու հասկանալի²: Իսկ թե ինչու այդ բանը չեն արել հայ

պատմաբանները, դժվար է ասել: Արդյո՞ք պատճառը միայն այն էր, որ ընդհանրապես չեն ցանկացել անդրադառնալ Նախիջևանի խնդրին, թե նաև այն, որ Բաքվի արխիվները մեր պատմաբաններին մատչելի չէին¹, իսկ Երևանի և Մոսկվայի արխիվներում այդ կարգի նյութ քիչ է պահպանվել: Պատճառներից մեկն էլ գուցե այն է, որ Ադրբեջանի ղեկավարությունը գործել է չափազանց զգույշ, հոչակազրի հրապարակումից հետո Նախիջևանի վերաբերյալ հրապարակային հայտարարություններ չի արել, գործել է թուրքերի միջոցով: Ինչ էլ որ լինեք պատճառը, մի բան ակնհայտ է. հրապարակի վրա մենք չունենք Նախիջևանի խնդրում թուրք-ադրբեջանյան հակահայկական գործունեությունը և խարդավանքները բացահայտող աշխատություն²: Մինչդեռ մեր արխիվներում պահպանված նյութը թեև քիչ է, բայց կայանալիս հնարավորություն տալիս է բացահայտելու այն գործելակերպը, որ իրագործեցին Բաքուն և Անկարան՝ կանխելու համար Շարուր-Նախիջևանի անցումը Հայաստանին:

* * *

Հայաստանի խորհրդայնացումը և Նախիջևանը Հայաստանին հանձնելու վերաբերյալ բուլղարական ղեկավարությունից հայտարարությունները չէին կարող առաջ չբերել Անկարայի կառավարող չրջանների անհանգստությունը: Նախ, որովհետև Հայաստանի խորհրդայնացումից հետո Նախիջևանի դերը՝ որպես Թուրքիայի հետ կապող օղակի, ինքնատիքյան վերանում էր: Այժմ արդեն այդ կապը իրականացվում էր Հայաստանով՝ Կարս-Ալեքսանդրապոլ երկաթգծով: Իսկ դա նշանակում է, որ ո՛չ Թուրքիան, ո՛չ Ադրբեջանը Նախիջևանն իրենց ձեռքում պահելու համար այդ պատճառաբանությունն օգտագործել այլևս չէին կարող: Չէին կարող նաև ամբողջովին ապավինել Ալեք-

այդ գործունեության հակահայկական ուղղվածության և այդ հարցում Բ. Շահ-թախթինսկու խաղացած դերի մասին (Տե՛ս Գ. Мадамов, Победа Советской власти в Нахичеване и образование Нахичеванской АССР, Баку, 1968, էջ 99-105):

¹ Դրանում համոզվել ենք անձամբ դեռևս 1970թ. Բաքվի արխիվներում աշխատելիս: Արտաքին քաղաքականության և վիճելի տարածքների վերաբերյալ նյութեր տրամադրելու մեր բոլոր պահանջները մերժվում էին, ըստ որում, առանց որևէ պատճառաբանություն:

² Այդ հարցը մասամբ շոշափված է մեր «Սովետական Ռուսաստանը և Հայ-թուրքական հարաբերությունները 1920-1922թթ.» (տե՛ս էջ 220-225) և Գ. Գալոյանի «Հայաստանը և մեծ տերությունները 1917-1923թթ.» (Եր., 1999, էջ 382-385) աշխատություններում:

¹ Տե՛ս ԲԳԱՍՊ, փ. 64, ծ. 19, յ. 9, 10.

² Օրինակ, Գ. Մաղաթովը, իր գրքում շուրջ 6-7 էջ նվիրելով Նախիջևանում թուրք գինավորականության հակախորհրդային գործունեությունը, ոչինչ չի ասում

սանդրապոլի պայմանագրին՝ քաջ գիտակցելով, որ Սորհրդային Ռուսաստանն այն չի ճանաչի, իսկ Հայհեղկոմն էլ կպահանջի չեղյալ հայտարարել այդ ապօրինի պայմանագիրը¹: Ուրեմն Նախիջևանի անցումը Հայաստանին կանխելու և այնտեղ հաստատվելու համար նոր, ավելի հիմնավոր պատճառներ էին պետք: Եվ թուրքական դիվանագիտությունը որոշում է դարձյալ չահարկել բոլշևիկյան ղեկավարությունը խիստ հոգեհարազատ Անտանտի դեմ պայքարելու անհրաժեշտությունը: Արդեն ղեկտեմբերի 7-ին դեռևս Ալեքսանդրապոլում գտնվող Բեհրուսթ Շահթախթինսկին հեռագրում է. «...թուրքերը չեն ժխտում ապագայում Անտանտի հետ որևէ համաձայնություն կնքելու հնարավորությունը (քեմալական ղեկավարության աջ թևի կողմից² - է. Զ.), ուստի և ուզում են Նախիջևանի մարզը, Շարուր-Ռարազպազի մի մասը և Մակվի խանությունը վերածել մի ինքնավար միավորի, որը Անտանտի հետ համաձայնության դեպքում թուրք ապստամբների համար բազա կձառայի Արևելքում Անտանտի դեմ պայքարը շարունակելու համար»³ (ընդգծումը մերն է - է. Զ.):

Մի կողմ թողնելով Պարսկաստանի մաս կազմող Մակվի խանությունը խնդիրը՝ արձանագրենք, որ այս հեռագիրը, ըստ էության, Նախիջևանի և Շարուրի նկատմամբ Ալեքսանդրապոլի պայմանագրով ամրագրված թուրքիայի իրավունքների հիմնավորմանը և խորհրդային ղեկավարության կողմից այդ իրավունքների ճանաչմանն ուղղված քայլ էր: Եվ ուշագրավ է, որ այդ մասին հաղորդում է Շահթախթինսկին և ոչ թե թուրք որևէ պաշտոնյա: Ճիշտ է, հեռագրում նա նաև ասում է, որ իբր ինքը թուրքերին խորհուրդ է տվել Անտանտի դեմ պայքարի համար օգտագործել Բայազեդի սանջակը և Վանի վիլայեթը, բայց կարծում ենք, որ դա ինքնաապահովագրման համար է ասված: Դրա ապացույցը հենց ինքը տվեց, երբ վերոհիշյալ հեռագրից կարճ ժամանակ անց հայտնվեց Նախիջևանում ու սկսեց թուրքիայի օգտին բացահայտ քարոզչություն անել: Այդ մասին խիստ ուշագրավ տեղե-

¹ Ալեքսանդրապոլի պայմանագիրը չեղյալ հայտարարելու և հայ-թուրքական նոր կոնֆերանս գումարելու վերաբերյալ Անկարայի կառավարությանն ուղղված Հայհեղկոմի առաջարկությունների մասին տե՛ս է. Ա. Զոհրաբյան, նշվ. աշխ., էջ 172-189:

² Տարածված էր տեսակետ, թե քեմալական կառավարող շրջաններում երկու հոսանք կա՝ աջ և ձախ: Աջերը ձգտում էին Անտանտի հետ համաձայնության, ձախերը՝ Ռուսաստանի հետ համագործակցության և բարեկամության: Կարաբեքիր փաշային համարում էին ձախ թևի ներկայացուցիչ:

³ РГАСПИ, ф. 85, он. 13, д. 143, л. 1-2.

կություններ են պահպանվել Նախիջևանի արտակարգ կոմիսար Վելիբեկովի ղեկուցադրերում, որոնց շարքում առանձնակի հետաքրքրություն է ներկայացնում 1921թ. հունվարի 23-ով թվագրված 4-րդ ղեկուցագիրը՝ ուղղված Հայաստանի կոմկուսի կենտկոմին և հեղկոմին (պատճենը՝ Ադրբեջանի կոմկուսի կենտկոմին և հեղկոմին, 11-րդ Կարմիր բանակի ռազմահեղափոխական խորհրդին): Այն բավականին ընդարձակ է՝ շուրջ ութ էջ, և այնտեղ խիստ ուշագրավ փաստեր կան մեզ հետաքրքրող հարցի՝ Նախիջևանի խնդրում Բաքվի և Անկարայի համագործակցության և հակահայկական գործունեության վերաբերյալ¹: Իսկ թե ինչու 1920թ. ղեկտեմբերին և 1921թ. հունվարին տեղի ունեցած իրադարձությունների մասին Նախիջևանի արտակարգ կոմիսարը ղեկուցում էր այդքան ուշ՝ հունվարի 23-ին, կտեսենք ավելի ուշ: Նախ ծանոթանանք ղեկուցադրում տեղ գտած փաստերին:

Պարզվում է, որ Ալեքսանդրապոլում իր սև գործն ավարտելուց հետո Բ. Շահթախթինսկին ղեկտեմբերի կեսերին անսպասելի կերպով հայտնվել է Նախիջևանում և զորամասի հրամանատար Վեյսալ-բեյի հետ ձեռք ձեռքի տված՝ ձեռնարկել Նախիջևանի ազգաբնակչությանը թուրքիայի օգտին հակելու գործը: Սոսելով այն մասին, որ դեռ մինչև Շահթախթինսկու ժամանումը Նախիջևանի խորհրդային ղեկավարության և Վեյսալ-բեյի միջև որոշ հակասություն կար՝ վերջինիս կողմից խորհրդային հաստատությունների գործերին միջամտելու պատճառով, Վելիբեկովը գրում է. «Հանկարծ Նախիջևան է գալիս Ադրհեղկոմի անդամ, արդարադատության կոմիսար ընկ. Շահթախթինսկին: Իսկույն նրա շուրջն են հավաքվում խորհրդային իշխանությունից նեղացածները և վիրավորվածները՝ կալվածատերերը, կաշվեգործարանատերերը, առևտրականները և այլն: Այդտեղ եմ գալիս և ես՝ կենտրոնից տեղեկատվություն ստանալու համար: Նրանից իմանում եմ Նախիջևանի վերաբերյալ Ադրհեղկոմի ակտի՝ այսինքն նրան Սորհրդային Հայաստանին հանձնելու մասին: Հենց այստեղ՝ հասարակության ներկայությունը նա փոքրիկ անզույշ արտահայտություն է անում. «Ադրբեջանը ձեզ ծախեց, եթե ես Բաքվում լինեի, ապա դա թույլ չէի տա»: Ես հեռանում եմ: Մեկ ժամից հեղկոմը շրջապատվում է ամբոխի կողմից՝ երկու հարյուր քաղաքացիներ, որոնք բացատրություն են պահանջում Ադրբեջանի հեղկոմի ակտի վերաբերյալ»²:

Պակաս հետաքրքրական չէ Վելիբեկովի տված բացատրությունը

¹ Տե՛ս ՀԱԱ, ֆ. 114, ց. 2, գ. 25, թ. 23-24, 28-29, 30-31, 34-35:

² Նույն տեղում, թ. 28:

ամբոխին: Նա հայտարարել է, որ Ադրբեջանի հեղկոմը ճիշտ է վարվել՝ ընդունելով այդ հռչակագիրը, որ այն հրապարակվել է Հայաստանում Պորհրդային իշխանության հաստատումից 2-3 օր առաջ և ուղղված էր ազգային զգացմունքների դեմ: «Այդ ակտով դաշնակները համոզվեցին իրենց անգործության մեջ, - ասել է Վելիբեկովը, - այն, ինչ տարիներով նրանք չկարողացան ձեռք բերել զենքի ուժով, այսօր խորհրդային իշխանությունը լուծել է գրչի մի հարվածով: Ես համոզեցի ամբոխին, որ ժողովրդի կամքը արտահայտող Պորհրդային Հայաստանից կհետևի ինքնավարություն սովող (Նախիջևանին - է. Զ.) երկրորդ ակտը, իսկ այնուհետև կհետևի Նախիջևանի երրորդ ակտը, որն իր ճակատագիրը կորոշի իր տնտեսական պահանջմունքներին համապատասխան»¹ (ընդգծումը մերն է - է. Զ.):

Ինչպես տեսնում ենք, Վելիբեկովը այդ շուրջ երկու հարյուր մարդկանց, որոնց նա ամբոխ է անվանում, չի փորձել համոզել, որ Ադրբեջանի հեղկոմը իր հռչակագրով ուղղակի արդարությունն է վերականգնել, որ անհրաժեշտ է ընդունել Հայաստանի գերիշխանությունը, որն այժմ արդեն խորհրդային է, ինչպես Ռուսաստանը և Ադրբեջանը, հարևան հայերի հետ ապրել հաշտ ու համերաշխ և այլն: Դրա փոխարեն նա հրապարակ է նետել Հայհեղկոմի կողմից Նախիջևանին ինքնորոշման իրավունք տալու գաղափարը՝ անտարակույս Ծախթախթինսկու կողմից առաջադրված և այն էլ ոչ այնքան ամբոխին հանգստացնելու, որքան այն գործունեության ուղեցույց դարձնելու միտումով: Վստահաբար կարող ենք ասել, որ Բաքվում որևէ նախնական համաձայնություն չի կայացվել Հայհեղկոմի կողմից Նախիջևանին ինքնորոշման իրավունք տալու մասին ոչ միայն նրա համար, որ որևէ վկայության չենք հանդիպում ո՛չ հրապարակի վրա եղած գրականության մեջ (այդ թվում՝ ադրբեջանական) և ո՛չ էլ արխիվային փաստաթղթերում, այլև նրա, որ այդ դեպքում Ծախթախթինսկին ազգաբնակչության մեջ Թուրքիայի օգտին քարոզչություն չէր անի: Զէ՞ որ ակնհայտ էր, որ հայերի և Հայաստանի դեմ թշնամաբար տրամադրված և 1918-1919 թվականների արյունալի իրադարձություններից հետո հիմնականում ադրբեջանական ազգաբնակչություն ունեցող Նախիջևանը ինքնորոշման իրավունքի իրագործման դեպքում կբռնեք Ադրբեջանի կողմը: Սակայն Ծախթախթինսկին ղեկտեմբերյան այդ օրերին² դեռևս վստահ

չէր, թե Հայաստանը Նախիջևանին ինքնորոշման իրավունք կտա և այդպիսով ցանկալի արդյունքի հասնելու հնարավորություն կառաջանա: Դրա համար էլ ավելի շատ հակված էր դեպի Թուրքիա, երկրամասը Հայաստանից կտրելու ամենաիրատեսական ուղին դա էր համարում և ազգաբնակչությանն էլ բացահայտորեն տրամադրում էր հօգուտ Թուրքիայի: Վելիբեկովը հունվարի 23-ով թվագրված իր գեկուցագրում հայտնում է, որ վերը հիշատակած հանդիպման ժամանակ ամբոխը միաձայն լիազորել էր իրեն հայտնելու վստահություն, երբ անսպասելիորեն հայտնվում է Ծախթախթինսկին և «դիմելով ամբոխին բառացիորեն ասում հետևյալը. Ես՝ որպես Ադրհեղկոմի անդամ, այսօր վերցնում եմ ընկ. Վելիբեկովին և մեկնում: Այստեղ նա (Վելիբեկովը և ես) կապ չունի՝ Հիմա դուք Հայացքներդ ուղղեք թուրքերին: Նրանք են ձեր միակ փրկությունը: Ամուր բռնեցեք նրանցից»³:

Վելիբեկովի գեկուցագրում տեղ գտած փաստերից դժվար չէ հետևություն անել, որ Ծախթախթինսկին գործում էր թուրքերի, այս դեպքում Նախիջևանի շրջանում տեղաբաշխված թուրքական զորամասի հրամանատար Վեյսալ-բեյի հետ համախորհուրդ: Քաջատեղյակ Նախիջևան քաղաքում գումարված միտինգում հնչած թուրքամետ հայտարարությանը՝ Վեյսալ-բեյը նույն օրը թողնում է իր նստավայր Ծախթախթին, ժամանում Նախիջևան և միանգամից գործի անցնում՝ իր շուրջը համախմբելով բոլոր դժգոհ տարրերին: «Այդ օրը, - գրում է Վելիբեկովը, - Ծախթախթի գյուղից գալիս է թուրքական զորամասերի հրամանատար Վեյսալ-բեյը: Պատասխանատու ընկ., Ադրհեղկոմի անդամի խոսքերից հետո իսկույն նրա շուրջն են հավաքվում ոչ միայն մեզ թշնամաբար տրամադրված, այլև կոմունիստորեն տրամադրված տարրերը, քանի որ նրանք մտածում են, որ դա կենտրոնի կամքը և կարծիքն է: Այդ օրվանից սկսած միտնոցորտը լարվում է»³:

Վելիբեկովը նաև գրում է, որ Վեյսալ-բեյը, օգտվելով իր ժամանակավոր բացակայությունից (ճանապարհվել էր Երևան), իրեն հռչակել է Նախիջևանի արտակարգ կոմիսար և իր գործակալների միջոցով բացահայտ հակախորհրդային քարոզչություն ծավալել. «Ես չտապ մեկնում եմ Երևան՝ տեղեկացնելու կենտրոնին Ադրհեղկոմի ակտի կապակցությամբ մասսայի տրամադրության մասին, - կարդում ենք նրա գեկուցագրում: - Նախիջևանի կայարանում ես իմանում եմ, որ քա-

¹ Նույն տեղում:

² Վելիբեկովի գեկուցագրում ամսաթվերը նշված չեն: Այլ փաստաթղթերից տեղեկանում ենք, որ գեկուցագրում նշված իրադարձությունները տեղի են ունեցել ղեկտեմբերի 22-ին:

¹ Այսպես է տեքստում:

² ՀԱԱ, ֆ. 114, ց. 2, գ. 25, թ. 30:

³ Նույն տեղում:

դաքից իմ դուրս գալուն պես Վեյսալ-բեյը իրեն հռչակել է արտակարգ կոմիսար, քաղաքում հակահեղափոխականները խորհրդային իշխանության դեմ քարոզչություն են անում»¹: Վելիբեկովը նաև հայտնում է, որ ինքը կայարանից (գտնվում էր քաղաքից շուրջ 1 կմ. հեռավորության վրա) անմիջապես հեռախոսազիր է ուղարկել Վեյսալ-բեյին՝ նման գործունեության անթույլատրելիության մասին և նաև նամակ Շահթախթինսկուն՝ խնդրելով ազդել Վեյսալ-բեյի վրա՝ դադարեցնելու հակախորհրդային գործունեությունը:

Վեյսալ-բեյի հակախորհրդային գործունեությանը դեռ կանդրադառնանք, այստեղ միայն նշենք, որ Վելիբեկովի ձեռնարկած քայլերը ոչ մի արդյունք չէին տվել, ինչի մասին վկայում է Երևանում Թուրքիայի արևելյան ճակատի ներկայացուցիչ Բահադդինի ղեկավարների 22-ին Հայհեղկոմ ներկայացրած գրությունը: Նրանում ասված է, որ ինքը Նախիջևանի արտակարգ կոմիսար և կարմիր զորամասերի հրամանատար Վեյսալ-բեյից նույն օրը ստացել է հաղորդագրություն, ըստ որի.

«1. Թուրքական բանակի արևելյան ճակատի ներկայացուցիչ ընկ. Բահադդինը միաժամանակ վարում է խորհրդային Նախիջևանի ներկայացուցչի պաշտոնը:

2. Առանց խորհրդային Նախիջևանի ներկայացուցչի տված վկայականի ոչ մի քաղաքացի իրավունք չունի անցնելու խորհրդային Նախիջևանի տարածք և այդ մասին հրաման է տրված սահմանապահ զորամասերին:

3. խորհրդային Նախիջևանի կողմից ընկերներ Վելիբեկովը և Նազիրը գործուղված են Երևան փախստականների դրություն մասին ՀՆԱՀ-ի հետ բանակցելու համար»²:

Այս փաստաթղթի բովանդակությունից դժվար չէ հետևություն անել, որ նախ՝ Վեյսալ-բեյը, իրեն հռչակելով Նախիջևանի արտակարգ կոմիսար, գործել էր ոչ թե ինքնազուտ, այլ թուրքական վերին իշխանությունների հրահանգով, այլապես նա չէր կարող Բահադդինին հայտարարել իր ներկայացուցիչը Երևանում: Եվ ապա, նա Հայաստանից Շարուր-Նախիջևանի անջատումը ոչ միայն կատարված փաստ է համարում, այլև փորձում է անկախ պետական կազմավորման կարգավիճակ հաղորդել նրան, ինչը չէր նախատեսված նույնիսկ Ալեքսանդրապոլի պայմանագրով: Ըստ այդմ, որպես թուրք ամբարտապան

¹ Նույն տեղում:

² Նույն տեղում, ց. 1, գ. 6, թ. 13:

զինվորականությունից տիպիկ ներկայացուցիչ, անգամ հարկ չէր համարել հարցնելու Երևանի համաձայնությունը Բահադդինին որպես Նախիջևանի ներկայացուցիչ ճանաչելու խնդրում: Հարկ չէր համարել նաև հարցնելու Հայհեղկոմի համաձայնությունը փախստականների հարցի շուրջ բանակցելու մասին: Ի դեպ, փաստաթղթում չի ասված, թե խոսքը ո՞ր փախստականների մասին է: Թեև պարզից էլ պարզ է, որ Վեյսալ-բեյին և Շահթախթինսկուն հետաքրքրողը ոչ թե Շարուր-Նախիջևանի հայ գաղթականների վերադարձն էր հայրենի օջախ, այլ Զանգիբասարի և Վեդիբասարի մուսուլմանների:

Բահադդինի գրություն մյուս ուշագրավ կողմն էլ այն է, որ նրանից պարզ է դառնում, որ Վելիբեկովը սեփական նախաձեռնությամբ չի ուղևորվել Երևան, ինչպես դա ներկայացնում է ղեկուցագրում, այլ գործուղվել է: Ուրեմն կասկած չի կարող լինել, որ դա արվել է Շահթախթինսկու թելադրանքով, հետևաբար՝ ոչ առանց Վեյսալ-բեյի գիտություն: Ընդհանրապես, իրադարձությունների ընթացքը վկայում է, որ ղեկավարներից այդ օրերին Վելիբեկովը գործում էր Շահթախթինսկու հետ համախորհուրդ, իսկ հակասությունը նրանց միջև ծագել է ավելի ուշ՝ 1921թ. հունվարի երկրորդ կեսին:

Մեզ հայտնի չէ, թե Հայհեղկոմը ինչպես է վերաբերվել Բահադդինին Նախիջևանի ներկայացուցիչ ճանաչելու խնդրին. մերժե՞լ է, թե՞ ուղղակի թողել է անպատասխան: Հակված ենք կարծելու, որ այդ հարցը չուտով օրակարգից ուղղակի դուրս է եկել, քանի որ Վեյսալ-բեյն էլ 4-5 օր հետո ստիպված եղավ հրաժարվելու իր հավակնություններից: Օրինակ, Հայաստանի արտգործօրհանի ներկայացրած ղեկավարների 27-ի պաշտոնական գրություն մեջ, որում շոշափված է Շարուրի չրջանի հայկական գյուղերի հարցը, Բահադդինը արդեն ներկայանում է միայն որպես Թուրքիայի արևելյան ճակատի ներկայացուցիչ: Ի միջի այլոց, փորձելով արդարացնել թուրք զինվորականությունը՝ Բահադդինը գրում է, որ «Շարուրի հայկական գյուղերը ավերվել էին 1919թ., այսինքն մինչև թուրքական զորքերի մուտքը այնտեղ», և որ, հակառակը, հայ գաղթականները հեռանալով ավերել են բոլոր մուսուլմանական գյուղերը և տարել տների փայտյա մասերը: «Վերջին ռազմական գործողություններից առաջ, - հավելում է Բահադդինը, - հայ գաղթականները տեղավորված էին Բաշնորաչենում, Մամեդբենդում և այլ մուսուլմանական գյուղերում, ինչը վկայում է այնտեղ հայկական գյուղերի բացակայություն մասին»¹ (ընդգծումը մերն է - է. Զ.):

¹ Նույն տեղում թ. 22:

ձիշտ է Բահադդինը, որ Շարուրի հայկական գյուղերը ավերվել էին դեռևս 1919թ., ճիշտ է նաև, որ շարուրցի գաղթականները, որոնք հայրենիք էին վերադարձել 1920թ. ամռանը՝ հայկական զորքերի կողմից Շարուրը ազատագրելուց հետո, տեղավորվել էին ոչ թե իրենց, այլ մուսուլմանական լքված գյուղերում: Բայց դրա պատճառը ոչ թե այն էր, որ Շարուրում հայկական գյուղեր չկային, ինչպես եզրակացնում է Բահադդինը, այլ այն, որ այդ գյուղերը ավերվել ու հողին էին հավասարեցվել այնքան հիմնովին, որ նրանցում բնակվել հնարավոր չէր: Ըստ որում, այդ գործում քիչ չի եղել նաև թուրք զինվորականության դերը, բոլոր նրանց, ովքեր կազմակերպեցին և գլխավորեցին հակահայկական շարժումը Շարուրում: Դա պետք է որ Բահադդինը չճանաչեր:

Դառնալով Վելիբեկովի առաքելությանը՝ ցավով պետք է արձանագրենք, որ այն հաջողությամբ է պսակվել. Հայհեղկոմը բոլոր հարցերում ընդառաջել է նրան, բավարարել նրա բոլոր պահանջները այն դեպքում, երբ դրանք չէին բխում Հայաստանի շահերից (օր.՝ Շարուր-Նախիջևանին ինքնորոշման իրավունք տալը): Ինքը՝ Վելիբեկովը, վերը հիշատակված իր ղեկուցագրում շատ հակիրճ է անդրադարձել իր երևանյան առաքելությանը: Նա գրում է. «Հայաստանի հեղկոմը շատ ուշադիր վերաբերվեց իմ ղեկուցմանը և հրապարակեց դեկլարացիա, որով Նախիջևանի երկրամասի ճակատագիրը հանձնում էր ազգաբնակչության կամքին»¹ (ընդգծումը մերն է - է. Զ.): Այսքանը միայն. Վելիբեկովը բառացիորեն ոչինչ չի ասում, թե ինքը ուրիշ ի՞նչ փաստարկներ է բերել հօգուտ Նախիջևանի ինքնորոշման, ինչպե՞ս է կարողացել համոզել Հայհեղկոմի անդամներին ընդունել իր առաջարկությունը: Նա ոչինչ չի ասում նաև Հայհեղկոմի կողմից իրեն Նախիջևանի արտակարգ կոմիսար նշանակելու մասին: Մինջդեռ Հայաստանի ազգային արխիվում է պահվում Հայհեղկոմի նախագահ Ս. Կասյանի և արտգործոց Ալ. Բեկզադյանի ստորագրությունները 1920թ. դեկտեմբերի 24-ին Վելիբեկովին հանձնված այն վկայականի պատճենը, որտեղ ուղղակի ասված է. «Սույն վկայականը տրված է ընկ. Վելիբեկովին առ այն, որ Հայաստանի Խորհրդային Սոցիալիստական Հանրապետության Հեղկոմի կողմից նա նշանակվում է Հայաստանի Հանրապետության արտակարգ կոմիսար Նախիջևանի չրջանում:

Հանրապետության բոլոր ռազմական և քաղաքացիական իշխա-

¹ Սույն տեղում, ց. 2, գ. 25, թ. 29:

նություններին առաջարկվում է ընկ. Վելիբեկովին ցույց տալ անհրաժեշտ աջակցություն՝ նրա վրա դրված պարտականությունների կատարման ժամանակ»¹ (ընդգծումը մերն է - է. Զ.):

Շատ տարօրինակ է, որ այս նշանակման մասին ոչինչ չկա ոչ միայն մեր, այլև ադրբեջանցի պատմաբանների աշխատություններում: Սակայն անհայտությունների շարքը դրանով չի ավարտվում: Անհայտ է մնում նաև մեկ այլ բան՝ արդյո՞ք Վելիբեկովը երևանում գտնվելու ժամանակ Հայհեղկոմին տեղեկացրել է Շահթախթինսկու հակահայկական գործունեության մասին: Փաստերի բացակայությունը այս հարցին միանշանակ պատասխան տալու հնարավորություն չի տալիս: Բայց որ Հայաստանի ղեկավարությունը արդեն անվստահությամբ էր վերաբերվում Շահթախթինսկուն, դա փաստ է, և այդ մասին վկայություն կա Ա. Մուսվյանի և Ա. Բեկզադյանի միջև ղեկտեմբերի 26-ին տեղի ունեցած մի հեռախոսային խոսակցությունում²:

Բայն այն է, որ ղեկտեմբերի կեսերին Մոսկվայում գտնվող Ասքանազ Մուսվյանը և Սահակ Տեր-Գաբրիելյանը տեսակցություններ էին ունեցել Վլ. Լենինի, Լ. Տրոցկու և Լ. Կարախանի հետ³: Թե ինչի մասին են խոսել Լենինի և Տրոցկու հետ ու ինչ պատասխան ստացել, կտեսնենք մեկ այլ տեղ: Ինչ վերաբերում է Շահթախթինսկուն չվստահելու խնդրին, ապա Հայ պատվիրակներն իրենց այդ կարծիքը Հայտնել են Կարախանի հետ հանդիպման ժամանակ, երբ զրույցի ընթացքում անդրադարձ է կատարվել թուրքերի հետ առաջիկայում կոնֆերանս գումարելու և Հայ-թուրքական հարաբերությունների խնդրին: Հայտնելով այն մասին, որ կոնֆերանս գումարելու հարցը դեռ լուծված չէ, որ թուրքերը համառորեն պնդում են գումարել այն Բաքվում և որ այդ հարցում տարաձայնություններ կան Անգորայի և էրզրումի միջև, ու ինքը կարծում է, որ Անգորան հակված է զիջելու, բայց Կարաբեքիրը բողոքում է, Կարախանը նաև ավելացրել է, թե անհրաժեշտ է հստակ պատկերացում ունենալ թուրքերի դիրքորոշման, ինչպես նաև այն մասին, թե «ինչպիսի ազդեցությունից է օգտվում Կարաբեքիրը»: Իսկ երբ Կարախանը նաև ասել է, որ այդ կապակցությամբ ինքը «մեծ հույսեր է կապում Շահթախթինսկու գործուղման հետ», ապա հետևել

¹ Սույն տեղում, գ. 87, թ. 1:

² Հեռախոսային այս խոսակցությունը Լոնդոն էր հաղորդել Կովկասում բրիտանական հետախուզական ծառայությունը:

³ Մրազրված էր հանդիպում (Լենինի առաջարկությամբ) նաև Ստալինի հետ, բայց այն չի կայացել վերջինիս կույր աղիքի բորբոքման պատճառով:

է հայ պատվիրակների պատասխանը այն մասին, որ իրենք չեն վստահում Շահթախթինսկուն: «Մեր հայտարարությունը, – ասվել է վերոհիշյալ հեռախոսային խոսակցության ժամանակ, – որ մենք չենք վստահում Շահթախթինսկուն, ընդունվեց կասկածանքով: Մեզ մոտ ստեղծվել է տպավորություն, որ նա գտնվում է էլիավայրի և Սուբհու ազդեցության տակ»¹ (ընդգծումը մերն է – է. Զ.):

Այս նույն հեռախոսային խոսակցության ժամանակ Մուսկյանը նաև հայտնել է տարածքային հարցերում Կարախանի բացասական դիրքորոշման մասին: «Ինչ վերաբերում է Կարսի և Նախիջևանի հարցին, – ասել է Կարախանը, – ապա ըստ իս հնարավոր չէ զիջումների հասնել, և ես անհրաժեշտ չեմ համարում Կարսի հարցը վերածել Անգորայի հետ խզման պատճառի»² (ընդգծումը մերն է – է. Զ.):

Ավելորդ չենք համարում մատնանշել, որ միայն էլիավայրի և Սուբհու ազդեցությամբ չէ, որ Կարախանի մոտ (հետևապես և ՌՆՖՍՀ Արտգործոցնախարարի ու կառավարության) նման մտայնություն էր ձևավորվել, այլև բոլշևիկյան բոլոր այն գործիչների, որոնք ամեն գնով քեմալականների հետ համաձայնությունը համարում էին ոչ միայն Արևելքում հակաիմպերիալիստական շարժումների, այլև համաշխարհային հեղափոխության կայացման հիմնական պայման:

Ինչ վերաբերում է մեզ հետաքրքրող խնդրին՝ Շահթախթինսկու նկատմամբ անվստահությանը, ապա ամենայն հավանականությամբ նրա հակահայկական տրամադրությունների մասին հայ գործիչները տեղեկացված են եղել շատ ավելի վաղ: Այդպես մտածելու հիմք է տալիս այն իրողությունը, որ Մոսկվայում կայացած հանդիպումները տեղի են ունեցել ոչ թե ղեկավարների վերջերին՝ Վելիբեկովի Երևան ժամանելուց հետո, այլ դրանից առաջ: Ինչպես հայտնի է, Լենինի հետ Մուսկյանը և Տեր-Գաբրիելյանը հանդիպել են ղեկավարների 13-ին, իսկ 15-ին Մուսկյանն արդեն ձանապարհվել էր Մոսկվայից և 18-ին գտնվում էր Ռոստովում³: Իսկ դա նշանակում է, որ Տրոցկու ու Կարախանի հետ հայ գործիչների հանդիպումը պետք է տեղի ունեցած լինի կամ Լենինի հետ նրանց հանդիպման օրը, կամ էլ մեկ օր առաջ

կամ հետո: Ուրեմն՝ Շահթախթինսկու նկատմամբ անվստահության աղբյուրը Վելիբեկովը չէր: Մի հանգամանք ևս, բոլոր փաստերը ցույց են տալիս, որ Մուսկյանը ղեկավարների 26-ին Բեկդադյանի հետ հեռախոսով խոսել է ոչ թե Մոսկվայից, այլ Բաքվից: Նախ, որովհետև այդ ժամանակ նա վաղուց Մոսկվայում չէր, և հետո՝ Մոսկվայի և Երևանի միջև հեռախոսային ուղիղ կապ չկար: Բացի այդ, հեռախոսային խոսակցությանը մասնակցել է նաև Բաքվում Նորհրդային Հայաստանի ներկայացուցիչ Աթաբեկյանը:

Վերադառնալով Հայհեղկոմի կողմից Նախիջևանին ինքնորոշման իրավունք չնորհելու խնդրին՝ նախ ասենք, որ Հայաստանի ազգային արևիվում պահվող մի փաստաթղթից տեղեկանում ենք, որ Հայհեղկոմը ղեկավարների 24-ի իր նիստում լսել է «Նախիջևանի մասին ղեկավարացիայի» հարցը և որոշել հրապարակել ներկայացված ղեկավարացիան¹: Այլ տվյալներ (Հայհեղկոմում քննարկման ընթացքի, ղեկավարացիայի նախապատրաստման և այլն) չեն պահպանվել, և այդպես էլ անհայտ է մնում, թե Հայաստանի համար արտակարգ կարևորություն ունեցող այդ հարցում հեղկոմի անդամները ի՞նչ մոտեցում են դրսևորել, կամ թե ինչո՞ւ է հեղկոմը այդքան արագ ու անվերապահ արձագանքել Վելիբեկովի ակնհայտորեն ուռճացված տեղեկատվությանը «Նախիջևանում մթնոլորտի շիկացման» մասին և առանց ստուգման կամ որևէ նախապայմանի (օրինակ, նախիջևանահայության՝ իրենց բնօրրանը վերադառնալու իրավունքի մասին) հապճեպ կատարել նրա պահանջը՝ հրապարակելով իսկապես անհաջող ու հայ ժողովրդի չահերն անտեսող հոչակագիր: Այս առիթով քննադատական խոսք ասելով Հայհեղկոմի հասցեին՝ միաժամանակ հարկ ենք համարում ավելացնելու, որ դատելով Չիչերինին ուղարկած Լեզրանի մի ղեկուցագրից՝ Հայհեղկոմն այդ որոշումն ընդունել է Լեզրանի գիտությունների ակադեմիայի հետ հարցազրույցի շրջանում: Չիչերինի ակադեմիայի հետ հարցազրույցի ժամանակ Հայհեղկոմի նախագահը հարց էր ցուցնում Հայհեղկոմի կողմից հարուցած թշնամական ագիտացիան կանխարգելելու համար»² (ընդգծումը մերն է – է. Զ.):

Ինչպես տեսնում ենք, Վելիբեկովը կարողացել է շինծու պատմու-

¹ «Геноцид армян: ответственность Турции и обязательства мирового сообщества», под. ред. Ю. Барсегова, М., 2003, стр. 337.

² Նույն տեղում:

³ Այստեղից նա հայկական կարմիր բանակի կազմակերպման վերաբերյալ Տրոցկու հետ ունեցած զրույցի ողով նամակ է ուղարկել Օրջոնիկիձեին: Նամակը թվագրված է ղեկավարների 18-ով:

¹ ՀԱԱ. ֆ. 114, ց. 1, գ. 17, թ. 18:

² Գ. Գալոյան, նշվ. աշխ., էջ 385:

թյուններով տպավորություն թողնել: Իսկ Հայհեղկոմի հռչակագրում ասված էր.

«Հայաստանի անտանելի և ոճրագործ դաշնակցական կառավարության անկումից և բանվորագյուղացիության խորհրդային իշխանություն հիմնվելուց հետո մեր եղբայր Խորհրդային Ադրբեջանը հանդիսավոր ակտով ոչնչացրեց հայերի և Ադրբեջանի մեջ եղած վեճը և Նախիջևանը հայտարարեց Խորհրդային Հայաստանի անբաժան մասը: Բայց Հայաստանի խորհրդային իշխանությունը իր կարողությունը տեսնում է միայն իրեն ազգաբնակչության՝ ըստ որում նաև Նախիջևանի աշխատավոր ժողովրդի կամքի պարզ արտահայտման մեջ:

Ողջունելով Նախիջևանի Հեղկոմը՝ որպես արտահայտիչ Նախիջևանի ազգաբնակչության շահերի, որը հերոսական Կարմիր բանակի օգնությամբ վայր է գցել իմպերիալիստական Անտանտայի և Անդրկովկասի ազգասերների անտանելի լուծը՝ Հայաստանի Հեղկոմը հավատացած է, որ Նախիջևանի բռնությունից ազատ աշխատավորական մասսաները կարող են տալ իրենց պարզ և որոշ կազմակերպված կարծիքը՝ իրենց ցանկալի փոխհարաբերությունների մասին՝ ամբողջ աշխատավոր Խորհրդային Հայաստանի հետ»¹:

Մենք հռչակագիրը ամբողջությամբ մեջբերեցինք, որպեսզի ընթերցողն էլ տեսնի ու համոզվի, թե որքան թույլ, անսկզբունք ու ոչ հայանպաստ փաստաթուղթ էր այն: Նրանում ոչ մի խոսք չկա Նախիջևանի երկրամասի նկատմամբ Հայաստանի իրավունքների մասին, ոչ մի նախապայման չի առաջադրված: Մինչև 1918–1919թթ. բռնագաղթը երկրամասի ազգաբնակչության շուրջ 35–40 տոկոսը կազմող նախիջևանահայերի շահերն ու իրավունքները մոռացության են տրված: Հռչակագրի հեղինակների ամենամեծ բացթողումը համարում ենք այն, որ որպես ինքնորոշման իրավունքի իրագործման նախապայման չի առաջադրվել նախիջևանահայության անպայման վերադարձի և հանրաքվեին մասնակցելու պահանջ: Եվ այդ հռչակագրի տակ դրված է Հայհեղկոմի նախագահ Կասյանի և անդամներ Ավիսի ու Բեգզադյանի ստորագրությունը: Ճիշտ է, բոլշևիկյան ղեկավար շրջանների համար ինքնորոշման իրավունքը ավելի շատ լոգունգ էր, քան գործունեության ուղեցույց: Հանրահայտ է, օրինակ, որ չնայած Նարիմանովի հռչակագրին, Լեոնային Ղարաբաղի հայությունն այդպես էլ ինքնորոշվելու հնարավորություն չտրվեց: Նախիջևանի հարցն էլ հանրա-

քվեի միջոցով չլուծվեց, թեև ադրբեջանցի պատմաբանները, խոսքերը մեկ արած, գրում են, թե Նախիջևանի հարցը լուծվել է հանրաքվեի միջոցով, և որ ազգաբնակչության 90 տոկոսն արտահայտվել է Ադրբեջանի օգտին: Այսպես, օրինակ, Գ. Մադաթովը գրում է. «1921թ. սկզբին Նախիջևանի քաղաքներում և գյուղերում Ադրբեջանական ԽՍՀ, Հայկական ԽՍՀ, ՌԽՖՍՀ և այլ ներկայացուցիչներ ազգաբնակչության մեջ հարցում են կատարել Ադրբեջանի հեղկոմի և Հայաստանի հեղկոմի ղեկրեւտների կապակցությամբ: Հանրաքվեի արդյունքում բնակչության 90 %-ից ավելին արտահայտվել է այն բանի օգտին, որ Նախիջևանը մնա Ադրբեջանական ԽՍՀ կազմում՝ ինքնավար հանրապետության իրավունքով»¹:

Հետագա շարադրանքում մենք դեռ կտեսնենք, թե ինչպես է լուծվել Նախիջևանի հարցը, իսկ հիմա ուղղակի նշենք, որ անլուրջ է խոսել երկրամասում որևէ հանրաքվե կատարվելու մասին, առավել ևս Հայաստանի և Ռուսաստանի ներկայացուցիչների մասնակցությամբ ու ոչինչ չասել այն մասին, որ նախիջևանահայությունը զրկված էր այդ իրավունքից: Կտեսնենք նաև, որ Վեյսալ-բեյի կարգադրությամբ Հայաստանի ներկայացուցիչներին Նախիջևանի տարածք մտնել չէր թույլատրվում: Մինչդեռ ադրբեջանցի պատմաբանը, շարունակելով կեղծիքը, գրում է. «...հետագա տարիներին Կոմունիստական կուսակցությունը և Խորհրդային կառավարությունը Նախիջևանի ԻՍՍՀ-ում ազգային պետական շինարարության գործում ելնում էին աշխատավորության այդ կամաարտահայտությունից»²:

Վերադառնալով Հայհեղկոմի ղեկտեմբերի 24-ի նիստին՝ հարկ ենք համարում ավելացնել, որ այդ նիստում լավել է նաև Նախիջևանում գտնվող հայ ռազմագերիների մասին հարցը: Բանն այն է, որ նախորդ օրը՝ ղեկտեմբերի 23-ին, վկայակոչելով Նախիջևանից վերադարձած ականատեսին, Ղամարլուից Երևան հղված հեռագրում հայտնվել էր, որ Նախիջևանում գտնվող հայ ռազմագերիները «սարսափելի վիճակում են, բոլորը մերկացված են»: Ինչպես երևում է, ռազմագերիներին մերկացնելը և միայն ներքնաշորերով թողնելը (լավագույն դեպքում) թուրքերի մեջ սովորական բան էր: Նրանք այդպես էին վարվել նաև Կարսում գերի ընկած հայ զինվորների հետ, որի հետևանքով գերիների մեծ մասը մահացել էր ցրտահարությունից: Փորձելով Նախիջևանում

¹ «Կոմունիստ», 28 ղեկտեմբերի 1920թ.:

¹ Գ. Մադաթով, նշվ. աշխ., էջ 95:

² Նույն տեղում:

պահվող հայ ուղղափառներին փրկել նույն ճակատագրից՝ Հայհեղկոմը կայացրել էր որոշում. «Ընկ. Վելիբեկովի գնացքին կցելով մի քանի վագոններ, հանձնարարել նրան տեղ հասնելուն պես Նախիջևանում գտնվող հայ ուղղափառներին տեղավորել նրանցում և բրիգադի հրամանատարի աջակցությամբ վերադարձնել Երևան»¹:

Ինչպես տեսնում ենք, որոշման մեջ հայ ուղղափառների թվի մասին ոչինչ չի ասված, նաև պարզ չէ, թե խոսքը միայն վերջին պատերազմում, թե՞ նաև 1919թ. իրադարձությունների ժամանակ գերության մեջ հայտնված զինվորների մասին է: Որոշակի է միայն մի բան. հայ ուղղափառներին առանց թուրքական զորամասի հրամանատարի թույլտվության վերադարձնել չէին կարող, այլապես ուսական զորամասի հրամանատարի աջակցությամբ դիմելու կարիք չէր լինի:

Թեև ղեկավարների 24-ի նիստի արձանագրությունների մեջ չի մտցված, բայց այլ փաստաթղթերից տեղեկանում ենք, որ Վելիբեկովի երևանյան բանակցությունների արդյունքում Հայհեղկոմը նաև 20 մլն. ռուբլի էր հատկացրել Նախիջևանին: Թե ինչ նպատակով է այն տրվել, միայն ենթադրել կարելի է, բայց հատկանշական է, որ սովահար ու գաղթականներով լի Հայաստանը, որտեղ օրական մի քանի տասնյակ մարդ սովամահ էր լինում, նման շոշափելի գումար է հատկացնում իր նկատմամբ թշնամաբար տրամադրված երկրամասի կարիքների համար: Ձի բացառվում, իհարկե, որ Հայհեղկոմի այդ քայլը քաղաքական նպատակներով էր թելադրված, թեև չենք կարծում, թե Կասյանը և մյուսները հնարավոր համարելին նման միջոցներով Նախիջևանի մուսուլմաններին տրամադրել Հայաստանի օգտին: Ասենք նաև, որ նախօրեին Հայհեղկոմը ինժեներ Ջարգարյանի ղեկավարությամբ մի հատուկ բանվորական գնացք էր ուղարկել Նախիջևան՝ երկաթուղային և հեռախոսային ցանցը նորոգելու և Երևանի հետ բնականոն կապը վերականգնելու նպատակով: Իսկ մի քանի օր անց (ավելի ճիշտ՝ հունվարի սկզբին) Հայհեղկոմը մահմեդականների համակրանքը չահելու ուղղությամբ մի քայլ ևս կատարեց. Ս. Կասյանի ստորագրությամբ մի ընդարձակ հեռագիր ուղարկեց Ն. Նարիմանովին, որում իր հիացմունքն էր արտահայտում Լեոնային Ղարաբաղի, Ջանգեղուրի և Նախիջևանի վերաբերյալ Ադրբեջանի հեղկոմի նոյեմբերի 30-ի հռչակագրի կապակցությամբ, հավաստիացնում, որ Ադրբեջանի կողմից այդ հարցերի արդարացի լուծումը երկու հանրապետությունների քաղաքական և տնտեսական ընկերակցության հիմք է դնում, և որ

«այսուհետ խորհրդային Հայաստանի սահմաններում օտարաժինների և այլադավանների բիրտ ու անմիտ հալածանքներն այլևս տեղ չունեն և խորհրդային կարգերի բոլոր բարիքները հավասարապես կտարածվեն Հայաստանի բոլոր քաղաքացիների վրա»¹ (ընդգծումը մերն է - է. Ջ.):

Թե ինչ «բիրտ ու անմիտ հալածանքներ» են կիրառվել նախախորհրդային Հայաստանում այլադավանների և օտարաժինների նկատմամբ, դա Կասյանի գաղտնիքն է, և հակառակն ապացույցելը մեր խնդիրը չէ: Բայց գաղտնիք է մնում նաև այն, թե ինչ նպատակ էր հետապնդում Կասյանն այս հեռագրով, ինչո՞ւ նա Նարիմանովի հռչակագրին արձագանքում է շուրջ մեկ ամիս հետո, և արդյո՞ք դա կապված չէր Նախիջևանի խնդրի շուրջ ղեկավարների վերջին օրերին ծավալված քննարկումների հետ:

«Քաղաքականությունը հաշիվ է», - ասում են քաղաքական գործիչները: Դա նշանակում է, որ քաղաքականություն մեջ շահում են նրանք, ովքեր ճիշտ են հաշվարկում իրենց ձեռնարկած քայլերի հնարավոր հետևանքները: Արդյո՞ք ճիշտ էր հաշվարկել ու ճիշտ քաղաքական գիծ որդեգրել Հայհեղկոմը Վելիբեկովին ամեն հարցում ընդունալու և Նախիջևանին առանց նախապայմանների ինքնորոշման իրավունք տալու խնդրում, ցույց պետք է տար մոտիկ ապագան:

* * *

Մինչ Հայհեղկոմը հայերի և ադրբեջանցիների հաշտեցման համար ուղիներ էր փնտրում, Նախիջևանի թուրքական հրամանատարությունը երկրամասը Հայաստանից կտրելու և ամբողջովին թուրքիայի գերիշխանությունը ենթարկելու ուղղությամբ կտրուկ քայլեր էր ձեռնարկում, փակում Երևանից Նախիջևան տանող խճուղային և երկաթուղային բոլոր ճանապարհները: Դեռ Հայհեղկոմի վերը նշված նիստի նախօրեին՝ ղեկավարների 23-ին, Ղամարլուի ջոկատի շտաբի պետ Ահարոնովը և զինկոմ Մխչյանը հեռագրել էին Երևան, թե Նախիջևանից վերադարձած ինժեներ Ջարգարյանը հայտնում է, որ «Նախիջևանում թուրքական իշխանություն է հռչակված, թուրքերը զրավել են քաղաքը, Արազգայան կայարանում գնացքը կանգնեցվել և ստուգվել է թուրք սպայի և 15 ասկյարների կողմից, ըստ որում, սպան պահանջել է թուրքական անցագիր»² և հայտարարել, որ այսուհետ

¹ ՀԱԱ, ֆ. 114, ց. 2, գ. 17, թ. 18:

¹ ՀԱԱ, ֆ. 4033, ց. 2, գ. 1207, փ. 11:

² Նույն տեղում, գ. 1176, փ. 10:

առանց թուրքական անցագրի ոչ մի գնացք չի թողնելու: Հեռագրում նաև ասված էր, որ «Արարատ կայարանում, այսինքն չեղոք գոտում, հանդիպել են երեք սպանների»: Այդ հանգամանքը առիթ է տվել, որ հատուկ հեռագրով Ս. Կասյանի ուշադրությունը հրավիրվի այդ փաստի վրա և առաջարկվի միջոցներ ձեռնարկել «նախօրոք կանգնեցնելու դեպի չեղոք գոտի թուրքերի ենթադրվող շարժումը»¹:

Դեկտեմբերյան այդ օրերին Վեյսալ-բեյի հակահայկական ու նաև հակախորհրդային գործունեության մասին վկայություն կա նաև Վելիբեկովի՝ վերը հիշատակած զեկուցագրում: Ոոսելով Երևանում իր ձեռք բերած հաջողության մասին՝ նա գրում է. «Ես անմիջապես վերադարձա Նախիջևան, որպեսզի տեղեկացնեմ բնակչությանը զեկուցարացիայի մասին: Տեղ հասնելով ես չճանաչեցի Նախիջևանը: Սահմանի վրա թուրքական ջոկատ էր կարգված, որը կանգնեցնում էր Հայաստանից Նախիջևանի չրջան ուղարկվող բոլոր գնացքները (այդ թվում և իմ): Քարոզիչներ էին ուղարկված բոլոր չրջանները, որոնք գոտում էին Սորհրդային Նախիջևանի նկատմամբ Թուրքիայի պրոտեկտորատի մասին: Հիմնարկություններից (գլխավորապես զինկոմիսարիատից) փտարվել էին կոմունիստները...» և այլն²:

Շարուր-Նախիջևանում թուրք զինվորականության հակահայկական գործունեությունը չէր կարող առաջ չբերել Հայհեղկոմի անհանգստությունը, բայց միջամտության որևէ միջոց չունենալով՝ նա հարկադրված դիմում է Լեզրանի օգնությանը: Վերջինիս կարգադրությամբ զեկուցարարի 26-ին տեղում իրադրությանը ծանոթանալու և համապատասխան զեկուցում ներկայացնելու նպատակով Շարուր-Նախիջևան է գործուղվում 2-18 բրիգադի հրամանատար Երմոլենկոն առաջին բրիգադի հրամանատարի և զինկոմ Մխչյանի ուղեկցությամբ: Դեկտեմբերի 27-ին Լեզրանին և Ավիսին (Սորհրդային Հայաստանի ռազմական կոմիսար) հասցեագրած զեկուցագրում Երմոլենկոն հաստատում է այն իրողությունը, որ «թուրքական ջոկատի հրամանատար Վեյսալ-բեյը իրեն հռչակել է արտակարգ կոմիսար Օրդուբադից մինչև Նորաչեն ներառյալ՝ հենվելով թուրքական կառավարության հետ դաշնակիցների (ստորագրած) պայմանագրի վրա, ավելացնելով, որ իրեն ժամանակավոր արտակարգ կոմիսար է հռչակում, այսինքն մինչև որ Թուրքիայից այդպիսին կժամանի»³: Ջեկուցագրում նաև ասվում է, որ

Վեյսալ-բեյը բանտերից ազատ է արձակել բոլոր հակահեղափոխականներին, և որ թուրք էմիսարները թուրքամետ ուժեղ քարոզչություն են ծավալել: Առանձնակի հետաքրքրություն է ներկայացնում ազգաբնակչության կողմնորոշման մասին նրա ներկայացրած կարծիքը. «Համաձայն ընկ. Ստուդենի հայտարարության, եթե բնակչությանն ինքնուրույն կողմնորոշման հնարավորություն տրվի, ապա այն անպայման կհակվի դեպի Թուրքիա, քան դեպի Սորհրդային Հայաստան, բայց եթե առաջարկվի խորհրդատուական իշխանություն, ապա նրանք անպայման կհրաժարվեն առաջին երկուսից հօգուտ վերջինի»¹: Երմոլենկոն նաև ճշգրտված տեղեկություն է հաղորդում Վեյսալ-բեյի տնօրինության տակ գտնվող թուրքական ուժերի թվաքանակի մասին, որից պարզ է դառնում, որ նրանց թիվը պատերազմի ավարտից հետո զգալիորեն կրճատվել էր: «Շարուրի և Նախիջևանի չրջաններում թուրքական զորքերի թվաքանակը ճշտորեն ստուգված տվյալներով կազմում է հետևյալի 8 վաշտ (յուրաքանչյուրում 30 մարդ), 8 գնդացիներով և մեկ լեռնային հրանոթով, - գրում է Երմոլենկոն: - Այդ գործամասերը տեղաբաշխված են հետևյալ կերպ. 2 վաշտ (60 մարդ) Նորաչենում 4 գնդացիներով, Արարատ և Արագոյայան կայարաններում՝ 1 վաշտ, Նախիջևանում 2 վաշտ 4 գնդացիներով, Շահթախ-թիում 2 վաշտ մեկ լեռնային հրանոթով, Սաղարակում 1 վաշտ: Ոչ մի այլ ուժ նշված չըջանում Վեյսալ-բեյի տնօրինության տակ չկա, բայց հիմք կա ենթադրելու, որ Վեյսալ-բեյը կապ ունի Իզդիրի խմբավորման հետ, քանի որ պահակակետ է պահում Արարատ կայարանում և աչալըջորեն հսկում Արաքսի ափը»²:

Դատելով Բ. Լեզրանի հետագա քայլերից՝ պետք է ենթադրել, որ Նախիջևանում թուրք գործակալների հակախորհրդային գործունեության և ազգաբնակչության թուրքամետ կողմնորոշման մասին Երմոլենկոյի հաղորդածը խիստ անհանգստացրել է նրան: Դեկտեմբերի 30-ին Մոսկվա՝ Գ. Ջիչերինին ուղարկած ընդարձակ զեկուցման մեջ ամենայն մանրամասնությամբ ներկայացնելով Նախիջևանում տիրող իրադրությունը (իշխանությունը գավթելու ուղղությամբ Վեյսալ-բեյի ձեռնարկած քայլերը, Հայհեղկոմի կողմից Նախիջևանին ինքնորոշման իրավունք վերապահելը, ազգաբնակչության մեջ թուրքամետ տրամադրությունների առկայությունը և այլն)՝ Լեզրանը այսպիսի առա-

¹ Նույն տեղում:

² ՀԱԱ, ֆ. 114, ց. 2, գ. 25, թ. 30:

³ Նույն տեղում:

¹ Նույն տեղում:

² Նույն տեղում:

ջարկ է անում. «Անհրաժեշտ են համարում ժամանակավորապես՝ մինչև բնակչության կամքի պարզելը և ուսու-թուրքական առաջիկա խորհրդաժողովում Նախիջևանի պետական պատկանելիության հարցի լուծումը, Նախիջևանում կոմիսար նշանակել Ռուսաստանի կառավարության կողմից»¹ (ընդգծումը մերն է - է. Ջ.):

Անտարակույս է, որ ուսական կառավարության կողմից Նախիջևանի կոմիսար նշանակելու մտահղացման համար հիմք է ծառայել Երմոլենկոյի զեկուցագրում տեղ գտած այն կարծիքը, ըստ որի՝ Նախիջևանի ազգաբնակչությունը ուսական իշխանությունը կգերադասի հայկականից ու թուրքականից: Սակայն չի կարող տարակուսանք չառաջացնել այն հանգամանքը, որ Լեզրանը, որը մինչ այդ բազմիցս հայտարարել էր, թե չի կարելի Հայաստանը թողնել առանց Նախիջևանի, ճիշտ այնպես, ինչպես որ չի կարելի տնամերձ թողնել առանց Ջրհորի, հիմա հանկարծ փոխում է իր կարծիքը և խոսում ազգաբնակչության կամաարտահայտության ու ուսու-թուրքական կոնֆերանսում այդ երկրամասի պետական պատկանելիության հարցի լուծման մասին: Ինչո՞վ բացատրել: Կարծում ենք, այլ ելք չտեսնելով, Լեզրանն իր այդ նոր առաջարկությամբ պարզապես փորձում էր Նախիջևանի մահմեդականներին Ռուսաստանի կողմը գրավել և փրկել երկրամասը թուրքերի ոտնձգություններից: Նման ենթադրության օգտին է խոսում նաև այն իրողությունը, որ Լեզրանը, չբավարարվելով տեղական գործիչներից ստացված ինֆորմացիայով, որոշել էր անձամբ լինել Նախիջևանում և տեղում ծանոթանալ իրադրությանը: Այդ մասին վկայություն կա Նախիջևանի փախստականներին օգնություն կազմակերպող ջոկատում Հայկոմկուսի լիազոր ներկայացուցիչ Հատիկ Աղիզյանի մի զեկուցագրում: Նա գրում է. «Ինչպես հայտնի է, ընկ. Լեզրանը Նախիջևանում էր հունվարի 2-ին, իսկ 3-ին վերադարձավ Երևան»²: Ո՞ւմ հետ է հանդիպել և ինչի՞ մասին բանակցել. բնական է, որ Աղիզյանն իմանալ չէր կարող և այդ մասին ոչինչ չի ասում: Առավել քան տարօրինակ է, որ Լեզրանի նախիջևանյան այցելության մասին ոչ մի հիշատակություն չկա Նախիջևանի արտակարգ կոմիսարի՝ Վելիբեկովի զեկուցագրերում, մարդ, որն անտարակույս գտնվել է իրադարձությունների կենտրոնում: Մինչդեռ ահա Անդրկովկասի բրիտանական հրամանատարությունը տեղեկություններ էր հավաքել

ոչ միայն Լեզրանի այցի, այլև նրա հանդիպումների ու հետապնդած նպատակի մասին: 1921թ. հունվարի 27-ին Լոնդոն ուղարկած հաղորդագրության մեջ գնդ. Ստոքսը հայտնում էր, թե Լեզրանը հունվարի 1-ին «ժամանել էր Նախիջևան, որպեսզի ապահովեր Նախիջևանի միացումը Հայաստանին, բայց հաղորդում են, որ տեղի հեղափոխական կոմիտեն որոշել է սպասել Մոսկվայում առաջիկայում տեղի ունենալիք խորհրդաժողովի արդյունքներին»¹ (ընդգծումը մերն է - է. Ջ.):

Չենք կարծում, թե Լեզրանի նախիջևանյան այցելության նպատակը երկրամասը Հայաստանին միացնելն էր, ինչպես Ստոքսն է ներկայացրել նշված հաղորդագրությունում: Լեզրանը չէր կարող ընդամենը երկու օր առաջ (դեկտեմբերի 30-ին) Ջիջերինին ուղարկած գրությամբ առաջարկել Նախիջևանում ուսական կառավարության ներկայացուցիչ նշանակել և երկրամասի ճակատագրի որոշումը հետաձգել մինչև ազգաբնակչության կամաարտահայտության կազմակերպումը ու Մոսկվայի ուսու-թուրքական կոնֆերանսում նրա պատկանելիության հարցի լուծումը, իսկ երկու օր հետո Նախիջևանը Հայաստանին միացնելու ուղղությամբ քայլեր ձեռնարկել: Ո՛չ, առավել հավանականն այն է, որ Նախիջևանի հեղկոմի հետ հանդիպման ժամանակ հենց իր առաջ քաշած հարցերի մասին է գրուցել: Գուցե հենց դա է պատճառը, որ այդ հանդիպման մասին որևէ պաշտոնական հայտարարություն չի արվել: Բնական է, որ նման դեպքում ծայր առնելին ասեկոսենք, տարածվելին ամեն կարգի լուրեր: Սակայն նաև չի բացառվում, որ Լեզրանն այնուամենայնիվ շոշափել է երկրամասը Հայաստանին միացնելու հնարավորության հարցը և ցանկացել պարզել այդ խնդրում Նախիջևանի թե՛ ղեկավարության և թե՛ ազգաբնակչության տրամադրությունը: Դա ևս հնարավոր է, մանավանդ եթե նկատի առնենք այն հանգամանքը, որ Լեզրանի այդ այցից չորս օր անց՝ հունվարի 7-ին, Հայաստանից ժամանած գործիչներին Նախիջևանում միտինգ գումարելու հնարավորություն տրվեց: Վերջապես չպետք է անտեսել և այն, որ Կովկասի ճակատագիրը տնօրինողները՝ Ստալինը, Օրջոնիկիձեն, դեռևս հաստատուն կերպով կանգնած էին Նախիջևանը Հայաստանի կազմում տեսնելու տեսակետի վրա:

Դատելով Վելիբեկովի՝ Նախիջևան վերադառնալուց և Հայհեղկոմի ղեկավարացի մասին միտինգներում հայտարարություններ անելուց հետո Վեյսալ-բեյի և Բ. Շաթթախթինսկու պահվածքից՝ պետք

¹ Գ. Գալոյան, նշվ. աշխ., էջ 385:

² ՀԱԱ, ֆ. 114, ց. 2, գ. 22, թ. 7:

¹ Գ. Գալոյան, նշվ. աշխ., էջ 415:

է ենթադրել, որ նրանք սկզբում գոհ էին Վելիբեկովի երևանյան առաքելության արդյունքներից: Նման ենթադրություն անելու իրավունք է տալիս այն փաստը, որ Վեյսալ-բեյն իսկույն հայտարարել էր, որ վայր է դնում արտակարգ կոմիսարի պաշտոնը, և հետոցել էր Շահ-թախթի: Նրա հետ Շահթախթի էր գնացել նաև Բ. Շահթախթինսկին: Եվ մի որոշ ժամանակ (չուրջ 8-10 օր) թուրք զինվորականությունն իրեն հանգիստ էր պահում: Սակայն դա կարճ տևեց, Վեյսալ-բեյը շուտով նորից ակտիվացավ՝ կապված Լեզգրանի այցի և տարածված այն լուրերի հետ, որ իբր այդ այցի նպատակը Նախիջևանի երկրամասը Հայաստանին միացնելն է՝ և որ Վելիբեկովը ծախվել է Հայաստանին՝ ստանալով 20 միլն. ուրլի: Հունվարի 5-ին (1921թ.) Վեյսալ-բեյը Վելիբեկովին ուղարկած հեռախոսագրով պահանջում է Արևելյան ճակատի հրամանատարությունը զեկուցելու համար.

«1. Շտապ ուղարկել Հայաստանի հեղկոմի ղեկրեստի պատճենը, որ Դուք անձամբ եք բերել և հայտարարել բնակչությանը:

2. Ի՞նչ պաշտոն եք Դուք զբաղեցնում Նախիջևանում և ո՞ւմ կողմից եք նշանակված:

3. Ստացված է տեղեկություն, որ Դուք Երևանից բերել եք քսան միլիոն ուրլի: Հայտնեցեք, ճի՞շտ է դա, թե՞ ոչ»¹:

Ուշագրավ է, որ Վեյսալ-բեյն այս գրություն տակ առաջին անգամ ստորագրել է ոչ միայն որպես Նախիջևանում գտնվող «թուրքական կարմիր ջոկատի հրամանատար», այլև «Արևելյան ճակատի դիվանագիտական ներկայացուցիչ»:

Վելիբեկովն անմիջապես պատասխանում է Վեյսալ-բեյին, ուղարկում Նախիջևանին ինքնորոշման իրավունք վերապահող Հայհեղկոմի ղեկրեստի պատճենը, տեղեկացնում, որ ինքը Նախիջևանի արտակարգ կոմիսար է նշանակված բոլչևիկյան կուսակցության Կոնտկոմի կողմից ու միաժամանակ հանդիսանում է 11-րդ Կարմիր բանակի ռազմահեղափոխական խորհրդի լիազորը: Բայց բառացիորեն ոչինչ չի ասում այն մասին, որ ինքը Նախիջևանի արտակարգ կոմիսար է նշանակված նաև Հայաստանի հեղկոմի կողմից: Կարծում ենք՝ պատճառը թուրքերին չզբաղելու ցանկությունն էր: Տեղին ենք համարում նաև ավելացնել, որ հետագայում էլ նա ոչ մի անգամ (ոչ զեկուցագրերում, ոչ էլ հրապարակային որևէ ելույթում) չի հիշատակել Հայհեղկոմի կողմից Նախիջևանի արտակարգ կոմիսար նշանակվելու փաստի մասին: Ինչ

վերաբերում է երրորդ կետին, ապա Վելիբեկովը հաստատել է Երևանից 20 միլիոն ուրլի բերելու փաստը և ավելացրել, որ այդ գումարը Նախիջևանին տրամադրել է Սորհրդային Ռուսաստանը, և «ինչպես որ Ադրբեջանն է հանդիսանում փոխանցման կետ Ռուսաստանի և Հայաստանի միջև, այնպես էլ Սորհրդային Հայաստանը կծառայի որպես փոխանցման կետ Ռուսաստանի, Ադրբեջանի և Սորհրդային Նախիջևանի միջև»¹:

Սակայն երկրորդ կետի վերաբերյալ Վելիբեկովի տված պատասխանը ըստ երևույթին չէր բավարարել Վեյսալ-բեյին, և երեք օր անց՝ հունվարի 8-ին, մի նոր, ավելի ընդարձակ (վեց կետերից բաղկացած) գրություն է ուղարկում Վելիբեկովին, որի առաջին կետում դարձյալ առաջ է քաշում վերջինիս լիազորությունների հարցը:

«Ես, որպես Արևելյան ճակատի գլխավոր հրամանատարությունը քաղաքական ներկայացուցիչ, - ասված է նրանում, - իմ կառավարությունը զեկուցելու համար պաշտոնապես հարցնում են Ձեզ հետևյալի մասին:

1. Նկատի ունենալով ձևավորված նոր պատմական իրողությունները, խնդրում եմ, եթե Հնարավոր է, Նախիջևանում կապի սպա Իքմեթին ներկայացնել Ձեր մանդատը Ձեզ Նախիջևանի արտակարգ կոմիսար նշանակելու մասին և, եթե Հնարավոր է, Ձեր մանդատի պատճենը ուղարկել ինձ, եթե Հնարավոր չէ, ապա ի՞նչ պատճառներով»²:

Ինչպես տեսնում ենք, այս անգամ Վեյսալ-բեյն արդեն հանդես է գալիս միայն որպես Թուրքիայի արևելյան ճակատի գլխավոր հրամանատարության քաղաքական ներկայացուցիչ, բայց նաև հայտարարում, թե այդ ամենը անհրաժեշտ է իր կառավարությունը զեկուցելու համար (նա կարող էր զեկուցել իր հրամանատարությունը և ոչ կառավարությունը): Իսկ Վելիբեկովի մանդատի մասին իր պահանջը պատճառաբանում «ձևավորված նոր պատմական իրողություններով»՝ անտարակույս նկատի ունենալով Թուրք-Հայկական պատերազմն ու Ալեքսանդրապոլի պայմանագիրը և ոչ թե Հայաստանում խորհրդային կարգերի հաստատումը: Ընդհանրապես, Վեյսալ-բեյի այս գրությունը բովանդակության առումով չափազանց հետաքրքիր է ու նաև բնութագրական՝ Նախիջևանի հարցում Անկարայի կառավարության վաճառ քաղաքականությունը բացահայտելու տեսակետից: Նրանում

¹ ՀԱԱ, ֆ. 114, ց. 2, գ. 25, թ. 31:

¹ Նույն տեղում:

² Նույն տեղում, գ. 22, թ. 15:

Նախիջևանի իշխանություններին ներկայացված մի շարք պահանջներ ու մեղադրանքներ կան, որոնցում Վելիբեկովը դիտվում է որպես հայամետ գործիչ: Դա հատկապես արտահայտված է 2-րդ, 3-րդ և 4-րդ կետերում, որոնք և ներկայացնում ենք ընթերցողի ուշադրությունը.

«2. 36թ.¹ այս ամսի 7-ին մի հայ միտինգ է կազմակերպել, ողջունել հայկական կառավարությունը, Նախիջևանի չրջանի բնակչությունը ու փորձել ստորագրություններ հավաքել Նախիջևանը Հայաստանին միացնելու համար: Իհարկե, նա լիազորություններ ունի և պետք է ներկայացնի Նախիջևանի կառավարությանը: Կասկած չկա, որ այդ հայը պաշտոնական անձ է: Ինչո՞ւ Դուք Երևանի հեղկոմից կարգադրագիր չեք ստացել այդ հային աջակցելու վերաբերյալ, եթե ստացել եք, ապա խնդրում եմ պատճենը ներկայացնել ինձ:

3. Թույլ կտա՞մ կառավարությունը Թուրքիայից եկող ընկերոջը (գումարել) միտինգ հօգուտ թուրքական կառավարության, եթե ոչ, ապա ինչո՞ւմն է տարբերությունը:

4. Բնակչությունը՝ չիմանալով բանն ինչումն է, Ձեր գիտությունը ազդեցություններ են ուղարկվել բոլոր գյուղերը, որոնք գովաբանելով հայերին, նկարագրում են թուրքական բռնության սարսափները: Վերոհիշյալը ապացուցող պաշտոնական փաստաթուղթ ունենք: Խորհրդային իշխանության ծրագրում կա՞ ազդեցության այս կամ այն պետության օգտին: Եթե թուրքերն էլ այնպես վարվեն, ինչպես Դուք այժմ վարվում եք և եթե բնակչությունը բաժանվի երկու լագերի ու հեղվի աշխատավոր բնակչության անմեղ արյունը, ո՞վ դրա համար պատասխանատու կլինի: Ընդունենք, թե մեղավորը թուրքերն են, ապա ինչո՞ւ հայերի օգտին քարոզել կարելի է, իսկ թուրքերի օգտին՝ չի կարելի»²:

Վկայակոչելով Ալեքսանդրապոլի պայմանագիրը ու հանդես գալով որպես Նախիջևանի խորհրդային իշխանության և աշխատավոր ժողովրդի շահերի պաշտպան՝ գրություն 5-րդ և 6-րդ կետերում Վեյսալ-բեյը Վելիբեկովին այլ կարգի մեղադրանքներ էլ է ներկայացնում (աշխատավորական զանգվածների շահերի ոտնահարում, հանցագործների ու կուլակների պաշտպանություն և այլն): Այդ հարցերին մենք չենք անդրադառնա, քանի որ, նախ, հեռու են մեր հետապնդած

խնդիրներից և հետո՝ ասված են ի միջի այլոց, կարծես թե մերկապարանոց չլինելու համար: Իսկ գլխավորը՝ գրություն անացքը, ինչպես վերը տեսանք, հունվարի 7-ին Նախիջևան քաղաքում կազմակերպված միտինգն էր, որի նպատակը, ըստ Վեյսալ-բեյի, Հայաստանին միանալու օգտին ստորագրություններ հավաքելն էր: Ուրեմն, փորձենք պարզել, թե դա ի՞նչ միտինգ էր, ովքե՞ր էին կազմակերպել և արդյո՞ք Հայաստանին միանալու օգտին ստորագրություններ հավաքելու փորձ է կատարվել:

ՀՀ ազգային արխիվում երկու փաստաթուղթ կա, որոնցում խոսվում է այդ միտինգի մասին: Մեկը Վելիբեկովի հունվարի 23-ի գեկուցագիրն է, որում այդ հարցը շոշոփված է շատ հակիրճ: Մյուսը՝ Հատիկ Ազիզյանի վերը հիշատակած գեկուցագիրն է, որտեղ միտինգի ընթացքը նկարագրված է բավական մանրամասնությամբ՝ ականատեսի ու մասնակցի դիրքերից: Ոտսելով այն մասին, որ ներկա պահին Նախիջևանում թուրքերի հիմնական խնդիրը «անարխիա առաջացնելը և խորհրդային իշխանության վարկաբեկելն է», և որ այդ նպատակով նրանք խորհրդային մարմիններում իրենց ունեցած հայտնի ու գաղտնի գործակալների միջոցով ինքնակամ ունեցած հայտնի ու գաղտնի գործակալների կողմից կազմակերպված միտինգի ձևապատկերը թուրք գործակալների կողմից:

Ըստ Հ. Ազիզյանի՝ սկզբում ամեն ինչ հանգիստ էր ընթանում, ելույթ են ունենում Նախիջևանի Կոմկուսի քարտուղար Սուլեյմանովը, ինքը՝ Ազիզյանը, և նրա հետ Երևանից եկած Ախունդովը, որը գործուղված էր Նախիջևան կոմունիստների երիտասարդական միության Կենտկոմի կողմից: «Այնուհետև կարդացվեց բանաձևը, – գրում է Ազիզյանը, – որը կազմված լինելով իմ կողմից՝ ընկ. Սուլեյմանովի մասնակցությամբ, դեռ հարևան սենյակում¹ մեր համաձայնությամբ և տեղական կոմկուսի (անդամության) թեկնածուներ գրանցված մի քանի ընկերների մասնակցությամբ, վերամշակման էր ենթարկվել: Բանն այն է, որ սկզբում բանաձևը ամենաանմեղ ձևով էր կազմված: Երկու կետ կար. ողջունել Հայաստանում բանվորագյուղացիական հեղափոխությունը և հայ աշխատավորների հետ միասին պայքարել խորհրդային իշխանության ամրապնդման համար (իհարկե, բոլորովին

¹ Պետք է լիներ 1336թ (իսլամական տոմար), որը համապատասխանում է քրիստոնեական տոմարի 1921թ-ին:

² ՀԱԱ, ֆ. 114, ց. 2, գ. 22, թ. 15-16:

¹ Միտինգը տեղի էր ունենում դահլիճում:

չմատնանշելով, թե որ)»¹: Ազիդյանն այնուհետև պատմում է, որ համակրողներն առաջարկեցին միտինգի կողմից ընդունելիք բանաձևում կեստ ավելացնել, որով ողջունում էին Հայաստանի հեղկոմի կողմից Նախիջևանին ինքնորոշման իրավունք չնորհող դեկլարացիան, և թեև դրանով իսկ բանաձևը որոշ չափով սեպարատիզմի երանգ էր ստանում, բայց իրենք համաձայնել են դրան: «Եվ ահա, երբ այդ վերամշակված բանաձևը ընթերցվեց դահլիճում, – շարունակում է Ազիդյանը, – պատասխանը լիակատար լուռությունն էր: Այնուհետև սկսվում է միտինգի կազմակերպված տապալումը: “Համակրող ընկերները”, որոնք մասնակցել էին բանաձևի մշակմանը, հանկարծ, մեզ համար անսպասելի կերպով, սկսում են կատաղի քննադատել բանաձևը: Դրանք թուրքերի ակնհայտ գործակալներն էին, որոնք սողոսկել էին կոմունիստական միջավայր»²: Դահլիճում միջուկորտն ավելի է շիկանում, Սուլեյմանովի և Ախունդովի բացատրությունների փորձերը թշնամաբար են ընդունվում, իսկ թուրք գործակալների ամեն մի խոսքը արժանանում է միտինգավորների բուռն համակրանքին: Դահլիճում հայտնվում են նաև ծպտված թուրք ասկյարներ, և միտինգը շարունակելը դառնում է անիմաստ:

Վելիբեկովի գեկուցագրից տեղեկանում ենք, որ թուրք գործակալները չեն բավարարվել միայն միտինգի տապալումով: Կապի սպա Իքմեթը, ներկայանալով Վելիբեկովին, Վեյսալ-բեյի անունից պահանջել է ձեռքակալել միտինգը կազմակերպողներին՝ Սուլեյմանովին, Ազիդյանին և Ախունդովին: Բավարարում չստանալով՝ թուրք գործակալները նույն օրը միտինգ են կազմակերպել գնդում և որոշել զինաթափել Չեկային (Արտակարգ հանձնաժողով), գրավել բանտը և ազատել հակախորհրդային տարրերին ու հանցագործներին: Սակայն Վելիբեկովին հաջողվել է գնդի հրամանատարին համոզել թույլ չտալու հակաօրինական գործողություններ:

Նախիջևանի գունդը դարձել էր այն հիմնական ուժը, որի միջոցով Վեյսալ-բեյը քաղաքում և նրա շրջապատում ինքնակամ բռնազրավումներ ու ձեռքակալություններ էր կատարում՝ անարխիա առաջացնելու և խորհրդային իշխանությունը վարկաբեկելու նպատակով: Գնդի սպայական կազմի զգալի մասը թուրք սպաներ էին, քիչ չէր նաև թուրք ասկյարների թիվը: Այլ կերպ ասած՝ գունդը դարձել էր թուրք

գործակալների և էմիսարների հավաքատեղի, և Վելիբեկովը՝ որպես խորհրդային իշխանություն ներկայացուցիչ, չէր կարող աչք փակել այդ ամենի վրա: Առավել ևս, որ Վեյսալ-բեյը նրա նկատմամբ իր հակակրանքը և Նախիջևանից նրան վտարելու մտադրությունը բնավ չէր թաքցնում: Անհրաժեշտ էր ազատվել այդ գնդի ներկայությունից, և Վելիբեկովը որոշում է կազմացրել այն: Եվ քանի որ Չեկայի ուժերը բավարար չէին այդ հարցը լուծելու համար, ուստի Շահթախթիում կանգնած 106-րդ ռուսական հեծելազնդի հրամանատար Վոլոդկինից խնդրում է մի էսկադրոն ուղարկել Նախիջևան: Նախիջևան է գալիս նաև Վոլոդկինը Վեյսալ-բեյի հետ միասին (Բ. Շահթախթինսկին արդեն մեկնել էր Բաքու): Վերջինս հարկադրված է լինում համաձայնել, որ գնդի թուրք ասկյարները հեռանան Նախիջևանից և մտնեն Շահթախթիի թուրքական զորաջոկատի մեջ: Հունվարի 11-ին Նախիջևանի գունդը կազմացրվում է, իսկ շուրջ 43 հոգի, որոնք ակտիվորեն մասնակցել էին հակախորհրդային ելույթներին, ձերբակալվում են:

Այս իրադարձություններից հետո բուն Նախիջևանում ու նրա շրջակայքում մի որոշ ժամանակ (շուրջ երկու շաբաթ) խաղաղություն հաստատվեց: Ե՛վ Վեյսալ-բեյը, և՛ նրա էմիսարները այդ օրերին հանգիստ էին և Վելիբեկովի ու խորհրդային իշխանության դեմ որևէ քայլ չէին ձեռնարկում: «Կոնֆլիկտը հարթվում է, – գրում է Վելիբեկովը: – Նախիջևանը իսկապես դառնում է խորհրդային»¹: Համոզված, որ կոնֆլիկտը վերջնականապես կհարթվի, և Նախիջևանի երկրամասում հանգստություն կպահպանվի միայն այն դեպքում, եթե թուրքիայի արևելյան ճակատի հրամանատարությունը փոխի վերաբերմունքը և հրաժարվի երկրամասում ներքին խլրտումներ հրահրելուց, նա նույնիսկ Կարաբեքիր փաշային սիրաշահելու փորձ է անում: «Հեղափոխական Անատոլիան՝ որպես ավանգարդ, առաջինը Արևելքի ազատագրության լոգունգով կարմիր դրոշ պարզեց, – ասված է Քյազիմ Կարաբեքիրին ուղարկած Վելիբեկովի հունվարի 19-ի հեռագրում: – Ժողովուրդները ուշադրությամբ ունկնդրում են այդ ձայնը և մեծ հույսով նայում նրան: Օր-օրի ավելի ու ավելի է ընդլայնվում կարմիր Անատոլիայի գործունեությունից դաշտը, բարձրանում է նրա հեղինակությունը խորհրդային հանրապետությունների մոտ և արդեն մոտ է այն օրը, երբ Արևելքի ճակատագիրը կհանձնվի նրա ձեռքը ու նա կդառնա այնպիսի կենտրոն, ինչպիսին Մոսկվան է»² (ընդգծումը մերն է – է. Զ.):

¹ ՀԱԱ, ֆ. 114, ց. 2, գ. 22, թ. 16:

² Նույն տեղում:

¹ ՀԱԱ, ֆ. 114, ց. 2, գ. 25, թ. 35:

² Նույն տեղում, թ. 19:

Պետք է ենթադրել, որ այս տողերը շարադրելիս Վելիբեկովը դեռ չգիտեր, որ դրանից երկու օր առաջ՝ հունվարի 17-ին, Կարաբեքիրը Վեյսալ-բեյից ստացած տեղեկատվության հիման վրա դիմել էր Մոզիվանուն՝ Հայտնելու Օրջոնիկիձեին իր դժգոհությունը Վելիբեկովի գործունեությունից, որն իբրև թե Նախիջևանի ազգաբնակչության մեջ վնասակար քարոզչություն է տարածում¹: Այլապես նա այդքան վերամբարձ տոն չէր հաղորդի իր գրությունը և այդպիսի շոյալ գնահատական չէր տա Անատոլիայի ազգայնական շարժմանը՝ Արևելքի համար նրան համարելով նույնպիսի կենտրոն, ինչպիսին Մոսկվան էր:

Վելիբեկովը չէր կարող չհասկանալ, որ նման միջոցներով Անկարային Նախիջևանի նկատմամբ հավակնությունից հնարավոր չէ շեղել, որ ներքին խլրտուսների, խորհրդային իշխանությունն ու նրա ներկայացուցիչներին վարկաբեկելու նպատակը Նախիջևանի հարցի լուծումն է մինչև Մոսկվայի կոնֆերանսի գումարումը: Հազիվ չորս օր էր անցել Կարաբեքիրին հասցեագրած այս գրությունից, երբ Վելիբեկովը Հայկոմկուսի կենտկոմին և Հայհեղկոմին (պատճենը Ազրհեղկոմին ու Կոմկուսի կենտկոմին և 11-րդ բանակի Ռազմհեղխորդին) ուղարկած զեկուցագրում, եզրափակելով Նախիջևանյան իրադարձությունների մասին իր խոսքը, դրանք համարում է «վիթխարի իրադարձությունների նախերգանք» և ավելացնում. «Թուրքիան վերջին ժամանակներս սիրախաղ է անում ինչպես մեզ, այնպես էլ Անտանտայի հետ և, ինչպես վերջին փաստերն են ցույց տալիս, թեքվել է Անտանտի կողմը: Նա ցանկություն ուներ զավթել սեպաձև խրված Նախիջևանի շրջանը՝ իրականացնելու համար իր պլանը. բարձրացնել ընդհանուր հակահեղափոխություն սկսած Անատոլիայից, Մակվից, Նախիջևանից, պարսկական Ադրբեջանից և վերջացրած Որհորդային Ադրբեջանով: Դա հաստատվում է հետևյալ փաստերով. ոտնձգությունը Նախիջևանի նկատմամբ, պահանջը Մակվի Սարդարից դադարեցնելու (սպառնալիքի տակ) առևտրական հարաբերությունները Որհորդային Նախիջևանի և Հայաստանի հետ, կնքված հաշտությունը (ոչ առանց Թուրքիայի ազդեցություն) ապստամբ Սմկոյի² և պարսկական Ադրբեջանի միջև»³:

¹ Տե՛ս „Геноцид армян...“, էջ 372.

² Ուրմիա լճից արևմուտք ընկած շրջանում հաստատված քրդական ցեղերից մեկի ցեղապետը, որին հաջողվել էր պարսիկներին դուրս քշել ոչ միայն Ուրմիա լճի ավազանից, այլև Սալմաստից ու Ուոյից և վտանգ ստեղծվել նաև Ատրպատականի նահանգի (Պարսկական Ադրբեջան) համար:

³ ՀԱԱ, ֆ. 114, ց. 2, գ. 25, թ. 35:

Որ Անկարան փորձում էր երկու լարի վրա խաղալ, դա գաղտնիք չէր խորհրդային ղեկավարությունից համար: Ուղղակի առանձին կուսակցական-պետական գործիչներ (հատկապես մահմեդական) խիստ չափազանցված էին ներկայացնում թե՛ քեմալականների դերը Արևելքում հակահամալերախոստական պայքարի ծավալման գործում, թե՛ Արևմուտքի հետ համաձայնությունից գալու նրանց հնարավորությունները, և դրանով իսկ ՌԽՖՍՀ կառավարությունը հարկադրում զիջող լինել Անկարայի հետ հարաբերություններում: Արխիվներում բազմաթիվ փաստաթղթեր են պահպանվել, որոնք վկայում են, որ այդ հարցում առանձնապես մեծ ակտիվություն էին ցուցաբերում Նարիմանովը, Շահթախիթնակին և նրանց շուրջը համախմբված Բաքվի ղեկավարությունը: Մենք դեռ առիթ կունենանք ծանոթանալու այդ փաստաթղթերի մի մասին: Բայց նաև անհրաժեշտ ենք համարում շեշտել, որ նրանք հաջողություն չէին հասնի հակահայկական իրենց գործունեության մեջ, եթե նրանց չպաշտպանեին ու չհովանավորեին Ստալինը, Օրջոնիկիձեն և բոլոր այն վրաց կոմունիստները, որոնք այդ ժամանակ գործում էին Կովկասում (էլիավա, Մոզիվանի, Կվիրկելիա և ուրիշներ): Իրականում 1921թ. առաջին ամիսներին Անտանտի տերությունները (հատկապես Անգլիան) դեռևս հակված չէին բավարարելու քեմալականների բոլոր պահանջները: Ուրեմն համաձայնություն հնարավորությունները դեռևս աննշան էին: Քեմալականները դա լավ էին հասկանում և ակտիվ կերպով պատրաստվում էին Մոսկվայի կոնֆերանսին՝ հուսալով, որ Ռուսաստանի կառավարությունը ճանաչել կտան Հայաստանում կատարված տարածքային զրավումները և կապահովեն նրա ռազմատնտեսական ու դիվանագիտական աջակցությունը Արևմուտքի դեմ մղվող պայքարում:

Տարածքային խնդիրների շղթայում թույլ օղակ էր Նախիջևանի հարցը: Չնայած թափած ջանքերին, ինչպես տեսանք, Թուրքիան դեռևս ցանկալի արդյունքի չէր հասել: Բայց դեռ ժամանակ կար և հունվարի վերջին օրերին Վեյսալ-բեյի գործակալներն ու թուրք էմիսարները նորից գործի անցան և մի քանի գյուղերում հակախորհրդային խռովություններ բարձրացրին: Դրանց դեռ կանդրադառնանք, բայց նախ ծանոթանանք արխիվային մի վավերագրի, որը տեղ է գտել 1929թ. Բաքվում լույս տեսած փաստաթղթերի և նյութերի ժողովածուում, և որից պարզ է դառնում, որ հունվարյան այդ նույն օրերին Նախիջևանի նկատմամբ դավեր էին նյութվում ոչ միայն Անկարայում, այլև Բաքվում: Խոսքը 1921թ. հունվարի 12-ին Բաքվում գումարված Ադրբեջանի Կոմունիստական կուսակցության Կենտկոմի Քաղբյուրոյի

և Կազմըյուրոյի միացյալ նիստի միասին է, որտեղ քննության էր դրվել նաև «Հայաստանի դրության մասին» Հարցը: Զեկուցում է Ն. Նարիմանովը և ակնհայտորեն գույները խտացնելով՝ Հայտարարում, թե «ամենուրեք խոսում են բանակի գլուխ Դրոյի գտնվելու մասին և որ դա առաջ է բերում ընդհանուր անվստահություն կառավարության նկատմամբ», որ Հայհեղկոմը թույլ է, իսկ ձախ դաշնակցականները ներթափանցում են Հայաստանի Կոմկուսի մեջ և այլն, և այլն, ու հետևություն անում, թե «անհրաժեշտ է գնալ այնտեղ, տապալել Դրոյին և հաստատել կայուն իշխանություն»: Ավարտելով իր խոսքը և մի անգամ ևս միացյալ նիստի մասնակիցների ուշադրությունը հրավիրելով Վրաստանի հետ դաշնակիցների ունեցած կապի և Զանգեզուրում ծավալած գործունեության վրա՝ Նարիմանովն ավելացնում է. «...եթե Հայաստանը թողնենք այդպես, ստիպված կլինենք այնտեղ ճակատ ունենալ: Անհրաժեշտ է այնտեղ ուղարկել նշանավոր գործիչների, որպեսզի վստահ լինենք, որ այնտեղ ամուր խորհրդային իշխանություն կլինի»¹: Ինչպես միշտ, հակահայկական մոլուցքով աչքի է ընկնում նաև Ծ. Էլիավան: Վերջինս, ոչ ավել, ոչ պակաս, Հայտարարում է. «Հայհեղկոմը չի կարող դուրս գալ դաշնակցական քաղաքականություն ուղեծրից»²:

Նիստին մասնակցած Գ. Օրջոնիկիձեն փորձում է մեղմել Նարիմանովի և Էլիավայի ելույթների թողած ծանր տպավորությունը՝ Հայտարարելով, որ «Դրոն արդեն հանված է», իսկ Էլիավայի ասածը «ճիշտ չէ, որ ամենը բացատրվում է օբյեկտիվ պայմաններով և աշխատակիցների բացակայությամբ»³: Այնուամենայնիվ նիստում ընդունվում է որոշում.

«ա) Լրացուցիչ մոբիլիզացնել Հայ պատասխանատու աշխատակիցների խումբ Հայաստան ուղարկելու համար: Ցուցակների կազմումը (հանձնարարել) ընկ. Սարգիսին ու Հուսեյնովին և ներկայացնել Քաղըյուրոյի հաջորդ նիստի հաստատմանը:

բ) Ծահլթախթինսկուն ուղարկել Նախիջևանի կոմիսարի կարգավիճակով Ռէլի (Ռազմահեղխորհուրդ) մանդատով:

գ) Հանձնարարել Ներքգործողկոմին նախապատրաստելու Զանգեզուրի մուսուլմանական հատվածի մասին հարցը՝ նրա վարչական կազմակերպության առումով»⁴:

Թե ինչ հետևանքներ ունեցան Հայաստանի ներքին դրության մասին արհեստականորեն ուժնացված ու թմբկահարված կարծիքները, և ինչի հանգեցրին Հայ սպաների ու մտավորականների նկատմամբ կիրառված բռնությունները, հանրահայտ է, և այդ հարցին մենք չենք անդրադառնում: Անշուշտ, մեր խնդիրը չէ նաև կանգ առնել այն հարցի վրա, թե Ադրբեջանի Կոմկուսի Կենտկոմի Քաղըյուրոն որքանով իրավասու էր քննարկելու Հայաստանի ներքին դրության մասին հարցը և որոշումներ կայացնելու: Բայց որ դրանով նա ոտնահարել է ինքնիշխան պետության իրավունքները, դա փաստ է: Խոսքը հատկապես ընդունված որոշման «բ» և «գ» կետերի մասին է: Ընդամենը չուրջ մեկուկես ամիս էր անցել այն օրից, երբ Ադրբեջանի կառավարությունը հանդիսավոր հռչակագրով ի լուր աշխարհի հայտարարել էր, որ Զանգեզուրը և Նախիջևանը Հայաստանի անբաժանելի մասն են: Իսկ հիմա իրեն իրավունք էր վերապահում որոշումներ կայացնել այդ նույն գավառների մասին: Արդյո՞ք սա չէ ապացույցն այն բանի, որ Նարիմանովի ու նրա խմբի համար ընդունված որոշումները, հռչակագրերը, նույնիսկ եթե դրանք միջազգային բնույթ ունեին, կարող էին պարտավորեցնող հետևանքներ չունենալ, եթե չեն նպաստում նրանց զավթողական նկրտումների իրականացմանը: Ճիշտ է, Զանգեզուրի վերաբերյալ ընդունված որոշման մեջ խոսվում է միայն գավառի մուսուլմանական մեծամասնություն ունեցող շրջանների մասին, բայց դարձյալ դրանից հարցի էությունը չի փոխվում, քանի որ Ադրբեջանի հեղկոմի ղեկավարների 1-ի հայտնի հռչակագրում չէր ասված, թե Հայաստանի անբաժանելի մաս են կազմում Զանգեզուրի գավառի հայաբնակ շրջանները միայն: Ինչ վերաբերում է Բ. Ծահլթախթինսկուն 11-րդ Կարմիր բանակի ռազմահեղափոխական խորհրդի մանդատով որպես Նախիջևանի կոմիսար գործուղելու մասին որոշմանը, ապա թեև փաստաթուղթը չատ հակիրճ է ու նաև անորոշ (պարզ չէ, թե ինչ նպատակով է Ծահլթախթինսկին գործուղվում և ուր, և արդյո՞ք Նախիջևանի ներքին դրության հարցը ևս քննարկման նյութ է դարձել վերոհիշյալ նիստում), միևնույն է, Նախիջևանի վերաբերյալ կամ նրա անունից Ադրբեջանի ղեկավարության կայացրած ցանկացած որոշում պետք է դիտել որպես կոպիտ միջամտություն Խորհրդային Հայաստանի ներքին գործերին: Ըստ որում, եթե Զանգեզուրի մուսուլմանական մասի վերաբերյալ կայացրած որոշման դեպքում Նարիմանովը և նրա խումբը կարող էին չահարկել այն իրողությունը, որ այդ գավառի հայկական հատվածում արդեն կազմավորվել էր Խորհրդային Հայաստանի

¹ „К истории образования НКАО...“, стр. 70.

² Նույն տեղում, էջ 71:

³ Նույն տեղում:

⁴ Նույն տեղում, էջ 70:

գերիշխանությունը չճանաչող կառավարություն¹, ապա Նախիջևանի հարցում որևէ պատճառաբանություն վկայակոչել չէին կարող, քանի որ Հայհեղկոմը, ինչպես արդեն տեսանք, ոչ թե հրաժարվել էր Նախիջևանից, այլ միմիայն նրան ինքնորոշման իրավունք էր տվել, իսկ Նախիջևանի հեղկոմն էլ իր կողմնորոշման վերաբերյալ որևէ հայտարարություն դեռևս չէր արել: Չենք կարծում նաև, թե Ադրբեջանի ղեկավարությունը մտահոգել էր Շարուր-Նախիջևանում թուրք գործակալների ծավալած հակահայկական գործունեությունը: Վերը տեսանք, որ իրականությունն ուղիղ հակառակն էր. Բաքուն և Անկարան Նախիջևանի հարցում գործում էին ձեռք ձեռքի տված: Նարիմանովը ևս, իհարկե, ոչ առանց Բաքու վերադարձած Ծաճթախթինսկու Ջանքերի, դժգոհ էր Վելիբեկովի գործունեությունից, նրան համարում էր հայամետ, Ադրբեջանի շահերի տեսակետից անցանկալի գործիչ: Դա² էր դրդել Ադրբեջանի ղեկավարությունը նման որոշում կայացնելու, թե՞ մեկ այլ բան (օր. գործուղում Մոսկվա և այլն), միևնույն է, խնդրի էությունը դրանից չի փոխվում. Ադրբեջանը ոտնահարել էր Հայաստանի ինքնիշխան իրավունքները:

Ինչ վերաբերում է Վելիբեկովին, ապա Շարուր-Նախիջևանում Ծաճթախթինսկու ու Վեյսալ-բեյի ղեկտեմբեր-հունվարյան հակահայկական ու հակախորհրդային գործունեության մասին կենտրոնական իշխանություններին փաստորեն ոչինչ չհայտնած բոլշևիկյան այս գործիչը, գուցե դժգոհ Բաքվում կայացրած որոշումից կամ էլ Կարաբեքիրի կոպիտ գնահատականներից, վերջապես որոշում է ջրի երես հանել այն ամենը, ինչ նրանք արել էին ղեկտեմբերի երկրորդ կեսին և հունվարի սկզբին: Խոսքը հունվարի 23-ի ղեկուցագրի մասին է, որի բովանդակությանն արդեն ծանոթացանք:

* * *

Որքան Մոսկվայի ոռու-թուրքական երկրորդ կոնֆերանսի գումարման ժամկետը մոտենում էր, այնքան Շարուր-Նախիջևանում Վեյսալ-բեյի ու նրա գործակալների հակախորհրդային գործունեությունն ավելի ու ավելի ակտիվանում և վտանգավոր երանգներ էր ստանում: Հաղվի հինգ օր էր անցել Վելիբեկովի՝ հունվարի 23-ի ղեկուցագրի լույս աշխարհ գալուց, երբ թուրք գործակալները մի նոր խոսվություն

¹ Խոսքը Ինքնավար Սյունիքի մասին է, որ հռչակել էր Համազանգեզուրյան համագումարը 1920թ. ղեկտեմբերի 25-ին:

բարձրացրին այս անգամ՝ Ջահրիում: Այս գյուղում թուրք զինվորականները իրենց համար հենարան էին ստեղծել՝ հանձին ռազմաուսումնական դպրոցի, որտեղ ընդունում էին հիմնականում հակախորհրդային տրամադրություններով մարդկանց: Հենց սրանց օգնությամբ թուրքերին հաջողվեց ձեռքակալել խորհրդային իշխանության տեղական ներկայացուցիչներին (տեղամասային հեղկոմի, հողկոմի և այլն) և փորձել թիրքեշ ու Կրզըլ-Բողազ գյուղերում միանալ տեղական հակախորհրդային ուժերին և միասին շարժվել դեպի Նախիջևան: Բացի այդ, թուրքական հրամանատարությունը խոսվարարներին օգնելու նպատակով Ջուլֆայում հավաքագրել էր շուրջ 850 մուսավաթականների, զինել նրանց՝ տրամադրելով նույնիսկ երկու հրանոթ¹: Սակայն խոսվարարներին չի հաջողվում միավորվել. Չեկայի և Կարմիր բանակի զորամասերը արագ և վճռական գործողություններով կարողանում են նույն օրը (հունվարի 28) գրավել Ջահրի գյուղը, ճնշել խոսվությունը և ձեռքակալել կազմակերպիչներին:

Թե Նախիջևանի խորհրդային իշխանության համար որքան վտանգավոր էին թուրք գործակալների կողմից պարբերաբար հրահրվող խոսվությունները, վկայում է թեկուզ այն փաստը, որ փետրվարի սկզբին որոշվում է ստեղծել Ռազմահեղափոխական խորհուրդ, ամբողջ իշխանությունը կենտրոնացնել նրա ձեռքում և երկրամասի բոլոր կոմունիստներին և խորհրդային իշխանության համակիրներին գենքի տակ դնել: Խորհրդի նախագահը Բ. Վելիբեկովն էր, բայց նախկինի պես կենտրոնական իշխանություններին հասցեագրած ղեկուցագրերի տակ ստորագրում էր որպես արտակարգ կոմիսար:

1921թ. փետրվարի 3-ին Վելիբեկովը մի նոր ղեկուցագիր է ուղարկում՝ որպես լրացում հունվարի 23-ի ղեկուցագրի: Այն բաղկացած է երկու մասից և ամբողջովին նվիրված է թուրքերի հակախորհրդային գործունեությանը ոչ միայն Նախիջևանի երկրամասում, այլև պարսկական Ադրբեջանում:

«Թուրքերի վերաբերմունքը մեր՝ խորհրդային իշխանության նկատմամբ, որոշակիորեն թշնամական է դառնում, - գրում է Վելիբեկովը: - Մինչև այժմ գործելով գաղտնի, այժմ նրանք հանդես են գալիս բացահայտ: Նրանք նպատակադրվել են զավթել Նախիջևանի շրջանը և այդ խնդրի իրագործման համար ձեռնարկում են բոլոր միջոցները: Նախիջևանի շրջանում առանձնապես իրական մեծ ուժ չունենալով՝

¹ Տե՛ս Դ. Մաժաթ, նշվ. աշխ., էջ 103:

նրանք ձգտում են օգտագործել տեղական հակահեղափոխական տարրերին: Երբեմն առ երբեմն տարբեր տեղերում հակահեղափոխություն են բարձրացնում (օրինակ. Նախիջևան-Ջահրի)¹:

Վելիբեկովի այս զեկուցագրից տեղեկանում ենք, որ թուրքերը հատկապես մեծ ուշադրություն էին դարձնում երկաթուղու հատվածին, բոլոր կայարաններում պահակակետեր էին հաստատել՝ նրանցից յուրաքանչյուրում տեղաբաշխելով 10-ական ասկյար, և հունվարի 28-ին Վեյսալ-բեյի հրամանով գինաթափել են հեռագրագծերի կարգավորման նպատակով Երևանից ուղարկված հեռագրաչարժակագմբ, իսկ այդ առթիվ Վելիբեկովի ներկայացրած բողոքին պատասխանել, թե համաձայն Ալեքսանդրապոլում կնքված պայմանագրի՝ ոչ մի զինված հայ չի կարող ոտք դնել Նախիջևանի երկրամաս: Ջեկուցագրում նաև հայտնվում է, որ թուրք էմիսարները կեղծ լուրեր են տարածում, թե իբր «Կարմիր բանակը միացել է հայերին, գրավելու են Նախիջևանի շրջանը և մորթելու են գլխովին բոլոր մուսուլմաններին, բայց թող նրանք չվախենան, քանի որ նրանց հետ են թուրքերը, անգլիացիները և Վրաստանը (վերջինս իբր արդեն օգնություն է գալիս)»²: Դրա հետ մեկտեղ՝ թուրք էմիսարները նաև բավականաչափ ձկունություն էին ցուցաբերում, կեղծ լուրերն առաջ քաշում՝ ազգաբնակչությանն իրենց կողմը գրավելու համար: Օրինակ, այն շրջաններում, որտեղ բնակչությունը համակրում էր խորհրդային իշխանությունը, առաջադրում էին «Կեցցե խորհրդային իշխանությունը, կորչեն կոմունիստները» լուրերը (այդպիսին էր Ջահրիի խոտվարարների լուրերը):

Ուշագրավ է, որ այս զեկուցագրում Վելիբեկովն այլևս չի բավարարվում Նախիջևանի տարածքում թուրքերի գործունեության մասին տեղեկություններ հաղորդելով: Նա այժմ նաև մեղադրական խոսք է ասում բոլոր նրանց հասցեին, ովքեր, կեղծելով իրականությունը, քեմալականներին հանիրավի գովաբանում էին, նրանց համարում ճշմարիտ հեղափոխականներ, խորհրդային Ռուսաստանի հավատարիմ դաշնակիցներ և այլն: «Ավարտելով զեկուցագրի առաջին մասը, - գրում է Վելիբեկովը, - բղավում եմ. Կենտրոնը կեղծ է տեղեկացված թուրքերի վերաբերյալ, մեզ մեծ իրադարձություններ են սպասում, և բավական է Նախիջևան ուղարկել երկու-երեք պատասխանատու ընկերներ, որպեսզի նրանք անձամբ համոզվեն: Նախիջևանի Արտակարգ

Հանձնաժողովում արժեքավոր փաստաթղթերի մի ամբողջ կույտ կա»¹: Ինչպես տեսնում ենք, Վելիբեկովն այստեղ իր խոսքը չի անձնավորել (հավանաբար չէր էլ կարող՝ նման գործիչների մեծ թվի պատճառով), բայց որ նկատի ունենա նախ և առաջ Նարիմանովին, Շահթախթինսկուն և Աղրբեջանի մյուս ղեկավարներին, որոնք առաջամարտիկ էին քեմալականներին երկինք բարձրացնելու գործում, դա անկասկած է:

Ինչպես արդեն նշել ենք, զեկուցագրի երկրորդ մասում Վելիբեկովն անդրադարձել էր Իրանի Հյուսիսային նահանգներում (Պարսկական Աղրբեջան) հեղափոխական շարժումների հասունացման և այդ շրջաններում թուրք գործակալների ծավալած գործունեության հարցերին, որոնց, հասկանալի պատճառով, մենք չենք անդրադառնում: Միայն ավելացնենք, որ բարձրացնելով այդ հարցերը, Վելիբեկովը չի սահմանափակվում միայն տեղեկություններ հաղորդելով, այլ Պարսկական Աղրբեջանը խորհրդային գորքերով օկուպացնելու առաջարկություն է անում, որպեսզի դրանով իսկ և՛ թուրքերը զրկվեն այնտեղ ազատորեն գործելու ու ազդեցություն ձեռք բերելու հնարավորությունից, և՛ Նախիջևանը Ջերբախի գավառի ու Ջանգեզուրի գավառի մուսուլմանական մասի վրայով Աղրբեջանի հետ կապվելու հնարավորություն ստանա²:

Ձեռք կարծում, թե Վելիբեկովն իսկապես անհանգստացած էր Իրանի Հյուսիսային շրջաններում թուրքերի գործունեության և ազդեցության աճով: Ամենայն հավանականությամբ նրան հետաքրքրողը Աղրբեջանի հետ կապի ստեղծումն էր: Իսկ դա նշանակում է, որ Վելիբեկովը բողոքովին էլ հայամենա չէր, ինչպես նրա մասին ասում էին թե՛ Բաքվում, թե՛ հատկապես Անկարայում: Կարաբեքիրը չէր դադարում մեկը մյուսի հետևից հեռագրեր ու նամակներ ուղարկել Օրջոնիկիձեին, 11-րդ Կարմիր բանակի հրամանատար Հեկկերին, որոնցում ամեն կերպ վատաբանում էր Վելիբեկովին ու հայերին, Նախիջևանի երկրամասում տեղի ունեցած անցանկալի իրադարձությունների համար պատասխանատվությունը դնում նրանց վրա: Փետրվարի 8-ին նա երկու ընդարձակ նամակ է ուղարկում Հեկկերին, որոնցից մեկում նշում է, որ նույն ամսվա 5-ին հաղորդագրություն էր ուղարկել, բայց պատասխան չի ստացել: Կարաբեքիրը Հեկկերին հորդորում է օժանդակել «երկու կառավարությունների միջև բարեկամական հարաբե-

¹ ՀԱԱ, ֆ. 114, ց. 2, գ. 87, թ. 11:

² Նույն տեղում:

¹ Նույն տեղում:

² Տե՛ս նույն տեղում:

րությունների ամրապնդմանը» և ավելացնում. «...ինչ վերաբերում է ինձ, ապա ես հրաման եմ տվել Նախիջևան տանող ճանապարհին որոշ կետեր գրաված մեր ջոկատներին խստորեն հետևելու որոշ վնասակար անձանց, ովքեր խախտում են հասարակական հանգստությունը և կատարում անկարգություններ»¹: Փորձելով արդարացնել Վեյսալ-բեյի և նրա գործակալների հակահայկական և հակախորհրդային գործողությունները Շարուր-Նախիջևանում՝ Կարաբեքիրը 11-րդ բանակի հրամանատարին հիշեցնում է, որ հայերի հետ կնքած Ալեքսանդրապոլի պայմանագրով այդ երկրամասում իրենց հովանավորության տակ գտնվող հատուկ վարչություն պետք է ստեղծվեր, և որ «բոլոր այն անձինք, ում վրա դրված է Նախիջևանում այդ քարոզչության վարումը, անմիջապես կհեռանան այդ քաղաքից՝ այդ վայրերում ամեն անհրաժեշտ իրականացնելուն պես»²:

Այսպես արդարացնելով իր գործակալների գործունեությունը՝ Կարաբեքիրը վերջում ավելացնում է, թե իրենք միշտ կհակադրեն Դելիբեկովների³ վտանգավոր պլաններին ու քարոզչությունը և Մդիվանու միջոցով այդ մասին կհայտնեն Օրջոնիկիձեին:

Մենք համառոտակի անդրադարձանք այս նամակին, որովհետև նրանում ավելի շատ խոսվում է ռուս-թուրքական բարեկամության մասին, «Անտանտի օգտին գործող հեղափոխականների» մասին, որոնք ձգտում են խափանել այդ բարեկամությունը՝ առանց նշելու, թե ովքեր են դրանք: Ճիշտ է, նրանում խոսվում է նաև հայերի հետ կնքած Ալեքսանդրապոլի պայմանագրի մասին, բայց չի ասվում, թե ովքեր են այդ չարամիտ հեղափոխականները: Կարաբեքիրը որոշել էր այդ մասին առանձին նամակ գրել, և քանի որ այն ամբողջովին հայերի դեմ է ուղղված, ուստի ներկայացնում ենք ամբողջությունը: Ահա այն⁴.

«Ղարաքիլիսից ստացված տեղեկություն համաձայն պարզորոշ նշմարվում է թուրքահայաստակ դաշնակիների ապստամբություն, որոնք սկսում են չարանենգ բանսարկություններ և վտանգավոր սպառնալիքներ տարածել:

Արևելյան ճակատի թուրքական հրամանատարությունը՝ լիազորված Ազգային մեծ ժողովի կողմից, անկախ ընդհանրապես կոմունիզմի հարցերի նկատմամբ իր վերաբերմունքից, պետք է նկատի ունենա, որ

հայերը միշտ անփոփոխ կերպով կողմնորոշվելու են Անտանտի շահերով, մշտապես ձգտում են անընդմեջ թշնամանք սերմանել թուրք ու ռուս ազգերի միջև, որոնք միմյանց հետ միշտ գտնվել են այնպիսի բարեկամության ու բարի հարևանության մեջ, որին, իհարկե, ոչ ոք չի կարող կասկածել: Թուրքական արևելյան բանակը միշտ պատրաստ է՝ ռուսականի հետ հավասարապես պաշտպանել իր շահերը Անտանտի վերաբերմամբ և կովել հայերի դեմ, որոնք ծախվել են Անտանտին: Այս հարցի վերաբերմամբ ես արդեն Ձեզ նախօրոք տեղեկացրել եմ, սակայն ցավոք մինչև հիմա Ձեզինց նրա պատասխանը դեռ չեմ ստացել: Համաձայն իրենց սովորությունների, ինչպես երևում է վերոչարադրյալից, հայերին երբեք պետք չէ վստահել ընդհանրապես և երբեք (պետք չէ) օգնություն գալ նրանց: Նրանք հազարավոր տարբեր խորամանկություններ են գործադրում, որպեսզի երկպառակություններ սերմանեն:

Ես խնդրում եմ Ձեզ ոչ մի վստահություն չցուցաբերել անգամ այն հայերին, որոնք բոլշևիկներ են դարձել: Նրանք անպայմանորեն ուզում են խախտել մեր բարի հարաբերությունները և քարոզչություն են անում, որը շահավետ է միայն Անտանտին, և դրա համար ես վստահ եմ, որ նույնիսկ այն հայերը, որոնք բոլշևիկներ են դարձել, դաշնակների հետ միասնաբար են գործում»¹:

Թուրք փաշան այսպես է դատում հայ ժողովրդի մասին, այսպես է փորձում 11-րդ բանակի հրամանատարությունը տրամադրել հայերի դեմ: Ալեքսանդրապոլի կոնֆերանսի օրերին հայերը Կարաբեքիրի համար «անգույն ու անհանգիստ» ազգ էին (այդպես է որակել Սատիսյանի հետ զրույցներում), իսկ հիմա նրանք անվստահելի են, խառնակիչ և բոլորը դաշնակ:

Փետրվարի երկրորդ կեսին իրադրությունը Շարուր-Նախիջևանում նորից սրվեց: Քեմալական հրամանատարությունը որոշեց օգտվել Հայաստանում ծայր առած քաղաքացիական պատերազմի հետևանքով կատարված իշխանափոխությունից և Նախիջևանում իշխանությունը զավթելու նոր փորձ արեց: Բայց այս անգամ Վեյսալ-բեյը չզնայ տրորված ճանապարհով և իսկույն իրեն չհուշակեց Նախիջևանի արտակարգ կոմիսար, ինչպես դա երկու ամիս առաջ էր արել: Նա նախ փորձեց Նախիջևանում եղած խորհրդային գործառույթին իր հրամանատարության տակ առնել և նոր միայն իշխանությունը հանձնելու պահանջ դնել: Հազիվ չորս օր էր անցել Հայաստանում ծայր առած քաղաքացիական պատերազմից, երբ Վեյսալ-բեյը փետրվարի 22-ին

¹ «Геноцид армян...», т. 2, ч. 1, стр. 372.

² Նույն տեղում, էջ 373:

³ Այդպես է տեքստում, պետք է լինի Վելիբեկով:

⁴ Նամակը ռուսերեն է՝ թարգմանված արարատառ թուրքերենից:

¹ «Геноцид армян...», т. 2, ч. 1, стр. 371-372.

չորս կեսից կազմված հատուկ ռազմագիր է ուղարկում Նախիջևանի խորհրդային կայազորի պետին, որոնցից առաջինում ասված էր, որ «Հայաստանում դաշնակցական կառավարություն է հայտարարված», որը պատերազմ է սկսել Ռուսաստանի դեմ, և որ «արտաքին գործերի կոմիսար Ջիչերինը սույն ամսի 20-ին ռազմային Վրաստանին և Հայաստանին խաղաղություն է առաջարկել¹, բայց պատերազմը չարունակվում է»²:

Ինչպես տեսնում ենք, այս կետը տեղեկատվական բնույթ ունեւր: Իսկ Վեյսալ-բեյի իրական նպատակը արտացոլված էր 2-րդ և 3-րդ կետերում: Դրանցից առաջինում ասված էր, որ հնարավոր է դաշնակների ներխուժում Նախիջևանի տարածք, ուստի թիկունքից կտրված կարմիր բանակի բոլոր զորամասերը, «Համաձայն թուրքական բանակի հրամանատարի կատեգորիկ հրամանի, պետք է անցնեն թուրքական հեղափոխական ջոկատի հրամանատարության պաշտպանության տակ» և կենտրոնանան Շահթախթի ու Կիվրազ գյուղերում: Երրորդ կետում ասված է, թե «որպեսզի պատրաստ լինելու համար՝ Նախիջևանի վրա դաշնակների հարձակմանը» երկրամասի զինվորական կոմիսարիատը ևս պետք է հանձնվի թուրքական ջոկատի հրամանատարությանն ու տեղափոխվի Շահթախթի³:

Մեկնաբանելով այս կետը՝ Վելիբեկովը գրում է, թե դա պարզ ու որոշակի ցույց է տալիս, որ թուրքերը ուզում էին «զինվորական կոմիսարիատի միջոցով զորակոչ կազմակերպել, մեծացնել իրենց ուժերը, բարձրացնել իրենց հեղինակությունը (փաստորեն զավթել իշխանությունը) և հետո ուսական զորամասերին զինաթափվելու առաջարկ անել»⁴: Նման ենթադրության համար հիմք էր ծառայել նաև այն քարոզչությունը, որ այդ օրերին վարում էին թուրք էմիսարները՝ տարածելով կեղծ լուրեր, թե արդեն խորհրդային իշխանություն վերջը եկել է, Հայաստանում, Ուկրաինայում ապստամբություն է, իսկ Լեհաստանը նորից է պատերազմ հայտարարել Ռուսաստանին և այլն:

Ինչպես վերն ասվեց, Վեյսալ-բեյի ռազմագիրն ուներ նաև 4-րդ կետ, որով պահանջում էր շտապ տեղեկություններ հաղորդել երկա-

¹ Թուրք-հայկական պատերազմի ժամանակ Վրաստանը օգտվելով Հայաստանի ծանր դրությունից, օկուպացրել էր Լոռու Չեղոք գոտին: 1921թ. փետրվարի 12-ին այստեղ ապստամբություն էր ծագել: Լոռեցիների խնդրանքով օգնության էին հասել թե՛ Հայկական բանակի և թե՛ ռուսական 11-րդ բանակի զորամասերը:

² ՀԱԱ, Փ. 114, ց. 2, գ. 87, թ. 26:

³ Տե՛ս նույն տեղը:

⁴ Նույն տեղում, թ. 22:

թուղու, հեռագրի և հեռախոսագծերի դրուծյան մասին: Շտապ պատասխան նա իհարկե ստացավ, բայց բոլորովին այլ բովանդակությամբ: «Մենք պատասխանեցինք, - գրում է Վելիբեկովը, - որ մենք մեր կենտրոնից կտրվել ենք ոչ վերջնականորեն, որ մենք ենթարկվում ենք մեր բարձր հրամանատարությանը, որը գտնվում է Ավչար կայարանում և որ միայն մերոնցից ստացած հրամանով կարող ենք վարվել այսպես կամ այնպես...»¹:

Մերժում ստանալով և իշխանությունը գեներալի օգնությամբ համար բավարար ուժեր չունենալով՝ Վեյսալ-բեյը նորից է փորձում ոտքի հանել տեղական հակահեղափոխական տարրերին և օգնություն ստանալ Մակվի սարգարից: Եվ քանի որ Վեյսալ-բեյը հարկադրված պետք է արտաքուստ չեզոքություն պահպաներ, ուստի ապստամբական շարժումները գլխավորելու համար թուրքիայի արևելյան ճակատի հրամանատարության կարգադրությամբ Բայազեդի բանտից ազատվում և Նախիջևան է ուղարկվում Հայտնի տեղորիստ, հակախորհրդային գործունեության համար կարմիրբանակայինների կողմից Նախիջևանում ձերբակալված, բայց Վեյսալ-բեյի միջնորդությամբ թուրքական արդարադատությանը հանձնված Մուստաֆա Քեմալը: Վերջինս նախ անցնում է Մակու, սարգարից 10 հեծյալ քուրդ ստանում, Մակվում ապաստան գտած հակախորհրդային տարրերից 50 հոգուց բաղկացած մարտական ջոկատ կազմավորում, ապա փետրվարի 22-ին անցնում Արաքսը, գրավում Նախիջևան քաղաքից չուրջ 5-6 կմ հեռավորության վրա գտնվող Ղարաջուղ և Բուժան գյուղերը, ձերբակալում գյուղական հեղկոմների և կոմունիստական բջիջների անդամներին, համալրում իր ջոկատը և պատրաստվում քաղաքի վրա հարձակման: Պայմանավորվածության համաձայն Վեյսալ-բեյը փետրվարի 24-ին 25 ասկյարներից բաղկացած մի ջոկատ է ուղարկում Նախիջևան, որին հրամայված էր միանալ ապստամբներին, հենց որ նրանք կներխուժեն քաղաք: Հարձակումը նախատեսված էր իրականացնել փետրվարի 25-ի վաղ առավոտյան: Սակայն այդ ամենի մասին Նախիջևանի իշխանություններն արդեն իմացել էին և լույս 25-ի գիշերը չեկիստների խմբերը և զինված կոմունիստները² չըջապատում են վերը նշված գյուղերը և երկաթուղային կայարանը: Փոխհրաձգություն ժամանակ չըջապատվածների մի մասը սպանվում է, իսկ Մ.

¹ Նույն տեղում:

² Վելիբեկովի գեկուցագրում ասված է, որ զինված կոմունիստների թիվը հասնում էր չուրջ երկու հազարի:

Քեմայլը և նրա 7 կողմնակիցները ձերբակալվում են¹: Մ. Քեմայլի մոտ հայտնաբերվում է երեք նամակ, որոնցից պարզ է դառնում, որ այդ շարժումը կազմակերպել ու ֆինանսավորել է թուրքական հրամանատարությունը: Վեյսալ-բեյին հասցեագրած այդ նամակներից մեկում, որը նա այդպես էլ չէր հասցրել ուղարկել, մասնավորապես ասված էր. «Միրելի իմ հրամանատար Վեյսալ-բեյ. 1. Ես եկել եմ մինչև Կիզիլ-Կիչլագ գյուղը: 2. Բոլոր շրջանների հետ կապվել եմ: 3. Սարդարի հրամանով տասը հեծյալներ եմ ստացել, հետախուզություն եմ ուղարկել Ալամդար և Ալինջիչայ: 4. Բագիր-խանին (Արաբզարի խանին) զեկուցագիր եմ ուղարկել: Ես խնդրում եմ Սարդարին ձեռնարկ օգնական ուժեր ուղարկել, ինչի մասին խնդրում եմ և Ձեռք միջնորդությունը Սարդարի առջև: Այսօր մտնում եմ Նախիջևան: Խնդրում եմ Ձեզ խոստացած վաչտի ուղարկումը արագացնել»²:

Թվում է, թե նման անհերքելի փաստերի առկայությունն պայմաններում Նախիջևանի թուրքական հրամանատարությունը կսկսվի, կընդունի իր մեղքը և վերջ կտա հետագա արկածախնդրություններին: Բայց ոչ, նա ոչ միայն շարունակում է հակախորհրդային քայքայիչ գործունեությունը, այլև փորձում նախիջևանյան իշխանությունների հետ իր լարված հարաբերությունների համար մեղքը բարդել Վելիբեկովի վրա: Եվ որ առավել տարօրինակ է, նման գործունեությունը շարունակվեց նաև Մոսկվայի կոնֆերանսի օրերին, միայն մի տարբերությունով՝ Նախիջևանում ոռու-թուրքական բարի հարաբերությունները խաթարող Վելիբեկովի կողքին հայտնվեցին նոր «մեղավորներ»՝ հայերը, որոնք, ըստ Կարաբեքիրի, բոլորն էլ դաշնակ են, և բոլորն էլ ապրում ու գործում են միայն մի նշանաբանով՝ հնարավոր բոլոր միջոցներով խանգարել ոռու-թուրքական բարեկամության հաստատմանը և հրահրել պատերազմ նրանց միջև:

* * *

Եթե փորձենք ամփոփել Մոսկվայի ոռու-թուրքական երկրորդ կոնֆերանսի նախօրեին Նախիջևանի երկրամասում թուրք-աղբբեջանյան հակահայկական ու հակախորհրդային գործունեության և դրա հետևանքով ստեղծված իրադրության մասին վերը ասվածը, ապա պետք է արձանագրենք.

1. Հայաստանի խորհրդայնացման կապակցությունը Հայաստանի և Աղբբեջանի միջև վիճելի համարվող տարածքների (Ղարաբաղ, Ջան-

գեղուր, Նախիջևան) վերաբերյալ Աղբբեջանի հեղկոմի հռչակագիրը, որը պատմագիտությունն ավելի շատ հայտնի է «Նարիմանովի դեկլարացիա» անունով, ոչ այլ ինչ էր, եթե ոչ Հայաստանում խորհրդային իշխանություն հաստատմանը նպաստող մարտավարական մի քայլ: Հռչակագրի լույս ընծայումը ոչ թե երկու ժողովուրդների միջև թշնամանք առաջացնող այդ շարաբաստիկ վեճը մեկընդմիջտ վերացնելու Աղբբեջանի ղեկավարության ազնիվ մղումով էր թելադրված, ինչպես դա ներկայացնում էին խորհրդային պետական ու կուսակցական ղեկավար գործիչները (Ստալին, Օրջոնիկիձե և ուրիշներ) ու թմրկահարում ժամանակի մամուլում, այլ պարտադրված էր բոլշևիկյան ղեկավարության կողմից: Ծատ ժամանակ չէր անցել, երբ Նարիմանովը և նրա շուրջը համախմբված աղբբեջանցի ղեկավար գործիչները, օգտագործելով բոլոր հնարավոր միջոցները (լեզու, անլեզու), լայնամասշտաբ գործունեություն ծավալեցին վիճելի տարածքները Աղբբեջանին կցելու ուղղությամբ: Տարբեր էին մեթոդներն ու եղանակները: Եթե Ղարաբաղի դեպքում դա հիմնականում շանտաժն էր ու նավթը, Ջանգեղուրի դեպքում՝ կաշառքը, ապա Նախիջևանի հարցում՝ համագործակցությունը ցեղակից թուրքիայի հետ:

2. Հակահայկական տրամադրություններով վաղուց աչքի ընկած Բ. Ծահթախիթինսկու՝ Նախիջևանում հայտնվելը պատահականություն չէր: Ալեքսանդրապոլում իր գործն ավարտելուց հետո գործուղվելով Նախիջևան՝ նա առաքելություն ուներ կանխել վերջինիս անցումը Հայաստանին: Խնդրի իրագործման համար Ծահթախիթինսկին գործադրում է երկու միջոց. ա) լինելով Աղբբեջանի անդամ՝ նա այդ նույն հեղկոմի հռչակագիրը համարում է դավաճանություն և կազմակերպված միտինգում հայտարարում, թե նրանց միակ փրկությունը թուրքերն են, պետք է «ամուր բռնել թուրքերից»: Բ) Նախիջևանի արտակարգ կոմիսար Վելիբեկովին համոզում է, թե Բաքվում կայացված համաձայնությունը Աղբբեջանի հռչակագրին պետք է հետևեր Հայհեղկոմի հռչակագիրը, որով Նախիջևանին ինքնորոշման իրավունք պետք է տրվեր:

3. Վելիբեկովի երևանյան առաքելությունը հաջողությամբ պսակվեց: Աղբբեջանի հռչակագրի հետևանքով Նախիջևանում ստեղծված լարված իրադրության մասին ուժացված պատմություններով նրան հաջողվեց համոզել Հայհեղկոմին ընդառաջել իր առաջարկություններին: Դեկտեմբերի 24-ի նիստում Հայհեղկոմը որոշեց հռչակագիր ընդունել Նախիջևանին ինքնորոշման իրավունք տալու մասին, ինչպես նաև որպես օգնություն 20 միլիոն ռուբլի հատկացնել Նախիջևանին:

¹ Տե՛ս ՀԱԱ, ֆ.114, ց. 2, գ. 87, թ. 22-23:

² Նույն տեղում, թ. 23:

Նախիջևանին ինքնորոշման իրավունք չնորհող Հայհեղկոմի հռչակագիրը արտաքին հարաբերությունների բնագավառում Հայաստանի նորահաստատ խորհրդային իշխանությունից ամենաթույլ և ամենախոցելի փաստաթուղթն է: Ոչ մի նախապայման (հատկապես ազգաբնակչության շուրջ 35-40 տոկոսը կազմած տարագիր նախիջևանահայության հայրենիք վերադառնալու և պարտադիր կերպով հանրաքվեին մասնակցելու իրավունքի մասին) չպարունակող այս փաստաթղթում նախիջևանահայության չահերը մոռացություն են տրված: Հռչակագրում ոչինչ չի ասված նաև Նախիջևանի նկատմամբ Հայաստանի իրավունքների մասին:

4. Ալեքսանդրապոլի պայմանագրով Նախիջևանի նկատմամբ հովանավորության իրավունք ստացած քեմալական թուրքիան այնուհետև ամեն միջոց գործադրեց երկրամասում իշխանությունը ձեռք գցելու և Մոսկվայի կոնֆերանսը կատարված փաստի առաջ կանգնեցնելու համար: Նախիջևանի անցումը Հայաստանին կանխելու նպատակով համազործակցելով Ադրբեյջանի հետ՝ թուրքիայի արևելյան ճակատի հրամանատարությունը միաժամանակ Շարուրում տեղաբաշխված իր զորամասի և հայտնի ու գաղտնի գործակալների միջոցով լայնածավալ թուրքամետ քարոզչություն է վարում, խորհրդային իշխանությունը վարկաբեկող լուրեր տարածում, խոտվություններ ու ապստամբություններ կազմակերպում: Օգտվելով Վելիբեկովի ժամանակավոր բացակայությունից (մեկնել էր Երևան)՝ թուրքական զորամասի հրամանատար Վեյսալ-բեյը ղեկտեմբերի 22-ին իրեն հռչակում է Նախիջևանի արտակարգ կոմիսար և հրամայում կանգնեցնել Երևանից եկող գնացքները, հունվարի 7-ին իր գործակալների միջոցով տապալում է Երևանից եկած գործիչների կողմից Նախիջևանում կազմակերպած միտինգը և հրահրում հակամիտինգ Նախիջևանի գնդում, հունվարի 28-ին Ջահրիում հակախորհրդային խռովություն է կազմակերպում, փետրվարի 22-ին Նախիջևան քաղաքի չրջակա գյուղերում ապստամբություն է կազմակերպում և քաղաքը գրավելու նպատակով օգնության ուղարկում թուրքական ջոկատ: Ահա հակիրճ շարքն այն ձեռնարկումների, որոնք թեև Չեկայի և ուսական զորամասերի կողմից արագ ճնշվում էին, բայց կայնպես լարվածություն էին առաջացնում երկրամասում, որի համար մեղքը բարդում էին «հայամետ» Վելիբեկովի և Նախիջևանում գոյություն չունեցող հայ դաշնակցականների վրա: 11-րդ Կարմիր բանակի հրամանատարությանն ուղարկած փետրվարյան նամակներում Կարաբեքիր փաշան բոլոր հայերին համարում է թշնամի ու կոչ անում ընդհանրապես հայերին չվատահեղ և օգնություն ցույց չտալ:

ԳԼՈՒԽ ՀԻՆԳԵՐՈՐԴ

Նախիջևանյան հիմնահարցը Մոսկվայի ուսումնասիրության երկրորդ կոնֆերանսում

Լեզրանը թուրքիայի և խորհրդային Ռուսաստանի միջև Հայաստանի փաստական բաժանման և վերջինիս նկատմամբ թուրքերի թշնամական քաղաքականության իրական պատճառների մասին:

Թուրքական դիվանագիտությունը Սերի դեմ պայքարի գործում, դերերի բաշխումը Անկարայի և Ստամբուլի միջև: Քեմալականների կեղծ հակամիտինգները և դիվիզիաների գնդով նրանց իր կողմում պահելու խորհրդային քաղաքականությունը:

Նախիջևանի պատկանելիության հարցը կոնֆերանսի նախօրեին. Ստալինի, Օրջոնիկիձեի, Կիրովի դիրքորոշումը: Ծահթախթինսկու հակահայկական նոր նկրտումը:

Լիազորությունների բացակայության պատճառաբանությունը, միացյալ կոնֆերանսի ձախողումը: Բեկզադյանի պատվիրակության գործունեությունը:

Նախակոնֆերանսյան բանակցությունները. Ստալինը և թուրքա-Հայաստանի հարցը օրակարգից հանելու, Կարախանին պատվիրակության կազմից հանելու և Հայաստանի օկուպացիայի չրջանները մաքրելու խնդիրների թուրքանպաստ լուծումը:

Բաթումը Վրաստանին թողնելու և Ալեքսանդրապոլի պայմանագիրը չեղյալ հայտարարելու Չիչերինի պահանջը, բանակցությունների խզման վտանգը: Ստալինի և Ծահթախթինսկու անդրկուլիայան բանակցությունները թուրք պատվիրակների հետ: Թուրքիայի հյուսիս-արևելյան սահմանն ըստ Ստալինի. Բաթումը Վրաստանին, Արփաչայից արևմուտք և Արաքսից հարավ 20 վերստ խորությունը մի շերտ Հայաստանին, Նախիջևանի հարցի լուծումը Ծահթախթինսկու հայեցողությունը:

Իրադարձությունները Վրաստանում և Բաթումը, Ախալքալաքը և Ախալցխան գավթելու Անկարայի փորձը: Վրաց

քաղաքական գործիչների դիրքորոշումը: Ստալինի նոր Հան-դիպումը թուրք պատվիրակների հետ և նոր գործարքը, Բաթումի փոխարեն 20 վերստանոց շերտի պահանջից հրաժարվելը:

Տարածքային սահմանադատման Հարցերը քաղաքական Հանձնաժողովի մարտի 10-ի և 12-ի նիստերում: Նախիջևանի երկրամասը Ադրբեջանի հովանավորությանը հանձնելու և այդ հովանավորությունը երրորդ պետության չփոխանցելու թուրքական պատվիրակության պահանջը: Չփոխանցման դեմ Չիչերինի հակափաստարկների մերժումը թուրքերի կողմից: Վիճաբանությունները Նախիջևանի երկրամասի սահմանների շուրջ և կայացրած որոշումը: Նախիջևանի վերաբերյալ հողվածների վերջնական ձևակերպումը մարտի 14-ի նիստում:

Տնտեսական Հարցերը մարտի 14-ի և 16-ի նիստերում: Օգնության մասին գրավոր պարտավորության պահանջը: Պայմանագրի ստորագրումը մարտի 18-ի նիստում: Թուրքական դիվանագիտության հաղթանակը:

Այլըստանդրապոլի պայմանագրով և Հանրապետության մնացած մասի խորհրդայնացումով փաստորեն Հայաստանը բաժանվեց քեմալական Թուրքիայի և Խորհրդային Ռուսաստանի միջև: Ճիշտ է, այն դեռ պետք է իրավական ձևակերպում ստանար Ռուսաստանի և Թուրքիայի միջև կնքվելիք պայմանագրում, բայց որ խնդիրն, ըստ էության, արդեն լուծված է, դա գաղտնիք չէր ոչ ոքի համար: Դեկտեմբերի 8-ին Չիչերինին ուղարկած հեռագրում Օրջոնիկիձեն զգուշությամբ գրում է, «իմ կարծիքով թուրքերի իրական նպատակը Հայաստանը մեզ հետ կիսելն է»¹: Սակայն բոլշևիկյան կայսրությունը չէր շտապում կլանել ազգային հանրապետությունները և վերջիններս, որոնց թվում և Խորհրդային Հայաստանը, ընդհուպ մինչև ԽՍՀՄ կազմավորումը, միջազգային հարաբերություններում հանդես էր գալիս որպես անկախ պետություն, պայմանագրեր էր կնքում և մի շարք երկրներում դիվանագիտական ու հյուպատոսական ներկայացուցչություններ պահում (Ռուսաստան, Ուկրաինա, Պարսկաստան, Թուրքիա, Վրաստան, Ադրբեջան և այլն) բայց որ դա անցողիկ երևույթ էր, որ շուտով

խորհրդայնացած բոլոր հանրապետությունները պետք է ներառվեն խորհրդային ընդարձակ կայսրության մեջ, դա ակնհայտ էր, թեև այդ մասին գերադասում էին դեռևս չխոսել: Չէին խոսում նաև Հայաստանի Հանրապետության փաստական բաժանման մասին: Ավելին, գրում և խոսում էին այն մասին, թե խորհրդայնացման հետևանքով Հայաստանը ձեռք է բերել իրական անկախություն:

Ո՞րն է անկախության իրական չափանիշը և որքանո՞վ անկախ էին Հայաստանի նման փոքր հանրապետությունները թե՛ մինչև խորհրդայնացումը և թե՛ խորհրդայնացումից հետո՝ ընդհուպ մինչև ԽՍՀՄ կազմավորումը, բոլորովին այլ հարց է, և դրա վրա մենք կանգ չենք առնում: Բայց նաև ավելորդ չենք համարում մատնանշելու, որ բոլշևիկյան կուսակցական և պետական գործիչների շարքում Լեգրանը միակն էր, որ թուրքերի հետ Հայաստանի Հանրապետության բաժանման մասին համարձակվեց բացահայտորեն խոսել ու գրել: 1920թ. դեկտեմբերի 22-ին Չիչերինին հասցեագրած նամակում նա գրում է. «Դեռ այն ժամանակ, երբ թուրքերին Սարիղամիշը նրանց կողմից գրավելու համաձայնություն տվեցինք, կարելի էր կանխատեսել, որ դա կհանգեցնի Հայաստանի համար խիստ ծանր պայմաններ ստեղծելուն: Իհարկե, որոշ օգուտ եղավ այն ձևումից, որ առաջ բերեց թուրքերի շարժումը դաշնակների վրա, բայց ոչ մի հիմք չկար կարծելու, թե նրանց կարելի կլինի կանգնեցնել այնտեղ և այն ժամանակ, երբ մենք դա անհրաժեշտ կհամարենք: Արդյունքում մենք հարկադրված եղանք սիրահոժար բաժանել Հայաստանը թուրքերի հետ: Այժմ դա բոլորի համար ակնհայտ փաստ է դարձել»¹ (ընդգծումը մերն է- է. Ջ.): Լեգրանը ցավով է անդրադառնում Հայաստանի բաժանման փաստին և այն քաղաքականությանը, որի արդյունք հանդիսացավ քեմալական թուրքերի արշավանքը Հայաստան ու գտնում, որ իրենք ավելի շատ կորցրել են, քան ստացել: «Ճիշտ է, - ասված է այդ նամակում, - այդ գնով մենք հասանք դաշնակների ոչնչացմանը և խորհրդային իշխանության հաստատմանը Հայաստանի այն տարածքում, որը մնաց մեր ազդեցության տակ: Բայց ես չարունակում եմ նախկինի պես կարծել, որ թուրքական հարձակման նկատմամբ այլ քաղաքականության դեպքում մեզ կհաջողվեր, թեև, հնարավոր է ոչ այդպես արագ, Հայաստանը ենթարկել մեր ազդեցությանը, և այն ժամանակ մենք ստիպված չէինք լինի դնալ բաժանման թուրքերի հետ և փաստորեն վավերացնել

¹ Геноцид армян: Ответственность Турции и обязательства мирового сообщества, Документы и комментарии, ред. Ю. Барсегов, Т. 2, ч. I, М. 2003, стр. 311.

¹ Նույն տեղում, էջ 328:

ազգային ճնշման նրանց քաղաքականությունը Հայաստանի օկուպացված մարզերում»¹ (ընդգծումը մերն է - է. Ջ.):

Որ Լեզգրանն իրավացի էր, դրանում երկու կարծիք լինել չի կարող: Երկու կարծիք լինել չի կարող նաև այն բանում, որ խորհրդային իշխանությունների էջերին էջերոններում Լեզգրանի նման մտածողներ փաստորեն չկային: Դա ակնբախտորեն երևաց Մոսկվայի ռուս-թուրքական երկրորդ կոնֆերանսին նախապատրաստվելու շրջանում, երբ կրկին օրակարգի հարց էր դարձել ոչ միայն թուրքերի հետ ռազմաքաղաքական դաշինք կնքելու, այլև տարածքային հարցերում նրանց արվելիք հնարավոր գիծմաների խնդիրը, ինչը, բնականաբար, պետք է հանգեր Հայաստանում նրանց կատարած դավթումները ճանաչելուն: Միակ բացառությունը արտգործոցն էր Գ. Ջիզերինն էր, որը դեռևս հույսը չէր կորցրել և նախկինի պես կանգնած էր Հայկական հարցին մի որոշ լուծում տալու դիրքերում: Դեկտեմբերի 5-ին Շ. էլիավային ուղարկած նամակում անդրադառնալով 1920թ. օգոստոսին Բեքիր Սամի բեյի հետ մշակած ռուս-թուրքական պայմանագրի նախագծին, Ջիզերինը գրում է. «Երկու կետում մենք տարաձայն ենք. մենք չենք ընդունում թուրքական սահմանների որոշումն ըստ Ազգային ուխտի, որը համարյա վերարտադրում է Բրեստ-Լիտովսկյան սահմանները, և մենք պահանջում ենք թուրքա-Հայաստանի թեկուզ որոշ մասի անկախության ճանաչում՝ Թուրքա-Հայաստանից ելած Հայ բնակչության բնակության համար...»²:

Ջիզերինը լավատես էր, նա կարծում էր, թե Անկարան դրականորեն կարձագանքի Հայաստանի խորհրդայնացման փաստին, կփոխի քաղաքականությունը նրա նկատմամբ և կհամաձայնի խորհրդային Ռուսաստանի մասնակցությամբ Հայ-թուրքական նոր կոնֆերանսի գումարմանը: Սակայն նրա լավատեսությունը շատ կարճ տևեց, չուտով նա համոզվեց, որ քեմալական թուրքերը բոլշևիկյան Հայաստանի նկատմամբ նույնքան թշնամաբար են տրամադրված, որքան թշնամական էին դաշնակցական Հայաստանի հանդեպ: Անկարան ոչ միայն մերժեց Հայ-թուրքական նոր կոնֆերանս հրավիրելու և ստեղծված նոր պայմանների համեմատ երկկողմ հարաբերություններ մշակելու Հայհեղկոմի առաջարկությունը, այլև սկսեց համառորեն պահանջել, որ խորհրդային Հայաստանը կատարի Ալեքսանդրապոլի պայմանագրից բխող բոլոր պարտավորությունները՝ միաժամանակ օկու-

պացված պահելով Ալեքսանդրապոլը ու բոլոր այն տարածքները, որոնք այդ նույն պայմանագրով Հայաստանի մաս էին կազմում: Միակ գիշումը, որ Անկարան ի վերջո կատարեց, դա այն է, որ համաձայնեց Հայաստանին առնչվող հարցերը քննարկել առաջիկայում գումարվելիք ռուս-թուրքական կոնֆերանսում՝ «Հայ կոմունիստների մինիմալ մասնակցությամբ»³:

Այդ հարցերի մասին մեր պատմագիտական գրականության մեջ բավականաչափ նյութ կա: Հայ պատմաբանները՝ որոնց շարքում և տողերիս հեղինակը, վաղուց բացահայտել ու հիմնավոր փաստերով ցույց են տվել, որ ազգային փոքրամասնությունների, և հատկապես հայերի ու Հայաստանի հարցում, քեմալական թուրքերն իրենց նախորդների՝ երիտթուրքերի արժանի ժառանգորդներն էին և ամեն զնով ձգտում էին ավարտին հասցնել այն, ինչ չէին հասցրել անել երիտթուրք հայասպանները²: Եվ այլ կերպ լինել չէր կարող, քանի որ այսպես կոչված ազգային (միլլի) շարժումը, որը հետագայում ստացավ քեմալական անվանումը, նախապես ծրագրվել ու կյանքի էր կոչվել հենց սուլթանական կառավարության և երիտթուրք գործիչների կողմից:

Ասում են, թե դիվանագիտությունը թուրքերի արյան մեջ է: Ճիշտ է այդ ասույթը թե ոչ, դժվար է ասել: Հնարավոր է, որ դրանում որոշ չափազանցություն կա: Բայց, որ թուրքերը դիվանագիտության ասպարեզում միշտ էլ ձկունություն են դրսևորել ու հաջողության հասել, դա անառարկելի է և այդ բանը հաստատող փաստեր՝ որքան ուղեք: Հերիք է հիշել, թե 19-րդ դարում քանի-քանի անգամ է Օսմանյան կայսրությունը հայտնվել անդունդի եզրին, կանգնել անխուսափելի թվացող կործանման փաստի առաջ, բայցևայնպես չի կործանվել, փրկվել է հենց դիվանագիտության օգնությամբ, մեծ տերությունների միջև ծագած հակասությունները հմտորեն օգտագործելու միջոցով: Իդուր չէր Լյուդ Ջորջն ասում. «...թուրքերը պղտոր ջրում ձկնիկ որսալու մեծ վարպետներ են»³:

Առաջին աշխարհամարտի ավարտից հետո, երբ հաղթող տերությունները հավաքվել էին Փարիզում և ամենուրեք խոսում ու հայտա-

¹ РГАСПИ, ф. 85, оп. 14, а. 50, п. 4.

² Տե՛ս, օրինակ, է. Ա. Ջոհրաբյան, Սովետական Ռուսաստանը և Հայ-թուրքական հարաբերությունները (1920-1922), Եր. 1979, էջ 172-194, Գ. Գալոյան, Հայաստանը և մեծ տերությունները 1917-1923թթ., Եր 1999, էջ. 404-420, և այլն:

³ Ллойд Джордж, Правда о мирных договорах, Т. 2, М. 1957, стр. 461.

¹ Նույն տեղում:

² Նույն տեղում, էջ 305:

րարություններ էին արվում, թե թուրքերն այլևս անելիք չունեն Եվրոպայում, թե նրանք կարող են մնալ միայն փոքրասիական թերակղզու կենտրոնական մասում՝ Բուսաս կամ Կոնիա մայրաքաղաքով, երբ վերջապես Սևրում այդ ոգով պայմանագիր թելադրվեց թուրքերին, մի պահ թվաց, թե այս անգամ նրանց փրկություն չկա: Բայց ոչ, չուտով դեպքերն այլ ընթացք ստացան, չուտով պարզվեց, որ թուրքերը բոլորովին ձեռքները ծալած չեն նստել ու սպասել Եվրոպայի կողմից իրենց ճակատագրի որոշմանը: Նրանք ստեղծված վիճակից դուրս գալու ելք են փնտրել ու գտել այն: Որոշել են «կողմերի» և «ղեմերի» խաղ խաղալ ու դերերի բաշխում կատարել. Ստամբուլը հնազանդորեն ենթարկվում է ու փորձում մեղմել Անտանտի զայրույթը, իսկ Անատոլիան հեղափոխական կերպարանք է ընդունում, ըմբոստ դիրք բռնում և օգնություն ու փրկություն որոնում հակաանտանտայական ուժերի մոտ:

Այսպես են գործել թուրք քաղաքական գործիչներն ու դիվանագետները և այս պարզ խաղը աշխարհը չի ըմբռնել, թեև այդ մասին խոսողներ շատ են եղել, որոնց շարքում՝ նաև թուրքեր: 1920թ. դեկտեմբերի 23-ին Տրապիզոնից Ելենա Ստասովային¹ ուղարկած մի նամակում Արևելքի ժողովրդների Բաքվի համագումարի որոշումով ստեղծված «Քարոզչության և գործողության խորհրդի» ներկայացուցիչ Եփրեմը, որը մի խմբի հետ հատուկ առաքելությունը գործուղվել էր Անատոլիա՝ տեղեկություններ հավաքելու քեմալական շարժման բնույթի և հետապնդած նպատակների մասին, գրում է. «Մի բան ինձ համար պարզ դարձավ. Իր էությունը, իր բնույթով այս (պես) կոչված, Կոստանդինապոլսի կարիներտը և Անգորայի կառավարությունը նույնն են, ոչ մի տարբերություն: Եվ իմ մի գրուցակից, Կոստանդինապոլսից եկած շտաբային նշանավոր սպա, որը նմանապես գնում էր Անգորա (ինչպես և մենք), բացահայտորեն գովաբանում էր թուրքական դիվանագետներին և քաղ(աքական) գործ(իչներին), որոնց Անտանտի «կողմնակիցների» և «հակառակորդների» դերերի շատ հաջող բաժանման միջոցով հաջողվեց այն, ինչ չկարողացավ անել պարտված պետություններից և ոչ մեկը՝ չկատարել Վերսալյան հաշտության թալանչիական պայմանները: Եվ պետք է ընդունել, որ սուբյեկտիվորեն իրենց՝ ինչպես Անգորայի, այնպես էլ Կոստանդինապոլսի թուրք գոր-

ծիչների հասկացությունը, գործը այդպես է դրված, բայց օբյեկտիվորեն, համաշխարհային մասշտաբով, այնուամենայնիվ, Քեմալի շարժումը առաջադիմական է»²:

Հենց այս՝ քեմալական շարժման առաջադիմական լինելու մասին աջ ու ձախ տարածվող կարծիքներն էլ Անկարայի ղեկավարությունը հնարավորություն էին տալիս բոլշևիկյան գործիչներին տրամադրել իր օգտին և ստանալ Խորհրդային Ռուսաստանի թե՛ նյութական և թե՛ բարոյական աջակցությունը՝ իր առաջ դրված խնդիրները լուծելու համար: Իսկ դա բոլորովին էլ եվրոպական իմպերիալիզմի դեմ պայքարը չէր, ինչպես դա ներկայացնում էին Ռուսաստանում, այլ պայքար էր հայերի և հույների «չար մտադրությունների դեմ», ինչը արձանագրված է «Արևելյան Անատոլիայի իրավունքների պաշտպանության ընկերություն» էրզրումի (1919թ. հուլիսի 23 – օգոստոսի 6) և Սվազի (1919թ. սեպտեմբերի 4–11) կոնգրեսներում ընդունված որոշումներում²:

Այս հարցը ևս բավականաչափ լուսաբանված է մեր պատմագիտական գրականության մեջ: Լուսաբանված է նաև դիվանագիտական այն աննախադեպ ակտիվությունը, որ դրսևորեցին քեմալականները Ալեքսանդրապոլի պայմանագրով գծված սահմանները Խորհրդային Ռուսաստանին ճանաչել տալու և ընդհանրապես Հայկական հարցը կոնֆերանսի օրակարգից հանելու ուղղությամբ: Հետևապես մի կողմ թողնելով այդ հարցը՝ առավել ևս որ այն մեր անմիջական խնդիրների շարքից չէ, միայն արձանագրենք, որ Անկարան հմտորեն օգտագործեց Արևմուտքի հետ համաձայնության գալու իրենց հնարավորությունների մասին տարածվող լուրերը՝ հարկադրելու Մոսկվային ձեռնպահ մնալ Ալեքսանդրապոլի պայմանագրով գծված սահմանները վերանայելու գայթակղությունից: Եվ, եթե թուրք դիվանագետները այդ հարցում ևս հաջողության հասան, ապա դրանում դարձյալ մեծապես մեղքի իրենց բաժինն ունեն Ստալինը, Օրջոնիկիձեն, Նարիմանովը և նրանց արբանյակները (Մդիվանի, Էլիավա, Շահթախթինսկի և ուրիշներ), որոնք խոսքները մեկ արած ակտիվ կերպով լծվեցին Ձիչերին վրա ճնշում գործադրելու, Անտանտի լազեր թուրքերի հնարավոր անցումը կանխելու նպատակով Հայաստանի հաշվին զիջումներ անե-

¹ Բոլշևիկյան կուսակցության ականավոր գործիչ, «Քարոզչության և գործողության խորհրդի» անդամ:

¹ „Геноцид армян...“, стр. 335.

² Մանրամասն տե՛ս Ռ. Սահակյան, Թուրք-ֆրանսիական հարաբերությունները և Կիլիկիան 1919-1921թթ., Եր., 1970, էջ 43-47, Է. Ա. Ջոհրաբյան նշվ. աշխ., էջ 18-22 և այլն:

լու, նրանց տարածքային նկրտումներին հագուրդ տալու գործին: ՌԿ(Բ)Կ Կենտրոնը և Արտգործոց նախարարությունը ուղարկած իրենց հեռագրերում և նամակներում այդ մարդիկ կաշվից դուրս էին գալիս հիմնավորելու, թե Արևելքում հեղափոխական շարժումների ծավալման գործի համար որքան կարևոր է քեմալականներին ունենալ իրենց կողքին, չձախողել պայմանագիր կնքելու հնարավորությունը՝ ինչպես դա արվեց 1920թ. ամռանը և բավարարել նրանց տարածքային պահանջները: Նույնիսկ Լեզգիները, որը միշտ էլ ճիշտ դիրքերից էր բնութագրում քեմալականներին, տեղի տալով այդ համատարած կարծիքին, Չիչերինին ուղարկած նամակում գրում էր.

«Ի՞նչ կարող է տալ Մոսկվայի առաջիկա կոնֆերանսը Սորհրդային Հայաստանին: Քանի որ մենք չահագրգռված ենք քեմալականներին աջակցելու մեջ, մենք չենք կարող Հայկական հարցը սրուլթյամբ դնել: ...Սորհրդային Հայաստանի ստեղծումը և վերջինիս օգտին մեր բարեկամական միջնորդությունը, թուրքերը, ըստ երևույթի, հակված են նույնիսկ դիտելու որպես Սորհրդային-Ռուսաստանի ձգտումը ստեղծելու արգելապատնեջ Հայաստանում, որն ի վիճակի կլինի հակադրվել Կովկասի մուսուլմանական երկրների վրա Թուրքիայի ազդեցությունը: Միանգամայն ակնհայտ է, որ թուրքերի այժմյան հայտարարությունները Սորհրդային Հայաստանին, հայ կոմունիստներին չվստահելու մասին և այլն, թեև արտացոլում են թուրքերի պատմական ազգային գաղափարախոսությունը, գլխավորապես քողարկում են Կովկասում Սորհրդային Ռուսաստանի քաղաքականությունը հանդեպ նրանց սեփական անվստահությունը: Հենց դրանով է պայմանավորված Հայերի նկատմամբ նրանց ներկա քաղաքականությունը:

Ինձ թվում է, որ թուրքերը կցանկանային մեզ հեռացնել Արևելքում անմիջական գործունեությունից՝ թողնելով մեզ զարգացնել հեղափոխություն Արևմուտքում: Եթե պարզվի, որ թուրքերը ընդունակ են հեղափոխական ճնշում գործադրել հարևան մուսուլմանական երկրների վրա, որ նրանք կկարողանան հեղափոխական շարժում բարձրացնել Արևելքում՝ դա հրաշալի կլինի, այդ ժամ նրանց ինքնուրույն գործողությունների ազատություն պետք է տալ, տալ նրանց նախնիներին, նեղել Սորհրդային Հայաստանը և այլն»¹ (ընդգծումը մերն է - է. Զ.):

Նամակից կատարված այս մեջբերումից դժվար չէ տեսնել, որ

¹ „Геноцид армян...“, стр. 329.

Լեզգիները դժգոհ էր ոչ միայն Հայերի ու Հայաստանի հարցում, այլև ողջ տարածաշրջանում քեմալական թուրքերի վարած քաղաքականությունից, որի համար էլ նրանց անվերապահ գիշումներ անելու խնդիր չի դնում: Իսկ նամակի վերջնամասում ուղղակի գրում է, որ ինքը չի վստահում ու չի հավատում քեմալականներին, որ նրանց հարկավոր է ստուգել և «տալ ճիշտ այնքան, որքան անհրաժեշտ է, որպեսզի նրանց թշնամի չդարձնելու, Անտանտի գիրկը նրանց նետելու համար»¹:

Ինչպես տեսնում ենք, «Անտանտի գիրկը նետվելու» քեմալականների հնարավորությունների մասին տարածված լուրերը իրենց ազդեցությունն էին թողել նաև Լեզգիների վրա: Մինչդեռ իրականում նրանք այդպիսի հնարավորություն չէին ունենում և Անտանտան էլ, ինչպես Լոնդոնի կոնֆերանսը և հետագա իրադարձությունները ցույց տվեցին, ընդհուպ մինչև 1922թ., մինչև հունական անհաջողությունների շրջանը, թուրքական պահանջներին ընդառաջելու ցանկություն չէր դրսևորում: Այդ լուրերը առավելապես տարածում էին հենց իրենք՝ քեմալականները և նրանց Կովկասյան արբանյակները՝ բացառապես Ռուսաստանի արտաքին քաղաքականությունից վրա ազդելու միտումով և պետք է ընդունել՝ ոչ առանց հաջողություն: Արդյունքում, որքան կոնֆերանսի օրերը մոտենում էին, այնքան ուղի-թուրքական դաշինքի կնքմանը խոչընդոտող հարցերը, - ասել է թե, - հայոց հողերի հարցը, օրակարգից հանելու կողմնակիցների ձայնը ավելի ու ավելի բարձր էր հնչում: Եվ առաջին օրինակը Ստալինն է տալիս. դեկտեմբերին՝ շրջանցելով Արտգործոց նախարարությունը, նա Մոսկվայում հրահանգում է հայտնել թուրքերին, որ իրենք չեն դիմադրի Ախալքալաքի և Ախալցխայի գավառներում նրանց իշխանության հաստատմանը: Իսկ փետրվարին՝ կոնֆերանսի աշխատանքներից շուրջ երկու շաբաթ առաջ տեղեկանալով այն մասին, որ Չիչերինը տարածքային հարցերում պաշտպանում է Հայերի շահերը և պահանջել է Վանը, Մուշը և Բիթլիսը հանձնել Հայերին, Լենինին հասցեագրած գրությունում՝ խախտելով էթիկայի բոլոր նորմերը, Չիչերինի այդ պահանջը որակում է որպես «հիմար և պրովոկացիոն» ու դրանով իսկ անձնական վիրավորանք հասցնում Արտգործոց նախարարին: «Ընկ. Լենին, - ասված է նրանում, - ես երեկ միայն իմացա, որ Չիչերինը իրոք ինչ-որ ժամանակ թուրքերին է ուղարկել հիմար (և պրովոկացիոն) պահանջ հօգուտ Հայաստանի Վանը, Մուշը և Բիթլիսը մաքրելու մասին (թուրքական նահանգներ, թուրքերի ճնշող

¹ Նույն տեղում:

մեծամասնությունը): Այդ հայկական իմպերիալիստական պահանջը չի կարող մեր պահանջը լինել: Հարկավոր է արգելել Ձիչերինին ազգայնականորեն տրամադրված հայերի ցուցումով նոտաների ուղարկումը թուրքերին»¹:

Որ Ստալինը կոպիտ ու անտակտ մարդ էր, այդ մասին Լենինը պիտի գրեր ավելի ուշ և այն էլ այլ դեպքերի ազդեցություն տակ: Մինչդեռ այս դեպքում պետական գործչի համար անթուլատրելի վարքագիծը մնաց անպատիժ:

Հայկական տարածքների խնդիրը կոնֆերանսի օրակարգից հանելու առաջարկությունը հանդես է գալիս նաև Օրջոնիկիձեն՝ փետրվարի 12-ին Լենինին ուղարկած նամակում: Նրանից հետո չի մնում Նարիմանովը, և չորս օր հետո (փետրվարի 16-ին) ընդարձակ նամակ է ուղարկում Լենինին, երկար-բարակ հեքիաթներ պատմում «մինչև վերջին մարդը Անգլիայի դեմ պայքարելու» քեմալականների պատրաստակամություն մասին, բայց եթե Հայկական հարցի պատճառով Մոսկվան վանի նրանց իրենից, ապա նրանք կնետվեն Անգլիայի գիրկը: Նարիմանովը ևս սլաքը ուղղում է Ձիչերինի դեմ, ճիշտ է, Ստալինի նման նրա հասցեին կոպիտ խոսքեր չի ասում, բայց և իրեն իրավունք է վերապահում մեղադրելու նրան Հայկական հարցում անգիտություն մեջ: «Ես պետք է զգուշացնեմ Ձեզ, - ասված է նամակի վերջում, - ընկ. Ձիչերինը չփոթում է Արևելյան հարցը, նա շատ է տարված Հայկական հարցով և հաշվի չի առնում այն ամենը, ինչ կարող է լինել, եթե անգործիները² հետ խզում լինի հենց Հայկական հարցի պատճառով: Ես վճռականորեն հայտարարում եմ, որ կովկասում ստեղծված պայմաններում (Դաղստան և Վրաստան) եթե ուզում ենք Ադրբեջանը պահել մեզ, մենք պետք է անգործիների հետ կնքենք ամուր դաշինք՝ ինչ էլ որ լինի: Ես ընդգծում եմ, այդ դաշինքը մեզ կտա ողջ մուսուլմանական Արևելքը, և այն ընդհանուր դժգոհությունը, որ ստեղծված է հենց մեր կողմից՝ մեր ապիկար արևելյան քաղաքականությունը, կվերացվի և դրանով Անգլիայի ձեռքից կխլենք պրովոկացիայի գենը»³ (ընդգծումը մերն է - է. Զ.):

Ուշագրավ է, որ Լենինը՝ ծանոթանալով նամակի բովանդակու-

¹ РГАСПИ, ф.3, оп. 1, д. 5214, л. 2: Տե՛ս նաև Ե. Սարգսյան, Ռ. Սահակյան, Հանուն պատմական ճշմարտության, Երեկոյան Երևան, 9.06.1988:

² Մայրաքաղաք Անգորայի (Անկարա) անունով հաճախ քեմալականներին այդպես էին անվանում:

³ „Геноцид армян...“, стр. 379.

թյանը (Քաղբյուրոյի փետրվարի 18-ի նիստի ժամանակ), իսկույն այն ուղարկում է Ստալինին՝ խնդրելով երկու խոսքով կարծիք ներկայացնել¹, թեև հայ-թուրքական հարաբերությունների հարցում Ստալինի կարծիքը նրան վաղուց հայտնի էր:

Սակայն դրանով Նարիմանովը չէր բավարարվել: Մի քանի օր հետո տեղեկություններ ստանալով Հայաստանում հակախորհրդային ապստամբությունների ծագման և փետրվարի 18-ին ապստամբների կողմից Երևանի գրավման մասին, շտապում է այդ փաստը ևս օգտագործել իր հակահայկական նկրտումների համար, իսկույն Ադրբեջանի կոմկուսի կենտկոմի անդամ Կամինսկու միջոցով հատուկ նամակ է ուղարկում (փետրվարի 21-ին) Լենինին, մատնացույց անում Հայաստանում խորհրդային իշխանություն տապալման փաստը ու հետևություն անում, թե «թուրքական պատվիրակության հետ բանակցություններում Հայկական հարցը դեր չպետք է խաղա»²:

Ահա այսպիսին էր հայ-թուրքական տարածքային խնդիրների շուրջ ստեղծված մթնոլորտը Մոսկվայի կոնֆերանսի նախօրեին: Այսպես վրաց-ադրբեջանական հակահայկական ճակատը օժանդակեց թուրքերին օրակարգից հանելու Ալեքսանդրապոլի պայմանագրով գծված սահմանների վերանայման հարցը: Այդ արշավին միացել էին նաև Մղիվանին, էլիավան և ուրիշներ, որոնց սակայն մենք չենք անդրադառնում ոչ թե նրա համար, որ նրանք երկրորդական դեմքեր էին և նրանց գրությունները, որպես կանոն ուղղված էին ոչ թե Լենինին, այլ Օրջոնիկիձեին կամ Ձիչերինին, այլ մեր բուն խնդրից շատ շեղված չլինելու: Այդ նույն նկատառումով չենք անդրադառնում նաև թուրքական դիվանագիտության ծավալած կամպանիային՝ Լենինին ուղարկած Մուստաֆա Քեմալի նամակին, Ձիչերինին հասցեագրած Ահմեդ Մուհթարի նոտաներին և այլն: Միայն արձանագրենք, որ նրանք կիրառեցին Մոսկվայի վրա ճնշում գործադրելու դիվանագիտությանը հայտնի բոլոր մեթոդներն ու եղանակները: Գործն այնտեղ հասավ, որ դեկտեմբերին Անկարայից դուրս եկած թուրքական պատվիրակությունը ավելի քան մեկ ամիս կանգ առավ Կարսում՝ սպասելով բաղձայի պատասխանի, և ճանապարհը շարունակեց միայն այն բանից հետո, երբ Անկարան պաշտոնական հավաստիացում ստացավ, որ կոնֆերանսում Հայաստանի օգտին տարածքային պահանջներ չեն

¹ Տե՛ս "Два месяца работы В. И. Ленина (из хроники жизни и деятельности, январь-февраль 1921г.), М. 1934, стр. 86:

² „Геноцид армян...“, стр. 387.

դրվի: Այդ մասին վկայություն կա Չիչերինին ուղարկած Ահմեդ Մուհամարի 1921թ. Հունվարի 30-ի նոտայում: Պատասխանելով Չիչերինի Հունվարի 13-ի նոտային, որում վերջինս հայտնում էր իր խորին հիասթափությունն այն բանի համար, որ Անկարան չի ընդունել Հայաստանի և Թուրքիայի միջև միջնորդության իր առաջարկը և հույս հայտնում, որ բոլոր չլուծված հարցերն ու թյուրիմացությունները կհարթվեն մոսկովյան բանակցություններում, Թուրքիայի արտաքին գործերի ժողովրդական կոմիսարի պաշտոնակատարը գրում է. «Մենք միաժամանակ ստացանք ընթացիկ Հունվարի 13-ի ձեր երկու՝ N 706 և 710 գրությունները, հավասարապես նաև ընկ. Մոլոտովի Ալի Ֆուադ փաշային հասցեագրած նամակի բովանդակությունը: Շտապում եմ Ձեզ տեղյակ պահել, որ այդ նամակում բովանդակված Հայտարարությունները, որով մեր կառավարությանը կից Ձեր ներկայացուցիչը ՌՆՖՍՀ անունից պաշտոնապես հաստատում է, որ Թուրքիայի կողմից Հայաստանին տարածքային զիջումների մասին խոսք լինել չի կարող, մեզ ամբողջովին բավարարում են: Մյուս կողմից՝ ժողովուրդների ինքնորոշման իրավունքի նկատմամբ հարգանքը, որ այդքան համոզիչ Հայտարարված է Մուստաֆա Քեմալ փաշայի անունով ընկ. Լենինի նամակում, ինչպես նաև ընթացիկ Հունվարի 13-ի Ձեր N 706 հեռագրում, մեզ վստահեցնում են, որ ոչ մի լուրջ խոչընդոտներ այլևս չեն կարող դժվարացնել մոսկովյան բանակցությունները: Այդպիսի պայմաններում մեր պատվիրակությունը կարգադրություն է ստացել դուրս գալ Կարսից և ամենահնարավոր արագությամբ ժամանել Մոսկվա»¹ (ընդգծումը մերն է - է. Զ.):

Ո՞ւմ ցուցումով է Մոլոտովին նման բան հայտնել թուրքերին: Որպես Թուրքիայում ՌՆՖՍՀ դիվանագիտական ներկայացուցիչ, նա անմիջականորեն ենթակա էր Արտգործոցնախարարի և Հյուրընկալ երկրի վերաբերյալ իր կառավարության կայացրած ամեն մի վճիռ, որպես կանոն, պետք է ստանար կա՛մ անձամբ Չիչերինից, կա՛մ էլ վերջինիս հանձնարարությամբ Արտգործոցնախարարի որևէ պաշտոնյայից: Սակայն, ինչպես վերը տեսանք, Ստալինը, երբեմն նաև Օրջոնիկիձեն՝ չրջանցելով Արտգործոցնախարարի, հաճախ Մոլոտովին ցուցումներ էին տալիս արտաքին քաղաքականության շատ կարևոր հարցերի վերաբերյալ: Այդպես էր գործը և այս անգամ, ինչի մասին վկայություն կա Մոսկվայում դեսպան նշանակված, բայց թուրքական պատվիրա-

կություն հետ մեկտեղ դեռևս Կարսում գտնվող Ալի Ֆուադ փաշային հասցեագրած Մոլոտովի 1921թ. Հունվարի 14-ի նամակում: Անդրադառնալով դրան նախորդած իրենց գրույցների ընթացքում շոշափված հարցերին և հատկապես Թուրքիայի կողմից Հայաստանին տարածքային զիջումներ անելու խնդրին, Մոլոտովին՝ վկայակոչելով Օրջոնիկիձենի և Ստալինին, գրում է. «Ընկեր Օրջոնիկիձեն ինձ հասկացրեց, որ ուս-թուրքական հարաբերությունների նկատմամբ Ոորհրդային կառավարությունն ամբողջովին հետևում է այն տեսակետին, որ ես ձեզ չարադրել եմ: Նա նաև ինձ ասաց, որ առաջիկա մոսկովյան կոնֆերանսի նիստերին ակտիվորեն մասնակցելու է ինքը՝ ընկեր Ստալինը»: Այնուհետև անցնելով խնդրի նկատմամբ Ստալինի մոտեցումներին, Մոլոտովին շարունակում է. «Կուզենայի Հայտարարել, որ ինչպես ես արդեն նախկինում հայտնել եմ Քյազիմ Կարաբեքիր փաշային, ո՛չ հրահանգներում, որ ես ստացել եմ Թուրքիա մեկնելիս, ո՛չ գրույցներում, որոնք ես ունեցել եմ ընկեր Ստալինի հետ, ոչ մի խոսք չի ասվել թուրքական տարածքի ինչ-որ մաս Հայաստանին հանձնելու մասին»: Իսկ վերջում հույս է հայտնում, որ «այս բացատրությունը, որը պաշտոնական է, բայց նաև հույժ գաղտնի, կցրի Ոորհրդային կառավարության իրական մտադրությունների նկատմամբ ձեր բոլոր կասկածները»²:

Ավելորդ չենք համարում նաև ավելացնել, որ կոնֆերանսի աշխատանքներին Ստալինի ակտիվ մասնակցության մասին լուրը խիստ ոգևորել էր թուրքերին: Ահա թե ինչ է գրում այդ մասին Ալի Ֆուադ փաշան. «Ընկեր Մոլոտովին մեզ հասկացրեց, որ Մոսկվայում գոյություն ունի նոր միջնորդող՝ միանգամայն տարբեր նրանից, որի հետ սկզբնապես բախվել է այնտեղ մեր պատվիրակությունը³: Այժմ պարզ դարձավ, որ հիմնախնդիրների լուծումը չի թողնվելու միայն արտաքին գործերի կոմիսարի (Չիչերինի) հայեցողությանը, որ ընկ. Ստալինը՝ ազգությունների գործերի կոմիսարը, խառնվելու է Թուրքիայի հետ բարեկամական կապերին վերաբերող գործերին, քանի որ այսուհետ զգալիորեն ավելի մեծ նշանակություն է տրվում նոր Թուրքիայի հետաքրքրություններին»³ (ընդգծումը մերն է - է. Զ.):

Ստալինի հարցում թուրքերը չէին սխալվել: Կոնֆերանսում նրա

¹ „Геноцид армян...“, стр. 358.

² Ոոսքը Բեքիր Սամիի պատվիրակության մոսկովյան բանակցությունների մասին է (1920թ. Հուլիս-օգոստոս):

³ „Геноцид армян...“, стр. 358.

¹ „Документы внешней политики СССР“, Т. III М. 1959, стр. 469.

չունչը զգացվում էր բոլոր հարցերում: Եվ եթե թուրք դիվանագետները լուրջ հաջողությունների հասան՝ հատկապես Հայաստանին առնչվող հարցերում, ապա դրա համար պարտական են Ստալինին: Նրանք դա գիտակցել են, որի համար էլ նրա հասցեին միշտ գովեստի խոսքեր են չուայել:

Ինչևէ, մենք հակիրճ ներկայացրեցինք Մոսկվայի կոնֆերանսի նախօրեին հայ-թուրքական հարաբերությունների շուրջ ծավալված դիվանագիտական պայքարը: Կարծում ենք՝ այդքանն էլ բավարար է, որ ընթերցողն էլ համոզվի այն ճշմարտության մեջ, որ այդ օրերին Մոսկվայում մթնոլորտն ամբողջովին հակահայկական թույնով էր ներծծված: Հայաստանի օգտին խոսողներ այլևս չկային: Նույնիսկ Ջիչերինն էր արդեն զգուշավորություն դրսևորում և խուսափում հրապարակային հայանպաստ հայտարարություններ անելուց:

* * *

Կոնֆերանսի աշխատանքներին անցնելուց առաջ անհրաժեշտաբար պետք է նաև պարզենք, թե թուրքական շահերի խորհրդային պաշտպանները՝ Ստալինը և նրա արբանյակները, ինչ կարծիք ունեին մեզ հետաքրքրող խնդրում՝ Նախիջևանի հարցում: Դա հատկապես կարևորվում է այն առումով, որ ինչպես հետո կտեսնենք, այս խնդրի վերաբերյալ կոնֆերանսի կայացրած որոշումը բոլորովին չի տեղավորվում այն կարծիքների համատեքստում, որ գոյություն ունեին կոնֆերանսի նախօրեին: Նախ ասենք, որ ձեռքի տակ եղած արխիվային փաստաթղթերի վերլուծությունը ցույց է տալիս, որ Նախիջևանի տարածաշրջանի պատկանելիության հարցում վրաց-ադրբեջանական բլոկը նույնպիսի միասնական մոտեցում չունեն, ինչպես որ կար հայկական մյուս տարածքների հարցում: Ստալինը, Օրջոնիկիձեն և նրանց հարող Կիրովը գտնում էին, որ Շարուր-Նախիջևանը պետք է լինի Հայաստանի կազմում, մինչդեռ Ադրբեջանի ղեկավարությունը՝ բացահայտորեն չընդդիմանալով այդ տեսակետին, ամեն կերպ ձգտում էր կանխել Նախիջևանի անցումը Հայաստանին՝ օգտագործելով գաղտնի դիվանագիտության բոլոր հնարավորությունները ու նաև ինչպես թուրքական, այնպես էլ ռուսական խաղաքարտերը: Դրանում համոզվելու համար բավական է ծանոթանալ մի քանի փաստերի: Բայց նախ Ստալինի, Օրջոնիկիձեի, Կիրովի դիրքորոշման մասին.

1921թ. հունվարի 2-ին ՌԿ(բ)Կ Կենտկոմի բոլոր անդամների հասցեագրած նամակում անդրադառնալով Խորհրդային Հայաստանի թե՛ տնտեսական և թե՛ քաղաքական ծանր վիճակին (թուրքիայի և

Վրաստանի կողմից իրականացվող չրջափակումը, երկաթուղային հաղորդակցության դադարեցումը և այլն), Օրջոնիկիձեն և Կիրովը առաջ են քաշում տեսակետ, որ առանց Վրաստանի խորհրդայնացման հնարավոր չի լինի ապահովել Հայաստանի անվտանգությունը և Խորհրդային կարգերի ամրապնդումը ու նաև ավելացնում, թե «ստեղծված պայմաններում թուրքերը հեշտությամբ կարող են իրենց բուֆերը ստեղծել Մակու-Նախիջևանյան շրջանում, որտեղ նրանք մտադիր են հատուկ խանություն ստեղծել, որի ձեռքին կլինի դեպի Թավրիզ երկաթուղագիծը, ինչը կտրում է մեզ Պարսկաստանից և անդամահատում Հայաստանը»¹ (ընդգծումը մերն է – է. Զ.):

Ինչպես տեսնում ենք, Մակուի և Նախիջևանի շրջանները գրավելու և այնտեղ առանձին խանություն ստեղծելու թուրք-քեմալականների մտադրության մասին Շահթախթինսկու ղեկավարների 7-ի հայտնի հեռագրում տեղ գտած հաղորդումը անհետևանք չէր անցել: Բայց նաև փաստ է, որ «Հայաստանի անդամահատման» վտանգը չէ, որ անհանգստացրել էր Օրջոնիկիձեին ու Կիրովին, ո՛չ: Նրանք, հավանաբար, այդպես էլ չէին անդրադառնա շուրջ մեկ ամսվա վաղեմություն ունեցող այդ տեղեկատվությանը, եթե Վրաստանի խորհրդայնացման հարցը մեջտեղ չգար: Ամեն դեպքում մեզ հետաքրքրողը Նախիջևանի պատկանելիության հարցում նրանց դիրքորոշումն է, իսկ նամակը վկայում է, որ նրանք Նախիջևանը Հայաստանի մաս էին համարում:

Նախիջևանի հարցին Օրջոնիկիձեն անդրադարձել է նաև հունվարի 25-ին ադրբեջանական կոմունիստների Բաքվի քաղաքային կոնֆերանսին տված ղեկուցման մեջ: Ուշագրավ է, որ Օրջոնիկիձեն իր ղեկուցման զգալի մասը նվիրել էր Հայաստանում ստեղծված սոցիալ-տնտեսական ու քաղաքական ծանր վիճակին և նրան ամեն կերպ օգնելու անհրաժեշտությանը: Իսկ Ադրբեջանի և Հայաստանի փոխհարաբերությունները որակել էր որպես եղբայրական ու ներկաներին հիշեցրել Նարիմանովի հայտնի ղեկավարացիայի մասին, որով «Ձանգեղուրը և Նախիջևանը դառնում են Խորհրդային Հայաստանի անբաժանելի մաս»: Այդ ակտը համարելով բացառապես Ադրբեջանի ձգտումը «ոչնչացնելու այդքան արյուն առաջացրած այդ անիծյալ հարցը», ավելացնում է, թե «ղժրախտաբար այդ հարցը լուծված չէ նաև այժմ»: Ըստ որում, եթե Ձանգեղուրի հարցում պատճառը համարում է այնտեղ ծագած հակախորհրդային ապստամբությունը և «ինքնավար

¹ Նույն տեղում, էջ 343:

կառավարություն կազմավորումը», ապա Նախիջևանի Հարցում՝ թուրքական գործոնը: «Այստեղ (Նախիջևանում - է. Զ.) որոշ հակասություն, որոշ ընդհարում կա թուրքերի հետ. իհարկե, ոչ զինված, - ասել է Օրջոնիկիձեն: - Թուրքերը ուզում են Նախիջևանի չրջանը իրենց ձեռքերում ունենալ: Նախիջևանի չրջանը դա այն հանգույցն է, որտեղից դարպասները գնում են Պարսկաստան, որտեղից մենք կարող ենք կապ ունենալ Պարսկաստանի և Միջագետքի հետ: Նախիջևանից երկաթուղին գնում է դեպի Թավրիզ՝ պարսկական Ադրբեջան, Պարսկաստանի ամենահեղափոխական նահանգը»¹: Այսպես կարևորելով Նախիջևանի աշխարհագրական դիրքը և կրկին շեշտելով, որ թուրքերի մոտ Արևելքի «այդ բանալին իրենց ձեռքերում ունենալու» ցանկություն կա, Օրջոնիկիձեն հանկարծ հայտարարում է. «**Խորհրդային Ադրբեջանն այդ հարցում անպայման շահագրգռված կողմ է և ոչ մի դեպքում չի կարող Արևելքի այդ բանալին հանձնել:** Ինչ էլ որ լինի, այդ բանալին պետք է լինի խորհրդային ձեռքերում...»² (ընդգծումը մերն է - է. Զ.):

Ահա այսպես, ղեկուցման սկզբում դրվատանքի խոսք ասելով վիճելի տարածքները Հայաստանին հանձնելու վերաբերյալ Նարիմանովի հռչակագրի մասին, այն համարելով նախադեպը չունեցող «պատմական ակտ», վերջում, չգիտես ինչու, Օրջոնիկիձեն սկսում է խոսել Նախիջևանի Հարցում ոչ թե Հայաստանի, այլ Ադրբեջանի շահագրգռվածություն մասին, ու հայտարարում, թե նա չի կարող Նախիջևանը հանձնել թուրքերին³: Ճիշտ է, նա իսկույն ևեթ ավելացնում է, թե ինչ էլ որ լինի, Նախիջևանը պետք է լինի խորհրդային ձեռքերում, բայց դրանից խնդրի էությունը չի փոխվում, իր այդ հայտարարությունում Օրջոնիկիձեն, ըստ էության, հարցականի տակ է դնում Նախիջևանի պատկանելիությունը Հայաստանին և հետո՝ Ադրբեջանի ղեկավարությունը Նախիջևանը ետ ստանալու հույսեր ներչնչում: Առավել ևս, որ հարցի լուծումը տեսնում է ոչ թե Անկարայի ազդեցիկ նկրտումներին հակահարված տալու, այլ դիվանագիտության միջոցով: «Մենք կարծում ենք, որ մեզ մոտ այդ հարցում ևս թուրքերի հետ ոչ մի սուր բախումներ տեղի չեն ունենա, - ավելացրել է Օրջոնիկիձեն, - ինչ-որ դիվանագիտական ճանապարհով այդ հարցը կարող է լուծ-

¹ ՀԱԱ, ֆ. 4033, ց. 1, գ. 1670, փ. II, թ. 2:

² Նույն տեղում, թ. 3:

³ Հակասական մտքերի առկայությունը և փաստաթղթի ոճը հիմք է տալիս ենթադրելու, որ Օրջոնիկիձեն խոսել է բանավոր:

վել»¹: Իսկ որ Անկարան Հայաստանի Հարցում ոչ մի զիջման չէր գնա, դա հասկանում էին ոչ միայն Օրջոնիկիձեն և Նարիմանովը, այլև բոլոր նրանք, ովքեր առիթ էին ունեցել առնչվելու թուրք-հայկական հարաբերություններին: Այլ կերպ ասած, իր այս հայտարարություններով Օրջոնիկիձեն, կամա թե ակամա, Բաքվի ղեկավարությունը ակնարկում էր Նախիջևանը վերադարձնելու հնարավորության մասին:

Դատելով Մոսկվայում Խորհրդային Հայաստանի լիազոր ներկայացուցիչ Սահակ Տեր-Գաբրիելյանի մի վկայությունից՝ նախակոնֆերանսյան այդ չրջանում Նախիջևանի Հարցում որոշակիորեն Հայաստանի օգտին էր խոսում նաև Ստալինը: ՀԿԿ Կենտկոմ ուղարկած 1921թ. հունվարի 15-ի նամակում անդրադառնալով Ստալինի հետ իր հանդիպմանը, նա գրում է. «Չունենալով Ձեզնից տեղեկություն, ես առիթ չեմ ունեցել դիմելու Ձիչերինին և Ստալինին: Բայց ահա օրերս ընկ. Աթաբեկովից² ստացա քաղվածքներ Նախիջևան - Օրդուբադ - Նորաչենի վերաբերյալ կոմբրիգ (բրիգադի հրամանատար - է. Զ.) Ստուդենևի ղեկուցագրից: Այդ հեռագրի պատճենները ուղարկեցի ընկերներ Լենինին, Տրոցկուն, Ձիչերինին, իսկ Ստալինին ես ինքս տարա և նրա հետ շատ երկար զրուցեցի: Ընկ. Ստալինը, ինչպես երևում է նաև մյուս ընկերները, նշանակալիորեն փոխել են իրենց վերաբերմունքը թուրքական շարժման նկատմամբ՝ ի հետևանս այն բավականին հանդուգն տոնի, որով նրանք սկսել են խոսել Ռուսաստանի հետ և այն փաստերի, որ վերջին ժամանակներս հաղորդված է Վրաստանում ՌևՖՍՀ մամուլի բյուրոյի կողմից: **Ստալինը վճռականորեն հայտարարեց, որ Նախիջևանի մասին խոսք լինել չի կարող: Նախիջևանը կլինի Խորհրդային Հայաստանում:** Ինչ վերաբերում է Կարսին, ապա թեև այդ հարցում վճռական որոշում կա պաշտպանել Հայաստանի համար, այնուամենայնիվ անհրաժեշտ է ամենաչտապ կերպով այնտեղից նյութեր ուղարկել ինչպես ամբողջ մարզի, այնպես էլ առանձին օկրուգների՝ Կարսի, Կաղզվանի, Օլթիի, Արղահանի ազգազրական վիճակի մասին»³ (ընդգծումը մերն է - է. Զ.):

Թե որքան «վճռական» էր Ստալինը Նախիջևանի և Կարսի մասին իր խոստումներում, կտեսնենք Մոսկվայի կոնֆերանսի աշխատանքներին ծանոթանալիս: Իսկ որ Ս. Տեր-Գաբրիելյանը անվերապահորեն հավատացել էր Ստալինին, երևում է նամակի այն տողերից, որոնցում

¹ ՀԱԱ, ֆ. 4033, ց. 1, գ. 1670, փ. 11, թ. 3:

² ՀնՍՀ լիազոր ներկայացուցիչն էր Ադրբեջանում:

³ ՀԱԱ, ֆ. 114, ց. 2, գ. 31, թ. 70-71:

նա խոսում է շուտափույթ ճշգրիտ ու հավաստի տեղեկություններ ուղարկելու մասին ոչ միայն օկուպացված շրջաններում թուրքերի գործողությունների, այլև Թուրքիայի ներքին դրության վերաբերյալ:

Անցնելով նախակոնֆերանսյան այդ նույն ժամանակաշրջանում Նախիջևանի երկրամասը Հայաստանին հանձնելու վերաբերյալ կոնֆերանսի հնարավոր որոշումը կանխելու ուղղությամբ Ադրբեջանի ղեկավարությունը ձեռնարկած քայլերին, դարձյալ հարկադրված ենք արձանագրել, որ Բաքվի արխիվների անմատչելիությունը մեզ հնարավորություն չի տալիս ամբողջությամբ բացահայտելու այն ամենը, ինչ հակահայկական մոլուցքով բռնված Նարիմանովի խումբը ծրագրել և իրականացրել է այդ օրերին: Բայցևայնպես, երկու փաստաթղթեր, որ Մոսկվայի արխիվներում հայտնաբերել ու հրատարակել է պրոֆ. Յու. Բարսեղովը, ինչ-որ չափով լրացնում են այդ բացը: Երկուսի հեղինակն էլ Բ. Շահթախթինսկին է, Ստալինի վստահությանն արժանացած այն նույն անձը, որը հակահայկականության մեջ աչքի էր ընկել դեռ մինչև Հայաստանի խորհրդայնացումը, լծվել ամեն գնով Նախիջևանը Հայաստանից անջատելու գործին և գնացել այնքան հեռուն, որ գերադասել էր այդ երկրամասը տեսնել Թուրքիայի կազմում, քան խորհրդայնացած ու «եղբայրական» հռչակված Հայաստանի (Հիչենք, թեկուզ, նրա թուրքամետ քարոզչությունն ու գործունեությունը Նախիջևանում 1920թ. դեկտեմբերին): Սակայն փոփոխված իրադրության պայմաններում (Մոսկվան չէր ճանաչել Ալեքսանդրապոլի պայմանագիրը, Անտանտի հետ քեմալական վերնախավի անթաքույց սիրախաղը առաջ էր բերել բոլշևիկյան ղեկավարության դժգոհությունը) Շահթախթինսկին չէր կարող այլևս խոսել հօգուտ թուրքերի, առավել ևս, որ համոզվել էր, որ Նախիջևանը չի զիջվելու նրանց: Եվ քանի որ այդ երկրամասը Ադրբեջանին միացնելու առաջարկությամբ նմանապես հանդես գալ չէր կարող՝ Ադրհեղկոմի հայտնի ղեկավարացիայի պատճառով, ուստի նա¹ որոշում է Նախիջևանը Հայաստանին չթողնելու գերխնդիրը լուծել երկրամասի հովանավորությունը Ռուսաստանին առաջարկելու միջոցով: Ադրբեջանի համար դա հարմար տարբերակ էր՝ հետագայում այն ետ ստանալու առումով: Արդյունքում ծնունդ են առնում վերը հիշատակած երկու փաստաթղթերը՝ մեկը ղեկուցագիր ուղարկված ՌՆՖՍՀ կառավարությանը, իսկ մյուսը՝ նամակ հասցեագրած Օրջոնիկիձեին:

¹ Անտարակույս է, որ Շահթախթինսկին գործել է Ադրբեջանի ղեկավարության ցուցումով, բայց մենք նրա անունն ենք նշում, քանի որ փաստաթղթերը կրում են նրա անունը:

Փաստաթղթերը թվագրված չեն, ինչը չափազանց տարօրինակ է, և միայն բովանդակությունից կարելի է դատել նրանց լույս աշխարհ գալու ժամանակի մասին: Ըստ Յու. Բարսեղովի՝ ղեկուցագիրը¹ գրվել է փետրվարին, իսկ նամակը՝ ոչ ուշ քան մարտին:

Ձեկուցագիրը իսկապես որ կարող է փետրվարին գրված լինել: Ինչ վերաբերում է նամակին, ապա այն մարտին գրված լինել չէր կարող մի շարք պատճառներով: Դրանցից առաջինն այն է, որ մարտին Հայաստանում խորհրդային իշխանություն չկար, այն տապալվել էր փետրվարյան ապստամբության հետևանքով մինչդեռ նամակում խոսվում է Հայաստանին օգնելու մասին: Եվ հետո, նամակում մի քանի անգամ շեշտվում է մինչև կոնֆերանսը ձեռնարկվելիք քայլերի մասին: Վերջապես նամակում հանդիպում ենք այսպիսի արտահայտությունների. «Կարաբեքիրն ինձ ամենաանկեղծ ձևով հայտարարեց...», «Կարաբեքիրի վրա չմեցնող տպավորություն թողեց Ձանգեզուրը և Նախիջևանի շրջանը Հայաստանին զիջելու մասին Ադրհեղկոմի ակտը...» և այլն: Այս արտահայտություններն ամենախոսուն վկայություններն են այն բանի, որ նամակը, ամենայն հավանականությամբ, գրվել է այն ժամանակ, երբ Շահթախթինսկին դեռևս գտնվում էր թուրքերի մոտ (Ալեքսանդրապոլ, Կարս) կամ էլ Նախիջևանում, այսինքն՝ ղեկտեմբերին: Իսկ մարտին Շահթախթինսկին վաղուց Մոսկվայում էր (Մոսկվա էր հասել փետրվարի 19-ին թուրքական պատվիրակության հետ միասին):

Ինչևէ, վերադառնալով այդ երկու փաստաթղթերի բովանդակությանը, պետք է արձանագրենք, որ նրանցում երկու հիմնական խնդիր է շոշափված.

1. Թուրքիայի հետ դաշնակցային պայմանագրի կնքում,
2. Նախիջևանի երկրամասի վերածում ինքնավար միավորի և հանձնում Ռուսաստանի հովանավորությունը:

Առաջինը, որ աչքի է զարնում նամակների հետ ծանոթությունից, դա այն է, որ ի տարբերություն Ստալինի, Օրջոնիկիձեի, Նարիմանովի և մյուսների, ովքեր ուղղակի պահանջում էին մի կողմ դնել Հայկական հարցը և Անկարայի հետ բարեկամության և համագործակցության մասին պայմանագիր կնքել, Շահթախթինսկին այդ նույն բանը՝ ինչպես վերը նշված փաստաթղթերն են ցույց տալիս, փորձում է անել

¹ 4-5 էջանոց այդ փաստաթուղթը ավելի շատ նամակի է նման, քան ղեկուցագրի: Յու. Բարսեղովը այն ղեկուցագիր է համարել՝ հենվելով նույն արխիվում պահվող Մ. Օրախելաչվիլու կարծիքի վրա:

բավականին խորամանկ ձևով: Նա հորինում և բոլշևիկյան ղեկավարությանն է հրամցնում տեսակետ, թե կոմնորոշման հարցում հակասություն կա Արևելյան Անատոլիայի՝ ի դեմս Կարաբեքիրի, և Անկարայի ղեկավարության միջև, որ իբրև Կարաբեքիրը համոզված ուսամետ է, բոլշևիկյան հայացքների տեր, Ռուսաստանի հետ ուղղակի զուգահեռական դաշինքի կոմնակից և, որ եթե Անկարան փորձի համաձայնության գալ Արևմուտքի հետ, ապա Կարաբեքիրն Արևելյան Անատոլիան դուրս կբերի Անկարայի ենթակայությունից, վեր կածի առանձին միավորի ու կշարունակի պայքարն Անտանտի դեմ: Նա նաև ավելացնում է, որ Անկարայում գիտեն Կարաբեքիրի այդ տրամադրությունների մասին և այդ պատճառով էլ Անտանտի հետ համաձայնության չեն գնա: «Անգորայի կառավարությունը հրաշալի գիտի Անատոլիայի ազգաբնակչության տրամադրությունը և նրա վրա Կարաբեքիրի ազդեցությունը, դրա համար էլ առանց վերջինիս համաձայնության նա ոչինչ չի ձեռնարկի, - ասված է նամակում: -...Կարաբեքիրը ամենաանկեղծ ձևով ինձ հայտարարեց, որ մեծագույն դժբախտություն կլինի Թուրքիայի համար, և անպայման, անշահավետ Ռուսաստանի համար, եթե նրանք միմյանց չհասկանան...»¹ (ընդգծումը մերն է - է. Զ.):

Նման նախաբանին պետք է հետևեր առաջարկությունը և նամակի հեղինակը շարունակում է.

«...իմ ծայր հասկացողությամբ մենք պետք է ձեռնարկենք հետևյալը.

1. Շտապ բավարարել Կարաբեքիրի պաշտոնական խնդրանքը՝ նրան 30000 փութ մագուլթ, 10000 փութ կերոսին և 5000 փութ բենզին բաց թողնելու մասին:

2. Կարաբեքիրին նվեր ուղարկել մեկ բարձրակարգ վագոն:

3. Անհրաժեշտ է մինչև կոնֆերանսը Նախիջևանի երկրամասը վերածել Ռուսաստանի հովանավորության տակ ինքնավար միավորի և նրա միջոցով առևտուր սկսել պարսկական հարուստ նահանգների հետ, պարսկական հացահատիկով, մրգերով և առաջին անհրաժեշտության այլ ապրանքներով կերակրելու համար Հայաստանը և այնտեղ գտնվող մեր գործասերը՝ այդպիսով ազատելով կենտրոնը Հայաստանի հանդեպ պարենային բոլոր հոգսերից: Ռազմավարական նկատառումով այդ կարևորագույն անկյունը չի կարելի տալ Թուրքերի հովանավորությանը: Պետք է ենթադրել, որ Ռուսաստանի հովանավոր-

ությունն տակ այդ երկրամասի ինքնուրույնությունը կբավարարի և Թուրքերին: Հնարավոր է, որ մոտիկ ապագայում հանգամանքները հարկադրեն մեզ ինքնավար Նախիջևանի երկրամասի անունից քայլ կատարել Պարսկական Աղբբեջանի ուղղությամբ, բայց դա երբեք չի կարելի անել Հայաստանի կողմից կամ նրա անունից»²:

Ինչպես տեսնում ենք, նամակի այս մասում Շահթախթինսկին Նախիջևանը Ռուսաստանի հովանավորությանը հանձնելու նպատակահարմարությունը փորձում է հիմնավորել երկու հանգամանքով՝ առևտուր Պարսկաստանի հետ և դեպի պարսկական Աղբբեջան Կարմիր բանակի առաջնաղացման հնարավորություն: Բայց, հավանաբար, վստահ չլինելով առաջ քաշված հիմնավորումների լրջությունը (ոչինչ չի ասված, թե ինչու դա չի կարելի անել Հայաստանի ենթակայության տակ գտնվող Նախիջևանից), նամակի վերջում նա դիմում է կեղծիքի ու բացահայտ շանտաժի: «Թուրքերի քարոզչության հետևանքով, - գրում է Շահթախթինսկին, - Հայաստանը Մակուի խանությունից հաց չի ստանում, բայց պատկերը միանգամայն կփոխվի և Հայաստանը կստանա հաց և այլն, Նախիջևանի երկրամասի ինքնուրույնության դեպքում: Այնուհետև պետք է նկատի ունենալ, որ Նախիջևանի երկրամասը Հայաստանին միացնելուց Թուրքերն անհապաղ կպատասխանեն Մակուի խանության զավթումով, ինչը մեզ համար չահավետ չէ բոլոր տեսակետներից»² (ընդգծումը մերն է - է. Զ.):

Այսպիսին է Օրջոնիկիձեին ուղարկած նամակի բովանդակությունը, այսպես է Շահթախթինսկին կեղծ ու պատիր միջոցներով փորձում համոզել Օրջոնիկիձեին, թե անհրաժեշտ է վերանայել Նախիջևանը Հայաստանին հանձնելու մասին Աղբբեջանի դեկլարացիան և այդ երկրամասը վերածել ինքնավար միավորի: Թե ինչպես պետք է Թուրքերը «անհապաղ զավթեն» Պարսկաստանի մաս կազմող Մակուի խանությունը, դա հանելուկ է, որի լուծումը միայն Շահթախթինսկուն էր հայտնի: Իսկ որ նա կեղծում է իրականությունը՝ գրելով, թե Մակուի խանությունը Թուրքերի ազդեցության տակ հրաժարվել է Հայաստանի հետ առևտրական կապերի մեջ մտնելուց, դա ակնհայտ է և այդ մասին է վկայում այն փաստը, որ դեռ հունվարին «Գրարմակ» ընկերությունը, որի վարչության անդամներից էր Սան Մակինսկին, Սորհրդային Հայաստանին առաջարկել էր իր ծառայությունը Մակուի

¹ „Геноцид армян...“, стр. 405.

¹ Նույն տեղում, էջ 405-406:

² Նույն տեղում:

խանութիւնում առևտրական գործարքներ կատարելու, իսկ փետրվարի 2-ին Հայհեղկոմը Մակու էր գործուղել իր հատուկ առևտրական ներկայացուցչին: Հայաստանի հետ առևտրական կապերի մեջ մտնելու պարսիկ վաճառականների ցանկութեան մասին Հայհեղկոմին տեղեկացրել էր նաև Երևանում Պարսկաստանի Հյուպատոս Ասադուլլախանը փետրվարի 10-ին¹:

Ռուսաստանի կառավարութեանը, կամ ինչպես Օրախելաշվիլին է ներկայացնում, Լենինին ուղարկած զեկուցագիրը, ավելի քան չորս էջից բաղկացած մի ընդարձակ փաստաթուղթ է, որը, սակայն, բովանդակութեան առումով շատ էլ չի տարբերվում Օրջոնիկիձեին հասցեագրած նամակից: Ուղղակի այստեղ չոչափված են նաև հարցեր, որոնք տեղ չէին գտել նամակում: Դրանցից են Ալեքսանդրապոլի պայմանագիրը և թուրքերի ու դաշնակցականների միջև ինչ-որ կապերի, Ալեքսանդրապոլը չէվակուացնելու թուրքերի մտադրութեան, Իզգեդ փաշայի և Անկարայի միջև տեղի ունեցած բանակցութիւնների և այլ հարցեր, որոնց հասկանալի պատճառներով չենք անդրադառնա: Ինչպես և նամակում, այստեղ ևս Շահթախթինսկին խոսում է Անկարայի կառավարող չրջաններում երկու խմբավորումների (արևմտամետ և ուսսամետ) առկայութեան մասին, Կարաբեքիրին երկինք բարձրացնում, ներկայացնում որպես Արևելյան Անատոլիայի միակ առաջնորդ՝ մարդ, որին ժողովուրդը պաշտում է իբրև հերոս և գործիչ, որն ամենամիլիվածն է Ռուսաստանին: Զեկուցագրում Շահթախթինսկին անդրադառնում է նաև թուրքական պատմիրակութեան կազմին, բնութագրում նրա անդամներին և կանգ առնում Հայկական հարցի վրա՝ հատուկ ընդգծելով, թե «որպեսզի ամուր դաշինք կնքենք թուրքերի հետ, մենք Հայկական հարցը մեր բանակցութիւնների օբյեկտ չպետք է դարձնենք»²:

Անտարակույս Շահթախթինսկին ինքն իրեն հավատարիմ չէր լինի, եթե մոռացութեան տար Նախիջևանի խնդիրը: «Նախիջևանի երկրամասը՝ որպես ստրատեգիական կարևորագույն անկյուն, - ասված է զեկուցագրում, - ոչ մի կերպ չի կարելի հանձնել թուրքերի հովանավորութեանը: Ճիշտ այդպես էլ հիմա չի կարելի թույլ տալ նրա միացումը Հայաստանին, քանի որ, առաջին, դրան կընդդիմանա ինքը՝ այդ երկրամասի բնակչութիւնը և, երկրորդ, դրան չեն համաձայնի

թուրքերը: Դրա համար էլ առայժմ հարկավոր է այդ երկրամասը վերածել Ռուսաստանի հովանավորութեան տակ ինքնակառավարվող մարզի: Նման ձևով հարցի լուծումը թուրքերին կչարժի իրենց բռնած դիրքից և չի կարող չբավարարել Հայաստանին»¹ (ընդգծումը մերն է - է. Զ.):

Ինչպես և նամակում, Շահթախթինսկին բավականին երկար դատողութիւններ է անում Նախիջևանի վրայով պարսկական նահանգների հետ առևտուր ծավալելու, դեպի պարսկական Ազրբեջան (գուցեև թուրքիա) հնարավոր արշավանքի մասին և այլն և այլն, բայց ի տարբերութիւն նամակի, որտեղ ասված էր, թե ի պատասխան Նախիջևանը Հայաստանին միացնելուն թուրքերը իսկույն կգրավեն Մակուն, այստեղ Հայտարարում է, թե «վերջապես հարկավոր է նկատի ունենալ, որ Նախիջևանի չրջանը Հայաստանին միացնելուն պես Մակուի խանութիւնը անհապաղ իրեն կհայտարարի թուրքիայի մաս, իսկ դա ձեռնտու չէ մեզ բոլոր տեսակետներից»² (ընդգծումը մերն է - է. Զ.): Եվ ոչ մի բացատրութիւն, թե ինչու՞ Նախիջևանը Հայաստանին միացնելու դեպքում Մակուն ամհապաղ կմիանա թուրքիային: Նախ, Մակուն անկախ խանութիւն չէր և չէր կարող առանց Պարսկաստանի կենտրոնական կառավարութեան համաձայնութեան նման քայլ կատարել: Եվ հետո, Մակուի խանի համար ի՞նչ նշանակութիւն ունեւր, թե Նախիջևանի երկրամասը ում հովանավորութեան տակ կգտնվի՝ Հայաստանի, թե՞ Ռուսաստանի: Չէ՞ որ Մակուի խանը ոչ մի նման բան չարեց ո՛չ 1919 թվականին, երբ Նախիջևանը միացվել էր Հայաստանին, ո՛չ էլ 1920թ. ամռանը, երբ Հայկական զորքերը գրավեցին Շարուրը և Նախիջևանի գավառի մի մասը: Ուրեմն Մակուի խանութեան հետ կապված Շահթախթինսկու առաջ քաշած վարկածը էժանագին շանտաժ էր, ուրիշ ոչինչ: Մնում է ավելացնել, որ Շահթախթինսկին դրանով չէր բավարարվել և զեկուցագրի վերջում մի նոր սպառնալիք էր առաջ քաշել: «Եթե Մոսկվայում համաձայնութիւն չկայանա, - գրում է Շահթախթինսկին, - ապա Ալի Ֆուադ փաշան կմնա Մոսկվայում որպես Անգորայի կառավարութեան դեսպան, իսկ ինքը՝ պատմիրակութիւնը, անհապաղ հետ կգնա: Այդ դեպքում Անատոլիական Ազգային ժողովը իսկույն կդիմի մուսուլմանական Արևելքին հայտարարութեամբ այն մասին, որ հեղափոխական թուրքիան Ռուսաստանի

¹ Տե՛ս է. Ա. Զոհրաբյան, Սովետական Ռուսաստանը և Հայ-իրանական հարաբերութիւնները, Եր. 1985, էջ 100-104:

² „Геноцид армян...“, стр. 390.

¹ Նույն տեղում:

² Նույն տեղում:

Հետ ոչ մի դաշինքի մեջ չէ և իր պայքարը մղում է ու կմղի առանց խորհրդային Ռուսաստանի որևէ օգնության և աջակցության»¹ (ընդգծումը մերն է – է. Զ.):

Ահա այն հեռանկարը, որով սպառնում է Շահթախթինսկին. թուրքիան մուսուլմանական Արևելքը կտրամադրի Ռուսաստանի դեմ: Գործող սպառնալիք էր սա, թե՞ ոչ: Անպայման գործող էր, եթե նկատի առնենք այն իրողությունը, որ բոլշևիկյան ղեկավարությունը և անձամբ Լենինը, այդ նույն մուսուլմանական Արևելքը հռչակել էին իրենց բնական դաշնակիցը արևմտյան իմպերիալիզմի դեմ ծավալած պայքարում: Ուրեմն ինչո՞ւ պիտի փոքրիկ ու բոլորի կողմից լքված Հայ ժողովրդի շահերը վեր դասվեն համաշխարհային հեղափոխության և հակաիմպերիալիստական պայքարի շահերից: Չէ, պետք է ընդունել, որ Շահթախթինսկին ոչ միայն հմուտ ինտրիգան էր, այլև դիվանագետ: Նա նպատակին հասնելու ճիշտ միջոց էր ընտրել: Իսկ գուցե Շահթախթինսկին արդեն տեղյա՞կ էր Ս. Տեր-Գաբրիելյանի և Ա. Մոսկյանի հետ ղեկտեմբերյան հանդիպման ժամանակ Լենինի արած այն հայտարարությունը, թե դժվարությունը կայանում է նրանում, որ համաշխարհային հեղափոխության ճակատներից մեկն անցնում է Հայաստանի վրայով²:

Ինչևէ, Մոսկվայի կոնֆերանսին հաշվված օրեր էին մնում, իսկ մթնոլորտն ամբողջովին հակահայկական թույնով էր ներծծված: Հայաստանի օգտին խոսողներ այլևս չկային: Ավելին, ծանոթությունը կոնֆերանսի նյութերին ցույց է տալիս, որ ի վերջո Չիչերինն էլ լծվեց ամեն գնով թուրքերի հետ պայմանագիր կնքելու գործին՝ պատրաստ ընդառաջելու նրանց բոլոր հարցերում՝ բացի թուրքերի պահանջած ռազմաքաղաքական դաշինքից: Այս հարցում նա մաքսիմում համառություն ցուցաբերեց: Փետրվարի 22-ին՝ թուրք պատվիրակների հետ հանդիպումից հետո, որի ժամանակ նրանք Չիչերինին էին ներկայացրել Լենինից ու Ստալինից ստացած ծածկագրի Հիման վրա թուրքիայի հետ քաղաքական և ռազմական դաշինք կնքելու վերաբերյալ Մդիվանու պաշտոնական նամակը Կարաբեքիրին և վերջինիս պատասխանը Մդիվանուն, Չիչերինը զարմանքով գրում է Լենինին. «Այդ ամբողջ պատմությունն ինձ համար միանգամայն անսպասելի էր: Ես ոչինչ չգիտեի այն մասին, որ Դուք և ընկ. Ստալինը ծածկագիր եք ուղարկել ընկ. Մդիվանուն: Այդ ծածկագրի ճշգրիտ բովանդակությունը մինչև

Հիմա ինձ անհայտ է, բայց նրա Հիման վրա մեր կառավարության անունից ընկ. Մդիվանին, ինչպես դա կտեսնեք այդ գրազրույթունից, թուրքերին քաղաքական և ռազմական դաշինքի պաշտոնական առաջարկություն է արել»¹ (ընդգծումը մերն է – է. Զ.):

Չիչերինը հարկադրված էր բացատրել Լենինին, որ նման դաշինք կնքել, նշանակում է չսահմանափակվել ղեկի ու ղինամթերքի մատակարարումով, այլ անմիջականորեն մասնակցել թուրքիայի կողմից մղվելիք պատերազմներին: «Դաշինք, – գրում է Չիչերինը, – նշանակում է, որ թուրքերի վրա Անգլիայի հարձակման ղեկավարում մենք հարկադրված կլինենք պատերազմ հայտարարել Անգլիային և մեր տրամադրության տակ եղած բոլոր միջոցներով մասնակցել Անգլիայի դեմ պատերազմին»: Չիչերինը նաև Լենինի ուշադրությունն է հրավիրում առևտրական համաձայնագրի կնքման նպատակով Լոնդոնում վարվող բանակցությունների վրա ու շեշտում, որ թուրքերի հետ դաշինքը «անհամատեղելի է Անգլիայի հետ ենթադրվող համաձայնագրի հետ»²:

Առաջ անցնելով ասենք, որ Չիչերինի փաստարկները համոզիչ էին և դաշինքի գաղափարը մերժվեց: Սակայն խնդիրը միայն դա չէ, այլ նաև այն, որ այս ղեկավարում ևս գործ ունենք Լենինի և Ստալինի կողմից դիվանագիտական տարրական նորմի խախտման՝ Արտգործո՞ղկոմատը չըջանցելու փաստի հետ:

* * *

Փետրվարի սկզբին Բաբու ժամանած թուրքական պատվիրակությունը մի քանի օր այնտեղ մնալուց և Ադրբեջանի ղեկավարության հետ առաջիկա կոնֆերանսում քննարկվելիք հարցերի շուրջ մտքեր փոխանակելուց³ և, ամենայն հավանականությամբ որոշ խնդիրների վերաբերյալ պայմանավորվածություններ ձեռք բերելուց հետո, փետրվարի 6-ին Շահթախթինսկու ուղեկցությամբ դուրս եկավ Բաքվից և Մոսկվա հասավ փետրվարի 18-ին: Պատվիրակությունը, որի նախագահը Յուսուֆ Քեմալ-բեյն էր (Մուստաֆա Քեմալի եղբայրը), բավականին բազմանդամ էր (ընդհանուր թվով 45 հոգի): Պատվիրակության կազմում էին Մոսկվայում ղեկավար նշանակված Ալի Ֆուադ փաշան (Ջեբեսոյ), Ռգա Նուր-բեյը, խորհրդականներ, թարգմանիչներ և այլն:

¹ „Геноцид армян...“, стр. 391.

² Նույն տեղում, էջ 392:

³ Այդ մասին վկայություն կա Լենինին ուղարկած Նարիմանովի փետրվարի 16-ի նամակում:

¹ Նույն տեղում, էջ 391:

² Տե՛ս ՀԱԱ, ֆ. 4010, գ. 258, փ. 4, ց.1, թ.1:

Ստանալով կոնֆերանսի աշխատանքներին մասնակցելու մասին Ձիչերինի հրավերը, Հայհեղկոմը դեռևս դեկտեմբերի 26-ի նիստում որոշել էր արտգործոց Այ. Բեկզադյանի գլխավորությամբ պատվիրակություն ուղարկել Մոսկվա¹, ինչպես նաև մանրամասն հրահանգներ էր մշակել կոնֆերանսին ներկայացվելիք խնդիրների մասին: Իսկ հունվարի 12-ին Թիֆլիսում Հայաստանի դիվանագիտական ներկայացուցիչ Դանուշ Շահվերդյանին հանձնարարել էր վրացական կառավարությունից թույլտվություն ստանալ «ռուս-հայ-թուրք-ադրբեջանական կոնֆերանսին մասնակցելու նպատակով Մոսկվա ուղևորվող պատվիրակության համար»²: Պատվիրակության կազմում էին քարտուղար Վահագ Մուրադյանը, աշխատակիցներ Գարրիել Տեր-Օհանովը, Պետրոս Բեկզադյանը, Արամ Տեր-Մկրտչյանը, Ելիզավետա Մուսայեյանը և պատվիրակությունը սպասարկող վեց այլ անձինք³: Մոսկվայում պատվիրակությանը պետք է միանար Սահակ Տեր-Գաբրիելյանը:

Պատվիրակության համար կազմվել էր հուշագիր, որին դեռ կանդրադառնանք, իսկ հիմա նշենք, որ հայ պատվիրակներին վիճակված չէր մասնակցելու կոնֆերանսի աշխատանքներին: Բանն այն է, որ դրժելով «Հայ կոմունիստների մինիմալ մասնակցություն» հայ-թուրքական հարաբերությունների հարցը Մոսկվայի կոնֆերանսում լուծելու մասին իր կառավարության նախնական համաձայնությունը, Յուսուֆ Քեմալ-բեյը Ձիչերինի հետ առաջին իսկ հանդիպման ժամանակ Հայտարարեց, թե կառավարությունից միացյալ կոնֆերանսի մասնակցելու լիազորություն չի ստացել: Որ հենց այդ պատճառաբանությամբ է մերժվել խորհրդաթուրքական միացյալ կոնֆերանսի գաղափարը, այդ մասին մանրամասն բացատրված է դեռևս 1979թ. լույս տեսած հայ-թուրքական հարաբերություններին նվիրված մեր գրքում⁴: Մինչդեռ դրանից հետո էլ մեր պատմաբանները, չգիտես ինչու, առանց հարցի էություն մեջ խորանալու, առանց կոնֆերանսի արձանագրություններն ուսումնասիրելու, և հաշվի առնելու այն փաստը, որ մերժվել է ոչ միայն Հայերի, այլև ադրբեջանցիների մասնակցությունը, նախկինի պես շարունակում են գրել, թե կոնֆերանսին Հայ պատվիրակների

մասնակցությունը թուրքերը մերժել են՝ վկայակոչելով Հայաստանում ծավալված փետրվարյան իրադարձությունները: Օրինակ, Գ. Գալոյանը անդրադառնալով այդ հարցին, գրում է, թե «քեմալական պատվիրակությունը դեմ էր խորհրդային Հայաստանի պատվիրակների մասնակցությանը խորհրդաժողովին «հիմք» ընդունելով «Հայրենիքի փրկություն կոմիտեի» հայտարարությունը, որ Հայաստանում խորհրդային իշխանությունը տապալված է»¹: Ըստ որում, դա անում է առանց որևէ փաստարկի: Իսկ ահա Ե. Սարգսյանը իր «Դավադիր գործարք. Հայաստան, Ռուսաստան, Թուրքիա» գրքում² ոչ միայն փորձում է ընթերցողին համոզել, որ Մոսկվայի կոնֆերանսին Բեկզադյանի պատվիրակության մասնակցությունը մերժելու պատճառը Հայաստանում Ս. Վրացյանի գլխավորած հակախորհրդային ապստամբությունն էր, այլև սխալ է մեկնաբանում այդ ամբողջ գործընթացը: Նա գրում է. «Բորիս Լեգրանի և Ալեքսանդր Բեկզադյանի պահանջով պետք է կոչվեր հայ-թուրքական կոնֆերանս, քանի որ պետք է քննարկվեին թուրք զավթիչների կողմից օկուպացված խորհրդային Հայաստանի տարածքների և հայ-թուրքական սահմանների հարցերը: Կոնֆերանսին պետք է մասնակցեին խորհրդային Ռուսաստանը և խորհրդային Ադրբեջանը: Սակայն 1918թ. փետրվարի 18-ին Երևանում տեղի ունեցավ պետական հեղաշրջում, իշխանություն գլուխ անցան դաշնակները Սիմոն Վրացյանի գլխավորությամբ: Թուրքական պատվիրակությունը օգտվելով դրանից վճռականապես հրաժարվեց Հայաստանի հետ համատեղ կոնֆերանսից: Որպեսզի կոնֆերանսը չձախողվի, խորհրդային Ռուսաստանի կառավարությունը ստիպված էր համաձայնվել, որ կոնֆերանսը ընթանա Ռուսաստանի և Թուրքիայի միջև, բայց անպայման խորհրդային Հայաստանի և խորհրդային Ադրբեջանի պատվիրակությունների մասնակցությամբ: Թուրքական պատվիրակությունը համառորեն դեմ էր Հայաստանի պատվիրակության մասնակցությանը կոնֆերանսին»³:

Ինչպես տեսնում ենք, այս փոքրիկ պարբերության մեջ բացի վերը նշածից, մի ուրիշ սխալ էլ կա: Դա այն է, որ առանց հիմքի, առանց որևէ փաստի հեղինակը գրում է, թե Լեգրանի և Բեկզադյանի պա-

¹ ՀԱԱ, ֆ.4/114, ց.2, գ.17, թ.19:

² Նույն տեղում, գ. 36, թ. 31:

³ Տե՛ս նույն տեղում:

⁴ Տ՛ես է. Ա. Զոհրաբյան, Սովետական Ռուսաստանը և հայ-թուրքական հարաբերությունները, էջ 210-212:

¹ Գ. Գալոյան, Հայաստանը և մեծ տերությունները 1917-1923թթ., Եր. 1999, էջ 440:

² Տարօրինակ է, որ հեղինակը դավադիր գործարքին մասնակիցների շարքում նշում է նաև Հայաստանը:

³ Ե. Սարգսյան, Դավադիր գործարք. Հայաստան, Ռուսաստան, Թուրքիա, Եր. 1995, էջ 185:

Հանձնով Մոսկվայի կոնֆերանսը պետք է լիներ հայ-թուրքական: Նման բան ասել՝ նշանակում է տեղյակ չլինել կոնֆերանսի գումարման նախապատմությանը:

Ինչևէ, ավելորդ համարելով այդ սխալները հերքելու համար մանրամասնությունների մեջ մտնելու անհրաժեշտությունը, ինչպես նաև չցանկանալով այստեղ կրկնել վաղուց ապացուցվածը, միայն ավելացնենք, որ իրողությունն այն է, որ թուրքական դիվանագիտությունը դեռ միջև կոնֆերանսը Անդրկովկասյան հանրապետությունների հետ հարաբերությունների հարցում որդեգրել էր սեպարատ (առանձին) պայմանագրեր կնքելու քաղաքականություն: Ավելի ուշ դա խոստովանել է նաև ինքը՝ պատվիրակության ղեկավար Յուսուֆ Քեմալ-բեյը Անկարայում Ադրբեջանի լիազոր ներկայացուցիչ Աբիլովի հետ զրույցում: «ՌԽՖՍՀ հետ պայմանագիր կնքելու նպատակով ուղևորվելով Մոսկվա, - ասել է Յուսուֆ Քեմալը, - մենք մտադիր էինք պայմանագրեր կնքել Ադրբեջանի և այնուհետև Վրաստանի ու Հայաստանի հետ: Բայց Ադրբեջանում, դժբախտաբար, այդ հարցին այնպես չվերաբերվեցին, ինչպես որ սպասում էինք»¹:

Մի փաստ էլ բերենք կոնֆերանսի նյութերից և դրանով սահմանափակվենք. Մարտի 12-ի նիստում, երբ քննարկվում էին այնպիսի հարցեր, որոնք կարող էին Անդրկովկասյան հանրապետություններում դժգոհություն առաջացնել, Չիչերինը դիմելով թուրք պատվիրակներին ասել էր, թե հարկավոր էր «այդ հանրապետությունների պատվիրակներին հրավիրել Մոսկվա ավելի ընդարձակ կոնֆերանսի, ինչպես դա առաջարկեց ռուսաստանյան պատվիրակությունը, բայց որը մերժվեց թուրքական պատվիրակության կողմից լիազորությունների բացակայության պատճառաբանությամբ»² (ընդգծումը մերն է - է. Զ.): Ասված է պարզ ու հասկանալի. Միացյալ կոնֆերանսից հրաժարվելու համար թուրք պատվիրակները վկայակոչել են լիազորությունների բացակայությունը և ոչ թե փետրվարյան իրադարձությունները Հայաստանում:

Միացյալ կոնֆերանսի տապալումը թուրք պատվիրակների միակ հաջողությունը չէր: Նախնական բանակցությունների օրերին նրանք մի հարց էլ լուծեցին: Դա բանակցություններին Լևոն Կարախանի մասնակցությունը հարցն էր: Կարծելով, թե Չիչերինի մոտ Հայամետու-

թյան որոշ դրսևորումները Կարախանի ազդեցությունը են, նրանք պահանջեցին Կարախանին հանել պատվիրակության կազմից, ինչը և կատարվեց (Կարախանի փոխարեն պատվիրակության կազմի մեջ մտցվեց թաթար Ջելալեդդին Կորխմազովը)³: Այդ պահանջը առաջ էր քաշվել Չիչերինի և Կարախանի հետ փետրվարի 22-ին կայացած հանդիպումից հետո:

Մենք այն կարծիքին չենք, թե ռուսական պատվիրակության կազմում Կարախանի մասնակցությունը Հայաստանին առնչվող հարցերի լուծման գործում կարող էր որևէ նշանակություն ունենալ, ո՛չ: Եթե Կարախանը ի վիճակի լիներ ազդելու Չիչերինի վրա, ապա դա կարող էր անել նաև առանց պատվիրակության կազմում լինելու: Բանն էլ հենց այն է, որ թե՛ Չիչերինն ու նրա տեղակալ Կարախանը և թե՛ Արտգործժողկոմատն ընդհանրապես, լուր կատարողներ էին, իսկ քաղաքականությունը որոշում էին Քաղբյուրոյի ամենագործող անդամները, կովկասյան գործերում՝ բացառապես Ստալինը: Իսկ որ վերջինս կօգտվեր թուրք պատվիրակների դժգոհությունից և կպահանջեր Կարախանին հանել պատվիրակության կազմից, դա հայտնի էր թե՛ Չիչերինին և թե՛ Կենտկոմի բոլոր անդամներին: Բանն այն է, որ Ստալինը վաղուց մտադրվել էր Չիչերինի տեղակալի պաշտոնում Կարախանի փոխարեն ունենալ մի մարդ, որի միջոցով կկարողանար ազդել Արտգործժողկոմատի գործունեության վրա: Այդ նպատակին հասնելու համար նա օգտագործում էր այն հանգամանքը, որ Կարախանը հայ է և որ դա մեծապես վնասում է իրենց արևելյան քաղաքականությունը՝ հատկապես մուսուլմանական աշխարհում: Դեռևս 1919թ. օգոստոսին (16-ին) Սմոլենսկից Չիչերինին ուղարկած նամակում՝ փորձելով հիմնավորել Կարախանին մեկ այլ, բայց անպայման մուսուլման գործիչով փոխարինելու անհրաժեշտությունը, գրում է, թե ինքը նկատել է, որ տարբեր երկրներից Ռուսաստան եկած մուսուլման պատվիրակները ամեն կերպ չըջանցում են Կարախանին և Արտգործժողկոմատին, և իր հետ հանդիպելու համար գալիս հասնում են Պիտեր, Սմոլենսկ և այլն: Ելնելով դրանից՝ Ստալինը հետևություն է անում, թե այդ ամենը իրեն մտածել է տալիս, որ Արտգործժողկոմատի պատասխանատու աշխատակիցների անձնակազմը բոլորովին չի համապատասխանում «իրենց այսպես կոչված «մուսուլմանական» քաղաքականությանը»: «Այնքա-

¹ Է. Ա. Զոհրաբյան, նշվ. աշխ., էջ 215:

² ՀԱԱ, ֆ.114, ց.2, գ.63, թ.50-51:

³ Ալի Ֆուադ փաշան (Ջեբեսոյ) իր՝ «Մոսկովյան Հուշեր»-ում գրում է, որ Կարախանը պատվիրակության կազմից հանվեց Անկարայի գաղտնի խնդրանքով և որ նրան փոխարինած Ջելալեդդին Կորխմազովը ծագումով թուրք էր:

նով որ մեր «մուսուլմանական» քաղաքականությունը արդարացվել է, արդարացվում է և դեռ կարդարացվի (մենք նվաճել ենք պարսիկների, թուրքերի, աֆղանցիների և այլոց համակրանքը), - գրում է Ստալինը, - այդքանով Կարախանի՝ աղգությունը հայի, միակ «արևելյան մարդու», որը կոչված է արտաքին աշխարհի համար ներկայացնել Արևելքի ժողովուրդներին, ներկայությունն Արտգործժողովումատում ծակում է լսողությունը և խախտում ներդաշնակությունը մեր արևելյան քաղաքականությունում, թուլացնում է մեր քաղաքականության ուժն ու էֆեկտը Արևելքի ժողովուրդների ու նախ և առաջ մուսուլմանների աչքում»¹:

Նամակում նաև ասված է, որ ինքը այդ հարցի շուրջ խոսել է Լենինի հետ և առաջարկել Կարախանին մի որևէ մուսուլմանով փոխարինելու հարցը մտցնել Կենտկոմ և որ այդ պաշտոնի համար առաջադրել է Նարիմանովի թեկնածությունը, որին Լենինը համաձայնել է: Լավ հասկանալով, որ իր հովանավորյալն այդ պաշտոնի համար համապատասխան չէ, որ Չիչերինը կարող է առարկել և Կենտկոմի անդամների ուշադրությունը հրավիրել նրա թույլ կողմերի վրա, Ստալինը շտապում է կանխել նրան, հայտարարելով, թե «ղժբախտություն չէ, եթե նրա մոտ բացակայում է լայն քաղաքական հեռանկարը, չէ՞ որ քաղաքականությունը նա չի անելու, այլ ԿԿ-ն և Արտգործժողովումատը, Նարիմանովը կարևոր է որպես դրոշ: Դեկորացիայի այդպիսի փոփոխությունը կամ ամեն դեպքում Արևելքի հարցերում Կարախանին ստվերում թողնելը և մուսուլմանին առաջին պլան մղելը, ես բացարձակապես անհրաժեշտ եմ համարում»² (ընդգծումը մերն է - է. Ջ.):

Կարծելով, որ այդպիսի փոփոխությունը իսկույն հաշվի կառնվի մուսուլմանների կողմից և կբարձրացնի բոլշևիկների հեղինակությունը իսլամի աշխարհում, Ստալինը շարունակում է, թե «առարկությունն այն մասին, որ Նարիմանովը ծանոթ չէ հեռավոր Արևելքին, որ նա ծեր է և դանդաղ է կողմնորոշվում, ինձ համար վճռական նշանակություն չունի, քանի որ ես երբեք չեմ մտածել, որ Նարիմանովը ղեկավարելու է արևելյան քաղաքականությունը, նա ինձ համար, կրկնում եմ, միմիայն դրոշ է, ղեկորացիա»³:

Կարծում եմ՝ ընթերցողն էլ կընդունի, որ Չիչերինի հետ այսպիսի տոնով կարող էր խոսել միայն պետություն ղեկավարը, այսինքն՝ Լե-

նինը: Ստալինը 1919թ. դեռևս չունեի այն կշիռն ու հեղինակությունը, որ նա ձեռք բերեց հետագայում՝ Լենինի մահվանից հետո: Քաղաքացիական պատերազմի տարիներին և նաև նրանից հետո ընկած առաջին շրջանում՝ Լենինից հետո ամենահեղինակավոր անձը Տրոցկին էր: Կառավարության կազմում Ստալինը զբաղեցնում էր Աղգությունների գործերի ժողովմի համեստ պաշտոնը: Ճիշտ է, կուսակցական հերարխիայում նա բարձր դիրք ուներ՝ Ռկ(բ)Կ Կենտկոմի Քաղքյուրոյի անդամ էր և նաև վայելում էր Լենինի վստահությունը: Բայց դատելով նամակի բովանդակությունից՝ արդեն այն ժամանակ նա իրեն շատ հավակնոտ էր պահում (նրա բնավորության արատավոր կողմերից մեկը, ինչի վրա մատնացույց էր արել Լենինը իր քաղաքական կտակում), իրավունք վերապահում միջամտելու մեկ այլ ժողովմատի կադրային քաղաքականությանը և այն էլ՝ ոչ թե համեստ խորհրդատուի դիրքերից:

Ինչևէ, ավարտելով մեր խոսքը Կարախանի դեմ Ստալինի ծավալած պայքարի մասին, միայն ավելացնենք, որ Ստալինին չէր հաջողվել իրականացնել իր ծրագրերը (հավանաբար Չիչերինի անհամաձայնություն պատճառով), թեև նամակի պատճենը ուղարկել էր Լենինին և նաև վերջում ավելացրել, որ ինքը պնդելու է իր այդ «հին առաջարկի վրա» և անհրաժեշտ է համարում հարցը քննարկել Կենտկոմի պլենումում:

Վերադառնալով մեր պատմությանը՝ անհրաժեշտ ենք համարում նշելու, որ Չիչերինի և Կարախանի հետ ունեցած առաջին հանդիպումը խիստ անհանգստացրել էր թուրք պատվիրակներին, քանի որ խոսք էր գնացել Ալեքսանդրապոլի պայմանագիրը չեղյալ հայտարարելու մասին: Չիչերինի և Կարախանի կողմից առաջ քաշված այդ պահանջի մասին գրում են բոլոր այն թուրք պատմաբանները, ովքեր անդրադարձել են Մոսկվայի կոնֆերանսին՝ հենվելով, անշուշտ, թուրք պատվիրակների վկայությունների վրա: Իսկ պատվիրակության անդամ Ալի Ֆուադ փաշան, որը կոնֆերանսից հետո մնացել էր Մոսկվայում որպես թուրքիայի դեսպան, հետագայում իր քաղաքական հուշերում գրում է. «Չիչերինի և Կարախանի հետ հանդիպումներից մենք հասկացանք, որ այդ ճանապարհով մենք որոշակի արդյունքների չենք հանգի: Եվ որպեսզի իզուր ժամանակ չկորցնենք, մենք Աղգությունների գործերի կոմիսար Իոսիֆ Ջուղաչվիլի-Ստալինից խնդրեցինք մեզ ընդունել»⁴:

¹ Ե. Սարգսյան, նշվ. աշխ. էջ 186:

¹ „Геноцид армян...“ стр. 33.

² Նույն տեղում:

³ Նույն տեղում:

Թուրք պատվիրակները քաջատեղյակ էին Ստալինի հակահայկական տրամադրություններին Մոսկվայում ստացած ինֆորմացիայի չնորհիվ և վատահ էին, որ Ստալինը կպաշտպանի իրենց շահերը: Այդպես էլ եղավ, նրա պահանջով Կարախանը հանվեց պատվիրակության կազմից, իսկ Ալեքսանդրապոլի պայմանագրի կապակցությամբ էլ հայտարարել էր. «Հայաստանի հարցը դուք ինքներդ լուծել եք: Եթե չլուծված ինչ-որ բան դեռ մնացել է, ապա դա ևս դուք ինքներդ լուծեք...»¹:

Ստալինի նման վերաբերմունքը չէր կարող չոգևորել թուրք պատվիրակներին, և նրանք օր-օրի ավելի համառ ու ավելի անդիժող էին դառնում: Փետրվարի 23-ի հանդիպման ժամանակ Յուսուֆ Քեմալը անդրադառնում է նաև Հայաստանի օկուպացված շրջանները մաքրելու վերաբերյալ Չիչերինի պահանջին և մերժում այն՝ Հայտարարելով, թե դա կանեն միայն այն դեպքում, երբ կատարվեն պայմանագրի բոլոր կետերն ամբողջությամբ: Նա նաև փորձեց արդարացնել իր կառավարության կողմից Ալեքսանդրապոլի կոնֆերանսին Ռուսաստանի միջնորդության մերժումը ասելով, թե իրենք չէին կարող ընդունել այդ միջնորդությունը «քանի որ վճիռը, որ այդ ժամանակ դուք կընդունեիք, նախապես Հայտնի էր, ամեն դեպքում մենք կարող էինք այդպես մտածել, և այդպիսով իրավաբանորեն ասած, արբիտրաժը անհնարին էր: Այն ժամանակ մենք դեռ չգիտեինք այն, ինչ դուք մեզ ասել եք այս օրերին և մենք մտածում էինք, որ ռուսական կառավարությունը մեզնից պահանջում է մաքրել վիլայեթները, որոնց մասին խոսք է գնում»²: Չիչերինը դա համարեց թյուրիմացություն, կոչ արեց վերացնել բոլոր թյուրիմացությունները, ավելացնելով. «...դրա համար մենք կառաջարկեինք հրավիրել Ադրբեջանի ներկայացուցչին, որը մուսուլմանական հանրապետություն լինելով, պետք է ձեզ լիակատար վստահություն ներշնչի: Դրա հետ մեկտեղ Ադրբեջանը որոշակի դեր է խաղում Կովկասում: Ես իմացա, որ նրա կողմից (վիճելի - է. Զ.) մարզերի հանձնումը Հայաստանին, ձեզ մոտ որոշ անհանգստություն է առաջացրել»³ (ընդգծումը մերն է - է. Զ.):

Ահա այսպես, դեռ մինչև կոնֆերանսի պաշտոնական բացումը, ոչ-պաշտոնական հանդիպումների արդյունքում թուրքական պատվիրակությանը հաջողվեց լուծել իր համար առանձնակի կարևորություն

ունեցող հարցը: Հայ-թուրքական հարաբերությունների վերանայման խնդիրը հանվեց կոնֆերանսի օրակարգից: Այդ է իրականությունը: Մինչդեռ մեր պատմագիտական գրականության մեջ (այդ թվում՝ հետխորհրդային) դեռևս հանդիպում ենք կարծիքների, որոնք շատ հեռու են իրականությունից: Առանձնապես տարօրինակ ու անհասկանալի է Կարսի խնդրում Գ. Գալոյանի հայտնած կարծիքը: Ոոսելով այն մասին, որ Կարսը Բաթումի բանալին է և Չիչերինը կարևորում էր Կարսը Հայաստանին թողնելը, նա գրում է. «Այժմ, երբ Հայաստանում իշխանությունը կրկին իրենց ձեռքն էին վերցրել դաշնակցականները և թուրքերին առաջարկել էին Հայ-թուրքական հարաբերությունների հիմքում դնել Ալեքսանդրապոլի 1920թ. դեկտեմբերի 2-ի պայմանագիրը, Ռուսաստանը վարանում էր քննարկման դեմ Կարսը Հայաստանին վերադարձնելու հարցը: Վախ կար, որ դրական լուծումը կարող էր ամրապնդել դաշնակցականների դիրքերը Հայաստանում: Մեր կարծիքով այդ էր պատճառը, որ Ռուսաստանը հրաժարվեց Կարսը Հայաստանին վերադարձնելու պահանջից»⁴:

Անհասկանալի է, թե ինչո՞ւ կոմունիստական Ռուսաստանի կողմից Կարսի վերադարձնելը կամրապնդեր ոչ թե Հայ կոմունիստների, այլ դաշնակցականների դիրքերը: Եվ հետո, ինչո՞ւ է հեղինակը մոռացել, որ Ալեքսանդրապոլի պայմանագիրը Հայ-թուրքական հարաբերությունների հիմքում դնելու մասին Անկարա ուղարկած Վրացյանի հեռագիրը տրվել է մարտի 18-ին, այսինքն՝ այն ժամանակ, երբ Մոսկվայում Հայ-թուրքական հարաբերությունների խնդիրը վաղուց արդեն լուծվել էր և հենց մարտի 18-ին էլ Մոսկվայի կոնֆերանսը ավարտել էր աշխատանքները: Նախակոնֆերանսյան հանդիպումների ընթացքում քննարկվել էին նաև Ալեքսանդրապոլի պայմանագրի 5-րդ կետի (թուրքերը փորձում էին համոզել, որ այն ուղղված է ոչ թե Ռուսաստանի, այլ Արևմուտքի դեմ), կնքվելիք պայմանագրի բնույթի և այլ հարցեր:

Իսկ ի՞նչ էր անում Բեկզադյանի պատվիրակությունը, որն, ի դեպ, շատ ավելի շուտ էր հասել Մոսկվա, քան թուրքական և ադրբեջանական պատվիրակությունները: Նախ ասենք, որ հավաստի փաստեր չեն պահպանվել, ուստի և չենք կարող ասել, թե նրանք տեղեկություններ ունեին ծավալված հակահայկական արշավի մասին: Բայց անգամ եթե տեղյակ լինեին, միևնույն է, հակադրել չէին կարող, քանի որ, ինչպես տեսանք, թուրք-ադրբեջանական բլոկի շահերն էին պաշտպանում

¹ Նույն տեղում, էջ 186-187:

² „Геноцид армян...“, стр. 394.

³ Նույն տեղում, էջ 397:

⁴ Գ. Գալոյան, նշվ. աշխ., էջ 443-444:

նաև Ստալինը, Օրջոնիկիձեն և մի շարք այլ ազդեցիկ բոլշևիկներ: Բայց դա նաև չի նշանակում, թե պետք է ձեռքերը ծալած նստեին ու սպասեին: Մենք վերը տեսանք, թե քանի-քանի անգամ են Նարիմանովը, Շահթախթինսկին նամակներով դիմել Լենինին, Օրջոնիկիձենին, Ռկ(բ)Կ Կենտկոմ, ծանոթացանք այդ նամակների հակահայկական բովանդակությունը: Մնում է զարմանալ, թե ինչո՞ւ Ադրբեջանի հեղկոմի նախագահը կարող էր իրեն նման շոտլանդացի թույլ տալ, իսկ Հայաստանի հեղկոմի նախագահը՝ ոչ: Մինչդեռ արխիվներում չենք հանդիպում Հայաստանի ղեկավարների՝ Լենինին հասցեագրած մի նամակի, որում բարձրացված լինեն Հայ ժողովրդի շահերը շոտլանդացիների: Կարծես թե այդ ամենը նրանց քիչ է հետաքրքրել, կարծես թե նրանց ցավ չէր պատճառել Հայաստանի անդամահատման կատարված փաստը: Ասել թե Հայհեղկոմի ղեկավարությունը մտահոգված չէր դրանով, մեղադրել նրանց Հայրենասիրության և համարձակության պակասի մեջ, մանավանդ Մոսկվային և Կասպանին, որոնք իրենց կյանքով ու գործունեությամբ հակառակն են ապացուցել, ճիշտ չի լինի: Պարզապես պետք է ընդունենք, որ ոչ թե նրանց մեղքը, այլ դժբախտությունն էր, որ հարկադրված եղան գործել տնտեսական ու քաղաքական անասելիորեն ծանր պայմաններում և, ի լրումն այդ ամենի, Մոսկվայի կոնֆերանսի նախապատրաստման և անցկացման օրերին կորցրել էին իշխանությունը ու խրվել եղբայրասպան քաղաքացիական պատերազմի մեջ: Այնուամենայնիվ որոշ քայլեր կատարվել են, որոնք և ներկայացնում ենք ընթերցողի դատին:

Հայաստանի ազգային արխիվում պահվող մի փաստաթղթից տեղեկանում ենք, որ Հայհեղկոմը նույնիսկ փորձել է թուրքահայերից կազմված մի պատվիրակություն ուղարկել Մոսկվա՝ Հայկական հարցում կոնֆերանսի ընդունելիք որոշումների վրա ինչ-որ ձևով ազդելու նպատակով: Փետրվարի 13-ին Ա. Մոսկվայնը շտապ հեռագրում է Բաքու՝ ՀՆՍՀ լիազոր ներկայացուցիչ Մ. Աթաբեգյանին և խնդրում անհապաղ հեռագրել Մոսկվա՝ Հայկական պատվիրակության ղեկավար Ալ. Բեկզադյանին և Ս. Տեր-Գաբրիելյանին ու հայտնել, որ «մեզ համակրող և պաշտպանող թուրքահայերի չրջանում լրջորեն քննարկվում է թուրք-հայկական հարցի բարձրացումը Մոսկվայի կոնֆերանսում: Կարելի է կազմակերպել լուրջ ելույթներ և հատուկ պատվիրակություն դեպի Մոսկվա: Իմացեք ղեկավար կենտրոնների կարծիքը և հավանության դեպքում հեռագրեք»¹ (ընդգծումը մերն է - է. Զ.):

¹ ՀԱԱ, ֆ. 114, ց. 1, գ. 81, թ. 4:

Որ «ղեկավար կենտրոնները» հավանություն չէին տա, դա հասկանալի է: Բայց նաև հայտնի չէ, թե Բեկզադյանն այդ ուղղությամբ քայլ կատարե՞լ է, թե՞ ոչ: Հայտնի է միայն, որ փետրվարի 20-ին պատվիրակությունը հանդիպել է Ջիչերինին և Կարախանին, խոսել կոնֆերանսից հայ ժողովրդի սպասելիքների մասին, ներկայացրել փաստաթղթեր օկուպացված շրջաններում թուրք զինվորականության իրականացրած մասսայական ջարդերի ու հակախորհրդային գործունեության վերաբերյալ և այլն, սակայն Մոսկվայի առաջարկության մասին նա հայտնել չէր կարող այն պարզ պատճառով, որ այդ նույն թուրքահայերը փետրվարի 18-ին գրավել էին Երևանը և տապալել խորհրդային իշխանությունը: Ուշագրավ է, որ այդ լուրը Ջիչերինը ստացել էր Հայ պատվիրակների հետ հանդիպման ժամանակ¹: Այդ օրը՝ փետրվարի 20-ին, հանդիպման մասնակիցները դեռևս չգիտեին թուրքական պատվիրակության դիրքորոշման մասին և կարծում էին թե կոնֆերանսը միացյալ է լինելու: Այդ հանդիպման մասին միակ աղբյուրը Բեկզադյանն է, որը կոնֆերանսի ավարտից հետո Կարախանին հասցեագրած նամակում պահանջում է հետ վերադարձնել այն փաստաթղթերը, որ փետրվարի 20-ի հանդիպման ժամանակ հանձնել է նրան և որոնք պետք է «Ներկայացվեն ուսում-թուրք-հայ-ադրբեջանական կոնֆերանսին»²: Կարախանին էր տրվել 12 փաստաթուղթ, որոնց շարքում Նախիջևանում թուրքերի և ադրբեջանցիների հակահայկական գործունեության մասին Վելիբեկովի ղեկուցագիրը, վկայություններ Ալեքսանդրապոլում և Կարսում տիրող դրության մասին և այլն: Իսկ երբ միացյալ կոնֆերանսը ձախողվեց, Հայ պատվիրակները, այնուամենայնիվ, ռազմական էքսպերտ Բորրիչևի միջոցով անհրաժեշտ նյութեր էին մատակարարում հայ-թուրքական սահմանագծման վերաբերյալ: Այդ մասին վկայում է ինքը՝ Ալ. Բեկզադյանը Մ. Աթաբեգյանին ուղարկած փետրվարի 18-ի նամակում³: Պատվիրակությունը նաև մի ընդարձակ ղեկուցագիր հասցեագրեց «Ջիչերինին, Լենինին, Ստալինին, Կրեստինսկուն», որում վիճակագրական տվյալներ էին ներկայացվում բոլոր գավառների վերաբերյալ և շեշտվում էր

¹ Այդ մասին հետագայում վկայել է Ալ. Բեկզադյանը, բայց հավանաբար բարոզական նկատառումներով խոսել է ոչ թե լուր ստանալու, այլ Վրացյանի հեռագրի մասին, ինչը չի համապատասխանում իրականությանը (Վրացյանի հեռագիրը տրվել է մարտի 12-ին):

² ՀԱԱ, ֆ. 114, ց. 1, գ. 8, թ. 8:

³ Տե՛ս ՀԱԱ, ֆ. 114, ց. 2, գ. 68, թ. 25:

Կարսի մարզը և Սուրմալուի գավառը անպայմանորեն Նորհրդային Հայաստանին վերադարձնելու անհրաժեշտությունը: «Նորհրդային Հայաստանի տնտեսական զարգացումը և կուլտուրական առաջադիմությունը, – ասված է նրանում, – Հնարավոր է անպայմանորեն Թուրքիայի և Վրաստանի հետ դաշնակցական կառավարությունների վերջին տարածքային համաձայնագրերը անհապաղ չեղյալ հայտարարելու, ինչպես Վրաստանի, այդպես էլ Թուրքիայի կողմից բոլոր չեզոք գոտիները վերացնելու և նրան մինչև վերջին պատերազմի սկիզբը գոյություն ունեցող իրական սահմանների շրջանակներում լրիվ վերականգնելու դեպքում միայն»¹: Զեկուցագրում նաև ցույց էր տրվում, որ Ալեքսանդրապոլի պայմանագրով գծված սահմանները Հայաստանը դարձրել են անպաշտպան, նրա գլխավոր կենտրոնները՝ Երևանը և Ալեքսանդրապոլը վեր են ածվել սահմանային քաղաքների և դարձել անպաշտպան, քանի որ Արաքս և Արփաչայ գետերը լուրջ պաշտպանական դեր խաղալ չեն կարող:

Հայ պատվիրակները չէին կարող մոռացություն տալ նաև Նախիջևանի հիմնախնդիրը, բայց չգիտես ինչու երկրամասը Հայաստանի կազմում թողնելու բացահայտ պահանջ չի դրվում: Ճիշտ է, երկրամասը Հայաստանի անբաժան մաս հայտարարելու մասին Ադրհեղկոմի հռչակագիրը համարում են «անօրինակ ակտ», հիշատակում Նախիջևանի մասին Հայհեղկոմի դեկլարացիան և հետևություն անում, թե Ադրբեջանի հետ վիճելի գոտիներում սահմանը «երկու հանրապետություններում խորհրդային սոցիալիստական կարգերի հաստատումով պետք է կորցնի քաղաքական նշանակությունը և այսուհետ ծառայեն որպես սովորական վարչական սահման: Ի դեպ, վերջինը կանցկացվի համաձայն ինքնորոշվող ժողովուրդների ազատ կամաարտահայտություն»² (ընդգծումը մերն է – է. Ջ.):

Հնարավոր չէ անտարբեր անցնել բոլշևիկյան հայ դեկավար գործիչների մոտ ծայրահեղություն հասած և համոզմունք դարձած «ինտերնացիոնալիստական» հայացքների կողքով: Ո՛չ վրաց, ո՛չ ադրբեջանցի կոմունիստների մոտ նման բան չէր գտնի: Ամեն մի թիզ հողի համար նրանք կռիվ էին տալիս, իսկ մերոնք խոսում «սահմանների քաղաքական նշանակության» կորստի մասին: Ո՛չ վրացիները, ո՛չ ադրբեջանցիները Ջավախքի և Լեռնային Ղարաբաղի պատկանելիու-

թյան հարցը լուծելիս խոսք անգամ չասեցին այդ մարզերի ազգաբնակչության ինքնորոշման իրավունքի և կամաարտահայտություն մասին: Բայց նման պահանջ չառաջադրեցին նաև Հայաստանի կոմունիստ դեկավարները: Հենց այդ միակողմանի ինտերնացիոնալիզմը չէ՞ր այն պատճառներից մեկը (մի շարք այլ պատճառների շարքում), որ մեր ադրբեջանցի ու վրացի «եղբայրներին» Հնարավորություն տվեց նորանոր կտորներ պոկել արդեն անդամահատված ու բզկտված Հայաստանի արյունածոր մարմնից: Իսկ եթե փորձենք հասկանալ, թե ինչն էր պատճառը, ինչու Հայաստանի կոմունիստական կուսակցությունը դեկավարության մոտ վերը նշված մտածելակերպը ավելի արտահայտված ու գերակայող էր, ապա նախ և առաջ պետք է հիշենք, որ նրանց մեծագույն մասը Հայաստանցի չէր և կուսակցական-քաղաքական գործունեություն մեջ էր ներքաշվել կա՛մ Ռուսաստանում, կա՛մ Բաքվում ու Թիֆլիսում:

* * *

Կոնֆերանսի պաշտոնական բացումը տեղի ունեցավ փետրվարի 26-ին¹: Ողջունելով թուրք պատվիրակներին՝ Չիչերինը հույս հայտնեց, որ բոլոր թյուրիմացությունները կհարթվեն և կստորագրվի պայմանագիր ուս և թուրք ժողովուրդների բարեկամության և եղբայրության մասին: Նա հատկապես ընդգծեց, որ «եթե վերջին վեց ամսում Տաճկաստանի դրությունը հիմնավորապես փոփոխվեց, ապա... դրանում զգալի ծառայություն է արել Ռուսաստանի և Տաճկաստանի միջև եղած բարեկամական հարաբերությունը, որը ամրացրել է վերջինիս դրությունը: Այդ բարեկամական կապերը պետք է վավերացնել ձևական դաշնագրով»²:

Պատասխանելով Չիչերինին՝ Յուսուֆ Քեմալը ձգտում էր համոզել, որ դաշինքի մեջ մտնելով Ռուսաստանի հետ, իրենք այլ նպատակներ չեն հետապնդում, բացի Անտանտի դեմ պայքարից: Նա «թուրքի անկեղծությունը» կոչ արեց «հավատալ թուրք ժողովրդին»: «Այն ձեռքը, որը մեկնում է Թուրքիայի աշխատավորությունը Ռուսաստանի աշխատավորությանն, անկեղծ բարեկամության ձեռք է», – շարունակել է Յուսուֆ Քեմալը և անդրադառնալով պայմանագրի կնքման

¹ Այդ օրը պատվիրակներին ընդունել էր Լենինը և հավաստիացրել էր, որ անպայմանորեն պայմանագիրը կստորագրվի:

² «Ռուս-տաճկական կոնֆերանցիան», «Կոմունիստ» օրաթերթ, 9 ապրիլի 1921թ.:

¹ Նույն տեղում, թ. 11:

² Նույն տեղում, թ. 1:

անհրաժեշտությունը, ավելացրել. «Ռուսաստանի հետ գոյություն ունեցող բնական համաձայնությունը պետք է մանրամասն մշակել և հայտարարել ամբողջ աշխարհին: ...Այդ միությունը կլինի մի ուժ, որը կերաշխավորի ժողովուրդների ազատությունը: **Նրանք, որոնք այստեղ են գտնվում, չար ձգտումներ չունեն այս կամ այն տերիտորիայի նկատմամբ:** Նրանք ձգտում են ապահովել ժողովուրդների ազատությունը: Երկու ժողովուրդները կովում են միևնույն իդեալի համար և եթե նրանց միջև հաշտություն կնքված չլիներ, այն ժամանակ մեղքը ընկնելու էր այն մարդկանց վրա, որոնց վրա էր ծանրացած հաշտություն կնքելու խնդիրը: Թուրքական ղեկավարի գիտակցում է այդ պատասխանատվությունը և ցանկանում է, որքան հնարավոր է, շուտ կատարել այդ խնդիրը»¹ (ընդգծումը մերն է - է. Զ.):

Հավատացե՞լ է Չիչերինը Յուսուֆ Քեմալի խոսքերին, թե ուղղակի փորձել է օգտվել այդ հայտարարությունից՝ կրկին առաջ քաշելով Հայաստանի սահմանների վերականգնման հարցը: Ահա թե ինչ է գրում այս մասին Թուրք պատվիրակը Կարաբեքիր փաշային ուղարկած նամակում. «Նույնիսկ այն բանից հետո, երբ մենք համաձայնություն եկանք Ստալինի հետ, Չիչերինը առաջին իսկ նիստում՝ մեր բանակցությունների ընթացքում, բարձրացրեց Հայաստանի հետ սահմանների հարցը և առաջարկեց վերականգնել 1914թ. սահմանները: Այդ նիստին Կարախանի փոխարեն մասնակցում էր Ջելալ Կորխանգովը: Նա Հայաստանում մեր ներկայացուցչին մեղադրեց իմպերիալիզմի մեջ և... **պնդեց, թե Կարսը և Արդահանը ոչ թե Թուրքական, այլ թաթարական քաղաքներ են եղել**»² (ընդգծումը մերն է - է. Զ.):

Ահա թե ինչի հանգեցրեց Կարախանին Կորխանգովով փոխարինելը: Կարսը հռչակվեց թաթարական քաղաք, և դրանով իսկ ջուր լցվեց Թուրքերի ջրաղացին, որոնք վաղուց պնդում էին, թե Կարսը հայկական է, հետևապես հայերը նրա վրա որևէ իրավունք չունեն: Մնում է զարմանալ, թե ինչո՞ւ Թուրք պատվիրակը չնորհակալական խոսք չի ասում Կորխանգովի հասցեին:

Կոնֆերանսի առաջին նիստում կողմերը համաձայնվեցին, որ բանակցությունների հիմքում պետք է դրվի ռուս-թուրքական առաջին կոնֆերանսի ժամանակ (1920թ. հուլիս-օգոստոս) մշակված պայմանագրի նախագիծը, որը կարող է փոփոխության ենթարկվել ու լրաց-

վել: Դրա համար էլ ստեղծվեցին համապատասխան հանձնաժողովներ՝ քաղաքական, իրավաբանական և խմբագրական: Կոնֆերանսն իր աշխատանքները շարունակեց մինչև մարտի 18-ը, երբ վերջապես կողմերը ստորագրեցին Ռուսաստանի և Թուրքիայի միջև «բարեկամությունից և եղբայրության մասին» պայմանագիրը, որը սակայն թվագրեցին մարտի 16-ով³, որպեսզի խաբեն Անգլիային, տպավորություն ստեղծեն, թե պայմանագրի ստորագրման ժամանակ Մոսկվայում իբրև չգիտեին, որ այդ օրը՝ մարտի 16-ին, Լոնդոնում ստորագրվել է առևտրական համաձայնագիր Անգլիայի և ՌԽՖՍՀ-ի միջև, որում տեղ էին գտել նաև քաղաքական պարտավորություններ (օրինակ, Արևելքի երկրներում հակաբրիտանական քարոզչություն չծավալել և այլն²):

Կոնֆերանսում քաղաքական հարցերից զատ քննարկվել են նաև տնտեսական, ֆինանսական, ռազմական և այլ հարցեր, որոնց մենք, հասկանալի պատճառով, չենք անդրադառնա: Այլ կփորձենք չչեղվել տարածքային խնդիրներից և հատկապես Նախիջևանյան հիմնահարցի շուրջ ծավալված պայքարից ու նրա լուծման գործընթացից: Դրա հետ մեկտեղ չենք կարող չչեղտել, որ տարածքային սահմանագծման հարցում Թուրք պատվիրակները ցուցաբերեցին աներևակալի մեծ խնորժակ ու համառություն: Եվ դա անում էին այնքան անպատկառ պահվածքով, որ կոնֆերանսի պաշտոնական բացումից 2-3 օր հետո խորհրդային ղեկավար չըջաններում արդեն խոսվում էր կոնֆերանսի աշխատանքների խզման հնարավորության մասին: Մարտի 1-ին ՌԿ(Բ)Կ Կենտկոմի քարտուղար Կրեստինսկուն հասցեագրած նամակում Չիչերինը գրում է. «Ներկա պահին Թուրքիայի հետ հարաբերությունները հասել են լուրջ ճգնաժամի: Թուրքական պատվիրակությունը հայտարարել է, որ Ազգային ուխտը, ըստ որի Բաթումը, Արդահանը և Կարսը հայտարարվում են Թուրքական և այնտեղ թույլատրվում է միայն մի անգամ էլ հանրաքվե կատարել, և Ալեքսանդրապոլի պայմանագիրը, որը Թուրքիային է հանձնում Հայաստանի զգալի մասը, իսկ նրա մնացած մասերը փաստորեն վերածում Թուրքիայի վասալ պրովինցիաների, պետք է անձեռնմխելի համարվեն»³ (ընդգծումը մերն է - է. Զ.):

¹ *Տե՛ս Рех Казанджян, К вопросу о датировке Московского советско-турецкого договора 1921г., Вестник общественных наук, Ер., 1999, N 1, стр. 176-177.*

² Արտգործմինիստր լորդ Քերզոնը որպես համաձայնագրի ստորագրման պայման առաջարկել էր պահանջել Ռուսաստանից՝ փոխելու քաղաքականությունը Հայաստանի հանդեպ: Սակայն այդ պահանջը տեղ չի գտել համաձայնագրում:

³ „Геноцид армян...“, стр. 406-407.

¹ Նույն տեղում:

² „Геноцид армян...“, стр. 393.

Ինչպես տեսնում ենք, ուսական կողմը նախնական բանակցությունների արդյունքում ճանաչելով հանդերձ Ալեքսանդրապոլի պայմանագրով զծված սահմանները, այնուամենայնիվ չէր ճանաչում այդ պայմանագրի օրինականությունը: Ինչպես նաև չէր ուզում ճանաչել թուրքական Ազգային ուխտի Բաթումին վերաբերող մասը: Նամակից նաև պարզ է դառնում, որ Չիչերինը այդ հարցերում զիջման գնալ չէր ուզում, թեև ուզեց զա հանգեցնել բանակցությունների խզմանը: Նա ելք էր փնտրում ու գտնում, որ բանակցությունների խզմանը որպես այլընտրանք կարող է լինել Անկարայում դեսպանի պաշտոնում մի երևելի դեմքի, մի խոշոր դիվանագետի նշանակումը: Դժգոհ Ուլմալից (ներկայացուցչության քարտուղար) և Միլիանուց, որը շատ արագ ընկել էր թուրքերի ազդեցության տակ, Չիչերինը առաջ է քաշում Լիտվինովի թեկնածությունը: «Քանի որ ուս-թուրքական կոնֆերանսի խզման և թուրքերի անհապաղ մեկնման հնարավորությունը չի վերացել, անհրաժեշտ է շտապել ընկ. Լիտվինովի նշանակման հարցում, - գրում է Չիչերինը, - քանի որ այդպիսի խոշոր դեմքի նշանակումը Անգորա, խաղաղության մեր ցանկության փայտուն ապացույցը կլինի և, եթե թուրքական պատվիրակությունը մեկնի Ազգային ուխտի և Ալեքսանդրապոլի պայմանագրի պատճառով, ապա ընկ. Լիտվինովի նշանակումը բոլորին ցույց կտա, որ մենք խաղաղություն և բարեկամություն ենք ցանկանում Թուրքիայի հետ: Դա մի որոշ չափով կվերացնի թուրքական պատվիրակության այստեղից գնալու ծայրահեղ վտանգավոր հետևանքները: Դրա համար էլ անհրաժեշտ է անհապաղ դա անել, քանի որ թուրք պատվիրակները պահանջել են հաջորդ նիստը նշանակել հինգշաբթի և վերջը կարող է շատ շուտ լինել»¹:

Բանակցությունները չխզվեցին, թուրքերը չհեռացան Մոսկվայից: Ո՛չ մեր ձեռքի տակ եղած արխիվային նյութերում և ո՛չ էլ հրապարակի վրա եղած արխիվային փաստաթղթերում, ոչինչ չկա վերը նշված հարցերի վերաբերյալ կողմերի միջև կայացած քննարկումների մասին, որոնք ամենայն հավանականությամբ պաշտոնական բնույթ չեն կրել, որի համար էլ չեն սղազրվել, պաշտոնական արձանագրություններ չեն կազմվել: Բայցեայնպես, եթե փորձենք խորամուխ լինել, թե ինչու բանակցությունները չխզվեցին, ինչպես կարծում էր Չիչերինը, ապա նախ պետք է հիշենք, որ թուրք պատվիրակները բանակցությունները խզելու ցանկություն բոլորովին էլ չեն ունեցել: Իսկ ճգնաժամային պահեր

դիտավորյալ էին ստեղծում՝ լավ իմանալով, որ այդ կերպ կարող են ազդել ուսանների վրա և հարկադրել նորանոր զիջումներ անելու: «Մենք ելնում էինք նրանից, - գրում է Ալի Ֆուադ փաշան, - որ Նորհրդային կառավարությունը լցված էր մեզ հետ համաձայնության գալու ցանկությամբ: Մենք հույս ունեինք, որ այն ճնշման տակ, որ գործադրում էր ընկ. Ստալինը, և նաև մենք, արտաքին գործերի կոմիսարիատը կնահանջի բանակցություններում բռնած դիրքից և կհամաձայնի մեր տեսակետի հետ: Ծնորհիվ որոշ ճգնաժամային պահերի, որ մեզ հաջողվեց ստեղծել և մեր ճնշման, ինչպես նաև նրանց առաջարկություններին հակազդելու որպես հետևանք, Արտաքին գործերի կոմիսարիատի ներկայացուցիչները բանակցություններում իրենց գիծը արդյունավետ անցկացնել չկարողացան»¹ (ընդգծումը մերն է - է. Զ.):

Կարծում ենք, որ թուրք պատվիրակները բանակցությունները չէին խզի նույնիսկ այն դեպքում, եթե ուսական կողմը պնդեր իր պահանջների վրա, քանի որ մարտի սկզբին Անկարայի համար պարզ էր դարձել, որ Լոնդոնի կոնֆերանսից սպասելիքներ չեն կարող ունենալ: Մարտի 3-ին Չիչերինին ուղարկած նոտայում Ահմեդ Մուհթարը մի անգամ ևս հավաստելով ուսական կառավարության հետ բարեկամական դաշինքի մեջ մտնելու թուրքերի ձգտման մասին, միաժամանակ անդրադառնում է Լոնդոնի կոնֆերանսին և հայտնում. «Մեզ առաջարկվել էր միմիայն ձեռնարկությունը պահպանելու համար ստորագրել Սևրի պայմանագիրը, համաձայնել նրան, որ մեր ժանդարմերիային ղեկավարեն օտարերկրյա սպաները, համաձայնել մեր արևելյան սահմանների հարցը հանձնելու կոնֆերանսի հայեցողությանը, ինչպես նաև այսպես կոչված Քուրդիստանի հարցը..., համաձայնել մեր երկրի վրա օտարերկրյա ֆինանսական վերահսկողությանը, համաձայնել հանրաքվեի Սմիրնայում (Իզմիր) և Թրակիայում... Մենք մեր պատվիրակներին առաջարկում ենք մերժել բոլոր այդ պահանջները և խստորեն կանգնել Ազգային ուխտի հիմքի վրա»²:

Թվում էր, թե ուսական կառավարությունը կօգտվի Լոնդոնի կոնֆերանսի ձախողման մասին տեղեկատվությունից և կշարունակի պնդել իր դիրքորոշման վրա: Բայց ոչ, իրադարձությունների հետագա ընթացքից դժվար չէ հետևություն անել, որ կողմերի մոտեցումներում պարզապես որոշ մեղմացում կատարվեց, որոշ կոմպրոմիս՝ եթե կա-

¹ Նույն տեղում, էջ 407:

¹ Նույն տեղում, էջ 393:

² „ДВП СССР“, М. 1959, т. 3, стр. 514.

րելի է այդպես անվանել. թուրքերը համաձայնում են քննարկումներ սկսել Բաթումի հարցում, իսկ ուսաները չպնդել Ալեքսանդրապոլի պայմանագիրը պաշտոնապես չեղյալ հայտարարելու վրա: Ահա թե ինչ է ասված այդ օրերի մասին Անկարա՝ Մղիվանուն ուղարկած Ջիչերինի մարտի 4-ի հեռագրում. «Այժմ առևտուր է գնում: Մենք տալիս ենք Կարսը և Արդահանը, բայց ոչ մի դեպքում չենք կարող տալ Բաթումը և պահանջում ենք քսանվերստանոց շերտ Ալեքսանդրապոլի երկաթգծից արևմուտք և Արաքսից հարավ: Բաթումում կլինի Վրաստանը, Ալեքսանդրապոլում և Երևանում՝ Հայաստանը, իսկ Նախիջևանը անմիջականորեն կախված կլինի Ռուսաստանից: Այդպիսին են մեր հիմունքները»¹:

Ինչպես տեսնում ենք, առևտուրը դարձյալ արդեն խիստ անդամահատված ու բզկտված Հայաստանի հաշվին է կատարվում: Ըստ որում, առևտրի օբյեկտ է դառնում նաև Նախիջևանը: Արդյո՞ք դա տեղի է ունեցել Ալեքսանդրապոլի պայմանագրի շուրջը ծավալված դիսկուսիայի ընթացքում, թե՞ պարզապես թուրք պատվիրակները պահանջել են ճանաչել իրենց իրավունքը նաև Նախիջևանի վրա, դժվար է ասել: Փաստը մնում է փաստ, մարտի առաջին օրերին տարածքային խնդիրների շարքում բանակցությունների սեղանին էր դրվել նաև Նախիջևանի հարցը: Իհարկե, դա անսպասելի չէր: Անսպասելին ու տարօրինակն այն է, որ հաստատակամություն ցուցաբերելով Բաթումը Վրաստանին թողնելու խնդրում, ուսական ղեկավարությունը այդ նույնը չի անում Նախիջևանը Հայաստանի մաս ճանաչելու հարցում: Եվ դա այն դեպքում, երբ տարածքային հարցերում թուրքիային կատարած բոլոր զիջումները տեղի էին ունեցել բացառապես Հայաստանի հաշվին:

Եթե հիշենք, որ Նախիջևանը Հայաստանի կազմում չթողնելու նպատակով այդ երկրամասը Ռուսաստանի հովանու տակ դնելու գաղափարը դեռ մինչև կոնֆերանսը առաջ էր քաշել Շահթախթինսկին, ապա կարող ենք արձանագրել, որ մարտի այդ առաջին օրերին նրա ծրագրի առաջին մասը իրականացել էր. Հայաստանը դուրս էր մղվել Նախիջևանին հավակնող երկրների շարքից: Այժմ արդեն բանակցությունների սեղանին դրված էր այն հարցը, թե Նախիջևանը Ռուսաստանի՞, թե՞ թուրքիայի հովանավորությունը պետք է հանձնել: Ինչպես դա տեղի ունեցավ, ո՞վ է դրանում մեղավոր:

Նախ ասենք, որ ի տարբերություն ուս-թուրքական առաջին կոնֆերանսի (1920թ. Հուլիս-օգոստոս), որտեղ թե՛ պաշտոնական և թե՛ անդրկուլիսյան բանակցությունները վարում էին նույն մարդիկ (Ջիչերին, Կարախան), այստեղ՝ ուս-թուրքական երկրորդ կոնֆերանսում, գլխավոր հարցերը լուծվում էին ոչ թե պաշտոնական նիստերում, այլ անդրկուլիսյան բանակցություններում, որ վարում էին ոչ թե պատվիրակության անդամները՝ Ջիչերինը կամ Կորխմազովը, այլ հիմնականում Ստալինը և մասամբ Շահթախթինսկին (հատկապես Բաթումի և Նախիջևանի խնդրում): Իսկ պաշտոնական նիստերում ուղղակի ամրագրում էին անդրկուլիսյան բանակցություններում ձեռք բերված համաձայնությունները: Այդ է պատճառը, որ մինչև մարտի 10-ը քաղաքական հանձնաժողովի նիստ էր կայացվել: Այդ մասին ուշագրավ տեղեկություն կա 1921թ. ապրիլի 21-ին Ս. Տեր-Գաբրիելյանին գրած Ջիչերինի մի նամակում. «Քաղաքական հանձնաժողովի նիստերը սկսվել են մեր և թուրքերի միջև իրական բանակցությունների սկսվելուց համարյա երկու շաբաթ անց, - գրում է Ջիչերինը: - Բանակցությունների հենց ամենախնտենսիվ շրջանը տեղի ունեցավ ոչ թե հանձնաժողովի նիստում, այլ մասամբ անդրկուլիսյան բանակցությունների միջոցով՝ ազդեցիկ ընկերների աջակցությամբ: Քաղաքական հանձնաժողովը բացվեց միայն այն ժամանակ, երբ հիմնական հարցերը վերջնականապես լուծված էին»¹: Նույն միտքը՝ այն է, գլխավոր հարցերը (հատկապես տարածքային) ոչ պաշտոնական բանակցություններում լուծելու և նոր պաշտոնական նիստերին ներկայացնելու մասին Ջիչերինը ասել է նաև հաջորդ օրը՝ ապրիլի 22-ին Լեգրանին հղած հեռագրում: Բայց ո՞չ նամակում և ո՞չ էլ հեռագրում նա անուններ չի տալիս: Իսկ որ դա Ստալինն էր և մասամբ Շահթախթինսկին, այդ մասին տեղեկություններ կան թուրք գործիչների մոտ և արևիվային որոշ փաստաթղթերում: Այդպիսի մի տիպիկ փաստաթուղթ է Ստալինի մարտի 6-ի նամակը Ջիչերինին (նկատի առնելով փաստաթղթի կարևորությունը, այն մեջբերում ենք ամբողջությամբ).

«Ընկ. Ջիչերին,

Ձեր խղրանքի համաձայն հայտնում եմ Ձեզ թուրքական պատվիրակներին արած իմ հայտարարությունների ճիշտ բովանդակությունը ՌՍՖՍՀ կողմից, իմ կարծիքով, հնարավոր զիջումների մասին.

Բաթումի օկրուգի մեծ մասը մնում է ՌՍՖՍՀ-ին, Արդվինը և

¹ „Геноцид армян...“, стр. 411.

¹ Նույն տեղում, էջ 498-499:

Արդանուշը անցնում են Թուրքիային, ՌԽՖՍՀ և Թուրքիայի միջև նոր սահմանը անցնում է մոտավորապես¹ Լիման - Բորչխա - Ճորոխ գետ - Իմերխևի գետ գծով և այնուհետև դեպի արևելք մինչև Կարսի մարզի սահմանը: Ինքնըստինքյան հասկանալի է, որ ես խոսել եմ մոտավոր գծի մասին, քանի որ այդ մոտավոր գծի հիման վրա ճիշտ սահմանը պետք է որոշվի համապատասխան հանձնաժողովի կողմից:

Զինվորականները համաձայն չեն Արդահանը զիջելու Թուրքիային՝ համարելով այն Թիֆլիսի բանալին, այնուամենայնիվ ես (Ստալինը) հույս ունեմ կոտրել զինվորականներին և հասնել զիջումների այնպես, որ ՌԽՖՍՀ և Թուրքիայի միջև սահմանն անցնի մոտավորապես Կարսի մարզի և Թիֆլիսի նահանգի միջև հին սահմանի գծով, ըստ որում այստեղ ես նույն վերապահությունն եմ անում մոտավոր գծի հիման վրա ճիշտ սահմանի մասին, ինչպիսին արել եմ վերը՝ առաջին կետում:

Թուրքիան մաքրում է Ալեքսանդրապոլը, ըստ որում Ալեքսանդրապոլ - Ղամարլու երկաթգծի ամբողջ երկարությունը (այդ գծից արևմուտք) ՌԽՖՍՀ օգտին ապահովվում է մոտավորապես 20 վերստ խորությունը չերտ:

Նախիջևանի հարցում վերջին խոսքը տրվում է Ադրբեջանի ներկայացուցչին:

Ի. Ստալին»²:

Այսպիսին են այն սահմանները, որ առաջարկել էր Ստալինը Թուրքերին: Ուշագրավ է, որ Ստալինը խոսում է ոչ թե մի կողմից Թուրքիայի և մյուս կողմից Հայաստանի ու Վրաստանի միջև սահմանների մասին, այլ Ռուսաստանի և Թուրքիայի: Սահմանագծի նկարագրությունից դժվար չէ նկատել, որ Վրաստանը փաստորեն ոչինչ չի կորցնում (Արդվինը և Արդանուշը հազիվ թե կարելի է վրացական համարել), կորցնողը Հայաստանն է: Ու այդպես էլ պետք է լիներ, եթե հարցը լուծողները հակահայկական տրամադրություններով վաղուց աչքի ընկած Ստալինը և Շահթախթինսկին էին:

Ստալինի նամակում նշված 4 կետերից Հայաստանի շահերը շոշափում էին հատկապես 3-րդը և 4-րդը: Երրորդից պարզ է դառնում, որ Ստալինը ոչ Արևմտյան Հայաստանի հարց է դրել, ոչ նույնիսկ Կարսի: Բայց պահանջել է ՌԽՖՍՀ-ին (նույնն է թե Հայաստանին) վերադարձ-

նել Ալեքսանդրապոլ - Ղամարլու երկաթգծից արևմուտք 20 վերստ խորությունը մի չերտ: Դա, իհարկե, չէր կարող մեղմել Խորհրդային Հայաստանի ծանր դրությունը, բայց եթե այդ պահանջը կատարվեր, ապա գոնե Արփաչայը և Արաքսը սահմանային գետեր չէին լինի և նրանց ջրերը ազատորեն օգտագործելու հնարավորություն կառաջանար, ինչպես նաև Երևանը և Ալեքսանդրապոլը սահմանային քաղաքներ չէին դառնա, հետևապես ավելի ապահովված կլինեին արտաքին վտանգից և այլն: Դժբախտաբար այդ պահանջը ևս չիրականացավ, Թուրքերը մեծ վտանգ տեսան այդ պահանջի մեջ, համառորեն պնդեցին և հասան նրան, որ մարտի 9-ի հանդիպման ժամանակ այդ պահանջը հանվեց: Նրանք համաձայնեցին միայն զորք չպահել և ամրություններ չկառուցել Արփաչայից արևմուտք մինչև 8 և Արաքսից հարավ՝ 4 վերստ տարածություն վրա¹:

Նախիջևանի հիմնախնդրի լուսաբանություն տեսակետից առավել ուշագրավ է Ստալինի նամակի 4-րդ կետը: Այն միանգամից լույս է սփռում այն հարցի վրա, թե ինչու և ո՞ւմ ջանքերով մարտի առաջին օրերին Հայաստանը դուրս մղվեց Նախիջևանի երկրամասի վրա հավակնող երկրների շարքից և առաջ քաշվեց Ռուսաստանի հովանավորությունը հանձնելու խնդիրը, և թե ինչու ի վերջո Նախիջևանը դրվեց ոչ թե Ռուսաստանի, այլ Ադրբեջանի հովանավորության տակ: Սակայն այստեղ մի առեղծված կա, որի լուծումը հեշտերից չէ: Ինչու՞ Ստալինն իր կարծիքը չի ասում Նախիջևանի մասին այնպես, ինչպես դա անում է Բաթումի և մյուս տարածքների մասին: Չէ՞ որ նա չուրջ մեկ ու կես ամիս առաջ Նախիջևանը հաստատապես Հայաստանի մաս էր համարում (Ս. Տեր-Գաբրիելյանի հետ 1921թ. հունվարի 15-ի զրույցում): Ի՞նչ էր փոխվել այդ ընթացքում, ինչու՞ էր Թուրքերի հետ բանակցություններում Նախիջևանի խնդրի լուծումը թողնում Ադրբեջանի ներկայացուցչին: Դա առավել քան տարօրինակ է, քանի որ Ադրբեջանը Նախիջևանի վրա հավակնողների շարքում չէր կարող լինել այն պարզ պատճառով, որ ի լուր աշխարհի հանդիսավոր ղեկավարացիայով Նախիջևանը հռչակել էր Հայաստանի մաս: Թուրքիան ևս Նախիջևանի վրա հավակնելու իրական հիմքեր չուներ, քանի որ միակ փաստարկը Ալեքսանդրապոլի պայմանագիրն էր, որը ապօրինի էր և չէր ճանաչվում ոչ Խորհրդային Հայաստանի և ոչ էլ Ռուսաստանի կողմից: Միակ երկիրը, որ չէր կորցրել իրավունքը Նախիջևանի վրա, այլ պարզապես

¹ Այս փաստաթղթի առանձին բաժերի (1-ին, 2-րդ, 3-րդ կետերում) ընդգծումները Ստալինի կողմից են արված, 4-րդ կետի ընդգծումը մերն է:

² „Геноцид армян...“, стр. 419.

¹ „ДВП СССР“, т. 3, М. 1959, стр. 604.

ազգաբնակչությանն ինքնորոշվելու իրավունք էր վերապահել, դա խորհրդային Հայաստանն էր: Մինչդեռ այդ ամենը մոռացություն տրվեց, և Նախիջևանի խնդրի լուծումը դրվեց Շահթախթինսկու վրա, որը կոնֆերանսի մասնակից չէր ճիշտ այնպես, ինչպես և Բեկզադյանը: Իր այդ քայլով Ստալինը կանաչ լույս բացեց Նախիջևանյան Հիմնահարցի ազդեցականագույն լուծման համար:

Շահթախթինսկին Հիմար մարզ չէր: Նա արդեն մի քանի ամիս ուղիներ էր փնտրում և հասկացել էր, որ Նախիջևանի հարցին ցանկալի լուծում տալու համար նախ հարկավոր է հիմնավորապես այն դուրս բերել Հայաստանի ենթակայությունից: Նախորդ շարադրանքում արդեն տեսանք, որ դրան էր միտված նրա հայադավ գործունեությունը թե՛ Ալեքսանդրապոլում և թե՛ Նախիջևանում: Սակայն կարճ ժամանակ անց Շահթախթինսկին համոզվել էր, որ Ռուսաստանը ոչ մի կերպ Նախիջևանը չի զիջի Թուրքիային: Ու քանի որ հայտնի ղեկավարացիայի պատճառով Ադրբեջանի մասին ղեռնա խոսք լինել չէր կարող, Շահթախթինսկին հրապարակ է հանում Նախիջևանի երկրամասը Ռուսաստանի հովանավորությանը հանձնելու տարբերակը՝ քաջ գիտակցելով, որ դրան էլ չի համաձայնի Թուրքիան (կվախենա, որ ապագայում Ռուսաստանն այն կվերադարձնի օրինական տիրոջը՝ Հայաստանին), հետևապես հարցի լուծման միակ հնարավոր միջոցը, որը կրավարարի և՛ Ռուսաստանին, և՛ Թուրքիային, Նախիջևանի երկրամասը Ադրբեջանին հանձնելը կլինի:

Այսպիսին էր այն սցենարը, որ կիրառվեց Մոսկվայի կոնֆերանսում Նախիջևանի խնդրի լուծման գործում: Պարզ, հասարակ, բայց նաև արդյունավետ: Որտե՞ղ է այն մշակվել, արդյո՞ք Բաքվում՝ Թուրքական պատվիրակության հետ Ադրբեջանի ղեկավարության ունեցած հանդիպումներում, թե՞ ավելի ուշ՝ Մոսկվայում, Ստալինի հետ Շահթախթինսկու հանդիպումներում, վստահաբար ոչ ոք չի կարող ասել: Մի բան ակնհայտ է. դարձյալ գործ ունենք Թուրք-ադրբեջանյան հակահայկական դավադրության փաստի հետ, որն իրականություն դարձավ Ստալինի գիտությունը ու հովանավորությամբ: Թե ինչ ընթացք ստացավ Նախիջևանյան հիմնահարցի քննարկումը կոնֆերանսի քաղաքական հանձնաժողովում ու ինչպիսին էր Ձիչերինի դիրքորոշումը, կտեսնենք քիչ հետո, իսկ մինչ այդ տեսնենք, թե մարտյան այդ նույն օրերին Թուրք զինվորականությունն՝ ի դեմս Կարաբեքիր փաշայի, ամենայն հավանականությամբ իր կառավարության հանձնարարությամբ, ինչպես էր օժանդակում մոսկովյան իր պատվիրակությանը առաջադրված խնդիրների լուծման համար:

Արխիվային փաստաթղթերը ցույն են տալիս, որ մոսկովյան բանակցությունների օրերին Անկարայի կարավարող շրջանները դարձյալ ակտիվացրել էին հակահայկական քարոզչությունը, տեղի-անտեղի ուսուսական կողմին հիշեցնում էին, որ իրենք են գրավել Շահթախթիի շրջանը, որ Ալեքսանդրապոլի պայմանագրով Նախիջևանի նկատմամբ հովանավորության իրավունք են ստացել և այլն: Մարտի 5-ին Կարաբեքիր փաշան մի նամակ է ուղարկում 11-րդ Կարմիր բանակի հրամանատարին, որում խոսելով իրենց միջև հաստատված բարեկամական հարաբերությունների մասին, որին սակայն փորձում են խանգարել հայ դաշնակցականները Օրդուբադի և Բոյուք-Դևալի¹ շրջանում, խնդրում հրահանգ տալ Նախիջևանի ուսուսական ջոկատներին անխախտ պահել իրենց բարեկամությունը և ավելացնում, թե «վերջին ժամանակներս մշտական բարեկամությունը Նախիջևանում և Շարուրում ոչ ամբողջովին է պահպանվել հայերի հետ (կնքած) մեր Ալեքսանդրապոլի պայմանագրի հիմքի վրա, պատճառը Շարուրի և Նախիջևանի կառավարման գործերում որոշ թյուրիմացությունն էր...»² (ընդգծումը մերն է - է. Զ.):

Ի՞նչ թյուրիմացություն մասին է խոսքը, Կարաբեքիրը չի ասում, այլ մատնացույց է անում Ալեքսանդրապոլի պայմանագիրը, այսինքն՝ Նախիջևանի երկրամասի հովանավորությունը Թուրքիային անցնելը: Բայց դրա հետ մեկտեղ հայտարարում է, թե «այսուհետ Շահթախթիի Թուրքական իշխանությունները պետք է լինեն կարմիր ուժերի իշխանության տակ» ու խնդրում այդ մասին համապատասխան հրաման արձակել:

Կարծում ենք նման առաջարկ անելով Կարաբեքիրը հետապնդում էր լոկ մեկ նպատակ. համոզել խորհրդային ղեկավարությունը, որ Թուրքերը պատրաստ են միավորել իրենց ուժերը Կարմիր բանակի հետ, եթե Մոսկվան համաձայնի ռազմաքաղաքական դաշինք կնքել, ինչը խիստ ձեռնտու էր Անկարային, բայց ոչ Ռուսաստանին: Իսկ մեկ օր հետո՝ մարտի 6-ին Կարաբեքիրը հեռագիր է հղում 11-րդ բանակի հրամանատարին և ավելի հավակնոտ հայտարարություն անում. «Ես հենց նոր ծանուցում ստացա, որ Թուրքիայի կառավարության անունից Քյազիմ-բեյը ժամանել է Թավրիզ: Նա կլինի նաև Նախիջևանում, որպեսզի այնտեղ կարգ ու կանոն հաստատի, իսկ քանի որ Նախի-

¹ Հավանաբար վրիպակ է, պետք է լինի Բոյուք-Վեդի:

² „Геноцид армян...“, стр. 417.

Չեանում մեր կողմնակիցները շատ մեծաթիվ են, ապա ես հուսով եմ, որ այդ վայրերի նկատմամբ մեր բոլոր ցանկությունները կիրադրվեն և մեր բոլոր ընդհանուր թշնամիները կհայտնվեն ծուղակում, քանի որ նրանց ջանադրաբար հետևում են ու որսում»¹ (ընդգծումը մերն է – է. Զ.):

Ի՞նչ է պատասխանել 11-րդ բանակի հրամանատարությունը, համաձայնե՞լ, թե՞ հերքել է «ընդհանուր թշնամիների»՝ հայերի չար դիտավորությունների մասին Կարաբեքիրի հեքիաթները, հայտնի չէ: Հայտնի է միայն, որ հաջորդ օրը Կարաբեքիրը մի նոր հեռագիր է ուղարկում 11-րդ Կարմիր բանակի հրամանատարին, որտեղ դարձյալ խոսում է Ռուսաստանի և Թուրքիայի միջև հաստատված «բարեկամական հարաբերությունների» մասին և անմիջապես ավելացնում. «...Իրա հետ մեկտեղ ափսոսում եմ, որ դաշնակիցները Նախիջևանում խախտում են այդ երկու բարեկամների (միջև) հաստատված լավ հարաբերությունները: Բարի եղեք Նախիջևանի կարմիր հրամանատարությունը տալ թուրքերի հետ միշտ լավ հարաբերություններ պահպանելու Զեր հրահանգները և այն ժամանակ ամեն ինչ Շահթախթիում բարեհաջող կարելի է համարել: ...Համարձակվում եմ Զեզ հավատացնել, որ Շահթախթիի և Նախիջևանի միջև (ընկած) տարածքում, մենք երկիրը օրինակելի կերպով ենք պահում»² (ընդգծումը մերն է – է. Զ.):

Ասում են, որ եթե սուտը համառորեն կրկնես, ապա շուտով ինքդ էլ կսկսես դրան հավատալ: Նախորդ շարադրանքում տեսանք, թե ինչպես փետրվարյան իր նամակներում Կարաբեքիրն աշխատում էր 11-րդ Կարմիր բանակի հրամանատարությանը համոզել, որ բոլոր հայերը դաշնակ են ու թշնամի: Հաջողվե՞ց դա նրան, թե՞ ոչ, հաստատակապես ոչ ոք ասել չի կարող: Բայց որ ամենուրեք նրա աչքին դաշնակ էր երևում, դա հաստատ է և դրա ապացույցը այս հեռագրի ընդգծված տողերն են: Իսկ գուցե Կարաբեքիրը կարծում էր, թե Կարմիր բանակի հրամանատարությունը հայտնի չէ, որ 1918-1919 թվականների ջարդերից ու բռնագաղթից հետո Շարուր-Նախիջևանում հայեր չէին մնացել, բացի Աստապատում և մեկ-երկու այլ գյուղերում իրենց կիսաքաղց գոյությունը քարշ տվող մի քանի հարյուր հայերի՝ հիմնականում կանայք ու ձերուհիներ: Ուրեմն որտեղի՞ց հայտնվեցին դաշնակները Նախիջևանում ու խախտեցին ուս-թուրքական բարեկամությունը:

Վերջապես, եթե ճիշտ է Կարաբեքիրը, ապա ինչո՞ւ Վելիբեկովի բազմաթիվ զեկուցագրերից և ոչ մեկում խոսք չկա Նախիջևանի տարածքում դաշնակների գործունեության մասին:

Ինչևէ, թե ինչպես արձագանքեցին խորհրդային ղեկավարները Կարաբեքիրի մարտի 7-ի հեռագրին, նմանապես հայտնի չէ: Միայն գիտենք, որ Օրջոնիկիձեն և Հեկկերը մարտի կեսերին Վելիբեկովին ուղարկած իրենց հեռախոսագրերում նրանից պահանջել են հարթել հարաբերությունները թուրքերի հետ³: Վելիբեկովին ռազմագիր էր ուղարկել նաև Վեյսալ-բեյը, արտահայտել թուրքերի ջերմ վերաբերմունքը բոլշևիկների նկատմամբ, հույս հայտնել, որ հաստատված բարեկամությունը «կվերածվի սերտ միություն և խնդրել էր ներել իրենց նախկին մեղքերը»²: Բայց հենց այդ նույն օրը Թիրքեչ գյուղում հավաքված խոսվարարների խնդրանքով 20 ասկյարներից կազմված մի խումբ էր ուղարկել օգնության: Իսկ այդ խմբին հետ կանչելու Վելիբեկովի պահանջին էլ պատասխանել էր, թե այդ ասկյարների մասին ինքը ոչինչ չգիտի և, եթե այդ շրջանում այդպիսիք կան, ուրեմն դրանք դասալիքներ են:

Թիրքեչի խոսվության մասին պատմվում է Վելիբեկովի 1921թ. մարտի 19-ի զեկուցագրում: Պարզվում է, որ դասալիք հռչակված ասկյարները Թիրքեչում և նրա շրջակա գյուղերում Վեյսալ-բեյի անուից գորահավաքի կողմնակից են արել և դավթել իշխանությունն այդ գյուղերում: Իսկ երբ գինկոմ Սոկոլովսկին ժամանել է կարմիրբանակայինների մի ջոկատով, ապա կրակել են նրանց վրա, սպանել զինկոմին և մի քանի զինվորների: Այնպես որ, Վելիբեկովը հարկադրված է եղել ավելի մեծաթիվ ուժեր ուղարկել խոսվարարների դեմ: Զեկուցագրում նաև ասված է, որ մարտի 18-ին խոսվությունն արդեն ճնշված էր և որ փախչելով Թիրքեչից, խոսվարարներն ապաստան են գտել Շահթախթիում՝ Վեյսալ-բեյի ճամբարում: Իսկ գյուղացիների մեջ կատարված հարցումներն ու հետաքննությունները անառարկելիորեն հաստատել են, որ նրանք թուրքական կանոնավոր բանակի զինվորներ էին³:

Ինչպես տեսնում ենք, թուրք զինվորականությունը նույնիսկ Մոսկվայի կոնֆերանսի օրերին չէր դադարեցրել հակախորհրդային գործունեությունը, չէր հրաժարվել խոսվության միջոցով երկրամասում իշխանությունը զավթելու նախկինում բազմիցս փորձած, բայց

¹ ՀԱԱ, ֆ. 114, ց. 2, գ. 87, թ. 24:

² Նույն տեղում:

³ Տե՛ս նույն տեղում:

¹ Նույն տեղում:

² Նույն տեղում, էջ 423:

անհաջողություններ ավարտված փորձերը: Մնում է ավելացնել, որ Թիր-քելի խոսվածությունն այդ շարքի վերջին իրադարձությունն էր: Մոսկվայի պայմանագրի կնքումից հետո Նախիջևանի երկրամասում նման իրադարձություններ այլևս տեղի չունեցան: Թուրք-ադրբեջանական համագործակցությունն արդեն տվել էր իր պտուղները, կնքված պայմանագրով Նախիջևանը դրվել էր Ադրբեջանի հովանավորության տակ՝ առանց այդ հովանավորությունը երրորդ պետության, այսինքն՝ Հայաստանին փոխանցելու իրավունքի: Գործն ավարտված էր, Բաքվում և Անկարայում կարող էին հանգիստ չունչ քաշել: Այժմ արդեն Անկարան կարող էր վեյսալ-բեյին ու նրա գլխավորած զորամասին հետ կանչել Թուրքիա, ինչ և արվեց ապրիլին: Մենք էլ վերադառնանք կոնֆերանսի աշխատանքներին և տեսնենք, թե ինչպես ընթացան Նախիջևանի հարցի քննարկումները քաղաքական հանձնաժողովի նիստում:

* * *

Կոնֆերանսի պաշտոնական բացումից (փետրվարի 26) հետո ընդհուպ մինչև մարտի 10-ը քաղաքական հանձնաժողովի նիստեր չգումարվեցին, և տարածքային հարցերի շուրջ տեղի էին ունենում ոչ-պաշտոնական բանակցություններ (առավելապես զրույցների ձևով), որ հիմնականում վարում էին Ստալինը և նրա հանձնարարություններ՝ Շահթախթինսկին: Չիչերինին ուղարկած Ստալինի մարտի 6-ի նամակից նաև տեղակացանք, որ Հայաստանին առնչվող տարածքային սահմանագծման խնդիրները լուծվել էին հոգուտ թուրքերի: Չլուծված մնում էին միայն Բաթումի և Նախիջևանի հարցերը, որոնց շուրջ թուրքերի հետ բանակցությունները Շահթախթինսկին էր վարում: Վերջապես մարտի 7-ին Շահթախթինսկին հպարտություն հայտնում է Չիչերինին իր առաքելությունը հաջողությամբ ավարտելու մասին և ավելացնում, որ ինքը երկարատև զրույց ունեցավ թուրքերի հետ: «Նախիջևանի շրջանի և Բաթումի հարցը այժմ նրանց քիչ է հետաքրքրում, - ասված է Չիչերինին ուղարկած նամակում, - քանի որ նրանք համոզվել են, որ այդ օկրուգների մասին բոլոր վեճերն անօգուտ են...»¹:

ձի՞շտ էր արդյոք Շահթախթինսկին, թե՞ ոչ, կտեսնենք իր տե-

ղում: Բայց որ նա խիստ գերազնահատում էր իր խաղացած դերը ու կարծում, թե թուրքերի հետ բանակցությունների հարցում ինքը անփոխարինելի է, դա փաստ է, և երևում է նրա նամակի այն տողերից, որտեղ խոսում է այն մասին, թե թուրքերի վրա ինչ հսկայական տպավորություն թողեց իր հայտարարությունն այն մասին, որ ինքը այլևս հնարավորություն չի ունենալու գոնե մի քիչ ժամանակ հատկացնել նրանց, քանի որ պիտի զբաղվի իր կառավարության կողմից նրա վրա դրված այլ հարցերի լուծմամբ¹:

Իհարկե, նա չի ասում, թե այդ ինչ այլ հարցեր պիտի լուծի, ինչպես որ չի ասում, որ իր կառավարության կողմից իր վրա դրված գլխավոր խնդիրը՝ թուրքերի միջոցով Նախիջևանը Ադրբեջանին վերադարձնելու խնդիրը, արդեն լուծել է: Դրա փոխարեն Չիչերինին տեղեկացնում է, որ թուրքերը իրեն խնդրել են ստանալ Ստալինի համաձայնությունը՝ հանդիպելու իրենց հետ, որպեսզի հնարավորություն ունենան նրա հետ քննարկել համաձայնագրի բոլոր կետերը: Նույն օրը Չիչերինը նամակով դիմում է Ստալինին, հայտնում թուրքերի խնդրանքը և վկայակոչելով Շահթախթինսկուն, տեղեկացնում, թե նրանք մեծ նշանակություն են տալիս երկաթգծից 20 վերստ հետ քաշվելու խնդրին՝ գտնելով, որ այդ պահանջը Կարսի ռազմական նշանակությունն ի չիք դարձնելու միտում ունի, իսկ Արաքսի հատվածում նրանք ձգտում են, որ հենց գետը սահման լինի: Չիչերինը միաժամանակ Ստալինի ուշադրությունը հրավիրում է այն բանի վրա, որ եթե Արաքսի վերաբերյալ թուրքերի առաջարկն ընդունվի, ապա Սուրմալուի ավազակաբարոքրդերը հեշտությամբ կկարողանան անցնել գետը և թալանել հարակից շրջանները: Սակայն այս անգամ թուրքերի խնդրանքը Ստալինը չի կատարել, հավանաբար, ինչպես Չիչերինն էր ենթադրում, «կուսակցական համագումարով² խիստ կլանված լինելու» պատճառով թեև, ինչպես թուրք պատմաբան Սալահին է գրում, մարտի 3-ին Ստալինն իր մոտ էր հրավիրել թուրք պատվիրակներին և ասել, որ եթե չկարողանան համաձայնության գալ արտգործո՞ղկոմ Չիչերինի հետ, դիմեն իրեն³: Այդ օրերին Ստալինի և թուրք պատվիրակների միջև հանդիպում չկայանալու մասին է վկայում նաև Լենինի մարտի 9-ի հետևյալ գրությունը Չիչերինին. «Ես խիստ անհանգստացած եմ այն բա-

¹ Տե՛ս նույն տեղում:

² Սուրբ ՌԿ(Բ)Կ 10-րդ համագումարի մասին է:

³ Տե՛ս Գ. Գալոյան, նշվ. աշխ. էջ 443:

¹ РГАСПИ, ф. 558, оп. 1, е/х 3529, л. 1

նի համար, որ թուրքերը ձգձգում են Բաթումի մասին համաձայնության ստորագրումը՝ ժամանակ չահելով, քանի դեռ նրանց զորքերը գնում են դեպի Բաթում: Մենք նրանց այդպիսի ձգձգումներ չպետք է թույլ տանք: Քննարկեք այսպիսի միջոց. դուք ընդհատում եք ձեր կոնֆերանսը կես ժամով՝ ինձ հետ խոսելու համար, իսկ Ստալինն այդ ժամանակ կխոսի թուրքական պատվիրակության հետ բացեիբաց, որպեսզի պարզի գործը և ավարտին հասցնի հենց այսօր»¹:

Լենինի ցուցումն իրականացվեց: Նույն օրը տեղի ունեցավ Ստալինի նոր հանդիպումը թուրք պատվիրակների հետ, որն ավարտվեց նոր գործարքով և դարձյալ Հայաստանի հաշվին: Օրակարգից հանվեց Արփաչայից արևմուտք և Արաքսից հարավ 20 վերստանոց մի տարածք թուրքական զորքերից մաքրելու և Հայաստանին (ըստ Ստալինի՝ ՌՆՖՍՀ-ին) վերադարձնելու վերաբերյալ հենց Ստալինի կողմից նախորդ հանդիպման ժամանակ առաջ քաշված պահանջը: Դրա փոխարեն թուրքերը պարտավորվեցին հրաժարվել Բաթում քաղաքի և նավահանգստի նկատմամբ հավակնությունից: Ո՛չ մեր արխիվներում և ո՛չ էլ քաղաքական գործիչների հուշերում, ոչինչ չի պահպանվել անդրկուլիսյան բանակցությունների մասին: Մինչդեռ թուրք հեղինակների մոտ և հատկապես Ալի Ֆուադ փաշայի (Ջեբեսոյ) «Մոսկովյան հուշեր»-ում բավականաչափ նյութ կա: Ահա, օրինակ, ինչ է գրում նա մեզ հետաքրքրող հարցի մասին. «Որոշակի պայմանների և հանգամանքների առկայությամբ կովկասցիների օգտին Բաթում քաղաքից և նավահանգստից հրաժարվելու դիմաց մենք պահանջեցինք հետևյալը. երկարացնել մեր սահմանները Կարսից արևելք ամբողջ տարածության վրա մինչև Արաքսի (Արփաչայի) հնահունը: Այդ կերպ կապահովվեր մեր անվտանգությունը և միաժամանակ տարածքի մի նշանակալից կտոր կմիացվեր մեր երկրին: Մենք նպատակ էինք դրել հասնել մեր պայմանների բավարարմանը պայմանագրի չըջանակներում, որպեսզի վերջնականապես հաստատվենք, և միայն դրանից հետո, վերջին պահին, որոշակի պայմաններով զիջենք Բաթումը, ըստ այդմ ձևացնելով, թե մենք զիջումներ ենք անում կովկասցիներին»² (ընդգծումը մերն է - է. Ջ.):

Մեր որոշ պատմաբաններ³, վկայաբերելով թուրք պատմաբան

Թեֆիկ Բիլիբլիօղլուն, շարունակում են գրել ու խոսել այն մասին, որ կոնֆերանսում Բաթումի փոխարեն թուրքերին առաջարկվել է Սուրմալուն, որ Սուրմալուն փոխանակել են Բաթումի հետ, մոռանալով, որ սահմանային հարցերը լուծող Ստալինը ո՛չ Կարսի և ո՛չ էլ Սուրմալուի պահանջ էր դրել: Նա պահանջել էր 20 վերստանոց մի շերտ Արփաչայից արևմուտք և Արաքսից հարավ (այսինքն՝ Կարսի մարզի Արփաչային հարող հատվածը և Սուրմալուի գավառի Արաքսին հարող հատվածը), ինչը, ինչպես վերը տեսանք, թուրքերը համարեցին իրենց անվտանգությունն ուղղված քայլ: Ուրեմն պետք է խոսել Բաթումի հետ ոչ թե Սուրմալուի, (կոնֆերանսում Սուրմալուի հարցը ընդհանրապես չի շոշափվել) այլ Ստալինի պահանջած 20 վերստանոց շերտի փոխանակման մասին: Չէ՞ որ պատվիրակության անդամը՝ Ալի Ֆուադը, ուղղակի գրում է, որ Բաթումի փոխարեն պահանջել են Կարսից արևելք ամբողջ տարածքը մինչև Արփաչայ և Արաքս: Այդ մասին ուղղակի վկայություն կա նաև մարտի 10-ի նիստում Չիչերինի Հայտարարության մեջ: Խոսելով այն մասին, որ Բաթումը Կովկասի դուռն է, միակ հարմար նավահանգիստը և այն կենսականորեն անհրաժեշտ է ամբողջ խորհրդային աշխարհին, Չիչերինն այնուհետև անցել է Հայթուրքական սահմանի հարցին՝ Հայտարարելով, փե «Ռուսաստանյան կառավարությունը չի պնդի սահմանը Արփաչայից արևմուտք և Արաքսից հարավ անցկացնելու վրա: Բայց ռազմական տեսակետից, ինչպես նաև քրդերի և այլ հրոսակախմբերի ասպատակություններից Ալեքսանդրապոլ-Նախիջևան երկաթգծի պաշտպանություն անհրաժեշտությունը Ռուսաստանյան կառավարությունը հարկադրում է խնդրել Թուրքիային իր վրա պարտավորություն վերցնելու գործ չպահել և բլոկհատուցներ չկառուցել սահմանից հայտնի տարածության վրա մի շերտում, որի լայնությունը չի անցնի 8 վերստից և որը կարող է կրճատվել այնտեղ, որտեղ գետը հեռանում է երկաթուղուց»¹ (ընդգծումը մերն է - է. Ջ.):

Ահա այսպես, մինչդեռ Չիչերինը մարտի 4-ի հեռագրում, իսկ Ստալինը մարտի 6-ի նամակում խոսում էին սահմանը երկաթգծից 20 վերստ հեռավորության վրա անցկացնելու մասին: Հազիվ թե ճիշտ կլինի փնտվել թուրք դիվանագետներին, նրանց վարքագիծը համարել խարդախ, անբարոյական և այլն: Նրանք իրենց առջև դրված խնդիրներն էին լուծում՝ նպատակին հասնելու համար միջոցների մեջ

¹ В. И. Ленин, Полн. собр. соч., т. 52, стр. 92.

² „Геноцид армян...“, стр. 418.

³ Տե՛ս, օրինակ, Ե. Սարգսյան, Դավադիր գործարք, Հայաստան, Ռուսաստան, Թուրքիա, Եր. 1995, էջ 188:

¹ ՀԱԱ, ֆ. 113, ց. 3, գ. 17, թ. 14:

խտրություն չղնելով: Նախատինքի խոսք պետք է ուղղել ոչ թե նրանց, այլ խորհրդային դիվանագիտական ու քաղաքական գործիչներին, որոնք իրենց ուղեղներում մեխել էին միայն մի բան՝ անպայման պետք է պայմանագիր կնքել թուրքերի հետ ու կանխել նրանց հնարավոր անցումը Անտանտի լազեր: Եվ դա այն դեպքում, երբ ակնհայտ էր դարձել, որ Անտանտան դեռևս չի ընդառաջում թուրքերին և Լոնդոնի կոնֆերանսն էլ արդեն ձախողվել է: Այսպիսի պայմաններում թվում է, թե խորհրդային ղեկավարությունը պետք է օգտագործեր ստեղծված նպաստավոր իրադրությունը և այնպիսի կարևոր հարցերում, ինչպիսին տարածքային սահմանադատումն է, կոչտ դիրք պետք է որդեգրեր: Բայց ոչ, կոմունիստ ղեկավարները շարունակում էին պարել թուրքերի դուզուկի տակ: Նույնիսկ Ձիչերինն էր վազքի մեջ մտել և թուրք-ֆրանսիական մերձեցման հնարավորության մասին մամուլում տեղ գտած որոշ կեղծ հաղորդումների ազդեցությունը տակ Ստալինի ու թուրքերի հանդիպման նույն օրը՝ մարտի 9-ին ՌԿ(Բ)Կ Կենտկոմ ուղարկած նամակում խուճապահար գրում է, թե «մեզ հարկավոր է շտապ ավարտել թուրքերի հետ» և առաջարկում «անհապաղ նրանց հետ համաձայնագիր ստորագրել՝ ընդունելով նրանց վերջին առաջարկությունը, որում մենք դեռ որոշ վերապահումներ ու բարելավումներ կմտցնենք, օրինակ՝ երաշխիք հրոսակախմբերի ասպատակությունների դեմ»¹: Նամակում Ձիչերինը նկարագրում է նաև համաձայնեցված սահմանը սկսած Բաթումից հարավ Սարայ գյուղից մինչև Հայ-թուրքական սահմանը, որն անցնելու է Արփաչայ և Արաքս գետերով: Ձիչերինը հատուկ ընդգծում է, որ դա Ալեքսանդրապոլի պայմանագրով գծված սահմանն է, և ավելացնում է, թե «Նախիջևանը հայտարարվում է ինքնավար մարզ Ադրբեջանի հովանավորության տակ»:

Մարտի 10-ին վերջապես գումարվեց քաղաքական հանձնաժողովի առաջին նիստը, որին ներկա էին թուրքական պատվիրակության անդամներ Յուսուֆ Քեմալ-բեյը, Ալի Ֆուադ փաշան, Ռեզա Նուր-բեյը: Ռուսական կողմը ներկայացնում էին Ձիչերինը և Կորխմազովը:

Նիստի նախագահ Յուսուֆ Քեմալ-բեյի առաջարկությամբ նախ քննարկման է դրվում սահմանային հարցը, որի շուրջ ծավալված վիճարանությունները բավականին երկար են տևում: Սակայն վեճերը չէին վերաբերում այս կամ այն տարածքի պատկանելիությանը, այդ հարցերը լուծել էր Ստալինը: Թուրքիայի հյուսիս-արևելյան սահման-

նագծի վերաբերյալ առաջինը կարծիք է հայտնում Ձիչերինը: Նա հայտարարում է, որ իր կառավարությունը պատրաստ է ճանաչել թուրքական «Ազգային ուխտը», բայց «պահանջում է սահմանների հայտնի ուղղում» մասնավորապես Բաթումի հատվածում: Բաթումը համարելով Կովկասի դարպասը և միակ նավահանգիստը, որ կարող է ծառայել խորհրդային հանրապետություններին, Ձիչերինը հայտարարում է, որ Բաթում քաղաքը, նավահանգիստը և նրանից հյուսիս ընկած հատվածը պետք է մնան Վրաստանին, իսկ սահմանը պետք է սկսվի Բաթումից հարավ գտնվող (շուրջ 10 կմ.) ծովափնյա Սարայ գյուղի մոտից:

Կայացած նախնական համաձայնությունը չխախտելով, թուրքական պատվիրակությունը չի առարկում Ձիչերինին, բայց առաջ է քաշում որոշ նախապայմաններ. «1. Լայն ինքնավարություն բնակչության համար, 2. Մշակույթի, կրոնի և հողի ազատ օգտագործման մուսուլմանների իրավունքի ճանաչում, 3. Ազատ տրանզիտ՝ Թուրքիա գնացող և Թուրքիայից եկող ապրանքների և առևտրի ամեն կարգի առարկանների համար, նավահանգստի անվճար օգտագործում ու բոլոր տուրքերից ու մաքսերից ազատում»²:

Տաք վեճեր բորբոքվեցին հատկապես 3-րդ պահանջի՝ ազատ տրանզիտի շուրջ: Ձիչերինը փոխադարձաբար պահանջում է խորհրդային հանրապետություններին ազատ տրանզիտի իրավունք տալ Փոքր Ասիայի որոշ նավահանգիստներում, սակայն թուրքերը մերժում են՝ հայտարարելով, որ ազատ տրանզիտի իրենց պահանջը հիմնված է Բաթումը Վրաստանին զիջելու խնդրի հետ: Այդ վիճաբանությունները մեզ առանձնապես չեն հետաքրքրում, ուստի նրանց վրա կանգ չենք առնում, այլ բավարարվում ենք նշելով, որ ի վերջո ոռուսական կողմը զիջեց և թուրքերի առաջ քաշած պայմանները տեղ գտան Բաթումի վերաբերյալ հոգվածում: Կարծում ենք՝ ավելի ճիշտ կլինի ընթերցողին ծանոթացնել Անկարայի կառավարության երկդիմի վարքագծի մի նոր դրսևորմանը, որ բացահայտվեց այդ նույն օրերին:

Բանն այն է, որ Անկարան թեև քաջատեղյակ էր Բաթումի հարցում Ռուսաստանի դիրքորոշմանը, բայց ևս այնպես, ինչպես Նախիջևանի հարցում, այստեղ ևս փորձեց նրան կատարված փաստի առաջ կանգնեցնել: Դեռ փետրվարի 21-ին՝ օգտվելով վրաց մենչևիկյան կառավարության համար ստեղծված ծանր վիճակից², վերջնագրի կարգով

¹ ՀԱԱ, ֆ. 113, ց. 3, գ. 17, թ. 14:

² Փետրվարի 12-ին վրացիների կողմից օկուպացված Լոռու չեզոք գոտում ծագեց ապստամբություն Վրաստանի դեմ: Օգնության գնացին հայկական ուժերը և 11-րդ Կարմիր բանակը:

¹ „Геноцид армян...“, стр. 426.

պահանջում է ճանաչել Թուրքիայի իրավունքը Բաթումի, Ախալքալաքի և Ախալցխայի վրա: Մարտի 10-ին՝ Մոսկվայի կոնֆերանսի քաղաքական հանձնաժողովի գումարման նույն օրը, Ահմեդ Մուհթարը թուրքական մեջլիսում հայտարարում է. «...Այժմ ես պետք է հաղորդեմ ձեզ, որ վրաց կառավարության համաձայնությունը արևելյան ճակատի մեր զորքերին հրաման է արձակված գրավելու Բաթումը: Բաթումի գրավումից հետո այնտեղ պլեբիսցիտ է կատարվելու, և եթե ազգաբնակչությունը ցանկանա, Բաթումը կլինի մերը»¹: Նույն օրը Կարաբեքիրը հեռագրում է 11-րդ Կարմիր բանակի հրամանատար Հեկկերին և հայտնում նշված շրջանները գրավելու վերաբերյալ իր զորքերին սոված հրամանի մասին: Իսկ հաջորդ օրը՝ մարտի 11-ին Օրջոնիկիձեին հասցեագրած գրությունում տեղեկացնելով, որ ինքը գործել է իր կառավարությունից ստացած հրահանգների համաձայն, միաժամանակ իր կառավարությանն արդարացնելու այլ միջոց չի գտնում, քան դարձյալ մեղքը բարդել «չարամիտ» հայերի վրա: «Հայերը, որ ամենուրեք և ամեն տեղ վարել են ու մնում են մուսուլմանների նկատմամբ թշնամական հարաբերություններում, - ասված է այդ գրությունում, - սովյալ դեպքում նույնպես օգտվելով Վրաստանի տարածքում տեղի ունեցող ռազմական գործողություններից, կարող էին չարաչահել, և Բաթումի, Ախալցխայի ու Ախալքալաքի շրջանների բնակչությանը, որտեղ ինչպես հայտնի է, բնակչության մեծամասնությունը գերազանցապես մուսուլմանական է, նորից պատերազմի մեջ քաշել և մատնել աղքատության»²: Ըստ Կարաբեքիրի, «հենց մուսուլման բնակչությանն այդ անխուսափելի սարսափներից», ինչպես նաև ռուսական և վրացական զորքերի միջև ռազմական գործողություններից փրկելու նպատակ է հետապնդում իր կառավարությունը: Նա նույնիսկ Օրջոնիկիձեին առաջարկում է զորք չմտցնել այդ շրջանները:

Մարտի 11-ին թուրքական մի ջոկատ մտնում է Բաթում, իսկ Թիֆլիսում Անկարայի դիվանագիտական ներկայացուցիչ Բյազիմ-բեյը այն հռչակում է Թուրքիայի անբաժանելի մասը: Թուրքական ջոկատներ են հայտնվում նաև Ախալցխայի և Ախալքալաքի շրջաններում:

«Կարմիր աստղ» օրաթերթում ուշագրավ ու մեզ՝ Հայերիս համար ուսանելի, տեղեկություններ են պահպանվել այն մասին, թե վրացիները ինչպես կարողացան Բաթումը զերծ պահել թուրքերի ոտն-

ձգություններից: Օրջոնիկիձեի հանձնարարությունը մարտի 16-ի գիշերը և 17-ի առավոտյան Վրաստանի հեղկոմի անունից Օրախելաչվիլին հեռախոսային խոսակցություն է ունենում Վրաստանի մենչևիկյան կառավարության նախագահի տեղապահ Լորդկիպանիձեի հետ¹, պահանջում բացատրություն Բաթում թուրքական զորքեր թուլյատրելու համար, հայտնում Անկարայի կառավարության և Կարաբեքիրի արած հայտարարությունների ու հեռահար նպատակների մասին և վերջում ավելացնում. «Բաթումին անպայման վտանգ է սպառնում, միակ փրկությունն է անմիջապես մեր զորքերը մտցնել այնտեղ և ձեր բոլոր զորքերին ենթարկել մեր հրամանատարությանը՝ Բաթումը պաշտպանելու և Վրաստանի ձեռքին պահելու նպատակով: Ձեր կողմից համաձայնության և դատարկ վագոններ տրվելու դեպքում մեր զորքերն այսօր և եթե կարող էին մտցվել Բաթում...»²: Հաջորդ օրն առավոտյան Լորդկիպանիձեին հայտնում է, որ ընդունում են հեղկոմի առաջարկությունը և հենց նրանց տրամադրած վագոններով էլ Կարմիր բանակի զորամասերը նույն օրը երեկոյան (ժամը 23-ին) չարժվում են դեպի Բաթում և 18-ի առավոտյան մտնում քաղաք³:

Ահա այսպես երեկվա թշնամիները՝ վրաց կոմունիստներն ու մենչևիկները, որ ավելի քան մեկ ամիս արյուն էին հեղում մարտի դաշտերում, վճռական պահին համաձայնության եկան՝ հայրենիքի շահը գերադասելով ամեն ինչից: Կարծում ենք ընթերցողը կընդունի, որ հայրենասիրության դասական օրինակ է սա, որով հայ քաղաքական գործիչները դժբախտաբար չփայլեցին: Եվ որպեսզի մեր խոսքը կիսատ չմնա, ներկայացնենք նաև Ստալինի և Օրջոնիկիձեի կեցվածքն այս հարցում: Մարտի 19-ին Ստալինը հեռագրում է Օրջոնիկիձեին. «...աչխատիր ուժեղ հարվածով թուրքերին քչել Բաթումից, իսկ հետո դա բացատրել թյուրիմացությունը: Նախաձեռնությունն իր վրա պետք է վերցնի հրամանատարությունը. վրացական կառավարությունը պետք է լռի, մնա ստվերում»⁴:

Ստալինի այս գայրալից հեռագիրը հետևանք էր այն բանի, որ ռու-

¹ Թեև 1921թ. փետրվարի 25-ին Կարմիր բանակը գրավել էր Թիֆլիսը և Վրաստանը հռչակվել էր խորհրդային հանրապետություն, բայց ռազմական գործողությունները կողմերի միջև դեռևս շարունակվում էին Արևմտյան Վրաստանի տարածքում:

² «Կարմիր աստղ», 20 մարտի 1921թ.:

³ Տե՛ս նույն տեղում:

⁴ „Геноцид армян...“, стр. 468.

¹ «Կարմիր աստղ», Թիֆլիս, 22 մարտի 1922թ.:

² „Геноцид армян...“, стр. 438.

սական զորամասերի Բաթում մտնելուց հետո էլ Կարաբեքիրը շարունակում էր համառել և թուրքական ջոկատը պահել Բաթումում: Օրջոնիկիձեն էլ Բաթումում գտնվող թուրքական ջոկատին «թյուրիմացաբար ուժեղ հարված» հասցնելուց առաջ մի բավականին կոշտ հեռագիր է ուղարկում Կարաբեքիրին, որում այսպիսի տողեր կան. «Լինելով թուրքիայի հետ զինվորա-քաղաքական դաշինք կնքելու անկեղծ կողմնակից, ես պետք է անկեղծորեն հայտարարեմ, որ վերջին անցքերը ամենամեծ վտանգի են ենթարկում կայացած բոլոր համաձայնությունները: ...Ես զարմացած եմ, ես ի վիճակի չեմ հասկանալու վերջին անցքերը: ...Մեր զորքերը մտան Բաթում և ձեռնարկում են գրավելու Մոսկվայի կոնֆերանսում որոշված սահմանները, այն սահմանները, որոնք հայտնի են ձեզ և Անգորային: Բաթումն այսուհետ ոչ ոքի կողմից չի կարող վեճի նյութ դառնալ: Թյուրիմացություններից և ոչ ոքի համար, բացի մեր թշնամիներից, հարկավոր չեղող տարակարծություններից խուսափելու համար, դուք ձեր զորքերին դուրս կհանեք Բաթումից և այլ շրջաններից: Դրանով մենք ամբողջ աշխարհին կցուցադրենք մեր համաձայնագրերի ու մեր դաշնագրի սրբությունն ու անխախտելիությունը»¹:

Վրաստանի չահերի պաշտպանության խնդրում վրաց քաղաքական ու կուսակցական գործիչների՝ թե՛ այդ օրերին և թե՛ դրանից հետո, ցուցաբերած անզիջում վարքագծի մասին ուրիշ այլ փաստեր էլ կան: Բայց կարծում ենք՝ վերը նշածն էլ բավարար է ճիշտ պատկերացում կազմելու համար: Միայն ավելացնենք, որ թուրքական զորքերից Ալեքսանդրապոլը և օկուպացված մյուս տարածքները մաքրելու հարցում նման վճռական պահանջ ոչ ոք չէր դնում ընդհուպ մինչև ապրիլի երկրորդ կեսը և թուրք զինվորականներն անարգել շարունակում էին թալանը, բռնաբարությունը և խաղաղ բնակիչների կոտորածը: Մեր պատմագիտական գրականության մեջ այդ ամենի մասին բավականաչափ հիմնավոր փաստեր կան: Բայց որպեսզի շատ չհեռանանք մեր բուն խնդրից՝ Նախիջևանյան հիմնահարցից, վերադառնանք կոնֆերանսի քաղաքական հանձնաժողովի մարտի 10-ի նիստին:

Ուչագրավ է, որ Նախիջևանի հարցը առաջ քաշեց ոչ թե Չիչերինը, այլ Յուսուֆ Քեմալը: Այն բանից հետո, երբ Չիչերինը հայտարարեց, որ իր կառավարությունը չի պնդում սահմանը Արփաչայից արևմուտք և Արաքսից հարավ անցկացնելու վրա, բայց պահանջում է 8 վերստա-

նոց ապառազմականացված զոտի երկաթուղու անվտանգությունը ապահովելու համար, Յուսուֆ Քեմալը պատասխանեց, որ թուրքական պատվիրակությունը համաձայն է սահմանի այդ հատվածում մշտական զորք չպահել, բայց գտնում է, որ այնտեղ պետք է ունենա իր վարչությունը և ոստիկանությունը: Յուսուֆ Քեմալ-բեյը նաև հայ-թուրքական սահմանի ամբողջ երկարությամբ 8 վերստանոց ապառազմականացված շերտի ստեղծումը համարեց մեծ զիջում և պահանջեց այն տարածել միմիայն Արփաչայի գոտու վրա, իսկ Արաքսի գոտում այն կրճատել մինչև 4 վերստ, պատճառաբանելով, թե Արաքս գետը կարող է դիտվել որպես բավարար պաշտպանություն և բացի դրանից, այդ գոտին 80-100 կմ երկարություն ունի և եթե անհրաժեշտություն առաջանա, ապա թուրքական զորքերի կողմից այդ շրջանի պաշտպանությունը խիստ կգժվարանա:

Յուսուֆ Քեմալը, իհարկե, չի ասել, թե ովքե՞ր են այդ ազդեցությունները, ումի՞ց պետք է պաշտպանեն իրենց սահմանները, բայց պարզից էլ պարզ է, որ նկատի ունեն «իմպերիալիստ» հայերին: Դրա համար էլ նա իսկույն կեթ առաջ է քաշում Նախիջևանի հարցը ու հայտարարում, թե «թուրքական պատվիրակությունը գտնում է, որ հենց բնակչության կողմից թուրքական զորքերի հրավիրման փաստի ուժով Նախիջևանը գտնվում է թուրքիայի հովանավորության տակ: Այնուամենայնիվ, նա համաձայն է այդ հովանավորությունը զիջել Ադրբեյջանին՝ պայմանով, որ Ադրբեյջանից պարտավորություն ստանա չվերազիջել այդ հովանավորությունը երրորդ պետության»¹: Թուրք պատվիրակը չի ասում, որ երրորդ պետություն ասելով նկատի ունի Հայաստանը, թեև առանց դրան էլ պարզ էր, որ խոսքը Հայաստանի մասին է, մանավանդ որ անմիջապես ավելացրել էր, թե «թուրքական զորքերին դժվար կլինի անտարբեր նմալ, եթե դա նորից տեղի ունենա, ինչպես դա մի անգամ եղել է, և եթե նորից կրկնվի բնակչության կոտորածը»²:

Եթե սելը չի ճոռում, սելվորն է ճոռում: Նախիջևանահայություն 1918 և 1919 թվականների ջարդերն ու բռնազաղթը մոռացած, երկրամասի հայաթափությունը մոռացած, Յուսուֆ Քեմալը մատնացույց է անում հայկական զորքերի 1920թ. հուլիսյան առաջխաղացումը Շարուրում, որի հետևանքով տեղի մահմեդական ազգաբնակչության մի մասը բռնել էր գաղթի ճանապարհը: Ըստ որում, գաղթում էին դեռ

¹ ՀԱԱ, ֆ. 113, ց. 3, գ. 17, թ. 19:

² Նույն տեղում:

¹ «Կարմիր աստղ», 22 մարտի 1921թ.:

մինչև հայկական զորքերի երևալը: Իսկ դա նշանակում է, որ ջարդեր տեղի ունենալ չէին կարող:

Չհակադարձել Յուսուֆ Քեմալին Չիչերիներ չէր կարող, բայց զարմանալիս այն է, որ նախիջևանահայության ջարդերի փոխարեն սկսեց խոսել այն մասին, որ «ոչ մուսուլման ազգաբնակչության ջարդեր հավասարապես տեղի են ունեցել, օրինակ, Կարսում»: Մեղադրանքի խոսք ասել Չիչերիների հասցեին, ճիշտ չի լինի, քանի որ նույնիսկ հայտնի չէ, թե նա գիտե՞ր 1918 և 1919 թվականների նախիջևանյան իրադարձությունների մասին: Ուրիշ բան, որ Չիչերիներ Նախիջևանի խնդրի քննարկումների ամբողջ ընթացքում, իսկ այն բավականին երկար է տևել, ոչինչ չասեց այն մասին, որ Նախիջևանը բուն հայկական տարածք է և շարունակում է մնալ այդպիսին, քանի որ Ալեքսանդրապոլի ապօրինի պայմանագիրը չի ճանաչվել ոչ խորհրդային Հայաստանի, ոչ Ռուսաստանի կողմից, իսկ Ադրբեջանն էլ հանդիսավոր դեկլարացիայով այն հռչակել էր Հայաստանի անբաժանելի մաս: Ճիշտ է, վերջինս էլ իր հերթին Նախիջևանի ազգաբնակչությանը ինքնորոշման իրավունք էր տվել, բայց այն դեռևս ի կատար էր ածվել: Այդ ամենի մասին նա հիանալի գիտեր, բայց նայնպես իսկույն համաձայնվում է, որ Նախիջևանը դրվի Ադրբեջանի հովանավորության տակ և առարկում միայն այդ հովանավորությունը երրորդ պետության չփոխանցելու պարտավորության դեմ:

Մենք այն կարծիքին չենք, թե Չիչերիներն ի զորու էր փոխելու Կենտկոմի հանձնարարությունը թուրք պատվիրակների հետ Ստալինի կայացրած համաձայնությունները: Նա անում էր այն, ինչ նրան ասում էին: Բայց կարո՞ղ էր իր փաստարկներում օգտագործել այն իրողությունը, որ տվյալ պահի դրությամբ Նախիջևանը եթե ոչ փաստական, ապա իրավական դրությամբ Հայաստանի կազմում էր, որի վկայությունն է թեկուզ այն, որ Նախիջևանի արտակարգ կոմիսարը՝ Վելիբեկովը, իր բոլոր զեկուցագրերը նախ հասցեագրում էր ՀԿԿ Կենտկոմ և Հայհեղկոմ ու նոր միայն 11-րդ բանակի ռազմահեղափոխական խորհրդին և սյուսներին: Եվ եթե Նախիջևանում թուրքական զորքեր կան, ապա դրանք պարզապես օկուպանտներ են, ինչը Չիչերիներն ասել չէր կարող, քանի որ հենց Ռուսաստանի համաձայնություններ էին մտել այնտեղ: Նա կարող էր հերքել Յուսուֆ Քեմալի հիմնավորումները, և դա արեց. «Ռուսական պատվիրակությունը չի կարող ընդունել ձևակերպում, ըստ որի Թուրքիան գիջում է հովանավորության իր իրավունքը՝ նկատի առնելով այն, որ Ալեքսանդրապոլի պայմանագիրը չէր վավերացվել, իսկ բնակչության կողմից թուրքական զորքերի հրավի-

րումը իրավաբանական արժանահավատություն ընդլծ չէր ստացել որպեսզի ծառայեր որպես այդպիսի հովանավորության հիմնավորում»¹:

Նախիջևանի հարցի քննարկման ընթացքից դժվար չէ համոզվել, որ հարկադրված լինելով համակերպվել և ընդունել Նախիջևանը Ադրբեջանի հովանավորությանը հանձնելու թուրքական առաջարկը, այնուամենայնիվ, Չիչերիներ ձգտում էր բացառել այդ հովանավորությունն ապագայում չվերագրվելու մասին թուրքական պահանջը: Եթե հիշենք, որ ընդհուպ մինչև կոնֆերանսի գումարումը նա միշտ էլ այն կարծիքին է եղել, որ Նախիջևանը Հայաստանի անբաժանելի մաս է, ապա նրա այդ ձգտումը հասկանալի կդառնա:

Դժբախտաբար այդ ուղղությամբ Չիչերիների գործադրած ջանքերն անհաջողության մատնվեցին: Գործին չօգնեց ոչ նրա այն մատնանշումը, որ ժողովրդական ինքնիշխանության արժանապատվությունը թույլ չի տալիս կենդանի էակների վրա իրավունքը վերագրվել մեկ ուրիշին, ոչ այն, որ պարտավորություն է դրվում մի պետության վրա, որը կոնֆերանսում ներկայացված չէ: Թուրքերի համառությունը կոտրել նրան չհաջողվեց. նրանք մերժեցին Չիչերիների առաջարկը՝ սահմանափակվել նրանով, որ «Նախիջևանը մշտական կապի մեջ կլինի Ադրբեջանի հետ և կօգտվի ինքնավարությունից՝ նրա հովանավորության տակ», առանց որևէ պարտավորություն հիշատակելու և պահանջեցին արձանագրության մեջ մտցնել հետևյալ ձևակերպումը. «Պայմանով, որ Ադրբեջանն այդ հովանավորությունը չի գիջում ոչ մի երրորդ պետության»²:

Ո՞ւմ գաղափարն էր դա, Ծահթախթինսկո՞ւ, ով Ադրհեղկոմի հայտնի դեկլարացիան համարել էր դավաճանություն, թե՞ թուրքերի, որոնք չէին հապաղել իրենց դժգոհությունը հայտնելու վիճելի տարածքների հարցի այդօրինակ լուծման համար: Ոչինչ հայտնի չէ, լուծման թուրք հեղինակները, լուծման են նաև ադրբեջանցիները: Ասենք դա էական էլ չէ: էականն այն է, որ մի անգամ էլ բացահայտվեց, որ մեր թշնամիները շատ ավելի միասնական էին, շատ ավելի հետևողական Հայաստանն անդամահատելու հարցում, իսկ վերջինս էլ նախկինի պես մնացել էր միայնակ:

Քաղաքական հանձնաժողովի մարտի 10-ի նիստում քննարկված մյուս հարցերին, ինչպես նաև պայմանագրի նախագծի մի քանի հոդ-

¹ Նույն տեղում:

² Նույն տեղում, էջ 18:

վածների քննարկումներին ու նրանց շուրջը կայացած համաձայնություններին մենք չենք անդրադառնա: Միայն ավելացնենք, որ այդ նիստում Նախիջևանի սահմանների խնդրին չէին անդրադարձել, այլ որոշել էին, որ ռազմական փորձագետները կորոշեն այդ սահմանները և կներկայացնեն հաջորդ նիստին, որի գումարումը նախատեսված էր մարտի 12-ին: Այդ է պատճառը, որ այդ օրվա նիստին մասնակցեցին նաև ռազմական փորձագետները՝ Բորրիչչեր և Սամոյլոն ռուսական կողմից և Սեյֆի-բեյն ու Սաֆվետ-բեյը՝ թուրքական կողմից: Նիստին նախագահում էր Չիչերինը:

Թուրքական պատվիրակության առաջարկությամբ նախ քննարկվում է մարտի 10-ի նիստի արձանագրությունը: Յուսուֆ Քեմալը ներկայացնում է մի շարք ուղղումներ ու դիտողություններ, որոնց թվում քրդերի կողմից սահմանի խախտման հնարավորության, Կարսի մարզում ոչ մուսուլման ազգաբնակչության ջարդերի, կովկասյան հանրապետությունների սուվերենության և այլն:

Ըստ Յուսուֆ Քեմալի, անգլիացիները փորձել են քրդերին ոտքի հանել Թուրքիայի դեմ, բայց հաջողություն չեն ունեցել: Քրդերը ձեռքակալել են անգլիացի սպաներին ու քարոզիչներին, հանձնել իշխանություններին և հայտարարել Թուրքիային իրենց նվիրվածության մասին: Ելնելով դրանից՝ Յուսուֆ Քեմալը հետևություն է անում, թե քրդերը խորհրդային հանրապետությունների նկատմամբ նույն վերաբերմունքն ունեն, ինչ և Թուրքիան, հետևապես թուրքական պատվիրակությունը չի կարող համաձայնել քրդերի վերաբերյալ ռուսական պատվիրակության արած հայտարարության հետ:

Բավական երկարաչուն էր թուրք պատվիրակի խոսքը Կարսի մարզում քրիստոնյա ազգաբնակչության ջարդերի մասին նախորդ նիստում Չիչերինի արած հայտարարության կապակցությամբ: Ըստ Յուսուֆ Քեմալի, դրանք կեղծ լուրեր են, որ տարածել են հայերը իրենց կողմից մուսուլմանների կոտորածը քողարկելու նպատակով: Նա հրապարակում է թվեր (մուսուլմանական գյուղերի ավերման և բնակչության բնաջնջման մասին), որոնք եթե ճիշտ լինեն, ապա Կարսի մարզում պետք է այլևս մուսուլման մնացած չլիներ:

Յուսուֆ Քեմալը ինչպես քրդերի, այնպես էլ Կարսի մարզի մուսուլմանների կոտորածի մասին արած իր հայտարարությունները պահանջում է մտցնել արձանագրության մեջ: Սակայն Չիչերինը չի առարկում միայն քրդերի հարցում, այն էլ վերապահում անելով, որ նրանց կողմից սահմանի խախտման դեպքում պատասխանատվությունն ընկնում է թուրքական կառավարության վրա: Ինչ վերաբերում է հա-

յերի կողմից Կարսի մարզի մուսուլմաններին բնաջնջելուն, ապա նա հայտարարեց, որ հնարավոր չէ այդ հարցի շուրջ քննարկումներ սկսել, քանի որ ներկա չէ հայկական պատվիրակությունը, որը կարող էր այդ հարցի մասին տեղեկություններ հայտնել: Ուստի Չիչերինն առաջարկեց բավարարվել միայն նրանով, որ ռուսական պատվիրակությունն այն ընդունում է ի գիտություն:

Առանձնապես սուր բնույթ ստացան ու ձգձգվեցին կովկասյան հանրապետությունների սուվերենության մասին նախորդ նիստում Չիչերինի արած հայտարարության կապակցությամբ ծավալված քննարկումները: Բայնն այն է, որ տարածքային սահմանադատումների շուրջ կայացված համաձայնություններից հետո Չիչերինը հանդես էր եկել մի հայտարարությամբ, որում ասված էր. «...քանի որ այդ սահմանը պետք է հաստատվի, ինքնըստինքյան հասկանալի է, որ բոլոր շահագրգռված պետությունների սուվերենությունն իրենց սահմաններում լիովին կիրականացվի և որ մի կողմից Թուրքիայի և մյուս կողմից Հայաստանի ու Վրաստանի միջև կնքվելիք պայմանագրերում ոչինչ չի կարող այն սահմանափակել»¹: Դա համարելով համաձայնության էական պայման՝ Չիչերինն ընդգծել էր, որ ռուսական կառավարությունը չի կարող ճանաչել այնպիսի որոշում, ինչպիսին է գինված ուժերի սահմանափակում կամ վերահսկողության իրավունքի սահմանում և որ այդ ուղղությամբ Թուրքիայի ձեռնարկած ամեն մի փորձ կհամարի իր դեմ ուղղված:

Դժվար չէ նկատել, որ Չիչերինի այս հայտարարությունն առանձնապես կարևոր էր Ռորհրդային Հայաստանի համար, քանի որ փաստորեն ուղղված էր Ալեքսանդրապոլի պայմանագրի դեմ, որի օրինականությունն վրա թուրքերը դեռևս չարունակում էին պնդել: Թուրքական պատվիրակությունը չէր առարկել Չիչերինին, հայտարարել էր, որ ընդունում է ի գիտություն, որ Ռուսաստանը դեմ չէ Թուրքիայի կողմից այդ հանրապետությունների հետ պայմանագրերի կնքմանը: Թվում էր, թե հարցը դրանով սպառվեց: Բայց մարտի 12-ի նիստում թուրքական պատվիրակությունը նորից է վերադառնում Հայաստանի և Վրաստանի սուվերենության խնդրին, ներկայացնում դեկլարացիա, որից պարզվում է, որ թուրքերն այդ հանրապետությունների սուվերենությունը չխախտելու իրենց պարտավորությունը տարածում են միմիայն երկու կետի վրա՝ 1. գինված ուժերի սահմանափակում, 2. վերահսկողության իրավունք:

¹ Նույն տեղում:

Համաձայնել Յուսուֆ Քեմալի առաջարկին և այդ դեկլարացիան մտցնել նիստերի արձանագրությունների մեջ՝ Ձիչերինը չէր կարող: Սուվերենությունից իրավունքի խախտման հնարավորությունները բազմաթիվ են ու բազմազան: Հնարավոր չէ նախօրոք սահմանել, թե ինչը կհամարվի սուվերենություն խախտում և ինչը՝ ոչ: Ուստի Ձիչերինն ընդգծում է, որ ինքը ավելի ընդհանուր հայտարարություն է արել՝ ներառելով նաև այդ երկու դեպքերը և ավելացնում, որ խորհրդային հանրապետությունները Ռուսաստանի հետ այնպիսի սերտ դաշինքի մեջ են գտնվում, որ վերջինս չի հանդուրժի նրանց սուվերենություն ամեն մի խախտում ընդհանրապես և այդ հարցում նրանք կստանան ռուսական կառավարության լիակատար աջակցությունը: Իրենց հերթին թուրք պատվիրակները՝ ձգտելով սողանք թողնել ապագայի համար, պահանջում են կոնկրետացնել և այժմևեթ որոշել, թե որոնք են այն դեպքերը, որ կարելի է սուվերենություն խախտում համարել: Գործն այնտեղ հասավ, որ պահանջեցին պարզել, թե արդյո՞ք Հայաստանը, Վրաստանը անկախ պետություններ են, եթե անկախ են, կարո՞ղ են պայմանագրեր կնքել, իսկ Ռուսաստանը՝ որպես նրանց դաշնակից, կարո՞ղ է միայն խորհուրդներ տալ: Սակայն տարհամոզել Ձիչերինին՝ թուրքերին չհաջողվեց: Մխալված չենք լինի, եթե ասենք, որ սուվերենություն հարցը այն եզակիներից էր, որում նա դրսևորեց կամք, համառություն և ի վերջո հասավ նրան, որ թուրքական պատվիրակությունը հայտարարեց, որ Ձիչերինի հայտարարությունն ընդունում է ի գիտություն:

Արձանագրությունների հարցի շուրջ բանավեճերն ավարտելուց հետո միայն կոնֆերանսը ձեռնամուխ եղավ սահմանների վերաբերյալ ռազմական փորձագետների կազմած զեկուցումների քննարկմանը: Ըստ օրակարգի՝ դա նախավերջին հարցն էր, բայց դարձավ վերջինը, քանի որ թուրքական պատվիրակության խնդրանքով պայմանագրի ռուսական նախագծի քննարկումը հետաձգվեց հաջորդ նիստին:

Ռազմական փորձագետները նախ հրապարակեցին ձևակերպումը, որը պետք է մտցվեր պայմանագրի տեքստի մեջ և ապա ճիշտ սահմանագիծը որոշող ակտ: Թուրք-վրացական և թուրք-հայկական (Արփաչայի և Արաքսի գոտի) սահմանագծի շուրջ առանձնապես միճաբանություններ չծավալվեցին: Ուղղակի ռուսական պատվիրակության խնդրանքով որոշվեց այդ ակտում զետեղել քաղաքական հանձնաժողովի մարտի 10-ի նիստի արձանագրության մեջ մտցված այն վերապահությունը, ըստ որի՝ Թուրքիան պարտավորվում էր թուրք-հայկական նշված սահմանագրում գինված ուժեր չպահել և ամրություններ

չկառուցել: Բայց երբ հրապարակվեցին Հայաստանի և Նախիջևանի միջև սահմանները, ապա պարզվեց, որ թուրք փորձագետների պնդմամբ բուն Նախիջևանի գավառին է միացվել ոչ միայն Շարուր-Դարալագյազի գավառը, այլև Երևանի գավառի հարավ-արևելյան մասը՝ ընդհուպ մինչև Արարատ կայարանը: Դա առավել քան տարօրինակ էր, քանի որ նույնիսկ մուսավաթական Ադրբեջանը երբեք չէր հավակնել Երևանի գավառի որևէ մասի վրա և իր ծայրագույն սահմանը համարել էր Գայլի Դրունքը: Հենց այդ հանգամանքը նկատի ունեն Ձիչերինը՝ հայտարարելով, որ փորձագետների գծած սահմանը գերազանցում է Ադրբեջանի մաքսիմում պահանջը և թեև «հարցը առաջնակարգ կարևորություն չունի»՝ խորհրդային հանրապետությունների միջև սերտ կապերի գոյություն նկատառմով, - չարունակեց Ձիչերինը, - բացեալայնպես, նախընտրելի կլինի մնալ Շարուր-Դարալագյազի օկրուգի սահմաններում՝ որպես ազգագրական սկզբունքին առավել համապատասխանող»¹:

Ինչպես տեսնում ենք, այստեղ Ձիչերինի տոնը մեղմ է, հաշտվողական: Նա ոչինչ չի ասում այն մասին, որ այդ խեղճ ու կրակ Հայաստանին բոլոր կողմերից արդեն անդամահատել են, չի պահանջում չափավորել պարտավոր և վերջ տալ թալանին: Այլ խոսում է խորհրդային հանրապետությունների համար այդ հարցի «առաջնակարգ կարևորություն» չունենալու մասին և դրանով իսկ թուրք դիվանագետներին հնարավորություն տալիս պնդել իրենց պահանջի վրա: Յուսուֆ Քեմալը հայտարարում է, թե իբր հենց այդ մասերում են տեղի ունեցել այն «ցավալի իրադարձությունները», որոնք հանգեցրել են թուրքական զորքերի հրավիրմանը և որ այդ շրջանը ամբողջովին մուսուլմաններով է բնակեցված: «Թուրքիան վստահ է, - ասել է Յուսուֆ Քեմալը, - որ Նորհրդային Ադրբեջանը կանի իր իշխանության տակ գտնվող ամեն ինչ, որպեսզի կատարի իր պարտքը Թուրքիայի, Ռուսաստանի և մարդկության առաջ և դրա համար էլ ցանկալի է այդ տարածքի հովանավորությունը ևս նրան հանձնարարել»² (ընդգծումը մերն է - է. Զ.):

Ահա թե որքան վերամբարձ ու նաև անպատկառ է եղել այն ոճը, որով թուրք դիվանագետները խոսում էին իրենց ռուս կոլեգաների հետ: Կարծես վերջիններս երկնքից էին իջել, անգետ ու անտեղյակ,

¹ Նույն տեղում, գ. 21, էջ 54:

² Նույն տեղում:

որոնց կարելի է հեշտութեամբ համոզել, որ մարդկութեան ճակատագիրը հենց այդ մի բուռ հողից է կախված: Յուսուֆ Քեմալի պատճառաբանությունը սակայն չէր համոզել Չիչերինին, և վերջինս առաջարկեց Նախիջևանի և Հայաստանի միջև սահմանը համարել ժամանակավոր, և եթե հետագայում այդ երկու պետությունների միջև անմիջական բանակցությունների միջոցով սահմանի որևէ փոփոխություն կատարվի, ապա այն չպետք է դիտվի որպես պայմանագրի խախտում:

Յուսուֆ Քեմալը համատու է, պնդում, թե այդ հարցը խիստ կարևոր է թուրքիայի արևելյան սահմանի անվտանգության տեսակետից և պետք է վերջնական լուծում ստանա՝ բացառելով այդ կապակցությունը Հայաստանի և Ադրբեջանի միջև որևէ բանակցության հնարավորություն: Բայց չի բացատրում, թե այդ փոքրիկ հողակտորից ի՞նչ վտանգ կարող է ծագել թուրքիայի համար այն դեպքում, երբ թուրքիայի և Հայաստանի միջև սահմանները ձգվում էին մի քանի հարյուր կիլոմետր: Եվ ինչո՞ւ Հայաստանը թուրքիային պիտի սպառնար հենց այդ տարածքից: Ուրեմն խնդիրը թուրքիային սպառնացող վտանգի մեջ չէր, այլ Նախիջևանի հետ ընդհանուր սահման ունենալու ձգտման: Չէ՞ որ ակնհայտ էր, որ եթե Հայաստանի սահմանները ձգվեն մինչև Գայլի Դրունք, ապա թուրքիան Նախիջևանի հետ ընդհանուր սահման չի ունենա ու չի կարողանա կապվել Ադրբեջանի հետ: Իսկ դա լուրջ խոչընդոտ կդառնա պանթուրքիզմի պլանների տեսակետից և Յուսուֆ Քեմալն իրար էր կարծում, թե ուսներին հեշտութեամբ կմոլորեցնի նաև այս հարցում: Մոսկվայում վաղուց էին նկատել, որ թուրքերը ձգտում են ամեն գնով կապվել Ադրբեջանի հետ: Դրանում լուրջ վտանգ տեսնելով՝ բուլղարիկյան ղեկավարներն էլ իրենց հերթին աշխատում էին զրկել թուրքերին այդ հնարավորությունից: Հայաստանը զրավելու միջոցով թուրքիայի և Ադրբեջանի միջև սեպ խրելու անհրաժեշտության մասին խոսել էր Ստալինը դեռևս 1920թ. նոյեմբերի 16-ին Վլադիկավկազից Լենինին հղած հեռագրում: Նման խոսակցություն տեղի էր ունեցել նաև նոյեմբերի 23-ին Ստալինի ու Օրջոնիկիձեի, և Ստալինի ու Լենինի միջև հեռախոսային ուղիղ կապի ժամանակ¹:

Անտեղյա՞կ էր Չիչերինը թուրքերի այդ ձգտմանը, իհարկե ոչ: Ուրեմն տրամաբանական էր, որ պետք է ավելի վճռական լիներ և հայտարարեր, որ պետք է հաստատել այն սահմանը, որը նախկինում պահանջել է Ադրբեջանը, քանի որ անհնար է կատարել սահմանագծի

փոփոխություն առանց շահագրգռված կառավարությունն ու ազգաբնակչությունը հարցնելու:

Ճիշտ ու տեղին պատճառաբանություն է, խոսք չկա: Ափսոս, որ միան այդ փոքրիկ հողակտորի հարցում Չիչերինը թուրքերին հիչեցրեց այդ հանրահայտ սկզբունքի մասին: Ինչևէ, համոզվելով, որ վիճաբանությունը չարունակելն անհեռանկար է, Չիչերինը կարծիքը չի փոխի, թուրք պատվիրակները որոշում են հարցի լուծման այլ ուղի ընտրել: Յուսուֆ Քեմալն առաջարկում է ընդունել որոշում, ըստ որի՝ Շարուր-Դարալագյազը միացվում է Նախիջևանին, իսկ Երևանի գավառի վիճելի հատվածում (Քյոմուրլու-դաղ – 6930, Սարայ-բուլաղ – 8071, Արարատ կայարան) սահմանի վերջնական ճշտման խնդիրը թողնել Հայաստանի, Ադրբեջանի և թուրքիայի ներկայացուցիչներից կազմված խառը հանձնաժողովին:

Չիչերինը չառարկեց, և կոնֆերանսը այդպես էլ որոշեց¹: Անտարակույս է, որ երկու կողմերն էլ հույսը դրել էին Ադրբեջանի վրա: Ո՞ւմ կողմը կընկնի նա, ցեղակից թուրքիայի՞, թե՞ դաշնակից Ռուսաստանի, ցույց պիտի տար մոտ ապագան:

Այսպիսի վախճան ունեցան Նախիջևանի հարցի քննարկումները մարտի 10-ի և 12-ի նիստերում: Ճիշտ է, այն շոշափվեց նաև մարտի 14-ի նիստում, բայց միմիայն պայմանագրի հողվածների քննարկման ժամանակ և ստացավ հետևյալ վերջնական ձևակերպումը.

«Հող. 3. Երկու պայմանավորվող կողմերը համաձայն են, որ Նախիջևանի մարզը սույն պայմանագրի I (c) հավելվածում նշված սահմաններում կազմում է ինքնավար տարածք Ադրբեջանի հովանավորության տակ՝ պայմանով, որ Ադրբեջանն այդ հովանավորությունը չի զիջում երրորդ պետության»:

Փոփոխություն չկատարվեց նաև Երևանի գավառի հարավարևելյան հատվածի խնդրում: Պայմանագրի 3-րդ հոդվածի շարունակություն մեջ ասված է.

«Նախիջևանի տարածքի եռանկյունի կազմող գոտում, որ պարփակված է արևելքում Արաքսի հնահունի, իսկ արևմուտքում Դաղնա (3829) – Վելի-դաղ (4121) – Բահարգիբ (6587) – Քյոմուրլու-դաղ (6930) լեռներով անցնող գծով, նշված տարածքի սահմանագիծը, որ սկսում է Քյոմուրլու-դաղ (6930) սարից, Սարայ Բուլաղ (8071) սարով անցնում Արարատ կայարան և ավարտվում Արաքսի հետ Կարասուի

¹ „Геноцид армян...“, стр. 237, 250.

¹ ՀԱԱ, ֆ. 113, ց. 3, գ. 21, թ. 54:

խաչման տեղում, կուղղվի Թուրքիայի, Ադրբեջանի և Հայաստանի պատվիրակներից կազմված Հանձնաժողովի կողմից»¹:

Մնում է ընթերցողի ուշադրությունը ներկայացնել նաև I (c) Հավելվածը: Ահա այն. «Նախիջևանի տարածք. Արարատ կայարան–Սարայ–Բուլաղ (8071) սար –Քյոմուրլու–դաղ (6839), (6930) – 3080– Սարայթ–դաղ (7868) – Գուրթ–գուլաղ (Գուրթ–գուլաղ) գյուղ – Գամեսուր–դաղ (8160) – բարձունք 8022– Կյուկի–դաղ (10282) և նախկին Նախիջևանի գավառի արևելյան վարչական սահման»²:

Սակայն թուրքերի կողմից Նախիջևանի Հարցի չահարկումը դրանով չավարտվեց: Ընդամենը երեք օր էր անցել այդ Հարցի վերջնական ձևակերպումից, երբ մարտի 17–ին թուրքական պատվիրակությունը Ջիջերինին Հասցեագրած նոտայում, մատնացույց անելով Նախիջևանի չրջանը Ադրբեջանի Հովանավորությունը Հանձնելու փաստը, առաջ քաշեց զավթողական մի նոր ծրագիր: Նոտայում ասված է, որ վերջերս Անկարայից Հաղորդագրություն է ստացել, որում հատուկ ընդգծված է, որ Նախիջևանի տարածքը Թուրքիայի Հովանավորության տակ վերցնելու բազմաթիվ պատճառների շարքում հատկապես կարևոր էր իմպերիալիստական պետությունների կողմից Թուրքիայի արևելյան նահանգների վրա Հարձակման կանխարգելումը և «քանի որ Նախիջևանի տարածքը դրվել է Ադրբեջանի Հովանավորության տակ համաձայն պայմանագրի, որ այս անգամ կնքվել է Ռուսաստանի և Թուրքիայի միջև, նա (Թուրքիայի կառավարությունը – է. Զ.) հայտարարում է, որ հաշվի առնելով գոյություն ունեցող անհրաժեշտությունը, իրեն պարտավորված է համարում պաշտպանել իր արևելյան սահմանները իմպերիալիստներից, իրականացնել Մակուի ռազմակալումը, որը նա հարկադրված էվակուացրել էր իմպերիալիստական տերությունների ճնշման տակ»³ (ընդգծումը մերն է – է. Զ.):

Արևելքից եկող ո՞ր վտանգի մասին է խոսքը, ինչպես Նախիջևանի Հարցի լուծման ժամանակ չէր ասվել, այնպես էլ այս նոտայում չի ասված, բայց առանց դրան էլ պարզ է, որ կողմերը նկատի են ունեցել Բրիտանական կայսրությունը: Բայց ո՛չ Թավրիզի նահանգում, ո՛չ Սալմաստում ու Ուոյում, կամ էլ Մակուի հարևան որևէ այլ չրջանում, բրիտանական զորքեր չկային: Այդպիսիք (ոչ մեծ թվով) կային Իրա-

քում, որտեղից իսկապես կարելի էր ներխուժել Հարավ–արևելյան Անատոլիա, եթե, իհարկե, նման ցանկություն լիներ: Բայց խնդիրն էլ հենց այն է, որ Անգլիայում նման ցանկություն չկար և դրան քաջատեղյակ էին Անկարայում: Վերջապես, եթե նույնիսկ Անգլիայում Թուրքիա ներխուժելու ցանկություն առաջանար, ապա ինչո՞ւ դա պետք է հեռավոր Մակուից իրականացնեին: Ավելի դյուրին չէ՞ր ափ ելնել Տրապիզոնում կամ որևէ այլ հարմար նավահանգստում և արագ շարժվել Անկարայի վրա: Մանավանդ, որ Թուրքիան ռազմական նավատորմ չուներ: Ուրեմն ո՞րն էր Մակուի խանությունը տիրանալու իրական նպատակը:

Նախ ասենք, որ քեմալական վերնախավի մոտ այդ մտադրությունը նոր չէր ի հայտ եկել, ինչպես նոտայում է ասված և կապ չուներ Նախիջևանի Հարցի հետ: Այդ մասին նրանք մտածում էին դեռ այն ժամանակ, երբ կարծում էին, թե Նախիջևանը արդեն իրենցն է: Մակուն զավթելու թուրքերի մտադրության մասին հայտնել էր Շահ–թախթինսկին Ալեքսանդրապոլից Բաքու ուղարկած հեռագրում 1920թ. դեկտեմբերի 7–ին¹: Այնպես որ խորհրդային ղեկավարության համար դա նորություն չէր, և նրանք չէին կարող չհասկանալ, որ Նախիջևանի դիմաց, Արաքսի մյուս ափին ընկած այդ կիսանկախ խանությունը² զավթելու թուրքերի նպատակը ոչ թե ինչ–որ երևակայական վտանգից պաշտպանվելու ցանկությունն էր, այլ, – որ առավել հավանական է, – պանթուրքիզմի հեռահար նպատակների տեսակետից այդ խիստ կարևոր չրջանին տիրանալը:

Կարո՞ղ էին ուսները համաձայնել Մակուն թուրքերի կողմից զավթելուն: Թեև արխիվներում որևէ կոնկրետ բան չի պահպանվել, բայց մենք կարծում ենք, որ մերժել են: Նախ Ռուսաստանը Պարսկաստանի հետ հենց նոր (փետրվարի 26–ին) բարիդրացիական և եղբայրական հարաբերություններ պահպանելու մասին պայմանագիր էր ստորագրել³ և իր դաշնակցի՝ Թուրքիայի կողմից Պարսկաստանի դեմ ուղղված ամեն մի քայլ վերջինս կդիտեր որպես պայմանագրի խախտում: Բացի այդ, Պարսկաստանի անվտանգությունը երաշխավորել էր

¹ РГАСПИ, ф. 85, оп. 13, д. 143, л. 1-2.

² Շահական Պարսկաստանի տիրապետության տակ գտնվող խանությունների կիսանկախ վիճակը պայմանավորված էր կենտրոնական իշխանության թուլությամբ:

³ Տե՛ս „ДВП СССР“, т. 3, М. 1959, стр. 536-544.

¹ „ДВП СССР“, т. 3, стр. 598-599.

² Նույն տեղում, էջ 604:

³ „Геноцид армян...“, стр. 465.

նաև Անգլիան, Հետևապես Մակուի գավթումը կարող էր առաջ բերել նրա միջամտությունը և նաև լարվածություն ուս-անգլիական հարաբերություններում: Եվ վերջապես, ինչպես արդեն նշել ենք, դեռևս Թուրք-Հայկական պատերազմի շրջանում խորհրդային ղեկավարություն մոտ ձևավորվել էր կարծիք, որ չի կարելի թույլ տալ, որ Թուրքիան ընդհանուր սահման ունենա Ադրբեջանի հետ:

Ինչպես վերը նշեցինք, մարտի 14-ի և 16-ի նիստերում կոնֆերանսը Հիմնականում զբաղված էր երկու կողմերի ներկայացրած պայմանագրի նախագծերի քննարկումով և առանձին հոդվածների վերջնական ձևակերպումով: Բայց դա էլ հեշտ ու հանգիստ չէր ընթանում, թուրք պատվիրակներն անընդհատ նորանոր ուղղումներ էին առաջարկում, որի հետևանքով քննարկումներն ավելի ու ավելի ձգձգվում էին: Լինում էին նաև չնախատեսված դեպքեր ու քննարկումներ, երբ թուրքերը առաջ էին քաշում առանձին հարցեր, փորձում խոսել թելադրողի դիրքերից, պահանջում անհապաղ լուծումներ: Այդպիսի դեպք տեղի ունեցավ մարտի 14-ի նիստում: Նիստը սկսելուն պես նախագահող Յուսուֆ Քեմալը հայտարարեց, որ ինքը գաղտնի հռչակագիր պետք է հրապարակի, ուստի խնդրում է կարճ ժամանակով դաշինում մնան միայն պատվիրակները (նիստին հրավիրված էին նաև փորձագետները): Հաջորդ օրը՝ մարտի 15-ին, Ստալինին ուղարկած նամակում հայտնելով կատարվածի մասին, Չիչերինը գրում է, թե ըստ էության այդ գաղտնի հռչակագրի բովանդակությունը հանգում է նրան, որ «անցած տարի մենք նրանց հիասթափեցրել ենք, նրանց քիչ ենք տվել: ...Ակներև է, որ գործը հանգում է նրան, թե ինչքան մենք կտանք»: Չիչերինը նաև տեղեկացնում է, թե հռչակագրում խոսվում է նաև իրենց բաժանելու Անտանտի ձգտումների, Անկարայի որոշ շրջանների տրամադրությունների մասին և ավելացնում, թե թուրքերը գտնում են, որ «թանկ է ամեն ժամը, անհրաժեշտ է անմիջապես շոշափելի արդյունքի հասնել»¹:

Անշուշտ, մեր խնդիրը չէ մանրամասնությունների մեջ մտնել տնտեսական խնդիրների շուրջ վարած բանակցությունների և այդ հարցում կողմերի դիրքորոշումների մասին: Միայն հակիրճ նկատենք, որ այդ հարցը պակաս կոնֆլիկտային չէր: Չիչերինի արտահայտությունները օգնության հարցը վեր էր ածվել փորձաքարի: Թուրք պատվիրակները շատ համառ էին իրենց պահանջների մեջ: Տարածքային հար-

ցերը հեշտությամբ իրենց օգտին լուծելով՝ նրանք այնուհետև եռանդուն կերպով ձեռնամուխ եղան տնտեսական խնդիրներին՝ պահանջելով գենք, զինամթերք, ոսկի: Ըստ որում, թուրքերը ուղղակի աստղաբաշխական թվեր էին ներկայացնում¹ և չբարարվելով ուսական կողմի բանավոր խոստումներով՝ ամեն գնով ձգտում էին գրավոր պարտավորություն կորզել: Մարտի 10-ին Ստալինին ուղարկած նամակում Չիչերինը հայտնում է, որ «թուրքական պատվիրակությունը հայտարարել է, որ իմպերատիվ մանդատ ունի կնքելու գրավոր և ոչ թե բանավոր համաձայնագիր՝ մեր կողմից նրան գենքով և ոսկով օգնելու մասին» և ավելացնում, թե ինքը համոզված է, որ նրանք դա հիմա են հորինել, քանի որ նախկին հանդիպումներում և բանակցություններում այդ մասին խոսք չէր եղել: Նաև տեղեկացնում է, թե քանի որ մենք նրանց պահանջածի չափ գենք տալ չենք կարող, ուստի պնդում են, որ նրանց մեծ գումար տանք (150 մլն. ուրբի ոսկով), որպեսզի իրենք այդ գենքը ձեռք բերեն²:

Ուշագրավ էր Չիչերինի դիրքորոշումը. իր կառավարության անունից օգնության խոստումներ անելով՝ նա միաժամանակ խուսափում էր կոնկրետ թվեր օգտագործելուց ու նաև վճռականորեն մերժում գրավոր պարտավորության մասին ամեն մի պահանջ: Նույն կերպ էր վարվել նաև մարտի 14-ի նիստում, ինչի մասին վկայություն կա Ստալինին ուղարկած մարտի 15-ի նամակում:

Մարտի 16-ի նիստում հարցերն արդեն լուծված էին, պայմանագիրն արդեն պատրաստ էր ստորագրելուն, պատրաստ էին նաև այդ կապակցությամբ փոխանակվող նոտաները: Այդ օրը Չիչերինը նաև թուրքական պատվիրակությանը հայտնեց, որ կօգնեն գենքով ու զինամթերքով և նաև կտրամադրեն 10 միլ. ուրբի ոսկով, որի կեսը կտրվի Բաթումից թուրքական ջոկատի հեռանալուն պես, մյուս կեսը՝ ավելի ուշ:

Թուրք պատվիրակները չառարկեցին Չիչերինին, բայց նաև պայմանագիրը չստորագրեցին: Իսկ հաջորդ օրը նորից վերադարձան տնտեսական օգնության խնդրին՝ հայտարարելով, թե խոստացած օգնությունը քիչ է և պահանջեցին անպայման գրավոր հայտարարու-

¹ Ըստ ռազմական փորձագետների ներկայացրած պահանջի՝ շուրջ 100 հազ. հրացան, 600 գնդացի, 24 ինքնաթիռ և այլն:

² Տե՛ս Քեմալը Քազանձյան, „Вся правда о договоре еще впереди“, Голос Армении, 26 апреля 2001 г.:

¹ „Геноцид армян...“, стр. 453.

թյուն անել: Երկար վիճարանությունները արդյունք չեն տալիս, թուրքերը Համառում են և առաջ քաշում պայմաններ՝ առանց որոնց բավարարման պայմանագիրը չեն ստորագրի: Այդ նույն օրը (17-ին) Լենինին Հասցեագրած նամակում Չիչերինը այդ պայմանները հետևյալ կերպ է ձևակերպել.

«1. Ես պետք է խոստանամ, որ մի քանի տարվա ընթացքում մենք կտանք տարեկան 10 միլիոն,

2. Նրանք Համաձայն են, որ ղեկքի մասին գրավոր հայտարարություն չլինի, բայց պնդում են մի քանի տարի տարեկան 10 միլ. տալու մասին գրավոր հայտարարություն վրա, ըստ որում կարելի է գրել, որ դա երկրի տնտեսական վերականգնման համար է: Դա թշնամական ակտ չի լինի Անգլիայի դեմ, որն ինքն է նրանց վարկ առաջարկում: Այդ փողը պետք է ղեկքի համար, քանի որ մենք քիչ ենք տալիս, իսկ ղեկքը անհրաժեշտ է Անտանտից պաշտպանվելու համար:

Ամեն ինչ պատրաստ է ստորագրելու համար, պայմանագիրը կստորագրենք վաղը երեկոյան, բայց մինչև ստորագրելը նրանք ինձնից պիտի ստանան այդ թուղթը...»¹:

Չիչերինը Լենինին տեղեկացնում է, թե թուրք պատվիրակներն իրեն հայտնել են, որ Անկարան Լոնդոնում վարկեր ստանալու հնարավորություն ունի և որ այդ գրավոր հայտարարությունը պետք է «մեջլիսը հանգստացնելու և հակառակորդների բերանը փակելու համար»: Վերջում ավելացնում է, որ ինքը կողմնակից է այդպիսի մի թուղթ տալուն, քանի որ ամենամյա վարկավորումը ապագայի գործ է, մինչդեռ մեր օրերում ոչ մի բան կայուն չէ: Չիչերինը նաև խնդրել էր պատասխանել նույն օրը մինչև երեկոյան ժամը 6-ը, որպեսզի Հասցնի նախապատրաստել հայտարարությունը և չհետաձգի պայմանագրի ստորագրումը, որը «կթվագրվի 16-ով, երբ մենք դեռ չգիտենք Կրասինի կողմից Անգլիայի հետ պայմանագրի ստորագրման մասին»²:

Սակայն այդ օրը Չիչերինը պատասխան չստացավ: Հարցը մտցվեց Քաղբյուրո, որի նիստը նշանակված էր մարտի 18-ին: Քննարկման դրվեց «Թուրքիայի մասին ընկ. Չիչերինի նամակը» և միաձայն որոշվեց «Համաձայնել ընկ. Չիչերինի կարծիքի հետ»:

Այսպես թուրքերը հաղթանակ տարան նաև այս հարցում: Չիչերինը, որ ընդամենը երեք օր առաջ՝ մարտի 14-ի նիստում, հոխորտալից

հայտարարել էր, թե «գրավոր պարտավորություն մասին կարող եմ կտրականապես հայտարարել, որ կառավարությունը դրան չի գնա», ու այդ մասին իսկույն հայտնել էր Ստալինին, այդ նույն թուրք պատվիրակների ճնշման տակ հարկադրված եղավ անձամբ խնդրել Լենինին բավարարելու նրանց պահանջը: Քաղբյուրոյի նիստի նույն օրը՝ մարտի 18-ին պայմանագիրը, որը մեծադրող կերպով անվանել էին «բարեկամություն և եղբայրության մասին», վերջապես ստորագրվեց, որը սակայն ինչպես արդեն նշել ենք, թվագրվեց մարտի 16-ով՝ Լոնդոնում Կրասինի ստորագրած համաձայնագրի ամսաթվով՝ կարծելով, թե դրանով կհամոզեն Անգլիային, որ կնքելով ուս-թուրքական պայմանագիրը, իրենք դեռևս տեղյակ չէին Լոնդոնի համաձայնագրի ստորագրման մասին: «Թուրքիայի հետ մեր պայմանագիրը ստորագրվել է Ձեր կողմից համաձայնագրի ստորագրման օրը, քանի որ չէինք սպասում, որ Ձեր բանակցություններն այդքան շուտ կավարտվեն, - գրում է Չիչերինը Լոնդոն՝ Կրասինին՝ ուղարկած մարտի 20-ի հեռագրում: - Այդ պայմանագրի գլխավոր բովանդակությունը տարածքային սահմանազատումն է, որը կապ չունի Անգլիայի հետ մեր համաձայնագրի հետ: Չէ՞ որ Անգլիան չի կարող մեզնից պահանջել, որ մենք հետ վերցնենք Կարսի և Արդահանի գիջումը Թուրքիային, կամ էլ մենք պատերազմ սկսենք Թուրքիայի հետ, իսկ տարածքային սահմանազատումն անհրաժեշտ է պատերազմը կանխելու համար»³: Չիչերինը նույն կերպ (մարտի 16-ին ստորագրված) է ներկայացրել արտասահմանում գործող իր բոլոր ներկայացուցիչներին ուղարկած հեռագրերում, այդ թվում՝ Մոսկվայում:

Ահա թե որքան կեղծ ու փարիսեցիական է եղել բոլշևիկյան դիվանագիտությունը դեռևս այն հեռավոր ժամանակներում, երբ ամենուրեք խոսում ու գրում էին գաղտնի պայմանագրերը հրապարակելու, բաց դիվանագիտություն վարելու, արդար ու ազնիվ քաղաքականություն, ազգերի ինքնորոշման իրավունքը հարգելու մասին և այլն: Իրականում բոլշևիկներն այդ ամենը ավելի կոպտորեն էին ոտնահարում, քան եվրոպական «իմպերիալիստական» անվանված դիվանագետները: Ինչ վերաբերվում է մեզ հետաքրքրող պայմանագրին, ապա քանի որ այն միջազգային դիվանագիտության մեջ հայտնի է մարտի 16-ի

¹ Նույն տեղում:

² Նույն տեղում:

¹ Լ. Կրասինը ՌԽՖՍՀ առևտրական ներկայացուցիչն էր Լոնդոնում, բայց իրականացնում էր նաև քաղաքական գործառույթներ:

² „ДВП СССР“, т. IV, М.1960, стр. 11.

ոուս-թուրքական պայմանագիր անվանումով, և այլ անսաթվի (մարտի 18) օգտագործումը կարող է թյուրիմացության տեղիք տալ, ուստի մենք ևս այդպես կանվանենք:

Ռուս-թուրքական պայմանագիրը բաղկացած է ընդարձակ պրեամբուլայից և 16 հոդվածներից: Պայմանագիրն ունի նաև երեք հավելվածներ: Պայմանագրի ստորագրումից հետո կողմերի միջև նոտաների փոխանակում կատարվեց փոխադարձ պարտավորությունների մասին (մեկը մյուսին տեղյակ պահել տարվող քաղաքականությունների ընդհանուր ուղղություն մասին, օտար պետությունների հետ չկնքել այնպիսի պայմանագրեր, որոնք կարող են հակասել մյուս կողմի շահերին և այլն): Ստորագրվեց նաև առանձին համաձայնագիր, ըստ որի՝ Սորհրդային Ռուսաստանը Թուրքիային անվարձահատույց կերպով տրամադրում էր 10 միլ. ռուբլի ոսկով և օգնում զենքով:

Անիմաստ համարելով պայմանագրի բոլոր հոդվածների առանձին-առանձին քննարկումը, քանի որ այն դուրս է մեր հետապնդած խնդրի շրջանակներից, հակիրճ նշենք, որ չեղյալ էին հայտարարվում նախկինում կնքված բոլոր այն պայմանագրերը և միջազգային ակտերը, որոնք պարտադրվել էին պայմանավորվող կողմերին: Սորհրդային կառավարությունը հրաժարվում էր ցարական Ռուսաստանի Թուրքիայում ունեցած բոլոր արտոնություններից, կապիտուլյացիաների ռեժիմը վերացված էր հայտարարվում: Պայմանագրում հոդվածներ կային նաև Սև ծովի և Նեղուցների հարցի լուծման, երկաթուղային և փոստ-հեռագրական հաղորդակցության, հյուպատոսական համաձայնությունների կնքման մասին և այլն¹: Թուրքիայի համար առանձնակի կարևորություն էր ստանում նաև ռազմագերիների և քաղաքացիական գերիների փոխանակության հարցը (հոդվ. 13): Ռուսաստանը պարտավորվում էր բոլոր թուրք ռազմագերիներին և քաղաքացիական գերիներին իր հաշվին հայրենադարձել՝ հասցնելով նրանց մինչև Թուրքիայի հյուսիս-արևելյան սահմանը, Եվրոպական Ռուսաստանից և Կովկասից 3 ամսվա, իսկ Ասիական Ռուսաստանից՝ 6 ամսվա ընթացքում (սկսած պայմանագիրը ստորագրելու օրվանից)²: Սա մեծ օգնություն էր Անկարային, քանի որ կարճ ժամանակամիջոցում նրա բանակը կհամարվեր տասնյակ հազարավոր զինվորներով:

Ընթերցողին առանձնապես կհետաքրքրեն պայմանագրի առաջին

երեք հոդվածները (և նրանց համապատասխան հավելվածները), որոնք վերաբերում են տարածքային սահմանազատումներին և 15-րդը՝ որով Ռուսաստանը պարտավորվում էր քայլեր ձեռնարկել, որպեսզի Անդրկովկասյան հանրապետություններն անպայմանորեն ձանաչեն և Թուրքիայի հետ ապագայում կնքվելիք պայմանագրերում ընդունեն բոլոր այն հոդվածները, որոնք տեղ են գտել այս պայմանագրում և անմիջականորեն իրենց են վերաբերում: Այս հոդվածը թուրք պատվիրակների կողմից Ռուսաստանին պարտադրված քայլ էր, քանի որ տարածքային սահմանազատումներն այնքան անարդար էին, որ թուրքերը հիմք ունեին վախենալու, որ Հայաստանն ու Վրաստանը կարող են և ընդդիմանալ ու չընդունել զծված սահմանները:

Առաջին հոդվածում բացի Թուրքիայի հյուսիս-արևելյան սահմանի նկարագրությունից (սկսվում է Բաթումից հարավ ծովափնյա Սարպ գյուղից, ձգվում դեպի արևելք՝ Վրաստանից Թուրքիայի օգտին անջատելով Բաթումի հարավային մասը և Արդվինի շրջանը, այնուհետև անցնում Արփաչայ և Արաքս գետերի հնահունով ու հասնում մինչև Ներքին Կարասու գետը, որով Թուրքիային են անցնում Կարսի մարզը և Սուրմալուի գավառը), տեղ է գտել նաև Թուրքիա հասկացության բնութագրությունը (Թուրքիա ասելով կողմերը հասկանում են այն տարածքը, որ մտցված է թուրքական Ազգային ուխտի մեջ) և Ռուսաստանի համաձայնությունը՝ չճանաչել Թուրքիայի վերաբերյալ որևէ միջազգային ակտ, որը չի ընդունվում Թուրքիայի ազգային կառավարության կողմից: Սուսքը, անշուշտ, Սևրի պայմանագրի մասին է:

Երկրորդ հոդվածն ամբողջովին վերաբերում է Բաթում քաղաքին և նրանից հյուսիս ընկած այն տարածքին, որ Թուրքիան համաձայնում էր թողնել Վրաստանին՝ պայմանով, որ բնակչությունը կօգտվի լայն ինքնավարությունից, կրոնական և մշակութային իրավունքներից, իսկ Թուրքիան էլ իրավունք կստանա օգտվելու ազատ տրանզիտից, Բաթումի նավահանգստից՝ առանց դրա համար հատուկ մաքսեր և տուրքեր վճարելու և այլն: Ինչ վերաբերում է երրորդ հոդվածին և I (c) հավելվածին, ապա այն ամբողջովին նվիրված էր Նախիջևանի հիմնախնդրին և քանի որ վերը արդեն ներկայացրել ենք, ուստի նորից չենք կրկնում:

¹ Նույն տեղում, Հ. 3, էջ 597-602:

² Տես նույն տեղում, էջ 601:

* * *

Կոնֆերանսն ավարտվեց, կողմերը հանգստացած շունչ քաշեցին: Նրանցից յուրաքանչյուրը հավատացած էր, որ հաջողությունն իր կողմում է և աշխատում էր կնքված պայմանագիրը ներկայացնել որպես իր դիվանագիտական հաղթանակը: Ռուսները կարծում էին, թե Մոսկվայի պայմանագրով Թուրքիան ամուր կերպով կապել են իրենց սայլին և ապահովել երկար տարիների բարեկամություն ու համագործակցություն հակախմբերիախտական պայքարում: Արտասահմանում գործող իր պաշտոնական և ոչ-պաշտոնական ներկայացուցիչներին հասցեագրած գրություններում գործը հենց այդպես էր ներկայացնում Ջիչերինը, արդարացնում թուրքերին կատարած զիջումները (օրինակ, Ստոկհոլմ՝ Կերթենցեկին ուղարկած հեռագիրը պայմանագրի ստորագրման արդեն հաջորդ օրը՝ մարտի 19-ին, Լոնդոն՝ Կրասինին հասցեագրած հեռագիրը մարտի 20-ին, անգլիացի լրագրողին (Ռենսոմին) տված հարցազրույցը մարտի 22-ին¹ և այլն):

Ցնծում էր Անկարան, կոնֆերանսից նա ավելին ստացավ, քան ակնկալում էր: Մարտի 21-ին Ահմեդ Մուհթարը Ջիչերինին ուղարկած նոտայում իր անսահման գոհանակությունն էր հայտնում պայմանագրի ստորագրման կապակցությամբ և հայտարարում, որ դրանով հաջողությունների և ձեռքբերումների նոր դարաշրջան է սկսվում Թուրքիայի համար: Մարտի 30-ին խորհրդային տեղեկատվական բյուրոն Տրապիզոնից հաղորդում է, որ «պայմանագրի կնքումը մեծ խանդավառություն է առաջացրել թուրք ժողովրդի մեջ» և որ ամեն քայլափոխի կարելի է լսել այսպիսի խոսքեր. «Հենց դրանում է կայանում Թուրքիայի և թուրք ժողովրդի փրկությունը»²:

Իսկ ի՞նչ էր կատարվել իրականում, փորձենք ամփոփել:

1. Մոսկվայի պայմանագիրը քեմալական Թուրքիայի մեծագույն դիվանագիտական հաղթանակն էր: Միջազգային հարաբերությունների և դիվանագիտության պատմության էջերում հազիվ թե գտնվի նախադեպը, երբ պարտված ու ջախջախված երկրում նոր կազմավորված և իր գոյություն համար օրհասական կոիվներ մղող մի կառավարություն իր կամքը թելադրի այն պետությունը, որից օգնություն և

աջակցություն էր ակնկալում: Թվում էր, թե ձեռքերը պարզելուց և օգնություն խնդրելուց զատ թուրքերը ուրիշ բան չպետք է անեին: Բայց ոչ, Մոսկվա ժամանած անատոլիական Թուրքիայի մի խումբ դիվանագետներ՝ տեսնելով, թե ինչ դյուրություններ են խորհրդային ղեկավարները իրենց ճնշման տակ զիջում դիրքերը, բանակցություններում արհեստական ճգնաժամեր ու լարվածություն են առաջացնում, դրանց խզման երևույթականություն ստեղծում և ամեն գնով պայմանագիր կնքելու մոլուցքով բռնված բուլչեկյան ղեկավարությունը հարկադրում աներևակայելի զիջումներ անել: Շատ թե քիչ կարևորություն ներկայացնող բոլոր հարցերը ի վերջո լուծվում են թուրքերի օգտին: Նրանց պահանջով խորհրդային պատվիրակության կազմից հանվում է Ջիչերինի տեղակալը՝ հայազգի Կարախանը, լիազորությունների բացակայության կեղծ պատճառաբանությամբ մերժվում է Պորհրդային Հայաստանի պատվիրակության մասնակցությունը կոնֆերանսին և թուրք-խորհրդային միացյալ կոնֆերանսը վեր է ածվում ուս-թուրքական կոնֆերանսի, ճանաչել են տալիս թուրքական Ազգային ուխտը, Հայաստանի և մասամբ Վրաստանի հաշվին ընդարձակում Թուրքիայի Հյուսիս-արևելյան սահմանները, հարկադրում են Նախիջևանը հանձնել Ադրբեջանի հովանավորությանը, ստանձնել գրավոր պարտավորություն ռազմատեխնիկական ու ֆինանսական ամենամյա օգնություն ցույց տալու մասին և այլն: Նույնիսկ Բրեստում թուրքերն այնքան չէին ստացել, որքան այստեղ: Եվ այդ բոլորը միայն մի բանի համար՝ պահել թուրքերին իրենց կողմում, կանխել նրանց հնարավոր անցումը Անտանտի լագեր, որն, ի դեպ, 1921թ. սկզբի պայմաններում, ինչպես հետագա դեպքերը ցույց տվեցին, բոլորովին էլ իրատեսական չէր:

2. Մոսկվայի կոնֆերանսը և կնքված պայմանագիրը խորհրդային դիվանագիտության ամենախայտառակ, ամենանվաստացուցիչ ու ձախողված դրվագներից է:

Մոսկվայի պայմանագիրը Ռուսաստանի և Թուրքիայի խայտառակ գործարքն էր Հայաստանի և Վրաստանի թիկունքում, ավելի խայտառակ, քան նույնիսկ Մյունխենյան գործարքն է, քանզի եթե Մյունխենում ազդեցություն հաղորդ տալու համար գոհարբում էին համարյա ամբողջությամբ գերմանացիներով բնակեցված Սուդետական մարզը, ապա Քեմալին գոհարբած Կարսի մարզում պատկերը միանգամայն այլ էր: Մինչև թուրքական ներխուժումները այստեղ էթնիկ ամենամեծ խումբը հայերն էին, թուրքերը չնչին տոկոս ունեին, նույնիսկ մահաճե-

¹ Տե՛ս „ДВП СССР“, т. IV, М.1960, стр. 11, 13-14.

² Նույն տեղում, էջ 48:

դականները (թուրքեր, քրդեր, թաթարներ և այլն) ազգաբնակչության բացարձակ մեծամասնություն չեն կազմել¹: Իսկ դա նշանակում է, որ Ռուսաստանի բոլշևիկյան կառավարողները շատ ավելի վաղ էին բռնել միջազգային իրավունքի հանրահայտ նորմերը ոտնակոխ անելու ուղին: Մոսկովյան գործարքը Մյունխենյան գործարքի նախադեպն էր:

Չիչերինի գլխավորած պատվիրակությունը նվաստացուցիչ դրու-
թյան մեջ էր հայտնվել: Նա զրկվել էր ինքնուրույնությունից և փաս-
տորեն Ստալինի, Շահթախթինսկու ու թուրք պատվիրակների միջև
անդրկուլիայան բանակցություններում կայացված համաձայնություն-
ները սրբագրելու ֆունկցիա էր միայն կատարում: Չիչերինի նախա-
ձեռնությունները, կամքի դրսևորման փորձերը դեմ էին առնում թուրք
պատվիրակների դիմադրությունը, որոնք հետո բողոքով դիմում էին
Ստալինին և նրա միջամտությամբ հարցերը լուծում իրենց օգտին:
Խորհրդային ղեկավարությունը բանակցություններում ճկունություն
չդրսևորեց, նպատակին հասնելու համար դիվանագիտական հնարք-
ներ ու միջոցներ չգործադրեց: Միակ միջոցը, որ օգտագործում էր ցան-
կալի արդյունքի հասնելու համար, դա թուրքական պատվիրակու-
թյանն ամեն ինչում ընդառաջելը, նրանց բոլոր պահանջները կատա-
րելն էր:

Մոսկովայի կոնֆերանսը և կնքված պայմանագիրը խորհրդային
դիվանագիտության ամենաձախողված դրվագների թվին է պատ-
կանում, ավելի ձախողված ու ստորացուցիչ, քան նույնիսկ Բրեստ-
Լիտովսկն էր: Որովհետև եթե Բրեստում թելադրողը հաղթական
Գերմանիան էր, ապա այստեղ՝ հակաիմպերիալիստական զգեստ
հագած և Ռուսաստանի օգնությամբ գոյատևող անատոլիական
Թուրքիայի պատվիրակությունը: Մեծագույն զոհողությունների գնով
կնքված պայմանագիրը չարդարացրեց խորհրդային ղեկավարության
հույսերը: Շատ ժամանակ չէր անցել, երբ պարզվեց, որ Անկարան
Մոսկովայի համար հավատարիմ դաշնակից չէ, որ նա գաղտնի բանակ-
ցություններ է վարում Անտանտի տերությունների հետ՝ նրա կողմն
անցնելու հնարավորություններ փնտրում:

3. Մոսկովայի պայմանագրի կնքահայրը Ստալինն էր: Լենինի
հանձնարարությամբ ստանձնելով իրավարարի դեր և փաստորեն մե-

կուսացնելով Չիչերինին, Ստալինը թուրքական պատվիրակության
հետ անդրկուլիայան հանդիպումներում լուծում էր բոլոր վիճահարույց
հարցերը (տարածքային, ֆինանսատնտեսական և այլն) հիմնականում
թուրքանպաստ դիրքերից և այնուհետև հանձնարարում Չիչերինին
սրբագրել ձեռք բերված համաձայնությունները: Թուրք պատվիրակնե-
րը խուսափում էին Չիչերինի հետ հարցերի քննարկումներից, բայց
հաճույքով պահանջում էին հանդիպում Ստալինի հետ՝ վստահ, որ նա
կընդառաջի իրենց: Պաշտոնական նիստերում միայն ճշտվում էին
կայացված համաձայնություններին առնչվող հարցերը, տալիս համա-
պատասխան ձևակերպումներ: Թուրք պատվիրակները, քաղաքական
գործիչները և պատմաբանները, միակարծիք են այն հարցում, որ եթե
չլինեք Ստալինի միջամտությունը, ապա հազիվ թե հնարավոր լինեք
պայմանագրի ստորագրումը:

Թեև Ստալինի ու թուրք պատվիրակների հանդիպումների մասին
կցկտուր տեղեկություններ են պահպանվել, և այն էլ միայն թուրք հե-
ղինակների մոտ, բայց դատելով բանակցությունների արդյունքներից,
Ստալինը դիվանագիտական ունակություններով չի փայլել: Նա կամք
ու համառություն է ցուցաբերել միմիայն Բաթումը Վրաստանին պա-
հելու հարցում: Մնացած հարցերում Ստալինը հավատացել ու վստա-
հել է թուրքերի խոսքին, հեշտությամբ տեղի տվել, զիջել դիրքերը: Եվ
այդ ամենը հանուն այն բանի, որ չձախողվի նրանց հետ պայմանագրի
ստորագրումը, ինչը համարվում էր Անտանտի լազեր Անկարայի հնա-
րավոր անցումը կանխելու անհրաժեշտ պայման: Ինքնահավան ու
ինքնավստահ, իր համոզմունքների մեջ միշտ անկոտրում, նա երևա-
կայել անգամ չէր կարող, որ թուրք պատվիրակների հրամցրածը դի-
վանագիտական խաղեր են, որ նրանք կեղծում ու խաբում են և Ռու-
սաստանի վրա նայում որպես ժամանակավոր դաշնակցի, որին կարելի
է կթել և այնուհետև թողնել: Պիտի անցնեին տասնամյակներ, որպես-
զի «Ժողովուրդների հայրը» հասկանար, թե ինչ մեծ սխալ են թույլ
տվել հայկական և վրացական տարածքները շոյալորեն բաշխելով
թուրքերին, պիտի փորձի պատժել նրանց, հետ բերել այն, ինչ այնպիսի
թեթևամտությամբ զիջել էին, բայց ուշացած զղջումը արդյունք չտվեց:
Թուրքերը իրենց դիվանագիտական հոտառությունը չէին կորցրել,
նրանք վտանգը կանխազգացել էին և պատերազմի ավարտից երկու
ամիս առաջ պատերազմ հայտարարել Գերմանիային: Ոչ մի կրակոց
չէր արձակվել, բայց միևնույն է, ԱՄՆ-ի և Անգլիայի համար Թուր-

¹ Տես «Կովկասյան կալենդար», 1916, ՀԱԱ, ֆ. 4/114, ց 2, դ. 68, թ. 5.

քիան արդեն դաշնակից էր ու վայելում էր նրանց պաշտպանությունը:

4. Մոսկվայի կոնֆերանսում միայն մի զոհ կար: Դա Հայաստանն էր, որի փաստական բաժանումը Թուրքիան և Ռուսաստանը ավարտին հասցրին և պայմանագրային բնույթ հաղորդեցին: Լիազորությունների բացակայությունը կեղծ պատճառաբանություններով մերժելով Այ. Բեկզադյանի պատվիրակության մասնակցությունը կոնֆերանսին՝ Թուրք պատվիրակները Հայաստանին առնչվող բոլոր հարցերը Ստալինի օգնությունները լուծեցին իրենց օգտին:

Ստալինի հայատյացությունն այնքան ակնհայտ էր, այնքան անթաքույց, որ Թուրք պատվիրակները հասկացել էին առաջին իսկ հանդիպումից և ամեն անգամ դիմում էին նրա օգնությունը՝ հենց որ Հայաստանին առնչվող հարցերում դժվարություն էր ծագում: Ստալինի միջոցով Ջիզերինի տեղեկալ Կարախանը հանվեց պատվիրակության կողմից, նրա օգնությունը լուծեցին ոչ միայն Թուրքա-Հայաստանի, այլև Կարսի մարզի հարցը, նույնիսկ Արփաչայից արևմուտք և Արաքսից հարավ 20 վերստանոց մի շերտ ՌՆՖՍՀ-ին թողնելու պահանջը, որ հենց ինքը՝ Ստալինն էր առաջ քաշել:

Ստալինը Թուրքերին ընդառաջեց նաև Նախիջևանի խնդրում՝ համաձայնելով, որ այդ հարցը լուծվի Շահթախթինսկու հետ բանակցություններում, քաջ գիտակցելով, որ այդ դեպքում Հայաստանի մասին խոսք լինել չի կարող:

Այդ ամենը կատարվեց Խորհրդային Հայաստանի թիկունքում: Ոչ՝ Հայաստանի իշխանություններին, ոչ՝ Մոսկվայում գտնվող Այ. Բեկզադյանի պատվիրակությանը, ոչինչ չէր հաղորդվում կոնֆերանսի ընթացքի մասին: Հայաստանի պատվիրակության գոյությունը մասին ոչ ոք չէր հիշում, չէին հիշում նաև այն ղեկուցադրերի մասին, որ պատվիրակությունը ներկայացրել էր Խորհրդային Ռուսաստանի ղեկավարությանը (Լենինին, Ստալինին, Ջիզերինին, Կրեստինսկուն) և որոնցում առաջ էին քաշված հայ-թուրքական տարածքային սահմանազատման վերաբերյալ առաջարկություններ: Հայ պատվիրակներին չէին հիշում, նրանց հետ չէին խորհրդակցում նույնիսկ այն ժամանակ, երբ փորձագետները քարտեզի վրա սահմանագիծ էին անցկացնում և անհրաժեշտ էր լինում ճշտել սահմանի վրա գտնվող այս կամ այն գյուղի ազգային կազմը, նրա պատկանելիության նպատակահարմարությունը և այլն: Արդյունքում թույլ տրվեցին բազմաթիվ սխալներ, որ

հետո՝ Կարսի կոնֆերանսում, այդպես էլ ուղղել չկարողացան՝ Մոսկվայի պայմանագրից կառչած մնալու Թուրքերի դիրքորոշման պատճառով:

5. Թեև Մոսկվայի կոնֆերանսի նախօրեին Նախիջևանի երկրամասը իրավական առումով դեռևս չէր դադարել Հայաստանի մաս լինելուց (Ադրհեղկոմը հանդիսավոր հռչակագրով այն ճանաչել էր Հայաստանի անբաժանելի մաս, Ալեքսանդրապոլի պայմանագիրը Խորհրդային Հայաստանը չէր ճանաչել, իսկ Նախիջևանի ազգաբնակչությունն ինքնորոշման իրավունք վերապահող Հայհեղկոմի հռչակագիրը դեռևս կյանքի չէր կոչվել), և Կովկասի ճակատագիրը տնօրինող բոլշևիկյան գործիչները (Ստալին, Օրջոնիկիձե, Կիրով) միանշանակ Նախիջևանը համարում էին Հայաստանին, բայցևայնպես, կոնֆերանսում Նախիջևանի երկրամասի պատկանելիության հարցը լուծելիս Հայաստանի անունն անգամ չչոչափվեց և Ստալինի կամքով այդ հարցի լուծումը թողնվեց Թուրքական պատվիրակության հետ բանակցություններում Շահթախթինսկու հայեցողությանը՝ առանց վերջինիս որևէ կոնկրետ հրահանգավորում տալու (այդպես է Ջիզերինին հասցեագրած նրա նամակում): Թե ինչու տարածքային բոլոր հարցերի վերաբերյալ իր վճռական դիրքորոշումն արտահայտած Ստալինը Նախիջևանի հարցում արդպես չի վարվում, միայն ենթադրել կարելի է: Ըստ երևույթին նա գիտեր, թե Շահթախթինսկու և Թուրքերի գործարքը ինչով է ավարտվելու, բայց դրա պատասխանատվությունը ևս իր վրա վերցնել, հավանաբար, չէր ուզում, այն պարզ պատճառով, որ շատ ժամանակ չէր անցել այն օրից (չուրջ մեկ և կես ամիս) երբ հայտարարել էր, թե Նախիջևանը կլինի Հայաստանի կազմում:

6. Նախիջևանի երկրամասի պատկանելիության շուրջ Թուրքական պատվիրակության հետ Շահթախթինսկու վարած բանակցությունների բովանդակությունը թանձր խավարի մեջ է: Այդ մասին որևէ հիշատակություն չկա ոչ Թուրք, ոչ ադրբեջանցի հեղինակների մոտ: Նույնիսկ Հայտնի չէ, թե այդ բանակցություններում քննարկվե՞լ է Նախիջևանը Ռուսաստանի հովանավորությանը հանձնելու Ջիզերինի առաջարկությունը, թե՞ ոչ: Հայտնի չէ նաև, թե Նախիջևանը Ադրբեջանի հովանավորությանը հանձնելու վերաբերյալ Թուրք-ադրբեջանական համաձայնությունը կայացել էր Բաքվում՝ Ադրբեջանի ղեկավարության հետ Թուրք պատվիրակների հանդիպումների արդյունքում, թե՞ Մոսկվայում Թուրքերի հետ Շահթախթինսկու բանակցու-

թյուններում: Մի բան անտարակույս է, Նախիջևանի հովանավորութունը երրորդ պետություն չփոխանցելու մասին Ազրբեջանի վրա դրված պարտավորությունը Շահթախթինսկու մտքի արգասիքն էր: Նման հետևություն համար հիմք կարող են ծառայել թե՛ Ազրհեղկոմի ղեկավարացիայի նկատմամբ նրա վերաբերմունքը, թե՛ Օրջոնիկիձեին հասցեագրած նամակը և թե՛ ՌԿ(Բ)Կ Կենտկոմ ուղարկած զեկուցագիրը:

ԳԼՈՒԽ ՎԵՑԵՐՈՐԴ

Նախիջևանի խնդիրը Կարսի կոնֆերանսում

Ձիչերինի առաջ ծառայած խմբիները. 1. Համոզել միջազգային հանրությունը, որ Թուրքիային արված տարածքային զիջումներն այլընտրանք չունենին, 2. Պարտադրել Անդրկովկասյան հանրապետություններին Մոսկվայի պայմանագրի հիմքի վրա պայմանագրեր կնքել Թուրքիայի հետ:

Հայաստանի խորհրդային ղեկավարությունը վերաբերմունքը Մոսկվայի պայմանագրի նկատմամբ: Ալ. Բեկզադյանի բողոք-նամակը Գ. Ձիչերինին: Վերջինիս պատասխան գրությունները Ս. Տեր-Գաբրիելյանին և Բ. Լեզրանին: Հայկումկուսի Կենտկոմի պնդումը հավանություն է տալիս Ալ. Բեկզադյանի պատվիրակության գործունեությանը, բայց նաև որոշում է նրա փոխարեն արտգործոժողկոմի պաշտոնում նշանակել Ասք. Մոսկվային:

Նախապատրաստությունը Թուրքիայի հետ կոնֆերանսին: Հանրապետությունների ներկայացուցիչների Բաբվի մայիսի 7-ի խորհրդակցությունը: Կոնֆերանս, թե՞ խորհրդակցություն. Հուսեյնովի և Բեկզադյանի բանավեճը: Խորհրդակցության որոշումները Թուրքիայի հետ կոնֆերանսում որպես մեկ միասնական կողմ հանդես գալու, Մոսկվայի պայմանագիրը որպես հիմք ընդունելու մասին և այլն: Հայաստանի և Նախիջևանի միջև սահմանագծի ճշտման խմբի, տեղացիների կարծիքը՝ հաշվի առնելու Շահթախթինսկու առաջարկության հեռահար նպատակը:

Նախիջևանին ամեն կերպ օգնելու Հայաստանի կառավարության դիրքորոշումը, աղահանքերի շահագործումը վերականգնելու ուղղությամբ ձեռնարկված քայլերը: 15 միլ. ռուբլի վարկի տրամադրումը (մայիսի 31-ին), Մյասնիկյանի կողմից Նախիջևանին օգնելու հարցի բարձրացումը Կավբյուրոյի սեպտեմբերի 5-ի նիստում և 20000 ռ. ոսկով օգնությունը: Նախիջևանը Հայաստանի ազդեցությունից կտրելու Ազրբեջանի ղեկավարության ձգտումը և բողոքի գրությունները (հունիսի 12-ի և հոկտեմբերի 10-ի) Կավբյուրոյին՝ Հա-

յաստանի կողմից Նախիջևանի ներքին գործերին միջամտելու մասին:

Թուրք-անդրկովկասյան կոնֆերանսի քննարկմանը ներկայացվելիք Հայաստանի կառավարության մեմորանդումը (Հուլի 1907) և «Հայ-թուրքական պայմանագրի» նախագիծը: Նախիջևանի խնդիրը այդ երկու փաստաթղթերում: Եռանկյունի գոտու բաժանումը Հայաստանի և Նախիջևանի միջև: Ադրբեջանի և Թուրքիայի միջև ընդհանուր սահմանի ապահովումը:

Կարսի կոնֆերանսը, սահմանագծային խնդիրները կոնֆերանսում: Հայկական պատվիրակության բոլոր պահանջների մերժումը թուրքերի կողմից: Նախիջևանի երկրամասի և «Եռանկյունի գոտու» բաժանման վերաբերյալ կայացված որոշումները:

Ռուսաստանի բոլշևիկյան ղեկավարությունը չէր կարող չհասկանալ, որ «Բարեկամության և եղբայրության մասին» ուս-թուրքական պայմանագիրն այնքան ապօրինի է, միջազգային իրավունքի տեսակետից այնքան խոցելի ու աննախադեպ, որ հարկ կլինի մեծ ջանքեր գործադրել կատարվածը արդարացնելու և միջազգային հանրության առաջ չքմեղանալու համար: Այստեղից էլ այն խնդիրները, որ կառավարությունը դրել էր Արտգործոցնախարարի առաջ:

1. Համոզել թե՛ իր դաշնակիցներին և թե՛ միջազգային հանրությունը, որ Թուրքիային կատարած տարածքային զիջումներն այլընտրանք չունենին, որ այդ կերպ միայն կարելի էր խուսափել մշտական պատերազմներից Կովկասում:

2. Պարտադրել Կովկասի խորհրդային հանրապետություններին Մոսկվայի պայմանագրի հիմքի վրա համապատասխան պայմանագրեր կնքել Թուրքիայի հետ և դրանով իսկ ամբողջացնել թուրք-խորհրդային հարաբերությունները:

Նախորդ գլխում արդեն նշել ենք, որ պայմանագրի ստորագրման արդեն հաջորդ օրերին Չիչերինը մի շարք գրություններ էր ուղարկել Լոնդոնի, Ստոկհոլմի, Անկարայի ուսական ներկայացուցիչներին, որոնցում հայտնում էր պայմանագրի ստորագրման մասին, ներկայացնում այդ ակտի քաղաքական նշանակությունը, մեկնաբանում նրա առանձին հոդվածներ՝ հատկապես տարածքային սահմանադատման: Հասկանալի է, որ նպատակը միայն տեղեկատվական չէր: Ներկայացուցչությունները պետք է համապատասխան քարոզչական աշխատանք տանեին և հասարակական կարծիք ստեղծեին: Բայց դրանով

Չիչերինը չի բավարարվում, նա անհրաժեշտ քայլեր է ձեռնարկում թե՛ իսլամի աշխարհի համակրանքը չահելու, թե՛ եվրոպական մամուլի էջերում որոշակի քարոզչություն ծավալելու ուղղությամբ: Մարտի 20-ին Արևելքի ժողովուրդներին «Քարոզչության և գործողության խորհուրդը», որի նստավայրը Բաքուն էր, հատուկ կոչով դիմում է Արևելքի ժողովուրդներին, մեկ առ մեկ ներկայացնում ստորագրված պայմանագրով Ռուսաստանի կողմից Թուրքիային արված զիջումները, չեղտում դրանց նշանակությունը ուս և թուրք ժողովուրդների միջև դարավոր թշնամանքի վերացման ու եղբայրական կապերի հաստատման գործում և ավելացնում, թե խորհրդային Ռուսաստանը այդ զիջումներին զնաց հանուն արդարության, նրա համար, որ մեկընդմիջ տրվի Արևելքի ժողովուրդների երկպառակությունը և նրանց միավորի մեկ բարեկամական ընտանիքում¹: Ու ոչ մի խոսք չի ասվում այն մասին, որ այդ զիջումները արվել են մեկ այլ ժողովրդի՝ հայ ժողովրդի ազգային շահերի զոհաբերման գնով:

Եվրոպայի հասարակական կարծիքի շոշափման և մամուլում նպաստավոր նյութերի գետնեղման առումով ուշագրավ փաստաթուղթ է Գերմանիայում խորհրդային Ռուսաստանի Արտգործոցնախարարի և Արտառևտրի ժողկոմատի ներկայացուցիչ Կոպպին հասցեագրած Չիչերինի մարտի 20-ի նամակը²: Ներկայացնելով արևելյան քաղաքականության բնագավառում խորհրդային քաղաքականությունների հաջողությունները (պայմանագրերի կնքումը Իրանի, Աֆղանստանի, Թուրքիայի հետ), Չիչերինը առավելապես կանգ է առնում ուս-թուրքական պայմանագրի վրա, Կարսի և Արդահանի հանձնումը թուրքերին՝ մեկնաբանում Անտանտի լազեր քեմալականների հնարավոր անցումը կանխելու և Կովկասում խաղաղություն հաստատելու դիրքերից, խնդրում անպայման տեղեկացնել հայտնի հրապարակախոսին³ իրադրություն լուսաբանություն համար նյութեր ստանալու իր ցանկությունները մասին:

Նամակում Չիչերինը մի ուշագրավ դիտարկում էլ է անում: Խոսելով Թուրքիայի հետ տարածքային սահմանադատման հարցում ծագած դժվարությունների, Կարսը և Արդահանը զիջելու անխուսափելի-

¹ Տե՛ս „Геноцид армян...” т. 2, ч. 1, էջ. 469:

² Տե՛ս նույն տեղում, էջ 469-471:

³ Նամակում հրապարակախոսի անունը նշված չէ՝ հավանաբար գաղտնիության նկատառումով:

Թյան մասին՝ հանկարծ նա ավելացնում է, թե «առանց Բաթուր Վրաստանին և Նախիջևանը Աղբրեջանին հանձնելու, Թուրքիայի հետ ոչ մի խաղաղություն հնարավոր չէր լինի»: Չիչերինը դա համարում է ամենաէական ձեռքբերումը, որին իրենք կարողացան հասնել ու ստեղծում տպավորություն, թե հակառակ պարագայում պատերազմն անխուսափելի էր: «Մահամանը Արփաչայով ու Արաքսով անցկացնելը նույնպես ծանր զոհաբերություն է, - գրում է Չիչերինը, - ըստ որում հայ կոմունիստներն այդ պայմանները նոր Բրեստ են անվանում»¹ (ընդգծումը մերն է - է. Զ.):

Որ հայ կոմունիստները ճիշտ գնահատական են տվել, գուցե և ավելի մեղմ գնահատական՝ Հայաստանի տարածքային կորուստների տեսակետից (Սուրմալուի գավառը Բրեստի պայմանագրով չէր անցնում Թուրքիային), դա անվիճելի է: Դժբախտաբար, Չիչերինն անուններ չի տալիս և այդպես էլ անհայտ է մնում, թե ե՞րբ և ովքե՞ր են տվել այդ գնահատականը: Չէ՞ որ պայմանագրի ստորագրումից ընդամենը երկու օր էր անցել և այդ ընթացքում որևէ ղեկավար հայ գործիչ Չիչերինին չէր հանդիպել: Մնում է ենթադրել, որ աղբյուրը Բեկզադյանի պատվիրակությունն է, որը թեև կոնֆերանսին չէր մասնակցում, բայց նախնական նրա ընթացքի մասին որոշ տեղեկություններ էր ստանում ռազմական էքսպերտ Բորրիչչևից: Այդ մասին վկայություն կա Աղբրեջանում Ուրհրդային Հայաստանի ներկայացուցիչ Աթաբեկովին ուղարկած Այ. Բեկզադյանի մարտի 18-ի նամակում²: Հնարավոր է, որ հենց Բորրիչչևն էլ հայ պատվիրակներից լսած կարծիքը փոխանցել է Չիչերինին: Իսկ կնքված պայմանագրի կապակցությամբ Չիչերինին հասցեագրած բողոք-նամակը Բեկզադյանը ներկայացրել է չուրջ մեկ ամիս հետո՝ ապրիլի 15-ին: Թե ինչու այդքան ուշ (կոնֆերանսի նյութերը Բեկզադյանը ստացել էր կոնֆերանսի ավարտից անմիջապես հետո, իսկ Կովկաս հասել էր մարտի 31-ին), որոշակիորեն հայտնի չէ, թեև հնարավոր է, որ այդ ժամանակամիջոցում Բեկզադյանը փորձել է ստանալ Հայհեղկոմի կարծիքը: Ավելորդ չենք համարում նաև նշելու, որ բողոքի վերաբերյալ փաստաթղթերի թվագրման հարցում որոշ անհամապատասխանություն կա: Այսպես, արխիվային մի փաստաթղթում, որ թվագրվում է ապրիլի 11-ով և ամենայն հավանականությամբ ռազմագիր է՝ վերնագրված «Աթաբեկովին, Շավերդովին»

Հայաստանի հեղկոմի համար», Բեկզադյանը հայտնում է. «...կոնֆերանսից մեր պատվիրակությունը հեռացնելու և Թուրքիայի հետ պայմանագրի ծանր պայմանների կապակցությամբ մեր կողմից բողոք է ներկայացված, որն, իհարկե, պրակտիկ նշանակություն չի ունենա»¹: Թե նշված փաստաթղթերից որի թվագրումն է ճիշտ, դարձյալ մնում է անհայտ:

Ինչևէ, անդրադառնալով բողոքին, նախ ասենք, որ այն բավականին ընդարձակ ու հիմնավորված մի փաստաթուղթ է, որում Բեկզադյանը ռուսական պատվիրակությանը մեղադրում է Հայաստանի հաշվին Թուրքիային տարածքային մեծ դիջումներ անելու, թուրք պատվիրակների հակահայկական հայտարարություններին հակահարված չտալու, Հայաստանի պատվիրակությանն ամբողջովին մեկուսացնելու, նրա հետ չխորհրդակցելու ու նրան չլսելու մեջ՝ անգամ այն դեպքում, երբ քննարկվել են Հայաստանին առնչվող հարցեր: «Հայկական պատվիրակությունը, - գրում է Բեկզադյանը, - չի կարող լուծյան մատնել այն փաստը, որ առանց նրա գիտության, մասնակցության ու համաձայնության քեմալական Թուրքիային զիջելով մի շարք հայկական տարածքներ, ռուսական պատվիրակությունը դրանով իսկ ոտնահարել է Ուրհրդային Հայաստանի ճանաչված իրավունքները և ծանր հարված է հասցրել նշված երկրի աշխատավոր զանգվածների կենդանի մարմինին»² (ընդգծումը մերն է - է. Զ.):

Թվում է, թե այս վճռական բողոքին պետք է հետևեր հայտարարություն այն մասին, որ Հայաստանը չի ճանաչի Մոսկվայի պայմանագրով գծված սահմանները: Բայց դա տեղի չի ունենում, Բեկզադյանը շարունակում է մեղադրել ռուսական պատվիրակությանը անսկզբունքայնություն և անհետևողականություն մեջ, որպես օրինակ վկայակոչում է Նախիջևանի ու Շարուր-Դարալագյազի հարցը, ցույց տալիս, որ ռուսական պատվիրակությունը չի ցուցաբերել անհրաժեշտ հաստատակամություն և թույլ է տվել, որ թուրքերը հանդես գան այդ շրջանի մուսուլմանների հովանավորի դիրքերից և հարցը լուծեն հօգուտ կրոնակիր Աղբրեջանի: «Հայաստանի Ուրհրդային Հանրապետության սուվերեն իրավունքների խախտումը չի կարող արդարացվել Արևելքում հեղափոխության գործի շահի մատնանշումով» - հայտարարում է Բեկզադյանը և շարունակում. «Կոնֆերանսի արձանա-

¹ Տե՛ս „Геноцид армян...“, էջ. 470:

² Տե՛ս ՀԱԱ, ֆ.114, ց. 2, գ. 68, թ. 25-26:

¹ ՀԱԱ, ֆ.114, ց. 1, գ. 85, թ. 3:

² Տե՛ս „Геноцид армян...“, էջ. 496:

գրույթյուններից կարելի է բերել մի շարք հղումներ (տե՛ս մարտի 10-ի և 12-ի արձանագրույթյունները), որոնք անառարկելիորեն ապացուցում են, որ ուսական պատվիրակույթյունը ոչ միայն հաշվի է նստել վրաստանի սուվերեն իրավունքների և Ադրբեջանի սուվերեն իրավունքների հետ այս կամ այն տարածքի նկատմամբ, այլև նրանց վերցրել է իր հովանավորութան տակ և չափավորել է քեմալականների չափից ավելի գրգռված ախորժակը: **Ինչո՞ւ մենք դա չտեսանք անմիջականորեն Հայաստանին վերաբերող հարցերի քննարկման ժամանակ: Կարսի հարցը կոնֆերանսում ընդհանրապես չի դրվել»¹** (ընդգծումը մերն է - է. Զ.):

Սրանք այն ամենը չեն, ինչ բովանդակված է Բեկզադյանի բողոք-նամակում: Նրանում խոսվում է նաև ուսական պատվիրակույթյան մի շարք այլ սխալների ու թերույթյունների մասին: Բայց մենք դրանց վրա կանգ չենք առնի, նախ թեմայից շատ չչեղվելու և հետո համոզված ենք, որ վերը նշվածներն էլ բավական են այդ փաստաթղթի մասին լիարժեք պատկերացում կազմելու համար: Միաժամանակ ավելորդ չենք համարում նշելու, որ Բեկզադյանի բողոքի բովանդակույթյունից դժվար չէ կուսակ, որ նա ստացել էր կոնֆերանսի ոչ բոլոր նյութերը (օր. տարածքային սահմանադատման վերաբերյալ Ստալինի՝ Չիչերինին ուղարկած մարտի 6-ի նամակը, Շահթախթինսկու և Չիչերինի միջև փոխանակված մարտի 6-ի և 7-ի գրույթյունները և այլն): Այդպես մտածելու հիմք է տալիս ու այն, որ Բեկզադյանն իր քննադատույթյունն ամբողջովին ուղղում է Չիչերինի դեմ ու ոչինչ չի ասում հիմնական դերակատարների մասին, և՛ նաև այն, որ Հայաստանի ազգային արխիվում Մոսկվայի կոնֆերանսի նյութերից առկա են միայն քաղաքական հանձնաժողովի արձանագրույթյունները:

Չիչերինը չէր կարող լուրջամբ անցնել ներկայացված մեղադրանքների կողքով, նա պետք է հերքեր Բեկզադյանին, փորձեր ստեղծել տպավորություն, թե դիվանագիտական ծանր ու երկարատև պայքարի արդյունքում են կատարվել տարածքային զիջումները: Նա պարտավոր էր դա անել ոչ միայն թե՛ իրեն և թե՛ իր կառավարույթյանը պատմութան առաջ արդարացնելու, այլև Հայաստանում կրքերի հնարավոր բորբոքումը կանխելու համար: Չէ՞ որ չէր բացառվում, որ Հայաստանի խորհրդային ղեկավարութունը, չնայած հանրապետութան քաղաքական ու տնտեսական ծայրահեղ ծանր վիճակին, կարող

էր հրաժարվել մոսկովյան պայմանագրով գծված սահմանները ճանաչելուց: Մինչդեռ ապրիլյան այդ նույն օրերին Չիչերինը արդեն եռանդուն աշխատանք էր ծավալել պայմանագրի 15-րդ հոդվածով ստանձնած պարտավորութունների կատարման ուղղությամբ, այն է՝ ապահովել կովկասյան հանրապետութունների կողմից իրենց վերաբերող պայմանների ընդունումը: Դա առավելապես հենց Հայաստանին էր վերաբերում:

Բեկզադյանի հետ անձամբ բացատրվելու հնարավորություն չունենալով (նա արդեն մեկնել էր Մոսկվայից), Չիչերինը որոշում է գործել դիվանագիտական խողովակներով: Ապրիլի 21-ին նա մի նամակ է ուղարկում Մոսկվայում Հայաստանի ներկայացուցիչ Ս. Տեր-Պարիեյանին, իսկ հաջորդ օրը՝ 22-ին ընդարձակ հեռագիր Հայաստանում Ռուսաստանի դիվանագիտական ներկայացուցիչ Լեգրանին: Երկուսն էլ նվիրված են Բեկզադյանի ներկայացրած բողոքին և բովանդակույթյան առումով իրարից բոլորովին չեն տարբերվում: Չիչերինը ոչ միայն վճռականորեն մերժում է իրեն հասցեագրած մեղադրանքը, այլև իր հերթին մեղադրանքներ է ներկայացնում Բեկզադյանին: Սոսկով այն մասին, որ տարածքային զիջումները բոլորովին էլ ոչնչով չարդարացված նվեր չեն Թուրքիային, այլ ամենադաժան և երկար պայքարի արդյունք, Չիչերինը շարունակում է. «Դա չէր կարող անհայտ լինել Հայկական պատվիրակույթյանը, քանի որ նրան հայտնվել է այդ պայքարի երևչների մասին: Նրան ավելին կհայտնվեր, եթե նա այն ժամանակ չխուսափեր ինձ հետ կապերից: Չնայած ինձ մոտ գալու և ինձ հետ կոնտակտի մեջ լինելու իմ պարզորոշ առաջարկին, հայկական պատվիրակույթյունը չգիտես ինչու դա չարեց և հարաբերութունն ինձ հետ վերսկսեց բավականին ու չմիայն, երբ գլխավոր հարցերն արդեն լուծված էին...»¹:

Սա լուրջ մեղադրանք է, մանավանդ, եթե նկատի առնենք այն հանգամանքը, որ Չիչերինը դրանով իսկ կատարվածի համար պատասխանատու է դարձնում նաև հայկական պատվիրակույթյանը: Բայց արդյո՞ք արդարացի էր Չիչերինը այդ մեղադրանքների հարցում: Դժբախտաբար նա չի ասում, թե ինչպե՞ս կամ ո՞ւմ միջոցով են հայ պատվիրակներին տեղեկութուններ հաղորդել բանակցութունների ընթացքի մասին: Մնում է այդ բացը լրացնելու համար դիմել Բաբվում Սորհրդային Հայաստանի լիազոր ներկայացուցիչ Աթաբեկովին

¹ Նույն տեղում, էջ 497:

¹ Նույն տեղում, էջ 499: Տե՛ս նաև Գ. Գալոյան, նշվ. աշխ., էջ 457:

ուղարկած Բեկզաղյանի մարտի 18-ի Հայտնի նամակին: «Այդ կոնֆերանսի ընթացքի մասին, որը մինչև այժմ ունեցել է 3 նիստ (ըստ որում՝ վերջինը պետք է լիներ երեկ), մենք մասնավոր կերպով տեղեկացել ենք Արտգործոժողկոմատի միջոցով ՌՆՖՍՀ ռազմական փորձագետ ընկ. Բորրիչչևի միջոցով, որին մենք սխտեմատիկ կերպով նյութեր ենք մատակարարել սահմանների և Հայաստանի ու Թուրքիայի միջև այդ սահմանների անցկացման ամենահնարավոր տարբերակների մասին, - գրում է Բեկզաղյանը: - Առայժմ մեզ Հայտնի է, որ Թուրքերը գնահատելով իրենց օգտավետ դրույթունը (նրանք պահանջել են նույնիսկ Բաթումը), մաքսիմալ պահանջներ են դնում, այդ թվում՝ Կարսը մարզի հետ, Բաթումի մարզը Ախալցխայի և Ախալքալաքի չրջաններով ու Սուրմալուի գավառը, բացի դրանից հսկայական քանակությամբ ոսկի...»¹:

Ինչպես տեսնում ենք, Բեկզաղյանը շատ բան չգիտեր և չէր էլ կարող իմանալ, քանի որ Բորրիչչևը ընդամենը փորձագետ էր և չէր կարող տեղեկություններ ունենալ ինչպես անդրկուլիսյան բանակցությունների, այնպես էլ այն նիստերի մասին, որոնց չէին հրավիրում մասնակցել: Այդ ամենի, ինչպես նաև անդրկուլիսյան բանակցություններին «ազդեցիկ ընկերների» մասնակցության մասին Հայ պատվիրակները իմացան միայն Ս. Տեր-Գաբրիելյանին Չիչերինի ուղարկած նամակից: Այնպես, որ Չիչերինը մեղանչում է իրականության դեմ՝ գրելով, թե Բեկզաղյանն այդ ամենին տեղյակ էր: Բայց մի հարցում Չիչերինն, այնուամենայնիվ, արդարացի էր: Խոսքը Հայ պատվիրակների պասսիվության մասին է: Ինչ խոսք, որ նրանք չպետք է նստեին ու սպասեին հրավերի, այլ պետք է օգտագործեին բոլոր հնարավորությունները (լեզու, անլեզու) քննարկվող հարցերի մասին տեղեկություններ հավաքելու և կապերի մեջ մտնելու ոչ միայն ռուսական պատվիրակության, այլև բոլոր այն գործիչների հետ, ովքեր այս կամ այն կերպ առնչվում էին բանակցություններին: Օրինակ, Բեկզաղյանը քաջատեղյակ էր, որ Ազրբեջանի ներկայացուցիչ Շահթախթինսկին ոչ միայն ծանոթ է Թուրք պատվիրակներին, այլև Մոսկվայում նրանց հետ գաղտնի բանակցություններ է վարում: Բայց փորձե՞լ է գոնե մի անգամ հանդիպել նրան ու ինչ-որ գաղտնիքներ կորզել: Կամ փորձե՞լ է հանդիպել Թուրք պատվիրակներին՝ թեկուզ Չիչերինի կամ Կարախանի օգնությամբ, Թուրք-հայկական անթիվ կնճռոտ հարցերի գոնե

մի մասի հարցում նրանց տրամադրությունը պարզելու նպատակով: Թե՞ հետևելով Լևոն Շանթին, չի ցանկացել մեր ժողովրդի թշնամիների հետ նույն սեղանի շուրջը նստել, ինչը, անչուչտ, դիվանագետին վայել վարքագիծ չէր լինի:

Մենք համոզված ենք, որ Բեկզաղյանն այդ ուղղությամբ քայլեր չի ձեռնարկել, այլապես նրա նամակներում գոնե մի ակնարկ կլիներ: Նա նաև չի պատասխանել Չիչերինի մեղադրանքներին: Ճիշտ է, 1921թ. մայիսի 19-ին ՀԿԿ Կենտկոմի պլենումում, որին մասնակցում էին Մյասնիկյանը, Լուկաչինը, Մուսվյանը, Երզնկյանը և ուրիշներ, Բեկզաղյանը զեկուցել է Մոսկվայում իր գլխավորած պատվիրակության գործունեության մասին, բայց կազմված արձանագրությունն այնքան հակիրճ է, որ մեզ հետաքրքրող հարցում պարզություն չի մտցնում: Ուշագրավ է, որ թեև պլենումը հավանություն է տվել պատվիրակության գործունեությանը, բայց նաև այդ նույն նիստում որոշել է Բեկզաղյանի փոխարեն Արտգործոժողկոմի պաշտոնում նշանակել Ասքանազ Մուսվյանին¹ (Բեկզաղյանը մնում էր որպես պարենավորման և արտաքին առևտրի ժողկոմ):

Անցնելով ՌՆՖՍՀ արտգործոժողկոմատի առաջ ծառայած երկրորդ խնդրին, ավելորդ չենք համարում սկզբից ևեթ շեշտելու, որ նրա իրագործման հարցում Չիչերինը ցուցաբերեց առավելագույն եռանդ ու հետևողականություն: Եվ դա հասկանալի է. Մոսկվայի պայմանագրի 15-րդ հոդվածը Ռուսաստանի կառավարության վրա ծանր պարտավորություն էր դրել՝ ձեռնարկելու անհրաժեշտ քայլեր Կովկասյան հանրապետությունների կողմից իրենց վերաբերող կետերի անվերապահ ընդունումն ապահովելու համար: Ահա ինչու չուտով Կովկասը ողողվեց չիչերինյան հեռագրերով ու նամակներով: Նա չվարանեց նաև Անդրկովկասյան հանրապետությունների մոսկովյան ներկայացուցիչների մասնակցությամբ պայմանագրերի նախագծեր մշակել և բացատրական գրությունների ու Մոսկվայի կոնֆերանսի արձանագրությունների հետ մեկտեղ ուղարկել Թիֆլիս՝ հուսալով, որ տունդարձի ճանապարհին Թուրքական պատվիրակությունը հենց այդտեղ էլ համապատասխան պայմանագրեր կկնքի բոլոր երեք հանրապետությունների հետ:

Չիչերինը նախապես հոգ էր տարել, որ Կովկասի խորհրդային հանրապետություններն ինքնագործունեությամբ չզբաղվեն և կնքվեն

¹ ՀԱԱ, ֆ. 114, ց. 2, գ. 68, թ. 26:

¹ Տե՛ս ՀԱԱ, ֆ. 1, ց. 1, գ. 13, փ. 2, թ. 2:

լիք պայմանագրերում այնպիսի դրույթներ չամրագրեն, որոնք Ռուսաստանի Համար անցանկալի կլինեն: Իսկ դրան կարելի էր հասնել կուսակցական կարգապահության պարտադրանքով: Ապրիլի 1-ին Ձիչերինը նամակով դիմում է Լենինին, Հայտնում, որ թուրքերը կփորձեն կովկասյան Հանրապետություններին սեպարատ պայմանագրեր պարտադրելու միջոցով նրանցից կորզել այնպիսի զիջումներ, որ չեն ստացել ռուսներից և ավելացնում, թե որպեսզի դա կանխվի «անհրաժեշտ է, որ թուրքերի հետ առաջիկա բանակցությունների ժամանակ կովկասյան խորհրդային Հանրապետությունները գործեն իրար հետ չափազանց համախմբված և մեզ հետ լիակատար կոնտակտի մեջ: Մինչդեռ երկուդե կարելի է, որ այդ առումով ամեն ինչ չէ, որ բարեհաջող կարող է լինել՝ մասնավորապես Ադրբեջանի կողմից»¹: Ելնելով դրանից, Ձիչերինն անհրաժեշտ է համարում, որ ՌԿ(Բ)Կ Կենտկոմը վճռական որոշում ընդունի, որով կովկասյան Հանրապետություններին կպարտավորեցնի Թուրքիայի հետ կնքվելիք պայմանագրերի նախագծերը նախապես ներկայացնել խորհրդային Ռուսաստանի կառավարությունը և ստանալ նրա հավանությունը:

Լենինը Ձիչերինի այս առաջարկությունը համարում է «անվիճելի» և հանձնարարում Մոլոտովին (Կենտկոմի քարտուղար) անմիջապես կապվել Քաղբյուրոյի անդամների հետ, ստանալ նրանց կարծիքը և դրական արդյունքի դեպքում անհապաղ ծածկագրով հաղորդել բոլոր երեք Հանրապետություններին: Ապրիլի 3-ին Լենինի հանձնարարությունն արդեն կատարված էր²:

Ձիչերինը շտապում էր, և պատճառը հասկանալի է. Յուսուֆ Քեմալի պատվիրակությունն իր առաքելությունը ավարտված համարելով՝ պատրաստվում էր մեկնել Մոսկվայից: Տունդարձի ճանապարհն անցնում էր Անդրկովկասով, և Ձիչերինն ուզում էր, որ Թիֆլիսում գումարվի թուրք-անդրկովկասյան կոնֆերանս, Մոսկվայի պայմանագրի հիմքի վրա կնքվեն համապատասխան պայմանագրեր բոլոր երեք Հանրապետությունների հետ, որով և թուրք-խորհրդային հարաբերությունները կամբողջանան: Դրա համար էլ չսպասելով իր առաջարկության վերաբերյալ Լենինի պատասխանին՝ իսկույն Մոսկվայում գտնվող վրաց գործիչների մասնակցությամբ թուրք-վրացական պայմանագրի նախագիծ է մշակում, բացատրական գրություններ կազմում

բոլոր այն խնդիրների վերաբերյալ, որոնք՝ ի տարբերություն թուրք-վրացական պայմանագրի, տեղ պետք է գտնեն թուրք-հայկական և թուրք-ադրբեջանական պայմանագրերում:

Ապրիլի 4-ին Օրախելաչվիլին Մոսկվայից ուղարկված թիֆլիս՝ խորհրդային Հայաստանի լիազոր ներկայացուցիչ Շավերգովին և տեղեկացնում. «...ուղարկում եմ. 1. Քաղվածքներ Մոսկվայի ռուս-թուրքական կոնֆերանսի արձանագրություններից՝ Անդրկովկասի խորհրդային Հանրապետությունների ինքնիշխանության մասին: 2. Թուրքիայի հետ պայմանագրի նախագիծը Ձիչերինի բացատրական գրության հետ մեկտեղ»¹: Օրախելաչվիլին նաև Հայտնում է, որ Ձիչերինի հետ զրույցի ընթացքում բավականին շատ է խոսվել Ալեքսանդրապոլի պայմանագրի մասին, որ Ձիչերինը մի քանի անգամ ընդգծել է, որ թուրքերի հետ բանակցություններում պետք է «աներեր պահանջվոտ» լինել Ալեքսանդրապոլի պայմանագրի վերացման հարցում և որ Ռուսաստանը ոչինչի առաջ կանգ չի առնի, որպեսզի թուրքերին հարկադրի հրաժարվելու այդ պայմանագրից:

Բացատրական գրությունները առավել հանգամանալից ներկայացված են Օրջոնիկիձեին՝ Օրախելաչվիլու հասցեագրած ուղարկում: Նրանում տեղ են գտել թե՛ Հայ-թուրքական և թե՛ թուրք-ադրբեջանական պայմանագրերի հարցում չիչերինյան մոտեցումներն ու առաջարկությունները²: Մենք դրանց վրա չենք ծանրանա, թեմայից շատ չչեղվելու համար, այլ կանդորադառնանք միայն այն գրություններին, որոնցում չոչափվում է Նախիջևանի հարցը: Բայց նախ ասենք, որ Հայ-թուրքական պայմանագրի հարցում Ձիչերինն առանձնապես կարևոր էր համարում այնպիսի կետերի առկայությունը, ինչպիսիք են նախկինում կողմերի միջև կնքված պայմանագրերի չեղյալ հայտարարման, սուվերենության փոխադարձ հարգման, ներման, գերիների վերադարձման մասին և այլն: Ձիչերինը հատկապես երկար է կանգ առնում Ալեքսանդրապոլի պայմանագրի հարցի վրա, ըստ որում՝ համարյա բոլոր գրություններում: Մեծերենք մի հատված Օրախելաչվիլու միջոցով Օրջոնիկիձեին ուղարկած ուղարկից. «Հայաստանի համար առանձին նշանակություն է ստանում նախկին բոլոր պայմանագրերի վերացման մասին հոգվածը, որով վերանում է նաև մինչև այժմ Թուրքիայի կողմից ճանաչվող Ալեքսանդրապոլի պայմանագիրը: Ռուս-

¹ „Геноцид армян...”, стр. 478.

² Ուշագրավ է, որ Քաղբյուրոյի անդամներից միայն Տրոցկին էր ձեռնպահ մնացել:

¹ ՀԱԱ, ֆ. 114, ց. 2, գ. 63, թ. 47:

² Տե՛ս նույն տեղում, թ. 47-50:

Թուրքական կոնֆերանսի ժամանակ մենք միլիոն անգամ հայտարարել ենք, որ Ալեքսանդրապոլի պայմանագիրը չենք ճանաչում, և եթե Թուրքերը առաջ քաշեն այն, պետք է ամենավճռական կերպով հայտարարել, որ նա ուժի մեջ չէ: ...Ալեքսանդրապոլի պայմանագիրը այնքան հրեշավոր է, որ նրա ամեն մի մատնանջում պետք է ամենակտրուկ հակահարված ստանա, կարելի է հայտարարել, որ Ռուսաստանյան հանրապետությունը ոչ մի բանի առաջ կանգ չի առնի, եթե Ալեքսանդրապոլի պայմանագիրը ճանաչելու համար Հայաստանին ստիպելու փորձը կրկնվի...»¹ (ընդգծումը մերն է – է. Ջ.):

Մենք չիչերինյան տողերն ընդգծեցինք, որպեսզի ընթերցողն էլ տեսնի ու համոզվի, որ ինչպես կոնֆերանսում Հայաստանին առնչվող մի շարք հարցերի կապակցությամբ Բեկզադյանի բողոքի դեմ գրություններում, այստեղ ևս Չիչերինը մեղանջում է իրականության դեմ՝ գրելով, թե «ռուս-թուրքական կոնֆերանսի ժամանակ մենք միլիոն անգամ հայտարարել ենք, որ Ալեքսանդրապոլի պայմանագիրը չենք ճանաչում»: Նախորդ գլխում արդեն տեսանք, որ այդ մասին խոսք եղել էր միայն նախակոնֆերանսյան հանդիպման և կոնֆերանսի առաջին նիստի ժամանակ, բայց Թուրքերի վճռական բողոքից հետո հետագայում այդ հարցին այլևս չեն անդրադարձել: Վերջապես, ի՞նչ է նշանակում «չենք ճանաչում», եթե Հայաստանի սահմանները որոշելիս հիմք են ընդունվում Ալեքսանդրապոլի պայմանագրով գծված սահմանները: Չէ՞ որ եթե այդ պայմանագիրը «հրեշավոր» էր, իսկ դա իսկապես այդպես էր, ապա դա նախ և առաջ վերաբերում էր հաստատված սահմաններին, որոնցով երկիրը ծվեն-ծվեն էր արվել, նրա տարածքները խլվել էին, ռազմական տեսակետից դարձել անպաշտպան, իսկ տնտեսական տեսակետից անկենսունակ: Բայց ինչպես երևում է, Չիչերինը «հրեշավոր» ասելով նկատի ունենում էր միայն սուվերենության այն սահմանափակումները, որոնք տեղ էին գտել Ալեքսանդրապոլի պայմանագրում: Մինչդեռ ազգի կենսունակության հիմքը տարածքն է և ոչ թե սուվերեն իրավունքների այս կամ այն սահմանափակումները, որոնք, որպես կանոն, անցողիկ ու ժամանակավոր են լինում:

Անցնելով ապրիլյան այդ օրերին Նախիջևանի հարցի արձածուններին, նախ արձանագրենք, որ Չիչերինն այդ խնդրին անդրադարձել է ոչ միայն հայ-թուրքական պայմանագրի նախագծի կապակցությամբ

գրված բացատրական գրությունում, այլև Ադրբեջանի արտգործոց-կոմ Հուսեյնովին ուղարկած հրահանգներում: «Երբ վճռվեց, որ Նախիջևանը անցնում է Ադրբեջանի հովանավորության տակ, – գրում է Չիչերինը Հուսեյնովին, – Թուրքերը Նախիջևանի մարզի սահմանը որոշեցին ըստ Ալեքսանդրապոլի պայմանագրի, այսինքն՝ Նախիջևանի օգտին ընդգրկեցին Երևանի մարզի հարավային եռանկյունի գոտին: Ռազմական փորձագետների սխալմունքի պատճառով, առանց մեր գիտություն, դա ընդունվել էր սահմանի մասին ռազմական փորձագետների հատուկ հանձնաժողովում: Դրա համար էլ, երբ հարցը նորից անցավ կոնֆերանս, միակ բանը, որ մենք կարող էինք անել, դա հարավային եռանկյունի հատվածում սահմանի ուղղության բողոքարկելն էր: Երկար պայքարից հետո որոշվեց, որ Հայաստանի, Ադրբեջանի և Թուրքիայի (ներկայացուցիչների – է. Ջ.) հանձնաժողովը վերջնականապես կճշտի սահմանն այդ վայրում...»¹:

Նախորդ գլխում՝ Մոսկվայի կոնֆերանսի աշխատանքները վերլուծելիս, մենք արդեն տեսանք, թե ինչպես ծագեց և ինչ ընթացք ստացավ այդ «Եռանկյունի գոտի» կոչված տարածքի խնդիրը և կարող ենք հավաստել, որ Չիչերինն իսկապես անթերի է ներկայացնում խնդրի ծագումը: Դա իրոք այդպես է. Քաղաքական հանձնաժողովի մարտի 10-ի և 12-ի նիստերում նա իսկապես եռանկյուն կերպով բողոքեց այդ տարածքը Նախիջևանի սահմանների մեջ մտցնելու դեմ և հասավ նրան, որ հարցի վերջնական լուծումը թողնվեց խառը հանձնաժողովի վերջնական որոշմանը: Բայց դրա հետ մեկտեղ Չիչերինը ոչինչ չի բացատրում և դրանով իսկ չի փարատում ընթերցողի տարակուսանքը, թե ինչու՞ բացառապես Հայաստանի հաշվին Թուրքերին կատարած մեծամեծ զիջումներում (Կարս, Արդահան, Սուրմալու և այլն), որոնք, ի դեպ, դարձյալ ըստ Ալեքսանդրապոլի պայմանագրի են կատարվել, ռուսական պատվիրակությունը, փաստորեն, ծպտուն չհանեց, չբողոքեց ու սահմանագծի ամենաչնչին ուղղում չպահանջեց Հայաստանի համար խիստ կարևորություն ներկայացնող մի որևէ հատվածում (օր. Անիի ավերակների, Կողբի աղահանքերի և այլն), իսկ այստեղ՝ Հայաստանի և Նախիջևանի սահմանագլխին ընկած այդ մի փոքր տարածքի պատկանելիության հարցում նման ակտիվություն ցուցաբերեց: Ինչ խոսք, որ բոլոր կողմերից խուզված և նվազագույնի հասցված սահմաններում կձևված Խորհրդային Հայաստանի համար ամեն մի թիզ

¹ Նույն տեղում, թ. 47 չրջերես:

¹ „Геноцид армян...”, стр. 492.

Հողատարածքն էլ էական նշանակություն էր ստանում և մենք պարտավոր ենք երախտիքի խոսք ուղղել Ձիչերին՝ թուրքերի կողմից որոշակի նկատառումով Նախիջևանին միացրած Երևանի գավառի հարավ-արևելյան «Եռանկյունի գոտին» Հայաստանին վերադարձնելու հարցում ցուցաբերած հետևողականության համար:

Բայց արդյո՞ք Ձիչերինն հենց Հայաստանի շահն էր հետաքրքրում, արդյո՞ք նա չէր կեղծում՝ Նախիջևանի արևմտյան սահմանի փոփոխման իր պահանջի հիմքում դնելով «Եռանկյունի գոտին» Երևանի գավառի մաս լինելու, կամ էլ Ադրբեջանի նախկին կառավարության կողմից այդ տարածքի վրա չհավակնելու փաստը: Անշուշտ, կեղծում էր ճիշտ այնպես, ինչպես կեղծում էր Յուսուֆ Քեմալը կոնֆերանսի Քաղաքական հանձնաժողովի մարտի 12-ի նիստում՝ հայտարարելով, թե այդ հարցը խիստ կարևոր է թուրքիայի արևելյան սահմանների պաշտպանության տեսակետից, թե ինքը վստահ է, որ Ադրբեջանը ստանձնելով այդ տարածքի հովանավորությունը ևս, ամեն ինչ կանի, որպեսզի կատարի իր պարտքը թուրքիայի, Ռուսաստանի և ողջ մարդկության առաջ: Մինչդեռ այդ վերամբարձ ոճի տակ թաքնված էր շատ հեռահար նպատակներ հետապնդող գաղափարախոսություն՝ պանթուրքիզմը, որն անհրաժեշտաբար պահանջում էր ապահովել ընդհանուր սահմանի առկայություն Ադրբեջանի հետ: Իսկ ստեղծված իրադրության պայմաններում դա կարելի էր իրականացնել միմիայն Նախիջևանի միջոցով: Բավական է մի հայացք նետել քարտեզին, դրանում համոզվելու համար: Ալեքսանդրապոլի և Մոսկվայի պայմանագրերով տեղ դառնալով Մուրմալուի գավառին, որի վարչական սահմանը Արաքսի աջ ափով ձգվում էր մինչև պարսկական սահմանը (մինչև Ստորին Կարա-սու գետը), թուրքիան դրանով իսկ Նախիջևանի երկրամասի հետ ընդհանուր սահման ունենալու հնարավորություն էր ստացել: Բայց դա կարող էր իրականանալ միայն այն դեպքում, եթե Նախիջևանի երկրամասի կազմում ընդգրկվեր ոչ միայն Շարուրի գավառակը, այլև Արաքսի ձախ ափով Գայլի Դրունքից դեպի արևմուտք տարածվող (մինչև Արարատ կայարան) Երևանի գավառի հարավային այն հատվածը, որը խորհրդա-թուրքական դիվանագիտական շրջանակներում սկսել էին անվանել «Եռանկյունի գոտի»:

Կոահեղ էր Ձիչերինն այդ գոտու պատկանելիության հարցում թուրքական դիվանագիտության հետին ծալքերում թաքնված իրական նպատակը: Անշուշտ, կոահեղ էր, այլապես այդպիսի համառություն չէր ցուցաբերի: Ասենք, Կովկասում գործող բոլշևիկյան ղեկավար գործիչների համար Ադրբեջանի հետ ընդհանուր սահման ունենալու

թուրքերի մտադրությունը բոլորովին էլ գաղտնիք չէր: Թուրք-հայկական պատերազմի վերջին շրջանում թե՛ Ստալինը, թե՛ Օրջոնիկիձեն իրենց գրություններում շոշափել էին այդ խնդիրը և միանշանակ չեչտել, որ չի կարելի թույլ տալ, որ թուրքիան Ադրբեջանի հետ ընդհանուր սահման ունենա: Ձիչերինի նման թրծված դիվանագետը չէր կարող այդ մասին պարզորոշ արտահայտվել ո՛չ կովկասյան իր կոլեգաների (հատկապես ադրբեջանցի) և ո՛չ առավել ևս՝ թուրքերի հետ: Նա պետք է խնդրի լուծման այլ միջոց գտներ: Ահա, օրինակ, ինչ է գրում Ձիչերինը այդ կապակցությամբ Հուսեյնովին ուղարկած հրահանգում. «Նախկինում, երբ Շահթախթինսկին մեզ հետ խոսում էր Նախիջևանի մասին, նա Նախիջևանի մարզի ծայրագույն սահմանը համարում էր Գայլի Դրունքը: Մինչդեռ Եռանկյունի գոտին՝ այսինքն Երևանի մարզի հարավային եռանկյունի մասը, ընկած է Գայլի Դրունքից դուրս, այսինքն՝ հեռու նրանից, ինչին հավակնում էր Շահթախթինսկին»:

Եթե Ձիչերինի այս հրահանգը չլիներ, ապա այդպես էլ չէինք իմանա, որ ինչ-որ մի ժամանակ Հայաստանի թիկունքում, Շահթախթինսկին և Ձիչերինը բանակցություններ են վարել, ինչի մասին ոչ մի հիշատակություն չի պահպանվել: Ափսոս միայն, որ Ձիչերինը չի կոնկրետացնում, թե երբ էր դա տեղի ունեցել, կոնֆերանսի նախօրեին, թե՞ ավելի վաղ, չի ասում նաև, թե ինչով են դրանք ավարտվել: Դրա փոխարեն Հուսեյնովին հանձնարարում է անմիջապես նախնական քննարկում կազմակերպել, պարզել Ադրբեջանի կարծիքը և հայտնել իրեն: Նա գտնում է, որ պետք է Հայաստանի և Նախիջևանի միջև անցկացվելիք սահմանը նախապես որոշել, որպեսզի իրենք իմանան, թե ինչ առաջարկությամբ են Հայաստանի և Ադրբեջանի ներկայացուցիչները ներկայանալու թուրքիայի մասնակցությամբ եռյակ հանձնաժողովին: Ձիչերինը Հուսեյնովից պահանջում է այդ հարցը քննարկել նաև Հայաստանի ու Վրաստանի իր կոլեգաների հետ և ապահովել այդ սահմանի մասին ընդհանուր համաձայնություն, որպեսզի հնարավոր լինի եռյակ հանձնաժողովում այն պաշտպանել:

Ինչպես տեսնում ենք, Ձիչերինը լրջորեն մտահոգված էր «Եռանկյունի գոտին» Հայաստանին վերադարձնելու հարցով, թեև Հայ-թուրքական պայմանագրի վերաբերյալ բացատրական գրությունում այդ մասին պարզորոշ չի արտահայտվում, այլ բավարարվում է նրանով, որ հատուկ ընդգծում է, թե թուրք-հայկական պայմանագրում պետք

¹ Նույն տեղում, էջ 492-493:

է առանձին հողված լինի, որ «երկու պայմանավորվող կողմերը համաձայն են, որ Եռանկյունի գոտու տարածքի, որն ընկած է հնահունի (Արաբսի – է. Ջ.)... և այլն, պատկանելիության հարցը պետք է լուծվի Մոսկվայի ուսումնական պայմանագրի երրորդ հոդվածի որոշման համաձայն»¹:

Եթե հիշենք, որ բացատրական գրությունները կազմելիս Ադրբեջանի և Հայաստանի միջև եռանկյունու վերաբերյալ որևէ համաձայնության մասին խոսք լինել չէր կարող, ապա հեշտ կլինի հասկանալ նման հողվածի մասին Չիչերինի առաջարկությունը: Բայց դատելով Բեկզադյանի ստացած որոշ հաղորդումներից (Հայհեղկոմի համար նախատեսված ռազմագիրը Բաբու՝ Աթաբեկովին և Թիֆլիս Շավերդովին, Բեկզադյանի հետ Աթաբեկովի հեռախոսազրույցը), այդ հարցը չոչափվել է Չիչերինի հետ Բեկզադյանի հետկոնֆերանսյան հանդիպման (օրն անհայտ է) ժամանակ: Հայաստանի ազգային արխիվում պահվող այդ փաստաթղթերից պարզորոշ երևում է, որ թե՛ Չիչերինին և թե՛ Բեկզադյանին առավելագույն անհանգստացնում էր Ծախթախթինսկու գործոնը, մարդ, որը կարող էր խառնել խաղաքարտերը և խախտել նախնական պայմանավորվածությունը: Ռազմագրում ուղղակի ասված է. «Չիչերինի հետ մեկտեղ անհրաժեշտ եմ համարում, որ Ադրբեջանի ներկայացուցիչը, որը ոչ մի դեպքում Ծախթախթինսկին չպետք է լինի, Շարուր-Դարալագյազի հարցում քվեարկի մեր պատվիրակի հետ միասին»² (ընդգծումը մերն է – է. Ջ.): Իսկ Բաբուվում Հայաստանի ներկայացուցիչ Աթաբեկովը Բեկզադյանի հետ հեռախոսազրույցից հետո Մոսկվային ուղարկած գրությունում ավելի լայն մեկնաբանություն է տալիս՝ գրելով. «Բեկզադյանը և Չիչերինը անհրաժեշտ են համարում, որ Շարուր-Դարալագյազի շրջանի հարցերում Հայաստանը և Ադրբեջանը հանդես գան միասնաբար, ըստ որում Ծախթախթինսկու թեկնածուները՝ եթե Ադրբեջանի կողմից այն առաջադրվի, պետք է վճռական կերպով մերժվի»³ (ընդգծումը մերն է – է. Ջ.):

Չի կարող տարօրինակ չթվալ, որ Չիչերինը՝ դեմ լինելով Ծախթախթինսկու թեկնածուները, այդ մասին բացահայտ չի արտահայտվում, Ադրբեջանի ղեկավարության առաջ նման պահանջ չի դնում, այլ փորձում է Նախիջևանին առնչվող հարցերում նրա հետա-

գա մասնակցությունը կասեցնել Հայաստանի ղեկավարության միջոցով: Սա մի կողմից վկայում է բոլշևիկյան ղեկավարության հիերարխիայում Չիչերինի դիրքերի թուլություն¹, մյուս կողմից՝ Նախիջևանի հարցում Ծախթախթինսկու գործունեությունից նրա դժգոհ լինելու մասին: Բայց կարո՞ղ էր Հայհեղկոմը Ադրբեջանի առաջ նման պահանջ դնել, և ի՞նչ պատճառաբանությամբ պիտի առարկեր Ծախթախթինսկու թեկնածուների դեմ: Բեկզադյանն այդ կապակցությամբ որևէ կոնկրետ բան չի առաջարկում Հայհեղկոմին, այլ ռազմագրի վերջում միայն ավելացնում է. «Ծախթախթինսկուն մերժելու որպես առիթ տես Չիչերինի գրությունը և իմ ծածկագրերի հաղորդումները»²:

Դժբախտաբար, մեզ մատչելի արխիվներում Բեկզադյանի մատնանշած փաստաթղթերից և ոչ մեկը հայտնաբերել չհաջողվեց: Անհայտ է մնում նաև այն, թե Հայհեղկոմը, այնուամենայնիվ, Ծախթախթինսկու թեկնածուների մերժման ուղղությամբ որևէ փորձ կատարե՞լ է, թե՞ ոչ: Կարծում ենք՝ չի կատարել, իսկ եթե կատարել է, ապա անհաջող. քանի որ Ծախթախթինսկին, ինչպես հետագա շարադրանքում կտեսնենք, դարձյալ ակտիվ դեր է խաղացել ինչպես «Եռանկյունի գոտու» խնդրի լուծման գործում, այնպես էլ Կարսի կոնֆերանսում՝ որպես Ադրբեջանի պատվիրակության ղեկավար:

Ապրիլյան այդ առաջին օրերին անկատար մնաց Չիչերինի մի այլ հանձնարարությունը ևս, որի իրականացումը նա դարձյալ Հայհեղկոմի վրա էր դրել: Բանն այն է, որ այդ օրերին (փաստաթուղթը թվագրված չէ, բայց բովանդակությունից երևում է, որ տրվել է ապրիլի առաջին օրերին) Չիչերինը մի հեռագիր էր ուղարկել Մոսկվային, որում բառացիորեն ասված էր հետևյալը. «Յուսուֆ Քեմալը այսօր-վաղը կարող է գալ Թիֆլիս: Անհրաժեշտ է անհապաղ Թիֆլիսում կազմակերպել երեք հանրապետությունների ներկայացուցիչների խորհրդակցություն, համախմբված հանդես գալու համար: Ես Թիֆլիս եմ ուղարկել պայմանագրի նախագիծ՝ երեք հանրապետությունների համար տարբերակներով, և մոսկովյան արձանագրություններն ու քարտեզները: Թուրքերը ձգտելու են կազմակերպել առանձին բանակցություններ Թիֆլիսում, Երևանում և Բաքվում: Հարկավոր է խափանել այդ պլանը և ամեն ինչ կազմակերպել Թիֆլիսում»³:

Մոսկվային իսկույն կատարում է Չիչերինի հանձնարարությունը,

¹ ՀԱԱ, ֆ. 114, ց. 2, գ. 63, թ. 31:

² Նույն տեղում, ց. 1, գ. 85, թ. 3:

³ Նույն տեղում, գ. 105, թ. 14:

¹ Գ. Չիչերինը բոլշևիկյան կուսակցության անդամագրվել էր միայն 1918թ.:

² ՀԱԱ, ֆ. 114, ց. 1, գ. 85, թ. 3:

³ Նույն տեղում, գ. 105, թ. 13:

Համապատասխան Հեռագրեր է ուղարկում Թիֆլիս և Բաքու (Օրա-խելաչվիլուն և Հուսեյնովին), ամբողջությամբ ներկայացնում Չիչերինից ստացած Հեռագրի բովանդակությունը և իր կողմից ավելացնում. «Առաջարկում եմ Հանրապետությունների խորհրդակցությունը կազմակերպել Հնարավորինս շուտ, դեռ մինչև թուրքերի գալը: Խորհրդակցություն ժամանակը որոշեք և հաղորդեք: Սպասում եմ շտապ պատասխանի»¹:

Սակայն խորհրդակցություն այդպես էլ չգումարվեց: Ինչն էր պատճառը. արդյո՞ք այն, որ թուրքերը սպասածից ավելի շուտ ժամանեցին Կովկաս, թե՞ մեկ այլ բան, դժվար է ասել: Հուսեյնովից ընդհանրապես լուր չստացվեց: Իսկ Օրախելաչվիլին Շահավերդյանին հայտնել էր, թե «Թուրքերի Հետ կոնֆերանսից առաջ Ադրբեջանի, Հայաստանի և Վրաստանի ներկայացուցիչների խորհրդակցության վերաբերյալ ես հեռագրալարով խոսել եմ Հուսեյնովի Հետ: Այդտեղ, իհարկե, դա համարում են ինքնաբերական հասկանալի, բայց որոշ նկատառումներով (Բաքուն համարվում է Արևելքի հեղափոխական կենտրոնը) գտնում են, որ խորհրդակցությունը և ընդհանրապես թուրքերի Հետ բանակցությունները ավելի լավ է Բաքվում կազմակերպել...»²:

Ինչպես տեսնում ենք, ամբիցիաները այն ժամանակ էլ որոշակի դեր էին խաղում:

* * *

Անդրկովկասյան Հանրապետություններին Թուրքիայի Հետ կոնֆերանսին նախապատրաստելուն զուգընթաց ապրիլի առաջին օրերին Չիչերինը եռանդուն կերպով ձեռնամուխ եղավ նաև Խորհրդային Հայաստանի օկուպացված տարածքները թուրքական զորքերից մաքրելու գործին: Մոսկվայում վերջապես հասկացել էին, որ Հայաստանն իրենց ձեռքում պահելու համար բավական չէ միայն զինագրավում, անհրաժեշտ է բարձրացնել խորհրդային իշխանությունից հեղինակությունը: Իսկ դրա համար պետք է անեին այն, ինչ չէին արել 1920թ. դեկտեմբեր – 1921թ. Հունվար ամիսներին՝ բավարարվելով միայն խորհրդայնացած Հայաստանի նկատմամբ վերաբերմունքը փոխելու և իրենց մասնակցությամբ Հայ-թուրքական նոր կոնֆերանս գումարելու պահանջով: Պետք է վճռական պահանջ ներկայացնեին

Թուրքերին՝ մաքրելու Խորհրդային Հայաստանի օկուպացված տարածքները և Հետ քաշվելու սահմանից այն կողմ: Այժմ արդեն դրա համար իրավական հիմք էին տալիս Մոսկվայի պայմանագրով հաստատված սահմանները, ինչպես նաև այն փաստը, որ ապրիլի 2-ին Կարմիր բանակի զորամասերը նորից գրավել էին Երևանը: Առանձնապես կարևորվում էր Ալեքսանդրապոլի և նրա շրջակայքի մաքրումը թուրքական զորքերից այն պարզ պատճառով, որ առանց դրա Երևանի Հետ երկաթուղային կապն ապահովել Հնարավոր չէր: Հայաստանը նախկինի պես կտրված կմնար արտաքին աշխարհից և բացի այդ, կխափանվեր Երևան մտած Կարմիր բանակի մատակարարումը: Եվ եթե մինչ այդ՝ փետրվարյան ապստամբությունից շրջանում (1921թ. փետրվարի 18 – ապրիլի 2), ոչ միայն թուրքերից Արփաչայի մյուս ափն անցնելու պահանջ չէին դնում, այլև անուղղակի կերպով հասկացնում էին, որ քանի դեռ ապստամբությունը ճնշված չէ, Ալեքսանդրապոլը դատարկել պետք չէ, ապա այժմ արդեն դիվանագիտական ուժգին գրոհ սկսվեց Անկարայի վրա: Բավական է նշել, որ Հինգ օրվա ընթացքում (ապրիլի 4–8-ը), Չիչերինը թուրքական կառավարությունը փոխանցելու համար տարբեր հասցեներով (Բաքու՝ Օրջոնիկիձեին, Անկարա՝ դեսպան Մոլոտովին, Մոսկվա՝ դեսպան Ալի Ֆուադ փաշային) 7 հեռագիր ու նոտա է հղել, որոնց մեջ ոչ միայն թուրքական զորքերը Արփաչայից այն կողմ Հետ քաշելու պահանջ կար, այլև սպառնալիք՝ թուրքական զորքերի Հետ Կարմիր բանակի զորամասերի ընդհարման ծանր հետևանքների մասին: Այդպիսի բովանդակություն ունեւ, օրինակ, ապրիլի 8-ին թուրքական կառավարությունը հաղորդելու նպատակով Օրջոնիկիձեի միջոցով Մոլոտովինուն ուղարկված հեռագիրը և նույն օրը Ալի Ֆուադ փաշային հասցեագրած նոտան¹:

Ինչ խոսք, որ թուրքերը նախկինի պես փորձում էին ձգձգել Չիչերինի պահանջի կատարումը՝ պատճառաբանելով, թե Ալեքսանդրապոլի պայմանագրի, – որը դեռ ուժի մեջ էին համարում քանի դեռ նոր պայմանագիր չի կնքվել, – ոչ բոլոր կետերն են կատարվել Հայաստանի կողմից: Այսպիսի պայմաններում Ռուսական կառավարությունը որոշում է օգտագործել նաև Կարմիր բանակի զործոնը: Ապրիլի 13-ին 11-րդ Կարմիր բանակի հրամանատար Հեկկերը սպառնալից ուղղորդել է ուղարկում թուրքական բանակի հրամանատարությունը, որում հայտնում է, որ իր կառավարությունից հրաման է ստացել անհապաղ հսկո-

¹ Նույն տեղում, թ. 24:

² Նույն տեղում, ց. 2, գ. 63, թ. 47:

¹ Տե՛ս «ДВП СССР», т. IV, էջ. 53,55.

ղության տակ առնել Թիֆլիս-Երևան երկաթգծի՝ թուրքերի կողմից օկուպացված մասը և զգուշացնում, որ եթե մոտ օրերը պատասխան չստանա Մոսկվայի պայմանագրով գծված սահմաններից այն կողմ թուրքական զորքերի հետքաչման ժամկետների վերաբերյալ, ապա ստիպված կլինի իր զորքերին հրաման տալ այդ շրջանները զենքի ուժով գրավելու մասին¹: Այս սպառնալիքը անհետևանք մնալ չէր կարող և ապրիլի 15-ին Անկարայի կառավարությունը Կարաբեքիրին հանձնարարեց մեկ շաբաթվա ընթացքում մաքրել Ալեքսանդրապոլը²: Թե ինչ ազդեցություն էր թողել Հեկկերի ռազմագիրը Անկարայում, երևում է նրանից, որ Թուրքիայի արտաքին գործերի ժողովրդական կոմիսար Ահմեդ Մուհթարը Չիչերինին, Ստալինին, Օրջոնիկիձեին հասցեագրած ապրիլի 14-ի հեռագրում հիշեցնելով հանդերձ, որ 16-րդ հոգվածի համաձայն Մոսկվայի պայմանագիրը ուժի մեջ պետք է մտնի վավերացրած օրինակների փոխանակումից հետո միայն (բացի 13-րդ հոգվածից, որը վերաբերում էր թուրք ռազմագերիների հայրենադարձությունը և ուժի մեջ էր մտնում ստորագրման օրվանից), և որ Հայաստանում ծագած ապստամբության շրջանում ռուսական կառավարությունը չէր ցանկանում օկուպացված շրջանների մաքրումը, ինչն ակնհայտ դարձավ Ալեքսանդրապոլի մաքրման մասին կեղծ լուրերի կապակցությամբ Ալի Ֆուադ փաշային արված հանդիմանությունից, այնուամենայնիվ ավելացնում է, թե մեկ շաբաթվա ընթացքում՝ սկսած ապրիլի 15-ից, Մոսկվայի պայմանագրով որոշված սահմանագծից արևելք ոչ մի թուրք չի մնա³: Նա նաև անդրադառնում է Հեկկերի սպառնալից տոնի կոպակցությամբ իրենց վիրավորվածությունից հարցին, խնդրում սանձել նրան, բայց դա՝ ի միջի այլոց⁴:

Մենք հպանցիկ անդրադարձանք բռնազավթված տարածքները ազատագրելու գործում ռուսական կառավարության և հատկապես Չիչերինի ծավալած գործունեությունը՝ նախ, որովհետև մասամբ հեռու է մեր հետապնդած նպատակներից, և հետո՝ այդ թեման բավականին

լուսաբանված է մեր պատմագիտություն կողմից: Ճիշտ նույն նկատառումով էլ չենք անդրադառնում Ալեքսանդրապոլ քաղաքում և զավառում թուրք զինվորականության կատարած բարբարոսություններին՝ թալանին, բռնաբարություններին, խաղաղ բնակչության զանգվածային սպանություններին, որոնց զոհերի ընդհանուր թիվը հասնում է չուրջ 60 հազարի¹:

Վերադառնալով Նախիջևանի խնդրին՝ նախ արձանագրենք, որ վերը հիշատակած չիչերինյան և ոչ մի փաստաթղթում Նախիջևանի տարածքից թուրքական զորամասի դուրսբերման վերաբերյալ որևէ տեղեկություն չենք գտնում: Հարցի ընդհանուր դրվածքի դեպքում (Մոսկվայի պայմանագրով որոշված սահմաններից այն կողմ թուրքական զորքերի հետքաչման) գուցե երբ կարիքը չլիներ էլ: Բայց խնդիրն էլ հենց այն է, որ բոլոր այդ հեռագրերում ու նոտաներում հարցը կոնկրետ էր դրված՝ թուրքական զորքերի դուրսբերում «Հայկական տարածքներից», «Սորհրդային Հայաստանի օկուպացված շրջաններից», և այլն, մինչդեռ Մոսկվայի պայմանագրից հետո Նախիջևանի երկրամասը այլևս Հայաստանի մաս չէր: Անհետաքրքիր է նաև իմանալ, որ՝ ինչքանով որ կարելի է դատել ադրբեջանական պատմաբանների աշխատություններից, Թուրքիային նման պահանջ չի ներկայացրել նաև Ադրբեջանը, թեև նրանք, ինչպես հայտնի է, առանձնահատուկ հարաբերություններ ունեին: Ճիշտ է, ադրբեջանցի որոշ պատմաբաններ ուղղակի հայտարարում են, թե Ադրբեջանը և Նախիջևանը իբր նման պահանջ առաջադրել են, բայց առանց որևէ սկզբնաղբյուր վկայակոչելու: Այդպես է վարվում, օրինակ Գ. Մադաթովը Նախիջևանում խորհրդային իշխանության հաստատմանը նվիրված իր աշխատությունում: Նա գրում է. «Մոսկվայի պայմանագրի համաձայն, Ադրբեջանի և Նախիջևանի հեղկոմների վճռական գործողությունների արդյունքում Նախիջևանի տարածքը 1921թ. ապրիլի երկրորդ կեսին մաքրվեց թուրքական զորամասերից»²: Այդպես էլ անհայտ է մնում, թե ե՞րբ և ի՞նչ վճռական գործողություններ են ձեռնարկվել: Իսկ որ Շարուրում գտնվող թուրքական զորամասը ապրիլի երկրորդ կեսին պետք է հեռացած լինի, դա երևում է Ահմեդ Մուհթարի վերը վկայակոչած ապրիլի 14-ի հեռագրից, որում խոսելով Ալեքսանդրապոլի գավառը մաքրելու մասին, միաժամանակ ավելացնում է, թե Կարաբեքիր

¹ Տե՛ս Ե. Սարգսյան, Դավադիր գործարք..., էջ 181:

² Տե՛ս Кемаль Мустафа, Путь новой Турции, т. 3, М. 1934, էջ. 423:

³ Ալեքսանդրապոլի էվակուացիան ավարտվել է ապրիլի 22-ին: Այդպես են գրում բոլոր նրանք, ովքեր առնչվել են այդ հարցին, բացառությամբ Գ. Գալոյանի, որը առանց որևէ աղբյուր նշելու գրում է, թե թուրքական զորքերը Ալեքսանդրապոլից դուրս են բերվել 1921թ. մայիսի կեսերին (տե՛ս Գ. Գալոյան, նշվ. աշխ. էջ 463):

⁴ Տե՛ս „Геноцид армян...”, стр. 493-494:

¹ Մանրամասն տե՛ս է. Ա. Զոհրաբյան, նշվ. աշխ. էջ 237-246:

² Г. Мадатов, նշվ. աշխ. էջ 109:

փաշային հրահանգ է տրված մեկ շաբաթվա ընթացքում՝ սկսած ապրիլի 15-ից, ամբողջովին էվակուացնել Մոսկվայի պայմանագրով որոշված սահմանից այն կողմ ընկած ողջ տարածքը:

Սահմանից այն կողմ թուրքական զորքերի հեռանալը, կովկասյան հանրապետությունների սուվերենությունը չխախտելու վերաբերյալ Մոսկվայում ձեռք բերված համաձայնությունները, ինչպես նաև Ալեքսանդրապոլի պայմանագիրը չճանաչելու մասին Չիչերինի բազմաթիվ հայտարարությունները կոնֆերանսի օրերին և տունդարձի ճանապարհին բոլոր երեք հանրապետությունների հետ պայմանագրեր ստորագրելու վերաբերյալ Չիչերինի և Յուսուֆ Քեմալի միջև կայացած ջննտմենական համաձայնությունը, թվում է, բավարար նախադրյալ էին Թուրքիայի և Խորհրդային Հայաստանի հարաբերությունները Մոսկվայի պայմանագրի հիմքի վրա կարգավորելու համար: Սակայն վերադառնալով Մոսկվայից՝ Թուրքական պատվիրակությունը դարձյալ փորձեց Հայաստանի հարցում սողանքը թողնել՝ Բաքվում, Հուսեյնովի հետ հանդիպման ժամանակ հայտարարելով, թե պատրաստ են առանձին-առանձին պայմանագրեր ստորագրելու Ադրբեջանի և Վրաստանի հետ, իսկ Հայաստանի հետ պայմանագիր կնքելու լիազորություն չունեն: Եվ քանի որ վերջիններս՝ կատարելով Չիչերինից ստացած հրահանգը, հրաժարվեցին սեպարատ պայմանագրեր կնքելու առաջարկությունից և պահանջեցին բոլոր երեք հանրապետությունների մասնակցությամբ կոնֆերանսի գումարում, ուստի Թուրքական պատվիրակությունն օգտվելով դրանից՝ հեռացավ Թուրքիա՝ կոնֆերանսի գումարման հարցը թողնելով անորոշ և, միաժամանակ, փորձեց պայմանագրերի չկնքման համար մեղքը բարդել կովկասյան հանրապետությունների վրա: Մեկնաբանելով Բաքվում կատարվածը, Հուսեյնովը Չիչերինին (պատճենը՝ Մոսկվային) ուղարկած ապրիլի 16-ի հեռագրում հայտնում է. «Ես նրան պատասխանեցի, որ մենք չենք կարող թույլ տալ, որ Ադրբեջանի և Թուրքիայի հարաբերությունները մեկ լինեն, իսկ Թուրքիային և Հայաստանինը՝ մի այլ, կամ Հայաստանինը և Վրաստանինը՝ մեկ ուրիշ: ...Ես, Մահմուդ Շեքեթին հայտնեցի, որ անդրկովկասյան հանրապետությունները պետք է միատեղ պայմանագիր կնքեն Թուրքիայի հետ»¹:

Հենց այդ օրերին էր, որ Թուրք քաղաքական ու զինվորական գործիչները խոսքները մեկ արած, հայտարարություններ էին անում,

թե Ալեքսանդրապոլի պայմանագիրը դեռևս ուժի մեջ է: Անկարայում նաև չէին շտապում վավերացնել Մոսկվայի պայմանագիրը:

Չնայած իրադարձությունների նմանօրինակ զարգացմանը, չնայած այն բանին, որ կոնֆերանսի գումարման տեղի ու ժամանակի շուրջ որևէ կոնկրետ պայմանավորվածություն դեռևս ձեռք չէր բերվել, այնուամենայնիվ՝ կարծելով, թե կոնֆերանսի գումարումը մոտ օրերի խնդիր է, հանրապետությունները սկսեցին ակտիվ կերպով նախապատրաստվել կոնֆերանսին՝ առաջ քաշել առաջարկություններ, կազմել հուշագրեր, պայմանագրերի նախագծեր և այլն: Նախիջևանյան հիմնախնդրին առնչվող այդ փաստաթղթերի մի մասին մենք դեռ կծանոթանանք: Իսկ առայժմ հակիրճ նշենք, որ Թուրք-անդրկովկասյան կոնֆերանսին նախապատրաստվելու առաջնահերթ խնդիրների շարքում հայտնվեց նաև Անդրկովկասի խորհրդային հանրապետությունների տնտեսական և քաղաքական միավորման հարցը և այս կամ այն չափով, ուղղակի թե անուղղակի, հանրապետությունների միջև սահմանների որոշման հարցը:

Անդրֆեդերացիայի կազմավորման, նրա տնտեսական ու քաղաքական նախադրյալների, Մյասնիկյանի միջոցով Կովկասի կոմունիստներին ուղարկած Լենինի հայտնի նամակի դրույթների մասին մեր պատմաբաններն այնքան շատ են գրել և այսօր էլ դեռ շարունակում են գրել, որ այդ հարցի վրա կանգ առնելը, կարծում ենք, անիմաստ կլինի: Միանգամայն ճիշտ դիքերից են մեկնաբանվում թե՛ միավորման պատճառներն ու անհրաժեշտությունը, թե՛ դժվարություններն ու խոչընդոտները: Միայն ավելացնենք, որ այդ ամենի հետ մեկտեղ չպետք է մոռացություն տալ Թուրք անդրկովկասյան կոնֆերանսի գործոնը: Կոնֆերանսում միասնաբար, որպես մեկ պայմանավորվող կողմ, հանդես գալու և միասնական պայմանագիր կնքելու համար անհրաժեշտ էր որոշ իրավական հիմքեր ստեղծել: Թե որքան հրամայական էր դա, պարզորոշ ցույց էր տվել մոսկովյան բանակցություններում Անդրկովկասյան հանրապետությունների ինքնիշխանություն վերաբերյալ Թուրք պատվիրակների համառ հարցապնդումները:

Միավորման գործընթացը սկիզբ առավ ապրիլի վերջին օրերին (առաջնահերթությունը տրվել էր երկաթուղիներին ու արտաքին առևտրին) և կարճ ժամանակամիջոցում լայն թափ առավ՝ ընդգրկելով նորանոր բնագավառներ (վայրուտային միջոցները, արտաքին քաղաքանությունը և այլն): Այդ հարցերը որքան որ հետաքրքիր, բայցևայնպես դուրս են մեր ուսումնասիրության շրջանակներից: Բավարարվենք միայն նշելով, որ այդ ամենը հեշտ ու հանգիստ չէր անցնում, որ հատ-

¹ ՀԱԱ, ֆ. 113, ց. 3, գ. 11, թ. 88:

կապես Վրաստանում, մասամբ Ադրբեջանում, քիչ չէին ընդդիմադիր ուժերը, որոնք երբեմն բացահայտ, երբեմն քողարկված, հանդես էին գալիս միավորման դեմ: Սորհրդահայ պատմաբանները քիչ էջեր չեն նվիրել այսպես կոչված «վրացական ուկրոնիստների» և ադրբեջանական ազգայնականների գործունեության լուսաբանմանը: Նաև ցույց են տվել, որ տնտեսական ռեսուրսներից զուրկ Հայաստանը առավել քան շահագրգռված էր Անդրֆեդերացիայի կազմավորման հարցում:

Սակայն կար մի բնագավառ, որտեղ ավելի շատ խոսում էին ոչ թե միավորման, այլ սահմանազատման մասին: Ոոսքը հանրապետությունների ներքին սահմանների որոշման ու հաստատման մասին է, առանց որի ոչ մի միավորում հնարավոր չէր: Բայց դրա լուծումն էլ հեշտերից չէր: Հանրապետությունների խորհրդայնացումով անցյալից ժառանգություն մնացած տարածքային վիճելի հարցերը չվերացան: Ադրբեջանը և Վրաստանը չէին հրաժարվել Հայաստանի հաշվին ընդարձակվելու իրենց նախորդների քաղաքականությունից: Թուրքիայի օգնությամբ տեր դառնալով Նախիջևանին, Ադրբեջանն այժմ էլ հայացքը հասել էր Ղարաբաղին և Զանգեզուրին: Իսկ Վրաստանը անվերապահորեն իրենն էր համարում թե՛ Զավախքը և թե՛ Լոռին:

Թե ինչպես լուծվեցին այս հարցերը կոմունիստական «ազգային քաղաքականություն» դիրքերից, նմանապես բավականաչափ լուսաբանված է: Հետևապես հանրապետությունների միջև սահմանների որոշման խնդրին կանդրադառնանք այնքանով, որքանով որ դա կառնչվի Հայաստանի և Նախիջևանի միջև սահմանագծի ճշտման, կամ ինչպես ընդունված էր ասել, Եռանկյունի գոտու հարցին: Իսկ այն առաջին անգամ Անդրկովկասյան հանրապետությունների ներկայացուցիչների (Օրախելաչվիլի, Բեկդադյան, Հուսեյնով և Շահթախթինսկի) և Օրջոնիկիձեի ու Լեգրանի մասնակցությամբ քննարկվել է Բաքվի խորհրդակցությունում 1921թ. մայիսի 7-ին: Ինչպես տեսնում ենք, խորհրդակցությանը չէին մասնակցում հանրապետությունների առաջին դեմքերը՝ Մախարաձեն, Մյասնիկյանը, Նարիմանովը, որոնք կանչվել էին Մոսկվա: Չէր մասնակցում նաև Կիրովը, որը Կավբյուրոյի մայիսի 2-ի նիստի որոշումով նշանակվել էր հանրապետությունների միջև սահմանները ճշտող հանձնաժողովի նախագահ¹: Իսկ խորհրդակցությունը նախագահող Մամիա Օրախելաչվիլու ներկայացրած օրակարգն այսպիսին էր.

«1. Թուրքիայի Ազգային մեծ ժողովի կառավարությունը հետ Անդրկովկասյան հանրապետությունների միացյալ կոնֆերանսը:

2. Թուրք-անդրկովկասյան կոնֆերանսի տեղը և ժամանակը:

3. ԹԱՄԺ-ի կառավարության հետ Անդրկովկասյան հանրապետությունների բանակցությունների հիմքերը:

4. Անդրկովկասյան հանրապետություններից յուրաքանչյուրի հետ կապված հարցերի քննարկման կարգը:

5. Լրացումներ և փոփոխություններ ի զարգացումն Մոսկվայի պայմանագրի»¹:

ՀՀ ազգային արխիվում պահվող այդ փաստաթղթի հետ ծանոթությունից ստացած առաջին տպավորությունն այն է, որ խորհրդակցության մասնակիցներին ոչ այնքան հետաքրքրել են օրակարգում դրված հարցերը, որքան այն, թե ինչպես պետք է անվանել այդ հավաքույթը՝ խորհրդակցություն², թե՞ կոնֆերանս: Մատյան (журнал) վերնագիրը կրող այդ փաստաթուղթը բավականին ընդարձակ է (տպագիր 7,5 էջ) և կազմված է սղագրական արձանագրության ձևով²: Ներկայացված է բոլոր ելույթների հակիրճ բովանդակությունը, որից էլ պարզ է դառնում, որ օրակարգի հրապարակումից հետո առաջինը Հուսեյնովն է ելույթ ունեցել և բարձրացրել այն հարցը, թե պե՞տք է արդյուք խորհրդակցությունը դիտել որպես նախնական, որից հետո կգումարվի կոնֆերանս, թե՞ այն պետք է համարել Անդրկովկասյան հանրապետությունների կոնֆերանս: Նրան առարկեց Բեկդադյանը՝ հայտարարելով, որ խորհրդակցությունը չի կարելի կոնֆերանս անվանել, քանի որ կոնֆերանսի ընդունած որոշումները պարտադիր կատարման ենթակա են, ուստի կոնֆերանսից առաջ անհրաժեշտաբար պետք է հանրապետություններում քննարկվեն օրակարգային հարցերը, ընդունվեն համապատասխան որոշումներ, որոնք և կներկայացվեն կոնֆերանսի քննարկմանը: Բեկդադյանը³ նաև ավելացնում է, թե խորհրդակցության օրակարգային հարցերը (Թուրքիայի հետ բանակցություններում միասնաբար հանդես գալու և այլն) կարելի է լուծված համարել, և որ միակ հարցը, որ պետք է լուծվի, դա Հայաստանի և Նախիջևանի միջև սահմանագծի ճշտումն է:

¹ ՀԱԱ, ֆ. 113, ց. 3, գ. 21, թ. 69:

² Տե՛ս նույն տեղում, թ. 67-70:

³ Փաստաթղթում Բեկդադյանի անվան սկզբնատառը „А“-ի փոխարեն ներկայացված է „М“ տառով: Դժվար է ասել, թե նիստի քարտուղարի՞ փխայն է դա, թե՞ մեքենագրողի:

¹ Տե՛ս РГАСПИ, ֆ. 64, օն. 2, е/х 1, л 57.³

Բեկզաղայանին Հուսեյնովը պատասխանում է ընդարձակ ելույթով, փորձում է ամեն կերպ հիմնավորել խորհրդակցությունը կոնֆերանս հայտարարելու անհրաժեշտությունը, առաջարկում ներկայացնել Երևանի կարծիքը օրակարգի հարցերի մասին, խոստանում Բեկզաղայանին հեռախոսակապ ապահովել Երևանի հետ, և այլն: Մինչդեռ Բեկզաղայանը Երևանի կարծիքն իսկապես չէր կարող ներկայացնել այն պարզ պատճառով, որ մինչ այդ Հայհեղկոմը այդ հարցերին չէր անդրադարձել: Արխիվային մի փաստաթղթից տեղեկանում ենք, որ Ադրբեջանի և Վրաստանի հետ սահմանների հարցը Հայհեղկոմը Մյասնիկյանի գլխավորությամբ (մասնակցում էին Մոավյանը, Մակինցյանը և Լուկաչինը) քննարկել է Բաքվի խորհրդակցությունից երկու օր անց՝ մայիսի 9-ի նիստում և որոշել Մոավյանի նախագահությամբ ստեղծել հանձնաժողով (անդամներ՝ Համբարձումյան, Կարապետյան, Լազյան և այլն) նախապատրաստելու համար Ադրբեջանի և Վրաստանի հետ սահմանների հաստատման հարցը և այնուհետև այն «հարուցելու հարևան հանրապետությունների կառավարությունների առաջ»¹:

Մարհրդակցությունը Անդրկովկասյան հանրապետությունների կոնֆերանս հռչակելու Հուսեյնովի համառ պնդումները (նա ելույթ ունեցավ 5, Բեկզաղայանը՝ 2, Օրջոնիկիձեն՝ 4, Լեզրանը՝ 4, Օրախելաչվիլին՝ 2 անգամ) չէին կարող չվկայել այդ հարցում Ադրբեջանի ղեկավարության շահագրգռության մասին: Դժվար չէր գուշակել, որ Ադրբեջանին հատկապես հետաքրքրում էր օրակարգի հինգերորդ կետը, այն է՝ Հայաստանի և Նախիջևանի միջև սահմանագծի որոշման հարցը, որի մասին կոնֆերանսի կայացրած որոշումը վերջնական կլիներ: Բայց Հուսեյնովի բոլոր փորձերն իզուր անցան, թեև այս կամ այն կերպ Հուսեյնովի առաջարկությունը պաշտպանեցին Օրջոնիկիձեն և Լեզրանը, բայցևայնպես Բեկզաղայանը մնաց անդրովելի և հայտարարեց, որ չի կարող համաձայնել ներկա խորհրդակցությունը կոնֆերանսի վերածելու առաջարկությանը, քանի որ Հայաստանի հեղկոմի համար Մոսկվայի պայմանագրի որոշ կետեր պարզ չեն և ուսումնասիրության կարիք ունեն:

Բեկզաղայանի այս վճռական դիրքը չէր կարող իր ազդեցությունը չթողնել մասնակիցների վրա, և նույնիսկ Օրջոնիկիձեն տեղի տվեց ու արդյունքում ընդունվեց հետևյալ որոշումը. «Ներկա խորհրդակցու-

թյունը համարել նախնական, որից հետո՝ Մոսկվայից Անդրկովկասյան հանրապետությունների պատվիրակների վերադառնալու և տեղերում, այսինքն՝ Վրաստանում, Ադրբեջանում և Հայաստանում օրակարգի ներկա հարցերը ուսումնասիրելուց հետո, գումարել Անդրկովկասյան հանրապետությունների կոնֆերանս Երևան քաղաքում»¹:

Այսպիսի վախճան ունեցավ Հուսեյնովի և Բեկզաղայանի վեճը խորհրդակցությունը կոնֆերանսի վերածելու շուրջ, այսպես Բեկզաղայանը կանխեց Հայաստանի և Նախիջևանի միջև սահմանի լուծման հարցը «Եռանկյունի գոտու» հատվածում անմիջականորեն կոնֆերանսում: Բայցևայնպես խուսափել այդ հարցի քննարկումից չհաջողվեց: Դա տեղի ունեցավ այն բանից հետո, երբ որոշում կայացվեց Թուրքիայի հետ բանակցությունների հիմքում Մոսկվայի պայմանագիրը դնելու մասին (դրանից առաջ ընդունվել էր որոշում Անդրկովկասյան հանրապետությունների, որպես մեկ միասնական կողմ, հանդես գալու և Թուրքիայի հետ կոնֆերանսի տեղի և ժամանակի մասին ու որոշվել, որ ցանկալի է այն գումարել Թիֆլիսում կամ Բաքվում, բայց դեմ չեն լինի նաև Կարսին): Այդ որոշումն ընդունելուց անմիջապես հետո նիստում նախագահող Օրախելաչվիլին առաջարկեց քննարկել նաև Նախիջևանի սահմանի մասին հարցը և ձայնը տվեց Շահթախթինսկուն, որն, ի դեպ, մինչ այդ օրակարգային հարցերի քննարկումներին չէր մասնակցել, ինչից դժվար չէ եզրակացնել, որ խորհրդակցությանը նա հրավիրված էր հենց Նախիջևանի հարցի կապակցությամբ:

Շահթախթինսկին իր խոսքն սկսեց Նախիջևանի խնդրի վերաբերյալ պատմական էքսկուրս անելով, բայց թե ինչ էլ ասել, մնում է անհայտ, քանի որ նիստի քարտուղարը այդ մասին ոչինչ չի նշել, այլ միայն հակիրճ արձանագրել է, որ Շահթախթինսկին «պատմական տեղեկանք է տալիս և ավելացնում, որ երբ ընկ. Ջիչերինը հարցրեց իրեն, թե որտեղ ճիշտ կլինի անցկացնել Նախիջևանի հյուսիս-արևմտյան սահմանը Հայաստանի հետ, ինքը մատնացույց արեց Գայլի Դրունքը՝ որպես սահմանային կետ, թեև Թուրքական օկուպացիոն զորքերը զբաղեցնում էին այդ կետից հյուսիս և արևմուտք ընկած տարածքը: Բայց պաշտոնական հանձնաժողովում մեր ռազմական մասնագետները սխալ են թույլ տվել Նախիջևանի սահմանը անցկացնելով հյուսիս-արևմուտքով և Նախիջևանի կազմում ընդգրկելով Երևանի

¹ ՀԱԱ, ֆ. 113, ց. 3, գ. 15, թ. 16-17:

¹ Նույն տեղում, գ. 21, թ. 67-ի չրջերես:

գավառի հարավային եռանկյունին»¹:

Շահթախթինսկին չէր կեղծում, նա իսկապես Մոսկվայի կոնֆե-
րանսի օրերին Չիչերինին այդպես էր պատասխանել՝ վկայակոչելով
մուսավաթական կառավարությունը, որն իր ծայրագույն սահմանը
համարել էր Գայլի Դրունքը: Բայց դատելով սահմանագծի անցկաց-
ման մասին Շահթախթինսկու առաջարկությունից, Բաքվի ղեկավա-
րությունը մտադիր չէր բավարարվել Գայլի Դրունքով անցկացվող
սահմանագծով: Դրա մասին է վկայում Շահթախթինսկու հետևյալ
առաջարկությունը, որ նա արել է «Եռանկյունի գոտու» առաջացման
պատմությունը ներկայացնելուց հետո. «Հուլիս նպատակահարմար
կլինի, եթե տեղում ճշգրիտ և անառարկելի սահմանն անցկացնելն տե-
ղացի, գիտակ ընկերները»²: Եվ քանի որ տեղացիները աղբրեջանցիներ
էին, ուստի հենց նրանք էլ պետք է որոշեին՝ ըստ Շահթախթինսկու,
անառարկելի սահմանագիծը, որն, անշուշտ, հօգուտ Նախիջևանի
կկտրեր եռանկյունու մի հատվածը:

Շահթախթինսկուց հետո ելույթ ունեցող Լեզրանը խորհրդակցու-
թյան մասնակիցներին հիշեցրեց, որ Մոսկվայի պայմանագրի համա-
ձայն Նախիջևանի հյուսիս-արևմտյան սահմանի ճշտման նպատակով
պետք է Թուրքիայի, Ադրբեջանի և Հայաստանի ներկայացուցիչներից
ստեղծվի հանձնաժողով, «որը հայկական ու ադրբեջանական ներկա-
յացուցիչների կոնտակտի արդյունքում հարցին այնպիսի լուծում կտա,
ինչպիսին որ մեր կողմից կորոշվի»³:

Պարզ է, որ Ադրբեջանի և Հայաստանի միջև համաձայնություն
կայացումից հետո՝ Թուրքիան, հանձնաժողովում մնալով միայնակ, չէր
կարող ազդել հարցի լուծման վրա: Բայց պարզ չէ մեկ այլ բան, թե
արդյո՞ք Լեզրանը առաջարկել է հարցը լուծել անմիջականորեն
խորհրդակցությունում: Արխիվային փաստաթղթերում այդ մասին ոչինչ
չկա: Սակայն նիստի քարտուղարը արձանագրել է Լեզրանից անմի-
ջապես հետո ելույթ ունեցած Բեկզադյանից մի նախադասություն
միայն, որտեղ ասված է, թե ինքը «չի կարող ճիշտ սահման նշել տե-
ղանքին ծանոթ չլինելու պատճառով»⁴: Իսկ սա նշանակում է, որ այ-
նուամենայնիվ Լեզրանը խոսքն ուղղել է Բեկզադյանին՝ ակնկալելով

նրանից պատասխան: Սա առավել ակնառու է դառնում Բեկզադյանի
պատասխանից հետո Օրջոնիկիձեի առաջարկությունից. «...հանձնա-
րարել Ադրբեջանի և Հայաստանի ներկայացուցիչներին տեղում պար-
զել սահմանի ճիշտ անցկացման հարցը»¹, որից հետո ընդունվեց որո-
շում, որում ասված էր, որ հաշվի առնելով այն հանգամանքը, որ Թուր-
քիայի և Հայաստանի հարաբերությունները առանձնապես սուր են,
պնդել, որ առաջին հերթին քննարկվեն պայմանագրային հարաբերու-
թյունների հաստատման հարցը Թուրքիայի և Հայաստանի միջև, այ-
նուհետև Թուրքիայի ու Վրաստանի և հետո՝ Թուրքիայի ու Ադրբեջա-
նի (4-րդ կետ): Իսկ օրակարգի 5-րդ կետի (փոփոխություններ և լրա-
ցումներ Մոսկվայի պայմանագրի մեջ) վերաբերյալ ընդունված որոշ-
ման մեջ ասված է, որ նկատի առնելով այն հանգամանքը, որ Մոսկ-
վայի պայմանագրի երրորդ հոդվածով Հայաստանի և Նախիջևանի
միջև սահմանի ճշտման հարցը դրված է Թուրքիայի, Ադրբեջանի և Հա-
յաստանի ներկայացուցիչներից կազմված հանձնաժողովի վրա, և հե-
տևապես այդ հարցը անխուսափելիորեն դրվելու է Թուրք-անդրկով-
կասյան կոնֆերանսի առաջ, «անհապաղ ձեռնարկել միջոցներ Ադրբե-
ջանի և Հայաստանի ներկայացուցիչների կողմից տեղում սահմանի
ճիշտ անցկացման հարցի ուսումնասիրման համար՝ համաձայն ազգա-
գրական սկզբունքի, ինչպես նաև այդ հարցի վերաբերյալ տեղական
ազգաբնակչության մոտ ձևավորված կարծիքների»² (ընդգծումը մերն
է - է. Զ):

Կարծում ենք, իմաստուն պետք չէ լինել հասկանալու, որ
խորհրդակցության կողմից «ազգագրական սկզբունքի» և «տեղական
ընակչության կարծիքի» հիման վրա Հայաստանի և Նախիջևանի միջև
սահմանի անցկացման մասին հարցադրումը կդառնա այն հիմքը, որը
հնարավորություն կտա սահմանն անցկացնել ոչ թե Գայլի Դրունքով,
ինչպես որ Չիչերինն էր նախատեսել, այլ դրանից արևմուտք և դրանով
իսկ Երևանի գավառի հարավարևմտյան մասից՝ Եռանկյունի գոտուց
կկտրվի և Նախիջևանին կմիացվի մի որոշ հատված:

Այսպիսի վախճան ունեցավ Հայաստանի և Նախիջևանի միջև
սահմանի ճշտորոշման հարցի քննարկումը Բաքվի խորհրդակցու-
թյունում: Այսպես, Բեկզադյանի համառ պնդումը խորհրդակցու-
թյունում կոնֆերանսի չվերածելու հարցում, ինչպես հետագայում կտեսնենք,

¹ Նույն տեղում, թ. 68:

² Նույն տեղում:

³ Նույն տեղում:

⁴ Նույն տեղում:

¹ Նույն տեղում:

² Նույն տեղում, չրջերես:

չըջվեց հենց Հայաստանի դեմ: Մինչդեռ խորհրդակցությունից 4 օր անց՝ մայիսի 11-ին Ասքանազ Մոսկովյանի հետ հեռախոսային խոսակցություն ժամանակ, պատասխանելով խորհրդակցության կողմից ընդունված որոշումների վերաբերյալ վերջինիս հարցին, Ալ. Բեկզադյանը ոչինչ չի ասում ո՛չ Հունսեյնովի հետ իր բանավեճի մասին (խորհրդակցությունը կոնֆերանս հռչակելու վերաբերյալ) և ո՛չ էլ Եռանկյունի գոտում սահմանի որոշման գործում «ազգագրական սկզբունքի» և «տեղի ազգաբնակչության ձևավորված կարծիքը» հաշվի առնելու վերաբերյալ խորհրդակցություն ընդունած որոշման մասին: «Նախիջևանը, Դարալազյազը Հայաստանից սահմանազատող Եռանկյունու հարցում, - ասել է Ալ. Բեկզադյանը, - Հայաստանի և Աղբբեջանի ներկայացուցիչներին (խորհրդակցությունը - է. Զ.) հանձնարարել է ներկայացնել իրենց նախագծերը առաջիկա կոնֆերանսին, ինչպես նաև հանձնարարել է Հայաստանին և Աղբբեջանին այդ կոնֆերանսին ներկայանալ պատրաստի նախագծերով՝ Մոսկովյան մշակված վրաց-թուրքական պայմանագրի օրինակով»¹ (ընդգծումը մերն է - է. Զ.):

Եթե ընդգծված տողերը համեմատենք խորհրդակցության ընդունած որոշման հետ, ապա կտեսնենք, որ Բեկզադյանն իսկապես խուսափել է «ազգագրական սկզբունքի» և «տեղական ազգաբնակչության կարծիքը» հաշվի առնելու մասին խոսելուց: Իսկ դա նշանակում է, որ Բեկզադյանը կա՛մ նշանակություն չի տվել խորհրդակցության որոշման այդ կետին, կա՛մ էլ իսկապես նա ծանոթ էր այդ տեղամասի ազգագրական պատկերին, ինչպես որ հայտարարեց խորհրդակցության ժամանակ:

Ա. Մոսկովյանի և Ալ. Բեկզադյանի հեռախոսային այս խոսակցության ժամանակ շոշափվել է նաև Անդկովկասյան հանրապետությունների միջև սահմանագծերի անցկացման հարցը, ինչի մասին ՌԿ(Բ)Կ Կենտկոմի Կովկասյան բյուրոն որոշում էր կայացրել Մայիսի 2-ի նիստում²: Ըստ այդ որոշման՝ պետք է ստեղծվեր հանձնաժողով երեք հանրապետությունների ներկայացուցիչներից՝ Ս. Կիրովի գլխավորությամբ, որը սահմանագծման աշխատանքները պետք է ավարտեր մինչև հունիսի 1-ը և այն ներկայացներ Կավբյուրոյի հաստատմանը: Մոսկովյանը Թիֆլիսում գտնվող Ալ. Բեկզադյանի ուշադրություն է հրավիրում Ախալքալաքի վրա, հանձնարարում հայտնել Դանուշ Շահ-

վերդյանին (Ուրհրդային Հայաստանի լիազոր ներկայացուցիչը Վրաստանում) Ախալքալաքի գավառի վերաբերյալ վիճակագրական նյութերի հավաքման մասին, որին Բեկզադյանը պատասխանում է, որ Ախալքալաքի և Լոռու չեզոք գոտու վերաբերյալ միջոցներ կձեռնարկեն, նաև տեղեկացնում, որ երկու շաբաթից Կիրովը Թիֆլիսում կլինի, հետևապես մինչ այդ անհրաժեշտ է գործուղել մեկին՝ որպես Հայաստանի լիազոր ներկայացուցիչ, սահմանների հաստատման հանձնաժողովի համար³:

Հանրապետությունների միջև սահմանների որոշման աշխատանքները հատկապես պետք է անհանգստացնեն Ուրհրդային Հայաստանի ղեկավարներին, քանի որ բոլոր կողմերից խուզված հանրապետությունը նոր մարտահրավերներ էին սպասում: Աղբբեջանը Թուրքիայի օգնությամբ տեր դառնալով Շարուր-Նախիջևանին, այժմ էլ աչքը գցել էր հայաբնակ Լեռնային Ղարաբաղի և Զանգեզուրի վրա, իսկ Վրաստանը Լոռու չեզոք գոտու դիմաց բացահայտորեն պահանջում էր ամբողջովին հայերով բնակեցված Ախալքալաքի գավառը: Այսպիսի պայմաններում մայիսի 23-ին Հայկոմկուսի Կենտկոմի պլենումը, որին ներկա էին Մյասնիկյանը, Լուկաչինը, Ազատյանը, Մակինցյանը, Մոսկովյանը, Բեկզադյանը, Կարինյանը և Սաչինը, լսում է երեք հանրապետությունների միջև սահմանագծի անցկացման հանձնաժողովի համար ներկայացուցիչ ուղարկելու հարցը և որոշում գործուղել Ալ. Բեկզադյանին²: Իսկ ընդամենը հինգ օր հետո՝ մայիսի 28-ին նույն կազմով Հայկոմկուսի Կենտկոմի պլենումը լսում է Լուկաչինի ղեկուցումը «1. Զանգեզուրի մասին, 2. երեք հանրապետությունների սահմանների մասին, 3. դրամանիչների պատրաստման էքսպեդիցիայի մասին, 4. Նախիջևանի երկրամասի հետ հարաբերությունների մասին, 5. մաքսատների հանման մասին և 6. տնտեսական միավորման ձևերի մասին» հարցերը և որոշում հանձնարարել Մյասնիկյանին ՌԿ(Բ)Կ Կավբյուրոյի նիստում պաշտպանել Հայկոմկուսի Կենտկոմի տեսակետը նշված հարցերի վերաբերյալ³:

Թե ինչպես Մյասնիկյանը կատարեց Հայկոմկուսի Կենտկոմի պլենումի որոշումը հանրապետությունների միջև սահմանների ճշտման հարցում, այստեղ չենք քննարկի, քանի որ դուրս է մեր ուսումնասիրության չրջանակներից, թեև արժեք խոսել նրա պասսիվ կեցվածքի

¹ ՀԱԱ, ֆ. 114, ց. 2, գ. 53, թ. 109:

² Տե՛ս ԲԳԱՍՊ, ֆ. 64, օն. 2, Է/Մ 1, ռ 57.

¹ Տե՛ս ՀԱԱ, ֆ. 114, ց. 2, գ. 53, թ. 109:

² ՀԱԱ, ֆ. 1, ց. 1, փ. 1, գ. 15, թ. 3:

³ Տե՛ս նույն տեղում, թ. 4:

մասին՝ հատկապես Լեոնային Ղարաբաղի և Ախալքալաքի գավառի պատկանելիության հարցերում: Ինչ վերաբերում է Նախիջևանի երկրամասի հետ հարաբերությունների հարցին, ապա Հայաստանը ոչ միայն ձգտում էր նորմալ հարաբերություններ պահպանել Նախիջևանի հետ, այլև իր սուղ միջոցներից բաժին էր հանում նրան, ամեն կերպ ձգտում օգնել: Այսպես, մայիս ամսին երկու անգամ Հայաստանի ղեկավարությունը անդրադարձել է Նախիջևանին օգնելու խնդրին: Մայիսի 14-ին (1921թ.) Նախիջևանի հեղկոմի նախագահ Կադիմովից ստացված հեռագրի առթիվ Հայաստանի արտգործոցը դիմում է Հայհեղկոմի նախագահ Մյասնիկյանին հետևյալ գրությունը. «Աչքի առաջ ունենալով Նախիջևանի և Գողթան գավառների տնտեսական ծանր դրությունը, կարծում եմ, որ Պարսկաստանում գնած ցորենից կարելի է բաց թողնել Նախիջևանի հեղկոմին մի քանի հարյուր փութ: Միևնույն ժամանակ անհրաժեշտ եմ համարում հրավիրել Հայաստանի առողջապահության և սոցիալական ապահովության կոմիսարիատներին միջոցներ փնտրել հիշյալ գավառներին հասցնելու բժշկական և ուրիշ տեսակի օգնություն»¹: Իսկ մայիսի 31-ին ժողկոմխորհի նախագահության նիստում լսվում է «Նախիջևանի հեղկոմին 15 մլն. ուրլի բաց թողնելու խնդիրը և որոշվում.

ա) Բաց թողնել Նախիջևանի հեղկոմին 15 մլն. ուրլի վարկ,

բ) Բաց թողնել այդ գումարը մի քանի նվազով (ա. 5 մլն.),

գ) Պահանջել Պարժողկոմից և Ֆինժողկոմից մինչև այժմ Նախիջևանի հեղկոմին ուղարկած ապրանքների ու դրամների, ինչպես նաև այնտեղից ստացված ապրանքների հաշիվը»²:

Ինչպես տեսնում ենք, Նախիջևանի երկրամասը Ադրբեջանի հովանավորությանը հանձնելուց հետո էլ Հայաստանը շարունակում էր նրան օգնելու իր այն քաղաքականությունը, որ որդեգրել էր Կասյանի գլխավորած Հեղկոմը դեռևս 1920թ. դեկտեմբերին՝ հանրապետության աղքատիկ բյուջեից անվերադարձ հատկացնելով 20 մլն ուրլի: Այն ժամանակ դա քաղաքական ենթատեքստ ուներ: Ի՞նչ նպատակ էր հետապնդում Հայաստանը այս անգամ, փաստաթղթում ոչինչ չի ասված: Բայց եթե նկատի առնենք այն իրողությունը, որ Կողբի աղահանքերը Թուրքիային անցնելուց հետո Հայաստանը չահագրգռված էր Նախիջևանի աղահանքերով, ուստի դժվար չէ գուշակել, որ նպատակը

աղահանքերի չահագործմանը նպաստելն էր, որոնք փաստորեն չէին գործում: Դա երևում է նաև «Գ» կետի բովանդակությունից (պահանջվում էր ներկայացնել նաև Նախիջևանից ստացված ապրանքների հաշիվը): Իսկ Նախիջևանը Հայաստանին միմիայն աղ կարող էր մատակարարել:

Առաջ անցնելով ասենք, որ Խորհրդային Հայաստանի կառավարությունը հետագայում էլ շարունակեց Նախիջևանին տնտեսական օգնություն ցույց տալու գործը՝ նպաստելով նրա տնտեսական զարգացմանը: Մասնավորապես սեպտեմբերի 5-ին Կավբյուրոյի նիստում Մյասնիկյանի առաջարկությամբ լսվեց Նախիջևանին օգնելու հարցը և ընդունվեց որոշում.

«ա) Աղի հարցը կարգավորելու համար ուղարկել հանձնաժողով՝ ենթարկելով այն Կավբյուրոյի ԿԿ-ի տնտեսական բաժնին:

բ) Նախիջևանի երկրամասի վերաբերյալ բոլոր տնտեսական որոշումները իրականացնել նրա ԺՏՈՒ-ի (ժողտնտխորհի) միջոցով:

գ) Ընդունել ընկ. Մյասնիկովի (Մյասնիկյանի) առաջարկությունը և Հայաստանի ԿԿ-ին առաջարկել բաց թողնել Նախիջևանի երկրամասի համար 20 000 ուրլով:

դ) Առաջարկել Կավբյուրոյի ԿԿ-ին իր միջոցներից բաց թողնել Նախիջևանի երկրամասի համար 20 000 ուրլով:

ե) Հատկացվող ոսկին գլխավորապես պետք է օգտագործվի բնակչության համար անասունների գնման նպատակով:

զ) Ընդունել ընկ. Մյասնիկովի առաջարկությունը և Հայաստանի ԿԿ-ին առաջարկել ամենալուրջ ուշադրություն դարձնել Նախիջևանի երկրամասին մանուֆակտուրայով և դրամանիչներով օգնելուն:

է) Առաջարկել Միացյալ Արտառևտրին (օճնեւտորշ-ին¹) հատկացնել Նախիջևանի երկրամասին ամսական տասը վագոն հացահատիկ:

ը) Նախիջևանի երկրամասի բոլոր հայտերը անցկացնել օճնեւտորշ-ով:

թ) Ընկ. Կադիմին ազատել աշխատանքից Նախիջևանի երկրամասում և առաջարկել Աղբ. ԿԿ-ին առաջադրելու մեկ ուրիշ թեկնածու-թյուն»² (ընդգծումը մերն է - է. Զ):

¹ օճնեւտորշ-ը (միացյալ արտառևտուր) ստեղծվել է 1921թ. հունիսի 2-ին Բաքվում Ֆ. Մախարաձեի, Ալ. Մյասնիկյանի և Ն. Նարիմանովի կողմից ստորագրված համաձայնագրով, որով միավորվում էր Հայաստանի, Վրաստանի, Ադրբեջանի արտաքին առևտուրը:

² ՀԱԱ, ֆ. 1, ց. 1, փ. 3, գ. 68, թ. 22:

Ահա այսպես. Հայաստանը շարունակում է օգնել Նախիջևանի տնտեսական զարգացմանը, ինչը չենք կարող ասել Նախիջևանի հովանավոր պետություն՝ Ադրբեջանի մասին: Դա այնքան ակնառու էր դարձել, որ Լեզրանը դեռևս մայիսի 27-ին Ադրբեջանի արտգործոցն էր Մ. Գ. Հուսեյնովին հասցեագրած նամակում խոսելով այն մասին, որ անհրաժեշտ է ավելի սերտ կապ պահպանել իր հետ (ապրիլին Լեզրանը նշանակվել էր ՌՆՖՍՀ լիազոր նորկայացուցիչ Հայաստանում, Վրաստանում և Ադրբեջանում), ապահովել մշտական տեղեկատվություն Ադրբեջանի գործերի մասին, ուղարկել Բաքվի մայիսի 7-ի խորհրդակցություն արձանագրությունը և այլն, և այլն, միաժամանակ ավելացնում է. «...հատկապես անհրաժեշտ է ժամանակին մեզ հայտնել այն ամենի մասին, ինչ ձեռնարկվում է Ձեր և Ադրբեջանի ԺՏՆ-ի կողմից Նախիջևանի վերաբերյալ»¹ (ընդգծումը մերն է - է. Զ.):

Իսկ ի՞նչ էր ձեռնարկում Ադրբեջանը: Պարզվում է, որ Ադրբեջանի ղեկավարությունն ավելի շատ հետաքրքրում էր ոչ այնքան Նախիջևանի տնտեսական զարգացումը, որքան նրան Հայաստանի ազդեցությունից զերծ պահելու հարցը: Այդ մասին են վկայում այն մի շարք գրությունները, որ Ադրբեջանի ղեկավարությունը ուղարկել է Կավբյուրոյի ղեկավարությանն ամեն անգամ, հենց որ Հայաստանը Նախիջևանին օգնելու նախաձեռնությունը է հանդես եկել: Այսպես, Նախիջևանին 15 մլն ռուբլի վարկ տրամադրելու Հայաստանի կառավարության մայիսի 31-ի որոշմանը հետևեց Ադրբեջանի արտգործոցն էր Հուսեյնովի հունիսի 12-ի հեռագիրը՝ «Երևան, արտգործոցն էր Մոսկվային, Թիֆլիս»՝ ընկ. Օրջոնիկիձեին և ընկ. Լեզրանին», իսկ Կավբյուրոյի սեպտեմբերի 5-ի նիստում Մյասնիկյանի՝ Նախիջևանին օգնելու մասին հարցադրմանը հետևեց հոկտեմբերի 10-ի բողոքի նամակը Կավբյուրոյին:

Հուսեյնովի հեռագրում խոսվում է այն մասին, որ «Երևանի որոշ ընկերների գործունեության հետևանքով», որոնք իբրև թե «թույլ կողմորոշվելով ստեղծված միջազգային իրադրության մեջ և անբավարար պատկերացում ունենալով Նախիջևանի նկատմամբ մեր ընդհանուր քաղաքականության հարցում», ստեղծվել է մի դրություն, որը հղի է անբարենպաստ բարդությանը Մոսկվայի պայմանագրի համաձայն Նախիջևանի երկրամասի հարցի լուծման գործում: Այնուհետև վկայաբերելով երկու աննշան փաստ (Հայաստանի Կարմիր բանակի

ոեգիստրացիոն բաժնի պետ Յուզբաչևի պահանջը Ջուլֆայում անտակտ պահվածքի պատճառով ձեռքակալված Հաջի Սաֆիի ազատ արձակման և Շանգիլի կալվածքի մի մասի օգտագործման նպատակով Հայաստանի Հողօրհկոմի կողմից Ծառուրյանցներին տրված մանդատի մասին), հետևություն է անում, թե Հայաստանից գործուղված մարդիկ իրենց այնպես են պահում, որ կարծես թե Նախիջևանը դուրս չի եկել Հայհեղկոմի ենթակայությունից ու ավելացնում. «...հագիվ թե կարելի է հուսալ, որ որոշ ընկերների նման գործողությունները աննկատ կմնան սահմանակից չրջանների թուրքական հրամանատարության ուշադրությունից և նրանց կողմից առաջ չեն բերի Նախիջևանի երկրամասի նկատմամբ հավակնության փորձ՝ Մոսկվայի պայմանագիրը չօգտագործելու պատրվակով»¹ (ընդգծումը մերն է - է. Զ.):

Դարձյալ թուրքական գործոն, դարձյալ սպառնալիք, որն այժմ արդեն հնչում է Ադրբեջանի Արտգործոցն էր չուրթերից: Սակայն նկատի առնելով այն հանգամանքը, որ հասցեատերերը անպատասխան են թողել Հուսեյնովի այս հեռագիրը, պետք է ենթադրել, որ թուրքական սպառնալիքը որևէ կերպ չի ազդել նրանց վրա: Գուցե այդ է պատճառը, որ Կավբյուրո ուղարկած հոկտեմբերի 10-ի գաղտնի նամակում այլևս չի օգտագործվում թուրքական գործոնը, այլ ուղղակի խոսվում է այն մասին, որ հայկական կառավարությունը իր համար «բավարար չափով չի պարզել Հայաստանի և Նախիջևանի երկրամասի փոխհարաբերությունների բնույթը», խառնվում է Նախիջևանի ներքին գործերին՝ այդ միջամտությունը հասցնելով մինչև մանր խնամակալության աստիճանի և դարձյալ վկայակոչում երկու դեպք. 1. Հայաստանի կողմից Նախիջևան գործուղված ոեգիստրացիոն բաժնի ներկայացուցիչ Սայադյանի գործունեությունը, որն իբր գործում է միանգամայն ինքնուրույն, առանց հաշվի նստելու տեղական իշխանությունների և կուսակցական կազմակերպության հետ և 2. Իբրև թե Հայաստանի Կոմերիտմիության ԿԿ-ի կողմից Նախիջևանի Կոմերիտմիության կազմբյուրոյի պատասխանատու քարտուղար նշանակված Ռեզա Ախտունդովի գործունեությունը, որն իբր զբաղված է կեղծ տեղեկություններ հաղորդելով Հայկոմկուսի Կենտկոմ՝ Նախիջևանի ներքին դրության մասին և այլն, ու դարձյալ առանց տեղական կուսակցական կազմակերպության գիտություն²: Իսկ վերջում ավելաց-

¹ ՀԱԱ, ֆ. 113, ց. 3, գ. 11, թ. 241:

¹ Նույն տեղում, գ. 14, թ. 101:

² Տե՛ս ՀԱԱ, ֆ. 1, ց.1, գ. 116, փ. 5, թ. 31:

նում է. «Աղբրեջանի Կոմկուսի Կենտկոմը նման երևույթը համարում է աննորմալ և խնդրում է Կալբյուրոյին համապատասխան ցուցում տալ Հայկոմկուսի Կենտկոմին Նախիջևանի և Հայաստանի փոխհարաբերությունների բնույթի մասին ու բացատրել, որ նոր ազատագրված հանրապետություններում առավել արգասաբեր խորհրդային և կուսակցական շինարարության համար անհրաժեշտ է բարեկամական սերտ հարաբերություններ աշխատանք և որ Հայկոմկուսի Կենտկոմը Նախիջևանի տարածքում իր ամեն մի միջոցառում պետք է իրականացնի Աղբրեջանի Կոմկուսի ԿԿ-ի գիտություններ և համաձայնություններ»¹:

Ինչ խոսք, որ Հունիսյան հեռագրի համեմատությունում այս գաղտնի նամակն իր բովանդակությունում ավելի մեղմ է, նրանում չկա Մոսկվայի պայմանագրի և թուրքական սպառնալիքի մասին հիշեցում: Ինչո՞վ բացատրել: Հավանաբար այդ սպառնալիքի նկատմամբ Կալբյուրոյի ղեկավարության արհամարհական վերաբերմունքով: Բայցևայնպես չի կարող զարմանք չպատճառել այն համառությունը, որով Աղբրեջանի ղեկավարությունը փորձում էր հեռու պահել Հայաստանը Նախիջևանից, կտրել նրանց միջև ամեն մի կապ: Թեև, հանուն արդարության, պետք է նշել, որ այս գաղտնի նամակն էլ չէր արժանացել Կալբյուրոյի ղեկավարության առանձնակի ուշադրությանը, ինչի մասին կարող է վկայել թեկուզ այն փաստը, որ այդ նամակը Հայաստանի ղեկավարությունն է հանձնվել շուրջ երկու ամիս անց՝ ղեկտեմբերին: Հայկոմկուսի Կենտկոմի ղեկտեմբերի 29-ի նիստում լսվում է Հայաստանի կողմից Նախիջևանի ներքին գործերին միջամտելու Աղբրեջանի բողոքի մասին հարցը և որոշվում «ամենվճռական կերպով հերքել» ներկայացված մեղադրանքը՝ հատուկ նամակով ուղղված Կալբյուրոյին, Աղբրեջանի ԿԿ-ին և Նախիջևանի երկրկոմիին²: Իսկ նամակում, որի տակ դրված է Հայկոմկուսի Կենտկոմի քարտուղար Լուկաչինի ստորագրությունը, հայտնվում էր, որ «ոչ մի միջամտություն Նախիջևանի ներքին գործերին, առավել ևս մանր խնամակալություն, ՀԿԿ ԿԿ-ի կողմից չի եղել: Միակ «միջամտությունը» դրսևորվել է Կենտկոմի քարտուղար ընկ. Լուկաչինի կողմից Ձեր կողմից հիշատակված Սայադյանի հետ կանչման ղեպում՝ նրա աշխատանքի մասին ինֆորմացիա ստանալուց հետո»: Այնուհետև մատնանշելով այն փաստը, որ

¹ Նույն տեղում:

² Տե՛ս նույն տեղում, գ. 15, փ. 1, թ. 48:

Սայադյանը Նախիջևան էր գործուղվել պատերազմական իրադրությունների պայմաններում, և այն էլ՝ ոչ թե ՀԿԿ Կենտկոմի, այլ ռեգիստրացիոն բաժնի կողմից, իսկ Ախունդովը գործուղվել է Նախիջևան ոչ թե Հայաստանի, այլ «Կոմերիտմիության Կալբյուրոյի Կենտկոմի գիտություններ, համաձայնություններ և կարգադրություններ», Հայկոմկուսի Կենտկոմը ափսոսանք է հայտնում «Աղբրեջանի պատասխանատու քաղաքական ղեկավար Կիրովի նամակի կապակցությամբ», որը հիմնված է կեղծ տեղեկատվության վրա և առաջարկում է «Նախիջևանի հետ կապված թյուրիմացությունների, խոսակցությունների և կոնֆլիկտների վերջնական վերացման նպատակով ստեղծել կուսակցական-քննչական հանձնաժողով և կեղծ ինֆորմացիա ներկայացնելու համար մեղավորներին ենթարկել օրինական պատասխանատվության»¹ (ընդգծումը մերն է - է. Զ.):

Ճիշտ է, հանձնաժողով չստեղծվեց և կեղծ տեղեկատվության հեղինակները չպատժվեցին, բայց նաև Լուկաչինի վճռական բողոքը ևս անհետևանք չանցավ: Ամեն ղեպում մի որոշ ժամանակ աղբրեջանական ղեկավարությունը դադարեց Նախիջևանի ներքին գործերին միջամտելու ուղղությամբ Հայաստանի կառավարությանը մեղադրանքներ ներկայացնելուց: Միաժամանակ տեղին ենք համարում մատնանշել, որ հայկական կողմը ցուցաբերում էր նրբանկատություն և նույն կերպ չէր պատասխանում Աղբրեջանի ղեկավարությանը: Մինչդեռ իրականում Հայաստանն ավելի հիմքեր ուներ բողոքելու Նախիջևանի կողմից իր ներքին գործերին միջամտելու առումով: Այսպես, արխիվային մի փաստաթղթից տեղեկանում ենք, որ Հուլիսի 30-ին ՀԽՍՀ ժողկոմխորհը որոշում է կայացրել վեղիբասարցիներին 4000 արչին մանուֆակտուրա բաժանելու մասին և այդ նպատակով Վեդի է գործուղել Բ. էֆենդիևին և Կ. Այվազյանին, որոնք օգոստոսի 7-ին կազմակերպել են միտինգ ու նաև ելույթ ունեցել ընթացիկ մոմենտի և Անդրկովկասի խորհրդային հանրապետությունների փոխհարաբերությունների մասին: Սակայն ելույթներից անմիջապես հետո վեղիբասարցիները հայտարարել են, որ իրենք ցանկանում են միանալ Նախիջևանին, որտեղից ստանում են աղ, հաց և այլն: Եվ միայն Վեղիբասարի Կարմիր տաբորի հրամանատար Աբաս Կուլի բեկի սպառնալից ելույթից հետո վեղիբասարցիները՝ կես ժամ առանձին խորհրդակցելուց հետո հայտարարել են, թե իրենք մոլորված են եղել

¹ Նույն տեղում, թ. 251:

և միմիայն այժմ իրենց պարզ դարձավ, որ «Նորհրդային Հայաստանը և Նորհրդային Նախիջևանի երկրամասը, դրանք երկու եղբայրներ են, ուստի մենք այսօրվանից միանում ենք Նորհրդային Հայաստանին»¹: Իսկ հոկտեմբերի 14-ին Նորհրդային Հայաստանի ներքին գործերի ժողովմատում Վեդիբասարից ստացված մի գրություն մեջ ասված է, որ տեղի ազգաբնակչության մեջ հակահայկական ուժեղ տրամադրություններ կան, որոնք արդյունք են Նախիջևանից ուղարկված գաղտնի գործակալների ակտիվ գործունեության և որպես օրինակ վկայակոչում են հենց այդ օրերին Նախիջևանից Վեդիբասար 8000 փութ աղի ուղարկումը, ինչը մեծապես օգտագործվել է հակահայկական ագիտացիա մղելու համար: «Ահա տեսնում եք, - ասում են գործակալները բնակիչներին, - Հայաստանի խորհրդային իշխանությունը ձեզ ոչինչ չի տալիս, իսկ Նախիջևանի խորհրդային իշխանությունը ձեզ ամեն ինչ է տալիս և եթե դուք միանաք Նախիջևանին, ապա այն ժամանակ ամեն ինչ կստանաք»²:

Տեղյալ էր արդյոք Ադրբեջանի ղեկավարությունը Հայաստանի տարածքում նախիջևանցիների այդ գաղտնի գործակալների գործունեության մասին, թե ոչ՝ միանշանակ պատասխանել չենք կարող: Բայց որ Կարսի կոնֆերանսի օրերին վեդիբասարցիների պատվիրակության Կարսում հայտնվելը և Վեդու շրջանը Նախիջևանին միացնելու ուղղությամբ աշխատանք տանելը պատահական չէր և կատարվել էր ոչ միայն Նախիջևանի, այլև Ադրբեջանի ղեկավարության գիտությունով, իսկ գուցեև գաղտնի հրահրանքով, դա անառարկելի է³: Այդ փաստին դեռ կանգնողառնանք:

Վերադառնալով Եռանկյունի գոտու խնդրին, հարկադրված ենք արձանագրել, որ արխիվներում չատ չնչին բան է պահպանվել Նախիջևանի հյուսիս-արևմտյան հատվածում սահմանի ճշտման գործընթացի մասին: Նախ ասենք, որ Չիչերինին այլևս չէր հետաքրքրում այդ հարցը, նա կարծես թե բավարարվել էր այդ կապակցությունները ապրիլին տրված հանձնարարություններով և չէր հետևում գործընթացին՝ նույնիսկ երբ դրանք խախտվում էին: Այսպես օրինակ, Ադրբեջանի կողմից Եռանկյունի գոտու հարցի լուծումը հանձնարարված էր Շահթախթինսկուն, ինչի մասին վկայություն կա Լեգրանի՝ Ադրբե-

ջանի արտգործողի շուսեյնովին ուղարկած մայիսի 27-ի նամակում: «Ինչ որ բան անում է ընկ. Շահթախթինսկին, - հարցնում է Լեգրանը շուսեյնովին, - Բեկզադյանի հետ միասին պարզելու համար Նախիջևանի մարզի հյուսիսային սահմանի ուղղման հարցը» (ընդգծումը մերն է - է. Ջ.): Մինչդեռ, ինչպես արդեն վերը տեսանք, Չիչերինը դեմ էր Շահթախթինսկու թեկնածությունը ինչպես Եռանկյունի գոտու խնդրի լուծման, այնպես էլ թուրք-անդրկովկասյան կոնֆերանսին նրա մասնակցության հարցում, ինչի մասին նա պարզ արտահայտվել էր Բեկզադյանի հետ զրույցում, իսկ վերջինս էլ այդ մասին հայտնել էր Շավերդովին և Աթաբեկովին հասցեագրած հեռախոսագրում: Բայց ինչպես երևում է, Շահթախթինսկին Ադրբեջանի համար անփոխարինելի գործիչ էր որպես ղեկավանագետ, ուստի և նրան է հանձնարարում ոչ միայն Հայաստանի հետ Նախիջևանի հյուսիս-արևմտյան սահմանի ճշտման հարցը, այլև իր երկիրը թուրք-անդրկովկասյան կոնֆերանսում ներկայացնելու պատիվը: Իսկ Հայաստանի ղեկավար գործիչները, ինչպես երևում է, կա՛մ մոռացություն էին տվել Չիչերինի կարծիքը, կա՛մ էլ ուղղակի չէին փորձել հակադրվել Ադրբեջանին՝ դա համարելով նրա ներքին գործը:

Ինչևէ, թե ինչպիսի լուծում ստացավ Եռանկյունի գոտու հարցը Կարսի կոնֆերանսում, կտեսնենք քիչ հետո, իսկ առայժմ ծանոթանանք Հայաստանի ազգային արխիվում պահվող երկու փաստաթղթերի, որոնցում շոշափված է մեզ հետաքրքրող հարցը: Դրանցից առաջինը „Մեմորանդում“ (հուլիսի 1) է՝ Կարսում թուրքիայի հետ առաջիկա կոնֆերանսում քննարկման համար Հայաստանի կողմից առաջարկվող հարցերի: Իսկ երկրորդը՝ «Պայմանագրի նախագիծ Հայաստանի և Թուրքիայի միջև»: Երկու փաստաթղթերն էլ թվագրված չեն, բայց դատելով նրանց բովանդակությունից (հատկապես Նախիջևանի հարցում) դժվար չէ ենթադրել, որ «Մեմորանդումը» կազմվել է ավելի վաղ՝ դեռ մինչև Եռանկյունի գոտու հարցում Ադրբեջանի և Հայաստանի միջև համաձայնության կայացումը՝ հավանաբար հունիսին: Այսպես օրինակ, քաղաքական հարցեր բաժնում¹ նախատեսվում էր սահման-

¹ «Մեմորանդում»-ն ուներ տնտեսական հարցերի մի ամբողջ շարք՝ Թուրքիային որոշ տոկոս հատկացնելու պայմանով Հայաստանին իրավունք վերապահել չահահագործելու Կարսի մարզում՝ Օլթիի քարածխի, Կաղզվանի մկնդեղի հանքերը և Սարիղամիչի անտառները, Սուրմալուի գավառում՝ Կողբի աղահանքերը, եթե դրանք չվերադարձվեն Հայաստանին: Առաջ էր քաջված նաև Թուրքիայի հետ արտաքին առևտրի (կողմերի առավել բարենպաստման սկզբունքով), վերաբնակեցման հարց (հայրենիք անարգել վերադառնալու սկզբունք) և այլն (մանրամասն տե՛ս ՀԱԱ, ֆ. 113, ց. 3, գ. 11, թ. 167-168):

¹ Նույն տեղում, գ. 32, փ. 3, թ. 82:

² Նույն տեղում, գ. 65, փ. 3, թ. 6:

³ Տե՛ս է. Ա. Զոհրաբյան, Սովետական Ռուսաստանը և հայ-թուրքական հարաբերությունները, էջ 281:

ների ուղղում երեք մասերում. ա) Մուրմայուի գավառում (առաջարկվում էր Կողբի աղահանքերի շրջանը թողնել Հայաստանին), բ) Նախիջևանի երկրամասի հատվածում և գ) Արփաչայի չեզոք գոտում (առաջարկվում էր այն ընդլայնել և այնտեղ մտցնել խառը թուրք-հայկական վարչություն):

Մեզ հետաքրքրողը „Բ” կետն է, որտեղ ասված էր, որ առաջարկվում է «Նախիջևանի երկրամասի նկատմամբ հովանավորությունը հանձնել Հայաստանին կամ էլ հաստատել նոր սահման Քյանդը-Ոսկ-Ազնաբերդ-Սուլթան-բեկ գծով և այնուհետև ուղիղ գծով մինչև Կյուկի-դաղ լեռը»¹ (ընդգծումը մերն է - է. Ջ.): Մեծորանդումը նաև անդրադառնում էր երկրամասի հովանավորությունը Հայաստանին հանձնելու պահանջի հիմնավորմանը՝ արձանագրելով, որ Մոսկվայի պայմանագրով Նախիջևանի երկրամասի առանձնացումը որպես ինքնավար միավոր «Հայաստանը զրկում է՝ առաջին, միակ հարմար ուղուց, որը նրա կենտրոն Երևանը կապում է Դարալագյազի և Զանգեզուրի հետ (Բաշ-Նորաչեն-Արփի-Քեչիչքենդ ճանապարհը), Երկրորդ, կորցնում է հարուստ բամբակի և աղի շրջանները և երրորդ՝ անմիջական կապը Պարսկաստանի հետ»²: Ինչ վերաբերում է Քյանդը-Ոսկ-Ազնաբերդ-Սուլթան-բեկ գծով անցկացվելիք սահմանագծին, ապա թեև դրա համար Մեծորանդումը որևէ բացատրություն չի տալիս, բայց նայելով քարտեզին՝ դժվար չէ հասկանալ, որ նրա կազմողները նկատի են ունեցել Արփա գետի ջրերով ոռոգվող Շարուրի դաշտի այդ հատվածը (Շահթախթիից հյուսիս-արևմուտք), որտեղ կային բամբակի հարուստ պլանտացիաներ:

Այսպիսին է Մեծորանդումի Նախիջևանին վերաբերող մասը: Քննարկվել է այն Ազրբեջանի հետ բանակցություններում, թեկուզ, ասենք, Եռանկյունի գոտու հարցի կապակցություններում, Վարծում ենք, որ ո՛չ: Այդ մասին ոչ մի հիշատակություն չի պահպանվել ո՛չ արխիվներում, ո՛չ էլ մամուլում: Հիշատակություն չի պահպանվել անգամ Եռանկյունի գոտու բաժանման շուրջ Բեկդադյանի և Շահթախթինսկու միջև բանակցությունների մասին: Կարծես թե դրանք չեն էլ եղել: Իսկ որ Եռանկյունի գոտին ոչ թե ամբողջությամբ է տրվել Հայաստանին, ինչպես Չիչերինն էր ասում, այլ բաժանվել է Նախիջևանի և Հայաստանի միջև և այն էլ դեռ մինչև Կարսի կոնֆերանսը, դա երևում է

«Հայաստանի և Թուրքիայի միջև պայմանագրի նախագծից»՝ կազմված Հայաստանի կառավարությունից կողմից: 14 հոդվածներից բաղկացած այդ փաստաթղթի 3-րդ հոդվածը նվիրված է Նախիջևանի երկրամասի կարգավիճակին: Նրանում ասված է, որ «Երկու պայմանավորվող կողմերը համաձայն են, որ Նախիջևանի մարզը ներկա պայմանագրի I (B) հավելվածում նշված սահմաններում կազմում է ինքնավար տարածք Ազրբեջանի հովանավորության տակ»¹:

Սա առաջին պաշտոնական փաստաթուղթն է, որում արձանագրված է Ոսրհրդային Հայաստանի համաձայնությունը Նախիջևանի երկրամասը Ազրբեջանի հովանավորության տակ ղնելուն և միաժամանակ չեղյալ է հայտարարված այդ հովանավորությունը Հայաստանին հանձնելու վերաբերյալ Մեծորանդումում առաջ քաշված պահանջը: Բայց պարզվում է, որ դա միակ զիջումը չէ, որ կատարել է Հայաստանը Նախիջևանի հարցում: I (B) հավելվածում Նախիջևանի երկրամասի տարածքի նկարագրությունից պարզ է դառնում, որ Հայաստանի կառավարությունը հրաժարվել է նաև Մեծորանդումում առաջ քաշված մյուս պահանջից (սահմանագիծը անցկացնել Քյանդը-Ոսկ-Ազնաբերդ-Սուլթան-բեկ գծով), և որ առանձնապես կարևոր է՝ զիջել նաև Եռանկյունի գոտու հարցում՝ համաձայնելով նրա բաժանմանը այնպես, որ իրեն բաժին է ընկել միայն նշված գոտու հյուսիսային մասը (Արարատ կայարանից մինչև Արազդաշյան կայարան) մնացածը (Արազդաշյանից մինչև Փայլի Դրունք վայրը) թողնելով Նախիջևանին: Ահա Հայաստանը Նախիջևանից բաժանող սահմանագիծը, որ նշված է պայմանագրի նախագծի I (B) հավելվածում. «Գյուղ Ուրմիա-կայ. Արազդաշյան (միայն) - լեռ Դաշ-Բուրուն (4108) - լեռ Բոհարսըխ (6607) - լեռ 6629 - լեռ Քյոմուրլու-դաղ (6639) - լեռ 3080 - լեռ Սայթ-դաղ (7868) - գյուղ Կուրթ-կուլաղ-լեռ Գամեսուր-դաղ (8160) - լեռ 8022 - լեռ Կյուկի-դաղ (10282) և Նախիջևանի գավառի նախկին արևելյան վարչական սահմանը»²:

Ի՞նչ բացատրություն կարող ենք տալ նշված սահմանագծին: Եթե Մեծորանդումում առաջ քաշված պահանջներից նահանջելը կարելի է բացատրել Մոսկվայի պայմանագրի պարտադիր լինելու պայմանով, ապա նույն բանն ասել Եռանկյունի գոտու մասին չենք կարող: Մոսկվայի կոնֆերանսի նյութերին ծանոթանալիս մենք տեսանք, որ թուր-

¹ Նույն տեղում, թ. 167:

² Նույն տեղում:

¹ Նույն տեղում, թ. 155:

² Նույն տեղում, գ. 23, թ. 37

քական պատվիրակության հետ Ձիչերինի երկար բանավեճից հետո կողմերը ի վերջո համաձայնեցին, որ Գայլի Դրունքից հյուսիս-արևմուտք ընկած Եռանկյունի գոտու հատվածը (նույն է թե՛ Երևանի գավառի հարավ-արևմտյան մասը) համարվում է վիճելի և նրա պատկանելիության հարցը կլուծվի Հայաստանի, Ադրբեջանի և Թուրքիայի ներկայացուցիչներից կազմված հանձնաժողովի կողմից: Իսկ երբ Բաքվի խորհրդակցությունը (մայիսի 7-ին) Հայաստանի և Ադրբեջանի ներկայացուցիչներին հանձնարարեց լուծել այդ հարցը և միասնական կարծիքով հանդես գալ Թուրքիայի հետ կայանալիք կոնֆերանսում, ապա մի պահ թվաց, թե գոնե այդ հարցը կլուծվի Հայաստանի օգտին, առավել ևս, որ խորհրդակցությունում Շահթախթինսկին հայտարարեց, որ Ադրբեջանը միշտ էլ իր ծայրագույն սահմանը համարել է Գայլի Դրունքը: Բայց դա տեղի չունեցավ, ինչպես արդեն նշեցինք Արազդայանից Գայլի Դրունք հատվածը մնաց Նախիջևանի կազմում: Ինչո՞վ բացատրել, արդյո՞ք դա արդյունք էր «տեղացի, գիտակ ընկերների» կողմից սահմանագծի ճշտման՝ ինչպես դա, հավանաբար, հրամայել է Շահթախթինսկին իր հայ գործընկերոջը, թե դարձյալ գործ ունենք թուրքական գործոնի հետ, ավելի ճիշտ Ադրբեջանի և Թուրքիայի միջև ընդհանուր սահման ունենալու երկուստեք ձգտման հետ: Եվ, թեև ադրբեջանցի պատմաբաններն այդ հարցին երբեք չեն անդրադարձել (ո՛չ նախկինում՝ խորհրդային ժամանակաշրջանում, և ոչ էլ մեր օրերում), իսկ մեր արխիվներում էլ բացարձակապես ոչինչ չի պահպանվել, բայցեայնպես կարծում ենք, որ այս հարցում ևս, ինչպես որ Նախիջևանի հարցի լուծման գործում ընդհանրապես, մենք գործ ունենք թուրք-ադրբեջանյան ընդհանուր սահմանի ստեղծման փաստի հետ: Դրանում կհամոզվենք, երբ կանդրադառնանք Կարսի կոնֆերանսին ու կտեսնենք, թե ինչպես համարյա առանց առարկության Կարաբեքիր փաշան համաձայնվեց Հայաստանի և Նախիջևանի երկրամասի միջև սահմանագծի նման փոփոխության հետ:

* * *

Կարսի թուրք-անդրկովկասյան կոնֆերանսը¹ (1921թ. սեպտեմբերի 26 – հոկտեմբերի 13) քննարկել է մի շարք քաղաքական ու

¹ Թուրքական պատվիրակության ղեկավարն էր Կարաբեքիր փաշան, Ռուսաստանը ներկայացնում էր Յակ. Գանեցկին, Հայաստանը՝ Մոռավյանը և Մակինցյանը, Վրաստանը՝ էլիավան և Սվանիձեն, Ադրբեջանը՝ Շահթախթինսկին և Աբիլովը:

տնտեսական հարցեր, որոնց վրա մենք կանգ չենք առնի, նախ որովհետև այդ հարցերն ամենայն մանրամասնությամբ լուսաբանված են հայ-թուրքական հարաբերություններին նվիրված մեր գրքում¹, և հետո՝ դրանք դուրս են մեր հետաքրքրությունների շրջանակից: Ուստի կանգ կառնենք միմիայն սահմանագծային հարցերի վրա, հատկապես Նախիջևանի խնդրի հարցում:

Տանտիրոջ իրավունքով բացելով կոնֆերանսը և ողջունելով Անդրկովկասի պատվիրակներին «թուրքական հողի վրա», Կարաբեքիր փաշան թուրքական պատվիրակության անունից իսկույն երկու առաջարկ արեց.

1. Նիստերի արձանագրությունները կատարել ֆրանսերեն լեզվով և հետո թարգմանել թուրքերեն, ռուսերեն, հայերեն և վրացերեն:

2. Դաշնագրերը կնքել բոլոր երեք հանրապետությունների հետ առանձին-առանձին պայմանագրերով²:

Ֆրանսերենը միջազգային հարաբերությունների լեզու էր, հետևապես ընդունելի: Ինչ վերաբերում է Կարաբեքիրի երկրորդ առաջարկին, ապա այն անընդունելի էր կովկասցիների համար: Ուստի և պատասխան ելույթում Յակ. Գանեցկին մերժում է Կարաբեքիրի երկրորդ առաջարկությունը, մատնացույց է անում Անդրկովկասյան հանրապետություններում տեղի ունեցող տնտեսական ու քաղաքական միավորման փաստը և թուրքերին առաջարկում Անդրկովկասը դիտել որպես մեկ միասնական կողմ և համապատասխան պայմանագիր կնքել նրա հետ: Սակայն Կարաբեքիր փաշան մերժում է Գանեցկու առաջարկությունը՝ հայտարարելով, թե իր պատվիրակությունը Անդրկովկասյան հանրապետությունների հետ միասնական պայմանագիր կնքելու իրավունք չի ստացել իր կառավարությունից, հետևապես ստիպված են դիմել Անկարային և սպասել նրա պատասխանին:

Պայմանագրի ձևի մասին վիճաբանությունները (առանձին-առանձին, թե՞ ընդհանուր) կողմերի միջև շարունակվեցին հետագա մի շարք նիստերի ընթացքում և բավականին համառ բնույթ ստացան: Ամեն անգամ նիստերում դեմ առնելով կովկասյան պատվիրակների համառ պնդումներին՝ թուրքական պատվիրակությունը հետաձգում էր հարցի լուծումը՝ հայտարարելով, թե ստիպված է նորից դիմել Անկարային, իսկ հաջորդ նիստին նորից էր առաջ քաշում առանձին պայմանագրերի

¹ Տե՛ս է. Ա. Զոհրաբյան, Սովետական Ռուսաստանը և հայ-թուրքական հարաբերությունները (1920-1922), Եր. 1979, էջ 265-305:

² Տե՛ս «Խորհրդային Հայաստան», օրաթերթ, 19 հոկտ. 1926թ.:

գաղափարը՝ ըստ որում վկայակոչելով ոչ միայն հարցի իրավական կողմը, այլ նաև Մոսկվայի պայմանագիրը, որտեղ խոսք չկար Անդրկովկասի հանրապետությունների հետ միասնական պայմանագիր ստորագրելու մասին: Կոնֆերանսի չորրորդ նիստը (սեպտ. 30-ի) ամբողջովին զբաղվեց պայմանագրի ձևի հարցով: Գանեցկու ելույթը նվիրված էր միասնական պայմանագրի թե՛ իրավական և թե՛ քաղաքական նշանակություն հարցին: Նա համոզիչ կերպով ցույց տվեց, որ իրավական տեսակետից ոչ մի տարբերություն չկա կոլեկտիվ և առանձին պայմանագրերի միջև: Ինչ վերաբերում է հարցի քաղաքական կողմին, ապա այն ավելի շատ ձեռնտու պետք է լինի Թուրքիային, որովհետև աշխարհին ցույց են տալիս, որ իրենք միավորվում են և միասնական, ամուր ու եղբայրական դաշինք են կնքում թուրք ժողովրդի հետ: Պատասխան խոսքում Կարաբեքիր փաշան կեղծ գոհունակություն է հայտնում Անդրկովկասյան հանրապետությունների նման ձգտման համար, բայց միաժամանակ փորձում առանձին պայմանագրեր կնքելու գաղափարը այլ կերպ պարտադրել: Նա առաջարկում է պայմանագիրը բաժանել երկու մասի՝ առաջին մասում ղետեղել ընդհանուր բնույթի հոդվածները, որոնք վերաբերում են բոլոր հանրապետություններին, իսկ երկրորդ մասում՝ ըստ առանձին հանրապետությունների, սկսած սահմաններից և այնուհետև նրանցից յուրաքանչյուրին վերաբերող մյուս հոդվածները: Սակայն Կարաբեքիրի այս փորձն էլ չանցավ (վտանգ կար, որ պայմանագրի երկրորդ մասը կդառնա առանձին հանրապետություններին՝ հատկապես Հայաստանին, պարտադրվող պայմանագիր), ուստի և կովկասցիները մերժեցին այդ փորձը ևս: Այդժամ թուրքական պատվիրակության ղեկավարը հայտարարեց, որ իր կառավարությունը «պայմանագրի իրավաբանական կողմն ապահովելու նպատակով ցանկալի է համարում, որ իրեն հայտնեն գոյություն ունեցող միասնություն ինչպես ձևի, այնպես էլ այն մասին, թե ինչքանով է այն վերաբերում արտաքին ներկայացուցչությանը: Նա անհրաժեշտ է համարում գոյություն ունեցող միասնությունը ներքին հարց համարել այնքան ժամանակ, քանի դեռ իրեն այդպիսի հայտարարություն չի արվել...»¹:

Անդրկովկասյան պատվիրակները հավաստիացրեցին թուրքերին, որ համապատասխան հայտարարություններ կարվեն: Եվ իսկապես, հոկտեմբերի 1-ին Սվանիձեն, Շահթախթինսկին և Մոսկվայնը առան-

ձին հայտարարություններ ուղարկեցին Անկարայի կառավարությունը՝ երեք հանրապետությունների տնտեսական և քաղաքական միասնություն մասին: Նույնը հաստատող հեռագիր ուղարկեց նաև Ջիջերինը, որից հետո Անկարան տվեց իր համաձայնությունը միասնական պայմանագիր կնքելու մասին¹: Պայմանագրի ձևի մասին մոտ հինգ օր տևած բանավեճը ի վերջո ավարտվեց խորհրդային պատվիրակների հաղթանակով, որը միաժամանակ առաջին և վերջին հաղթանակն էր: Մնացած բոլոր հարցերը (սահմանագծային, տնտեսական) լուծվեցին թուրքական պատվիրակության օգտին, որը ցուցաբերեց համառություն, անդիջում վարքագիծ հատկապես Հայաստանին վերաբերող հարցում:

Մոսկվայի պայմանագրով գծված սահմանները բավականին ընդհանուր բնույթ էին կրում: Պատճառն այն ժամանակ (1921թ. փետրվար-մարտ) Հայաստանում և Վրաստանում պատերազմական վիճակն էր, որը զրկել էր սահմանները տեղում ճշտելու հնարավորությունից: Այդ բացը պետք է լրացնեն Կարսի կոնֆերանսը, որի համար էլ ստեղծվել էր սահմանագծային հանձնաժողով (նրանում Հայաստանը ներկայացնում էր Վլ. Թամուչին), որն իր հերթին բաժանվել էր երկու ենթահանձնաժողովի՝ թուրք-հայկական և թուրք-վրացական սահմանագծի ուսումնասիրման և ճշտման համար: Մենք, ինչպես որ վերը նշել ենք, կանգ կառնենք թուրք-հայկական սահմանագծի հարցի վրա:

Հենց սկզբից ասենք, որ թուրք պատվիրակները սահմանների որոշման հարցում խստորեն կառչում էին Մոսկվայի պայմանագրից և պահանջում ոչ մի փոփոխություն չմտցնել նրա մեջ: Միաժամանակ օգտվելով այն բանից, որ պայմանագրում չէր ասված, որ քարտեզի և տեքստի միջև անհամապատասխանության դեպքում նախապատվությունը տրվում է տեքստին, պնդում էին, որ սահմանների վրա նշված բոլոր գյուղերը պատկանում են իրենց: Այնուամենայնիվ հայ և վրաց պատվիրակներին հաջողվեց որոշ ուղղումներ մտցնել սահմանագծի մեջ, որոնք թեև իրենց չափերով նշանակալից չէին, բայց կարևոր էին, որովհետև վերաբերում էին Վրաստանի սահմանում Բաթումի, իսկ Հայաստանի սահմանում՝ Ալեքսանդրապոլի հատվածին (ճտորեն հաստատվեց սահմանագիծը ճորոխ գետի ձախ ափով, Հայաստանին մնացին Մեծ Աղբաբա լեռան Հյուսիս-արևմտյան լանջերը, Իբիչ գյուղից Հյուսիս-արևելք ընկած սարահարթը): Սակայն մի շարք տեղամա-

¹ ՀԱԱ, ֆ. 113, ց. 3, գ. 21, թ. 125:

¹ Մանրամասն տե՛ս է. Ա. Զոհրաբյան, նշվ. աշխ., էջ 265-275:

սերի շուրջ Համաձայնություն չկայացվեց (Սարգսյանի գյուղը, սահմանը Սարգսյանի գյուղի շրջանում, Քավթառեթի գյուղը՝ Թուրք-վրացական սահմանում և Նոր Կիզիլդաչ ու Վարթանյու գյուղերը, Անի, Կողբը՝ Հայ-թուրքական սահմանում) և որոշվեց հարցը փոխադրել կոնֆերանսի պլենում: Ըստ որում, Անիի և Կողբի պատկանելիությունը վիճելի չէր, երկուսն էլ գտնվում էին Թուրքիային անցած տարածքներում: Հայաստանի համար պատմաճակովթային խիստ կարևոր արժեք ներկայացնող Բագրատունյաց Հայաստանի մայրաքաղաք Անիի ավերակները, որոնք գտնվում են Արփաչայի անմիջականորեն աջ ափին, Մոսկվայի պայմանագրով Արփաչայը սահմանագիծ ընդունելով, մնացել էին Թուրքական մասում: Հայաստանի կառավարությունն էլ կարծելով, թե դա թյուրիմացություն արդյունք է, և հեշտ շտկելի (չէ՞ որ ընդամենը մեկ-երկու քառ. կմ. տարածքի մասին է խոսքը), մտցրել էր իր կազմած «Հայ-թուրքական պայմանագրի» նախագծի սահմանների մեջ:

Երբ անցում կատարվեց Անիի խնդրին, Կարաբեքիր փաշան Հայտարարեց, որ ինքը դեմ չի Անիի ավերակները Հայաստանին թողնելուն, բայց պետք է այդ մասին հարցում անի կառավարությունը: Նա առաջարկեց Արփաչայը ընդունել որպես վերջնական սահմանագիծ և ապա Անկարայի դրական պատասխանի դեպքում մի առանձին հոդված ընդունել, որտեղ կասվի, որ Թուրքիան Անին զիջում է Հայաստանին: Նման մոտեցումը ընդունելի չէր Անդրկովկասյան պատվիրակության համար, քանի որ Նույն պայմանագրում Անիի վերաբերյալ իրար հակասող երկու հոդված կլինեք, որոնցից մեկում ասվում է, որ Անին պատկանում է Թուրքիային (Արփաչայը սահմանագիծ ընդունելու դեպքում), իսկ մյուսում, որ Անին անցնում է Հայաստանին: Ուստի Գանեցկին առաջարկեց Անիի հարցը հետաձգել մինչև Անկարայի պատասխանի ստացումը: Բանավիճելով Կարաբեքիրի հետ՝ Գանեցկին մատնացույց է անում Եվրոպայում տիրող կարծիքը Հայաստանի սահմանների հարցում, ցույց տալիս, որ Եվրոպայում շատ լավ տպավորություն կթողնի Անիի զիջումը Հայաստանին և ընդգծում, որ Անիի հարցը էական նշանակություն ունի ոչ միայն Հայաստանի, այլև ամբողջ Անդրկովկասի համար: Կարաբեքիրը վերջապես զիջեց և Անիի հարցը հետաձգվեց մինչև Անկարայի պատասխանի ստացումը:

Սահմանային մյուս հարցերի քննարկման ժամանակ Թուրքական պատվիրակության առաջարկությամբ որոշվեց առաջնորդվել բնական սահմաններով՝ գետերով, ջրբաժաններով և այլն: Սա ճիշտ մոտեցում էր, և խորհրդային պատվիրակները չառարկելով հանդերձ ավելացրին, որ եթե սահմանագիծը գյուղերով է անցնում, ապա պետք է հաշվի

առնել տվյալ գյուղի տնտեսական, իսկ խառը բնակչություն ունենալու դեպքում նաև ազգագրական կազմը: Այդպիսին էր Քավթառեթի, Վարթանյու, Կիզիլդաչ գյուղերի հարցը, որոնց միջով գետ էր հոսում և Թուրք պատվիրակները անդում էին, որ գետն ընդունվի իբրև սահման: Սակայն հայ և վրաց պատվիրակները՝ հարազատներին իրարից չկտրելու նպատակով, համաձայնեցին, որ նշված գյուղերի իրենց անցնող մասերը մնան Թուրքերին: Այդպես վարվելով, հույս ունենալով փոխադարձ վերաբերմունքի Թուրքերի կողմից՝ հատկապես Անիի հարցում: Բայց շուտով պարզվեց, որ Թուրքերը ինչպես Անիի, այնպես էլ ընդհանրապես Հայաստանին վերաբերող ոչ մի հարցում որևէ զիջում անելու մտադրություն չունեն: Ահա թե ինչ է գրում Մոսկվայի Մյասնիկյանին ուղարկած հոկտեմբերի 6-ի հեռագրում. «Երեկվա խորհրդակցությունը զբաղված էր հայկական հոդվածներով: Թուրքերը խիստ անհաշտվողականություն ցուցաբերեցին, հրաժարվեցին զիջել Անիի ավերակները, մերժեցին Կողբի կոնցեսիան¹, երկար համառում էին հայ-թուրքական պատերազմի մասնակիցների ամիստիայի հարցում...Վեճերը խիստ տաք էին: Այսօր դրանք կշարունակվեն»²: Նույն բանն է ասված Ջիզերինին ուղարկած Գանեցկու հեռագրում, որում շեշտված է, որ Թուրքերը չեն գնում փոխադարձ զիջման ճանապարհով, թեև անդրկովկասյան հանրապետությունները մի շարք հոդվածներում էական զիջումներ արեցին Թուրքերին³:

Հայաստանին առնչվող խնդիրների շարքում էր նաև Հայաստանի և Նախիջևանի միջև Եռանկյունի գոտու հատվածում սահմանի ճշտման հարցը, որն ըստ Մոսկվայի պայմանագրի պետք է լուծեր Հայաստանի, Ադրբեջանի և Թուրքիայի ներկայացուցիչներից կազմված խառը հանձնաժողովը: Եվ թվում էր, թե Թուրք պատվիրակները, որոնք բոլոր հարցերը լուծելիս կառչում էին Մոսկվայի պայմանագրից (այդպես մերժեցին Անիի ավերակները Հայաստանին հանձնելու հարցը), կօտազործեն այդ հնարավորությունը, կպահանջեն հանձնաժողով ստեղծել, կփորձեն միջամտել Հայաստանի և Ադրբեջանի ներքին գործերին, կպնդեն Մոսկվայում իրենց առաջ քաշած սահմանագիծ վրա: Սակայն դա տեղի չունեցավ: Ի դարմանս հայ, վրաց և ռուս պատվի-

¹ Անիի նկատմամբ Թուրքերի ցուցաբերած վերաբերմունքից հետո հայ պատվիրակները որոշել էին Կողբը Հայաստանին վերադարձնելու փոխարեն առաջ քաշել Կողբի աղահանքերի շահագործման պահանջ՝ կոնցեսիոն կարգով:

² ՀԱԱ, ֆ. 113, ց. 3, գ. 23, թ. 137:

³ Տե՛ս նույն տեղում, գ. 11, թ. 231:

րակների, Կարաբեքիր փաշան շատ հանգիստ ընդունեց Գանեցկու հայտարարությունն այն մասին, որ Աղրբեջանն արդեն լուծել է Հայաստանի հետ Նախիջևանի սահմանի հարցը և եթե թուրքական պատվիրակությունը չի առարկում, ապա հարցը կարելի է լուծված համարել: Մեջբերենք այդ կապակցությամբ Գանեցկու և Կարաբեքիրի երկխոսությունը, որը տեղի է ունեցել սեպտեմբերի 27-ին.

«Գանեցկի – Սահմանների կապակցությամբ այստեղ պետք է ավարտել մի ձևական հարց ևս: Եռանկյունու վերաբերյալ հարցը: Ես ինձ թույլ եմ տալիս հիշեցնելու, որ այդ առթիվ ընդունված է որոշում, սահմանը հաստատում է հայկական, աղրբեջանական, թուրքական ներկայացուցիչներից կազմված խառը հանձնաժողովը: Ինչ վերաբերում է երկու անդրկովկասյան հանրապետություններին, ապա այդ հարցը լուծված է և հետևաբար ես կրկնում եմ, որ ամբողջ այդ հարցը կարելի է ավարտված համարել: Եթե թուրքական պատվիրակությունը համաձայն է, ապա սահմանի հարցը կարելի է հենց այստեղ համարել ավարտված:

Կարաբեքիր փաշա – Թուրքական պատվիրակությունը ընդունում է Աղրբեջանի և Հայաստանի հաստատած սահմանը և վաղը կարելի կլինի վերջնականորեն դա ձևակերպել»¹:

Ճիշտ է, հաջորդ օրը Նախիջևանի մասին հողվածք չձևակերպվեց, և ընդհանրապես մինչև հոկտեմբերի 3-ը այդ հարցին չանդրադարձան: Բայց ուշագրավը Կարաբեքիրի վերաբերմունքն է, նրան չի հետաքրքրում, թե ինչպիսի սահմանագիծ է անցկացվել, արդյո՞ք այդ վիճելի տարածքը բաժանվել է կողմերի միջև, թե ամբողջությամբ տրվել է կողմերից մեկն ու մեկին: Այդ ամենը կարծես թե նրան չէր հետաքրքրում, կամ էլ, որ առավել հավանական է, նա նախապես գիտեր կատարված բաժանման մասին: Նման ենթադրությունն է համար հիմք կարող է ծառայել Ծահթախթինսկու կապը Կարսի հետ:

Ընդհանրապես Կարսի կոնֆերանսի նյութերի հետ ծանոթությունը ցույց է տալիս, որ Նախիջևանի խնդիրը կողմերին առանձնապես չի հետաքրքրել: Արձանագրություններում համարյա ոչինչ չկա, շատ սուղ տեղեկություններ են պարունակում Գանեցկու՝ Ջիչերինին ուղարկած և Մոսկվայի՝ Մյանսիկյանին ուղարկած հեռագրերում: Ահա օրինակ, ինչ է գրում Գանեցկին Ջիչերինին հոկտեմբերի 3-ին, այսինքն՝ այն նույն օրը, երբ ձևակերպվեց Նախիջևանի վերաբերյալ հողվածք.

«Տար վեճեր եղան Նախիջևանի և Բաթումի հարցում, քանի որ թուրքերը պնդում էին, որ այդ հողվածքներից յուրաքանչյուրի համար հավելված կցվի պայմանագրին, որում ճշտորեն որոշված կլինեն այդ մարզերի ինքնավարության ընդհանուր հիմունքները, մշակված հենց այստեղ՝ կոնֆերանսում համապատասխան հանրապետությունների և թուրքերի հետ մեկտեղ: Վերջապես նրանք համաձայնեցին, որ հավելվածներ չեն լինի և կբավարարվեն միայն կոնֆերանսի նիստում Նախիջևանի և Բաթումի մարզերում գոյություն ունեցող կարգի մասին Աղրբեջանի և Վրաստանի կողմից տրված բացատրությամբ, որը կմտցվի արձանագրության մեջ»¹: Ինչ վերաբերում է Մյանսիկյանին հասցեագրած Մոսկվայի հեռագրերին, որոնցում շոշափվում է Նախիջևանի հարցը, ապա դրանք երկուսն են՝ տրված հոկտեմբերի 4-ին և 5-ին: Առաջինում խոսելով նախորդ օրը (3-ին) թուրքերի հետ ունեցած երկու խորհրդակցությունների մասին և հայտնելով, որ «թուրքերը հատկապես համառում են Բաթումի հարցում», այնուհետև անցնում է Նախիջևանի խնդրին՝ ավելացնելով, որ «նրանք (թուրքերը – է. Ջ.) ցուցաբերեցին մեծ հետաքրքրություն Նախիջևանի նկատմամբ: Ընդունված է մեր խմբագրությունը հողվածք» և այնուհետև հեռագրի վերջում նորից է անդրադառնում Նախիջևանի խնդրին, ասելով, թե «այստեղ եկան վեղիբասարցիների ներկայացուցիչները՝ Նախիջևանին միանալու պահանջով: Մասնավոր կերպով հաջողվեց նրանց հանգստացնել»² (ընդգծումը մերն է – է. Ջ.): Թե ինչ հետաքրքրություն են ցուցաբերել թուրքերը Նախիջևանի նկատմամբ, Մոսկվայը չի ասում: Այդ բացը լրացնում է Ջիչերինին հասցեագրած Գանեցկու հոկտեմբերի 3-ի հեռագիրը, որից տեղեկանում ենք, որ թուրքերին հետաքրքրում էր Նախիջևանի ինքնավարության հարցը: Բայց դատելով այն իրողությունից, որ Նախիջևանին ինքնավարություն չնորհելու մասին հատուկ չի շեշտված Նախիջևանի վերաբերյալ հողվածքում, պետք է ենթադրել, որ թուրքերին այն չի հետաքրքրել այնպես, ինչպես Բաթումի հարցը, որի մասին մի առանձին պարագրաֆ է գետեղված (6-րդ հողվածքի 1-ին պարագրաֆը), որով Վրաստանից պահանջվում է ապահովել Բաթումի մարզի համար «լայն տեղական ինքնավարություն»³ և այլն:

Իսկ հիմա տեսնենք, թե ինչ է ասված Նախիջևանին ինքնավար

¹ Նույն տեղում, գ. 21, թ. 137:

¹ Նույն տեղում, թ. 87:

² Նույն տեղում, գ. 23, թ. 55:

³ «Документы внешней политики СССР», т. IV, М., 1960, էջ 423.

տարածքի կարգավիճակ շոնորհող Կարսի պայմանագրի 5-րդ հոդվածում և որքանով է այն «մեր խմբագրությունը», ինչպես Մոսկվայան է ասում:

«Հոդված 5 - Թուրքական կառավարությունը և Հայաստանի ու Ադրբեջանի խորհրդային կառավարությունները համաձայն են, որ Նախիջևանի մարզը՝ ներկա պայմանագրի 3-րդ հավելվածում ցույց տրված սահմաններում, կազմում է ինքնավար տարածք Ադրբեջանի հովանավորության տակ»¹:

Եթե համեմատելու լինենք ներկա հոդվածը Հայաստանի կառավարության ընդունած «Հայաստանի ու Թուրքիայի միջև պայմանագրի նախագծի» Նախիջևանին վերաբերող հոդվածի հետ, ապա երկու հակառակ տարբերություն կտեսնենք. 1-ինն այն է, որ Հայկական նախագծում ասված է, որ «Երկու պայմանավորվող կողմերը (այսինքն՝ Հայաստանը և Թուրքիան) համաձայն են, որ Նախիջևանի մարզը...», և այնուհետև ինչպես տեքստում: Երկրորդ տարբերությունն այն է, որ Ադրբեջանը Նախիջևանի նկատմամբ իր իրավունքներով հավասարեցված է Հայաստանին և Թուրքիային. «Թուրքական կառավարությունը և Հայաստանի ու Ադրբեջանի խորհրդային կառավարությունները համաձայն են...» և այն: Եթե հիշենք, որ Մոսկվայի պայմանագրով Թուրքիան և Ռուսաստանը համաձայնեցին, որ Նախիջևանի երկրամասը դրվի Ադրբեջանի հովանավորության տակ «պայմանով, որ Ադրբեջանը այդ հովանավորությունը չի զիջի ոչ մի երրորդ պետության», այսինքն՝ Հայաստանին, ապա պարզ կդառնա, որ Ադրբեջանը չպետք է տեղ գտներ Հայաստանի և Թուրքիայի կողքին՝ Նախիջևանի ինքնավարությունը ճանաչողների շարքում: Պարզ է նաև, որ դա արված է Նախիջևանի նկատմամբ Ադրբեջանի իրավունքը ամրապնդելու նկատառումով: Միայն պարզ չէ, թե ո՞ւմ թեթև ձեռքով է դա կատարվել, արդյո՞ք Շահթախթինսկու, թե՞ Թուրքական պատվիրակության:

Գատնելով Մոսկվայի հոկտեմբերի 5-ի հեռագրից՝ դա Շահթախթինսկու ձեռքի գործն է: Հեռագրի սկզբում խոսելով նախորդ օրվա նիստի լարվածության մասին և շեշտելով, որ «կոնֆերանսի վրա սավառնում է մեկը մյուսին չվստահելու ոգին» և, որ Բաթումի հարցում թուրքերը շարունակում են համառել իրենց ծրագրի վրա, Մոսկվայը վերջում հանկարծ մի նախադասություն անդրադառնում է Նախիջևանի հարցին՝ ասելով. «...հիշում եմ մեր պայմանը (դժվար ընթե-

նելի է - է. Զ.) Նախիջևանի հարցի մասին, Հայտնեցեք չիֆրով, հնարավոր է Շահթախթինսկուն կրեբենք Երևան»¹ (ընդգծումը մերն է - է. Զ.):

Շահթախթինսկուն իսկապես կոնֆերանսից հետո բերեցին Երևան, բայց թե ինչի մասին են խոսել, մնում է անհայտ: Միայն Հայտնի է, որ հոկտեմբերի 15-ին, կեսօրին ժամը 12-ին, Շահթախթինսկին Մոսկվայի և Մակինցյանի հետ մեկտեղ, Շահումյանի անվան բանվորական ակումբի բալկոնից ելույթ ունեցավ հավաքված բազմության (կարմիրբանակայիններ, բանվորներ և ծառայողներ) առջև և հավաստիացրեց, որ կոնֆերանսի արդյունքները բարենպաստ են երկու կողմերի համար էլ և որ պայմանավորվող կողմերը անկեղծ էին իրենց ձգտումներում²:

Մի կողմ թողնելով երկու կողմերի անկեղծ ձգտումների մասին կեղծ Հայտարարությունը, որը սովորաբար հրապարակային ելույթների լեզու է, ասենք, որ Շահթախթինսկուն Երևան բերելու համար մի այլ հիմնավոր պատճառ էլ կարող էր լինել, դա վեղիբասարցիների պատվիրակության Կարս ժամանելը և Նախիջևանին միանալու պահանջ առաջ քաշելն է, որից Հայկական կողմը, հասկանալի է, դժգոհ պետք է մնար: Եվ քանի որ Հայաստանի ղեկավարությունը տեղյակ էր Շահթախթինսկու նախորդ գործունեությանը Նախիջևանի հարցում, ուստի նա կարող էր կասկածել, որ վեղիբասարցիների այդ ելույթն էլ հրահրված էր Շահթախթինսկու կողմից: Անգամ եթե չի հրահրել, բայց կայնպես կարող էր կանխել, ինչը չէր արել:

Թե ի՞նչն էր իրական պատճառը Շահթախթինսկուց Մոսկվայի դժգոհության, արդյո՞ք Նախիջևանի ինքնավարության հարցում Ադրբեջանին Հայաստանի և Թուրքիայի կողքին դնելը, թե՞ վեղիբասարցիների Կարս ժամանելը և Նախիջևանին միանալու պահանջը, այդպես էլ անհայտ է մնում:

Գառնալով «Նախիջևանի տարածքը» վերնագիրը կրող Կարսի կոնֆերանսում ընդունված 3-րդ հավելվածին, ապա պետք է արձանագրենք, որ այն ամբողջովին համընկնում է Հայ-Թուրքական պայմանագրի նախագծում տեղ գտած I (B) հավելվածին: Պարզապես առաջինում առկա են սահմանագծի նկարագրության որոշ մանրուքներ: Բայց որպեսզի ընթերցողն էլ համոզվի դրանում, մեջբերենք այդ երկու հավելվածները.

¹ ՀԱԱ, Փ. 113, ց. 3, գ. 23, թ. 56:

² Տե՛ս „Правда Гruzии“, N = 189, 18 окт.1921г.

¹ Նույն տեղում:

Հավելված I (B) – Նախիջևանի տարածքը:

«Գյուղ Ուրմիա - Արագդայան կայարան (բացառապես) - լեռ Դաչ-Բուրուն (4108) - լեռ ԲաՀարսղ (6607) - լեռ 6629 - լեռ Քյոմուրլու-դաղ (6639) - լեռ 3080 - լեռ Սայաթ-դաղ (7868) - գյուղ Գուրդ-գուլաղ - լեռ Գամեսուր-դաղ (8160) - լեռ 8022 - լեռ Կյուկի-դաղ (10282) և Նախիջևանի գավառի նախկին արևելյան վարչական սահմանը»¹:

Հավելված III – Նախիջևանի տարածքը.

«Գյուղ Ուրմիա - այստեղից ուղիղ գծով՝ Արագդայան կայարան (Թողնելով այն Հայաստանի Սոցիալիստական Խորհրդային Հանրապետությունը) - այնուհետև ուղիղ գծով դեպի արևմտյան Դաչ-Բուրուն լեռ (3142) - արևելյան Դաչ-Բուրուն լեռան ջրբաժան գիծ (4108) - անցնում է ՋՀանամ-դարասի գետով «Աղբյուր»-ից (Բուլաղ) (Հարավ) դեպի Հարավ - ընթանում ԲաՀարսղ լեռան ջրբաժան գծով (6607 կամ 6587) և այստեղից ընթանում է նախկին Երևանի օկրուգի և Շարուր-Դարալագյազի գավառի վարչական սահմանով և 6629 բարձունքով դեպի Քյոմուրլու-դաղ լեռ (6839 կամ 6930) և այստեղից դեպի 3080 բարձունք - Սայաթ-դաղ (7868) - Գուրդ-Գուլաղ (Գյուրդ-Գուլաղ) գյուղ - Գամեսուր-դաղ լեռ (8160) - 8022 բարձունք - Կյուկի-դաղ (10282) և նախկին Նախիջևանի օկրուգի արևելյան վարչական սահմանը»²

Այսպիսին են սահմանները Հայաստանի և Նախիջևանի միջև, այսպես Երևանի գավառի Հարավ-արևելյան մի Հատվածը ևս կտրվեց Խորհրդային Հայաստանից և միացվեց Նախիջևանի երկրամասին, որով և ապահովվեց Թուրք-աղբրեջանական ընդհանուր սահմանի առկայությունը Ուրմիա գյուղից (Արաքսի ձախ ափին), մինչև Ստորին Կարասուի թափվելը Արաքս գետը (Արաքսի աջ ափին), ընդամենը շուրջ 9-10 կմ. երկարությամբ մի սահման, բայց անչափ կարևոր, քանի որ մեր օրերում (ԽՍՀՄ փլուզումից հետո) հենց սահմանի այդ Հատվածով է ապահովվում Աղբրեջանի կապը Թուրքիայի հետ: Ուստի ճիշտ է մեր պատմագրության մեջ տեղ գտած այն կարծիքը, ըստ որի՝ Թուրքիան 30-ական թվականներին Իրանի հետ տարածքների փոխանակություն է կատարել Նախիջևանի հետ ընդհանուր սահման ունենալու համար: Թուրքիան Իրանից բաժանող սահմանագիծը հիմա էլ անցնում

է Ստորին Կարասուով: Իսկ այդ նեղ շերտը (լեզվակը) նախկին Սուրմալուի գավառի այն Հատվածն է, որը Արաքս գետը սահման ընդունելուց հետո անցել էր Թուրքիային:

Կարսի կոնֆերանսում Հայաստանին առնչվող մյուս Հարցերին՝ տնտեսական (Կողբի աղահանքերի կոնցեսիայի, Ալեքսանդրապոլի դեպոյի թալանված գույքի վերադարձման), պատերազմի մասնակիցների ամնիստիայի, գաղթականների վերադարձի և այլն, մենք չենք անդրադառնում, նախ՝ որովհետև դուրս են մեր ուսումնասիրությունների թեմայի շրջանակներից և հետո՝ ինչպես արդեն նշվել է, այդ Հարցերը ամենայն մանրամասնությամբ լուսաբանված են 1920-1922թթ. Հայ-թուրքական Հարաբերություններին նվիրված մեր գրքում: Ճիշտ նույն նպատակով չենք անդրադառնում նաև Վրաստանի (Հատկապես Բաթումի Հարցում) և Աղբրեջանի (նավթի մատակարարման) հետ առնչվող Հարցերին, ինչպես նաև Հոկտեմբերի 13-ին ստորագրված պայմանագրին, որի վավերացրած օրինակները փոխանակվեցին 1922թ. սեպտեմբերի 12-ին Երևանում:

* * *

Ամփոփենք այս գլխում շարադրվածը.

1. Մոսկվայի ուս-թուրքական պայմանագրի ստորագրումից անմիջապես հետո Ջիջերինը լծվեց իր առաջ ծառայած երկու գլխավոր խնդիրների իրականացման գործին (1. Համոզել միջազգային Հանրությունը, որ Թուրքիային կատարված տարածքային զիջումներն այլընտրանք չունենին, 2. պարտադրել Անդրկովկասյան Հանրապետություններին Մոսկվայի պայմանագրի հիմքի վրա պայմանագրեր կնքել Թուրքիայի հետ) և, եթե առաջին խնդրում հաջողություն չունեցավ, ապա երկրորդը հաջողությամբ իրականացրեց:

2. Խորհրդային Հայաստանի ղեկավարությունը դժգոհ մնաց Մոսկվայի կոնֆերանսի որոշումներից, ինչն իր արտահայտությունը գտավ Ջիջերինին հասցեագրած Ալ. Բեկդաղյանի բողոք-նամակում, ինչպես նաև Բեկդաղյանի պատվիրակության գործունեությունը Հավանություն տված Հայկոմկուսի Կենտկոմի մայիսի 19-ի պլենումի որոշման մեջ: Ինչ վերաբերում է Ջիջերինի պատասխան գրություններին՝ ուղղված Ս. Տեր-Գաբրիելյանին և Բ. Լեգրանին, ապա դրանք անհամոզիչ էին, թեև նա այդ գրություններում բացահայտեց որոշ գաղտնիքներ՝ Հարցերը անդրկովկասյան բանակցություններում վճռելու, այդ գործում ղեկավար գործիչների մասնակցություն և այլն:

3. Ջիջերինը մտահոգված էր Երևանի գավառի Հարավ-արևելյան

¹ ՀԱԱ, ֆ. 113, ց. 3, գ. 23, թ. 37:

² «Документы внешней политики СССР», т. IV, էջ 429.

Հատվածը՝ այսպես կոչված Եռանկյունի գոտին (Արարատ կայարանից մինչև Գայլի Դրունք ընկած Հատվածը) Նախիջևանին անցնելու խնդրով, քանի որ դրանով իսկ անմիջական կապ էր ստեղծվում Թուրքիայի և Ադրբեջանի միջև: Այդ է պատճառը, որ Բաքու՝ Հուսեյնովին ուղարկած հրահանգներում, խոսելով այն մասին, որ Հայաստանի և Նախիջևանի միջև սահմանի վերջնական որոշումը Մոսկվայի պայմանագրով թողնված է Հայաստանի, Ադրբեջանի և Թուրքիայի ներկայացուցիչներից կազմված Հանձնաժողովի Հայեցողությունը, միաժամանակ առաջ է քաշում այն միտքը, որ Գայլի Դրունքից Հյուսիս-արևմուտք ընկած Հատվածը (Եռանկյունի գոտի) Թուրքերն անարդարացիորեն են կտրել Հայաստանից: Քաջատեղյակ Մոսկվայի կոնֆերանսում Նախիջևանի ճակատագրի վճռման գործում Ծախթախթինսկու խաղաղած դերին՝ Ձիչերինը միաժամանակ Բեկզադյանին խորհուրդ է տալիս Հայհեղկոմի միջոցով կանխել Ծախթախթինսկու մասնակցությունը Հայաստանի և Նախիջևանի միջև սահմանի ճշտման հարցին:

4. Բաքվի մայիսի 7-ի խորհրդակցությունը (մասնակցում էին Օրջոնիկիձեն, Լեգրանը, Օրախելաչվիլին, Հուսեյնովը, Ծախթախթինսկին և Բեկզադյանը) ավելի շատ զբաղվեց տվյալ հավաքույթը կոնֆերանս թե խորհրդակցություն անվանելու Հուսեյնով-Բեկզադյան բանավեճով, քան օրակարգային հարցերով, որոնք արագ լուծում ստացան (Թուրքիայի հետ Անդրկովկասյան հանրապետությունների միացյալ կոնֆերանսի, բանակցությունները Մոսկվայի պայմանագրի հիմքի վրա վարելու և այլն): Խորհրդակցությունը կոնֆերանս հայտարարելու և օրակարգում դրված հարցերին լուծում տալու Հուսեյնովի ջանքերը ապարդյուն անցան: Առարկում էր Բեկզադյանը՝ վկայակոչելով այն փաստը, որ օրակարգային հարցերը չեն քննարկվել հանրապետություններում, հետևապես չի կարելի կոնֆերանս անվանել, որի որոշումները պարտադիր կատարում են պահանջում: Օրակարգի վերջին հարցի՝ Նախիջևանի և Հայաստանի միջև սահմանի խնդրի մասին զեկուցում է Ծախթախթինսկին, որը տեղեկացնելով Հանդերձ, որ ինքը Ձիչերինին ասել է, որ ճիշտ սահմանը Գայլի Դրունքն է, միաժամանակ վերջում ավելացնում է, թե արդարացի կլինի, որ հաշվի առնվի նաև «տեղացի, գիտակ ընկերների կարծիքը»:

Թվում էր, թե Բեկզադյանը կհասկանա Ծախթախթինսկու հեռահար նպատակը և կկառչի Գայլի Դրունքը սահման ճանաչելու գաղափարից, բայց ո՛չ: Ի պատասխան Ծախթախթինսկուց հետո հանդես եկած Լեգրանի այն կարծիքի, որ «հարցին այնպիսի լուծում կտրվի, ինչպես որ մենք կորոշենք», նա հայտարարում է, որ ինքը «չի կարող

ճիշտ սահման նշել տեղանքին ծանոթ չլինելու պատճառով»: Դրան հաջորդում է Օրջոնիկիձեի առաջարկությունը ընդունված որոշումը. «Հանձնարարել Հայաստանի և Ադրբեջանի ներկայացուցիչներին տեղում ճշտելու սահմանը՝ համաձայն ազգագրական սկզբունքի, ինչպես նաև այդ հարցի վերաբերյալ տեղական ազգաբնակչության մոտ ձևավորված կարծիքի»: Իսկ դա նշանակում էր, որ Ադրբեջանը կօգտվի այդ որոշումից և սահմանագիծը Գայլի Դրունքից առաջ կմղի դեպի Հյուսիս-արևմուտք և ձեռք կզցի Եռանկյունի գոտու մի մասը ևս, ինչը և նա կատարեց հետագայում՝ Հայաստանի հետ սահմանն անցկացնելով Արազղայանով: Գայլի Դրունքից Արազղայան Հատվածը պահելով իրեն՝ Ադրբեջանը դրանով իսկ ապահովեց կապը Թուրքիայի հետ¹: Դա Ծախթախթինսկու գծի հաղթանակն էր:

5. Չնայած իր տնտեսական ծանր դրությունը՝ Հայաստանն իր սուղ միջոցներից շարունակում էր բաժին հանել Նախիջևանին՝ նպատակ ունենալով ամեն կերպ օգնել նրան տնտեսությունը վերականգնելու, հատկապես աղահանքերի շահագործումը վերականգնելու գործում: Մայիս ամսին Հայկոմկուսի Կոնտկոմը իր նիստերում երկու անգամ անդրադարձել է Նախիջևանին օգնելու խնդրին և որոշում կայացրել (մայիսի 31-ին) 15 մլն. ռուբլու վարկ տրամադրել Նախիջևանին: Իսկ երբ սեպտեմբերի 5-ին Մյաննիկյանը Կավբյուրոյի նիստում բարձրացրեց Նախիջևանին տնտեսական օգնություն ցույց տալու հարցը, ապա այդ նույն նիստում հանձնարարվեց Հայաստանին բաց թողնել Նախիջևանի համար 20 հազ. ռուբլի ոսկով: Մինչդեռ այդ նույն ժամանակամիջոցում Ադրբեջանը զբաղված էր Նախիջևանը Հայաստանի ազդեցությունից կտրելու խնդրով, ինչի մասին են վկայում նրա երկու բողոք-դիմումները Կավբյուրոյին (հունիսի 12-ի և հոկտեմբերի 10-ի), որոնցում մեղադրում էր Հայաստանին Նախիջևանի ներքին գործերին միջամտելու մեջ:

6. Նախապատրաստվելով Կարսի կոնֆերանսին, Հայաստանի կառավարությունը մշակել էր Մեծորանդում (հուլիսի) և «Պայմանագրի նախագիծ Հայաստանի և Թուրքիայի միջև»: Ձթվագրված այդ երկու փաստաթղթերը Նախիջևանի հարցում խիստ տարբեր մոտեցումներ են նախանշում: Եթե Մեծորանդումով առաջարկվում է կա՛մ Նախիջևանի երկրամասի նկատմամբ հովանավորությունը հանձնել Հայաս-

¹ Պրոֆ. Ա. Հակոբյանը սխալմամբ Արազղայանը նույնացրել է Գայլի Դրունքի հետ (տե՛ս նրա «Խորհրդային Հայաստանը Մոսկվայի և Կարսի պայմանագրերում», Եր., 2010 թ., էջ 306, 307):

տանին, կա՛մ էլ սահմանը անցկացնել Քյանդը-խոկ-Ազնաբերդ-Սուլ-թան-բեկ գծով մինչև Կյուկի-դաղ՝ համապատասխան հիմնավորումներով, ապա հայ-թուրքական պայմանագրի նախագծում խոսվում է այն մասին, որ երկու պայմանավորվող կողմերը համաձայն են, որ Նախիջևանի երկրամասը կազմում է ինքնավար միավոր Ադրբեջանի հովանավորության տակ: Ընդ որում պայմանագրի նախագծի հավելվածում նշված սահմանները համընկնում են Կարսի պայմանագրով գծված սահմանագծին: Իսկ դա նշանակում է, որ Մեմորանդումը և հայ-թուրքական պայմանագրի նախագիծը տարբեր ժամանակում են կազմվել: Մեմորանդումը հավանաբար ապրիլին կամ մայիսին, իսկ պայմանագրի նախագիծը արդեն Եռանկյունի գոտու բաժանումից հետո (հունիսին կամ հուլիսին):

7. Կարսի կոնֆերանսում թուրքական պատվիրակությունը խստորեն կառչում էր Մոսկվայի պայմանագրից և պահանջում ոչ մի փոփոխություն չկատարել նրանում: Այսպես մերժեցին Անիի ավերակները Հայաստանի սահմաններում թողնելու անրդկովկասյան պատվիրակության պահանջը, մերժվեցին նաև Կողբի աղահանքերի շահագործումը կոնցեսիոն կարգով Հայաստանին հանձնելու, Ալեքսանդրապոլի դեպոյի թալանված գույքը վերադարձնելու պահանջները և այլն: Ընդհանրապես թուրքերը շատ անզիջում էին Հայաստանին վերաբերող հարցերում և նրա կողմից առաջ քաշված և ոչ մի հարց լուծում չստացավ: Միակ հարցը, որ թուրքերը չառարկեցին և շատ շուտ համաձայնվեցին, դա Հայաստանի և Նախիջևանի միջև սահմանի հաստատումն էր: Կարաբեքիրը չպահանջեց խառը հանձնաժողովի (Հայաստանի, Թուրքիայի և Ադրբեջանի ներկայացուցիչների) ստեղծում, չփորձեց պաշտպանել թուրք փորձագետների գծած սահմանները Մոսկվայում, այլ իսկույն հանաձայնեց Գանեցկու առաջարկության հետ՝ ճանաչելու Ադրբեջանի և Հայաստանի կողմից գծված սահմանները: Իսկ դա նշանակում է, որ նա նախապես տեղյակ էր գծված սահմանների մասին:

8. Կարսի կոնֆերանսում Նախիջևանի վերաբերյալ հողվածը տարբերվում է Հայաստանի կառավարության կազմած հայ-թուրքական պայմանագրի նախագծից նրանով, որ ըստ վերջինի՝ Ադրբեջանի հովանավորության տակ Նախիջևանին ինքնավարություն չնորհողի դերում հանդես են գալիս Հայաստանը և Թուրքիան, մինչդեռ Կարսի պայմանագրի համապատասխան հողվածում Հայաստանի և Թուրքիայի կողքին ավելացված է Ադրբեջանի անունը: Դա նշանակում է, որ Ադրբեջանը Նախիջևանի նկատմամբ իր իրավունքներով հավասարեցված է Հայաստանին և Թուրքիային: Ուրեմն սխալվում էր Մոսկվայի

հոկտեմբերի 4-ին հեռագրելով Մյասնիկյանին, թե «ընդունված է մեր խմբագրությունը հողվածը», իսկ 5-ին՝ թե «Շահթախթինսկուն կրեբենք Երևան»: Ինչո՞վ էր դժգոհ Մոսկվայից Շահթախթինսկուց, արդյո՞ք Նախիջևանի հարցում Ադրբեջանին Հայաստանի և Թուրքիայի հետ նույն հարթության վրա դնելուց, ինչը նա կարող էր անել թուրքերի հետ գաղտնի համաձայնությունով, թե՞ վեղիբասարցիների Կարս գալու և Նախիջևանին միանալու պահանջից, ինչը, անտարակույս, չէր կարող տեղի ունենալ առանց Շահթախթինսկու գիտություն: Դրանք հարցեր են, որոնց պատասխանը արխիվներում հայտնաբերել մեզ չհաջողվեց:

ՎԵՐՋԱԲԱՆ

Մոսկվայի ռուս-թուրքական և Կարսի թուրք-անդրկովկասյան պայմանագրերով ստանալով Նախիջևանի երկրամասի նկատմամբ հովանավորության իրավունք, Ադրբեջանի ղեկավարությունը դրանով չբավարարվեց, այլ իսկույն ևեթ ձեռնամուխ եղավ երկրամասը ամբողջովին իրեն ենթարկելու, Ադրբեջանի անբաժան մաս դարձնելու խնդրի լուծման գործին: Դեռ նոր էր տեղի ունեցել Կարսի պայմանագրի վավերացրած օրինակների փոխանակությունը Երևանում (1922թ. սեպտ. 12-ին), երբ Ադրբեջանի ղեկավարությունը առաջ քաշեց Նախիջևանի երկրամասը ինքնավարության իրավունքով Ադրբեջանական ԽՍՀ կազմի մեջ ընդգրկելու մասին հարցը և այդ նպատակով դիմեց Խորհուրդների անդրկովկասյան առաջին համագումարի կազմկոմիտեին՝ խնդրելով այդ մասին համապատասխան որոշում կայացնել: Վերջինս էլ՝ ընդառաջելով Ադրբեջանի ղեկավարության խնդրանքին, այդ հարցը մտցրեց օրակարգ, որի արդյունքում 1922թ. դեկտեմբերին գումարված Խորհուրդների անդրկովկասյան առաջին համագումարը կայացրեց որոշում Նախիջևանի ԽՍՀ-ն ինքնավարության սկզբունքով վերակառուցելու մասին: Շուտով ՌԿ(Բ)Կ Անդրկովկասի երկրային կոմիտեն ևս անդրադարձավ այդ հարցին (1923թ. հունվարին) և որոշեց առաջարկել Ադրբեջանի Կոմկուսի Կենտկոմին Խորհուրդների անդրկովկասյան առաջին համագումարի որոշման հիման վրա Նախիջևանի ԽՍՀ-ն վերակառուցել որպես ինքնավար մարզ Ադրբեջանական ԽՍՀ կազմում:

Թվում էր, թե դա առաջ կբերի Նախիջևանի եթե ոչ ազգաբնակչության, ապա գոնե ղեկավարության դժգոհությունը: Չէ՞ որ Նախիջևանի Խորհրդային Սոցիալիստական Հանրապետությունը վեր էր ածվում ինքնավար միավորի և մտցվում Ադրբեջանի կազմի մեջ, որով խուզվում էին նրանց իրավունքները, ստանում ստորադաս կարգավիճակ: Բայց ո՛չ, փետրվարի 27-ին բացված Խորհուրդների համանախիջևանյան երրորդ համագումարը, քննարկելով Նախիջևանի ԽՍՀ-ն Ադրբեջանի կազմի մեջ ինքնավար միավորի իրավունքով մտնելու հարցը, որոշեց.

«1. ձանաչել Նախիջևանի ԽՍՀ-ն Ադրբեջանական ԽՍՀ-ի անբալկ-

տելի մաս, որի կազմի մեջ մտնելը համարել կենսական անհրաժեշտություն.

2. Լուծարել Նախիջևանի Կենտգործկոմը և Ժողկոմխորհը և բոլոր ժողկոմատները,

3. Երկրամասի կառավարման համար ընտրել 17 անդամներից և 7 թեկնածուներից բաղկացած «Նախիջևանի երկրամասային գործադիր կոմիտե»:

4. Նախիջևանի ողջ երկրամասը իր ամբողջ ապարատներով մտցնել Ադրբեջանական ԽՍՀ կազմի մեջ ինքնավար երկրամասի իրավունքով»¹:

1923թ. հունիսի 16-ին Ադրբեջանի Կենտգործկոմը որոշում կայացրեց Նախիջևանի երկրամասը Ադրբեջանին միացնելու մասին, ինչը սակայն իսկույն ևեթ առաջ բերեց Թուրքական կառավարության դժգոհությունը: Տասն օր էլ չէր անցել, երբ Մոսկվայում ստացվեց Թուրքական կառավարության բողոքի նոտան: ՌԽՖՍՀ կառավարությունը հասցեագրած 1923թ. հունիսի 25-ի նոտայում Նախիջևանի երկրամասի միացումը Ադրբեջանին որակելով որպես Մոսկվայի ռուս-թուրքական պայմանագրի (1921թ. մարտի 16-ի) 3-րդ հոդվածի և Կարսի թուրք-անդրկովկասյան պայմանագրի (1921թ. հոկտեմբերի 13-ի) 5-րդ հոդվածի ուղղակի խախտում, Թուրքիայի արտգործմինիստրը գրում է. «Իմ կառավարության ցուցումով ես լիազորված եմ տեղյակ պահելու ՌԽՖՍՀ կառավարությանը, որ Թուրքիան այդ միացումը համարում է անվավեր այն պատճառով, որ այդ աննեքսիան հանդիսանում է վերոհիշյալ պայմանագրերի բացահայտ խախտում, և որ Թուրքիան վճռական կերպով բողոքում է այդ տարածքի անվերապահ միացման փաստի դեմ»²:

Թուրքիայի Արտաքին գործերի մինիստրության բողոքի նոտան անհետևանք չանցավ. Մոսկվայի ցուցումով Ադրբեջանի Կենտգործկոմի նախագահությունը ստիպված եղավ վերանայել իր որոշումը և 1924թ. փետրվարի 9-ին ընդունել հետևյալ որոշումը. «Նախիջևանի երկրամասը վերակառուցել Նախիջևանի Խորհրդային Սոցիալիստական Հանրապետության Ադրբեջանի ԽՍՀ պրոտեկտորատի տակ»³:

Այսպես Թուրքիայի միջամտությունը կանխեց Նախիջևանի երկրամասի միացումը Ադրբեջանին: Սակայն այդ վիճակը պահպանվեց

¹ Г. Мадамов, նշվ. աշխ., էջ 158:

² „Геноцид армян...“, էջ 633:

³ Նույն տեղում:

մինչև 1936թ. դեկտեմբերը, երբ ստալինյան սահմանադրությունը Նախիջևանի երկրամասի կարգավիճակը կրկին փոխվեց և նա ինքնավար Հանրապետություն կարգավիճակով մտցվեց Ադրբեջանի կազմի մեջ:

1966թ. նորից առաջացավ Նախիջևանի կարգավիճակի փոփոխման անհրաժեշտություն: Բանն այն է, որ 1966թ. մայիսի 31-ին ԽՍՀՄ Արտաքին գործերի մինիստրությունը ԽՍԿԿ Կենտկոմի պահանջով նախապատրաստեց և Միջին Արևելքի երկրների բաժնի վարիչ Ս. Կիկտևի և պայմանագրային-իրավական բաժնի վարիչ Օ. Նլեստովի ստորագրությամբ ներկայացրեց տեղեկանք «Նախիջևանի ԻՍՄՀ-ն խորհրդա-թուրքական պայմանագրերում»: Տեղեկանքում ներկայացնելով Մոսկվայի և Կարսի պայմանագրերի Նախիջևանին վերաբերող հոդվածները և ամփոփելով՝ հետևություն է արվում, թե «չարագրվածի լույսի ներքո Նախիջևանի Ինքնավար Խորհրդային Սոցիալիստական Հանրապետության կարգավիճակի վերանայումը կնշանակի ետ կանգնել պայմանագրային պարտավորություններից, որ վերցրել է իր վրա Խորհրդային Միությունը վերը նշած համաձայնագրերով: Դրա հետ մեկտեղ այդ քայլը կարող է առաջ բերել խորհրդա-թուրքական հարաբերությունների բարդացում: Թուրքական կողմը կարող է Նախիջևանի կարգավիճակի վերանայումը որակել որպես կնքված պայմանագրերի խախտում և օգտագործել այդ հանգամանքը դրանք չեղյալ հայտարարելու համար»¹: Այս ամենին հետևում է վերը նշված բաժինների եզրակացությունն այն մասին, որ իրենք նպատակահարմար չեն համարում Նախիջևանի Ինքնավար Խորհրդային Սոցիալիստական Հանրապետության «կարգավիճակի փոփոխման ուղղությամբ ինչ-որ քայլերի ձեռնարկումը»:

Դժվար է ասել, թե ինչն է հարկադրել ԽՍԿԿ Կենտկոմին ստալինյան սահմանադրությամբ Ադրբեջանի կազմում ինքնավար Հանրապետության կարգավիճակ ստանալուց 30 տարի անց անդրադառնալ Նախիջևանի կարգավիճակին: Արդո՞ք դա կապված էր նախապատրաստվող նոր սահմանադրության հետ (սահմանադրական հանձնաժողովը ստեղծվել էր Ն. Նրուչչովի ժամանակ և նրա զահրնկեցությունից հետո այն գլխավորել է Լ. Բրեժնևը), թե՞ դարաբաղցիների բողոքի՝ Ղարաբաղի Ինքնավար Մարզի կարգավիճակի մասին (1965-1966թթ. դարաբաղցիները 40 հազար ստորագրություն էին հավաքել և դիմել ԽՍԿԿ Կենտկոմ ինքնավար մարզը Ադրբեջանի կազմից հանելու և Հա-

յաստանին փոխանցելու առաջարկությամբ): Ինչ էլ որ լինեք պատճառը, հետևանքը զրոյական է. Բրեժնևյան սահմանադրությամբ (1977թ.) ո՛չ Ղարաբաղի կարգավիճակը փոխվեց, ո՛չ էլ Նախիջևանի: Եվ այդ վիճակը պահպանվեց ընդհուպ մինչև Խորհրդային Միության փլուզումը:

Խորհրդային Միության փլուզմանը զուգընթաց ամբողջ Ադրբեջանում գրոհ սկսվեց արտաքին սահմանների վրա, որի արդյունքում պետական սահմանները քանդվեցին: Առաջինների շարքում էին Նախիջևանցիները, որոնք ձեռնարկեցին պետական սահմանի և հատկապես Թուրքիայի հետ սահմանի քանդումը (Արազղայանից Գայլի Դրունք հատվածում), որով հնարավորություն ստեղծվեց Արաքսի վրայով կամուրջ կառուցելու և Իզդիբի շրջանի հետ աշխույժ կապերի մեջ մտնելու համար: Մեր օրերում Թուրքիան Նախիջևանի հետ սերտ առևտրատնտեսական կապեր է պահպանում: Նախիջևանը ողողված է թուրքական արտադրության ապրանքներով: Իսկ Ադրբեջանի հետ տարածքային կապ չունեցող Նախիջևանն իր գյուղատնտեսական արտադրանքը (Նախիջևանը ինչպես որ եղել էր գերազանցապես գյուղացիական երկիր, այնպես էլ մնացել է), մեծ դժվարությամբ է իրացնում Թուրքիայում, քանի որ Թուրքիայի հարակից շրջանները նմանապես գյուղատնտեսական են (նախկինում իրացնում էին հիմնականում Հայաստանում): Իսկ եթե դրան ավելացնենք նաև այն, որ Նախիջևանցիների մի զգալի մասը աշխատում է կենտրոնական Թուրքիայի քաղաքներում և արդյունաբերական այլ շրջաններում, ապա պատկերը միանգամայն պարզ կդառնա. Նախիջևանը աստիճանաբար վեր է ածվում Թուրքիայի սոսկական մի նահանգի: Առավել ևս, եթե իրականություն կառուցման Թուրքիայի մտադրությունը, ինչի մասին տեղեկացվում է մամուլում:

¹ Նույն տեղում, էջ 632:

НАХИЧЕВАНСКАЯ ПРОБЛЕМА В 1920-1921 ГГ.

РЕЗЮМЕ

После установления советской власти в Азербайджане (апрель 1920 г.) армяно-азербайджанские отношения ещё более обострились*. Используя присутствие 11-ой Красной Армии, Азербайджан начал говорить с Арменией языком ультиматума, пытаясь решить спорные территориальные вопросы в свою пользу. Вопросы территориального разграничения между Арменией и Азербайджаном были обсуждены на Московских русско-армянских переговорах летом (июнь-июль) 1920г. Архивные материалы, а также “воспоминания” члена армянской делегации А. Тертеряна показывают, что правительство России не было склонно удовлетворить территориальные притязания националистически настроенных бакинских руководителей. Выдвинув в начале переговоров схему разделения спорных областей “Карабах - спорный, Зангезур и Нахичевань -Армении”, наркоминдел Г. Чичерин затем под давлением азербайджанских руководителей вынужден был отступить и во второй половине июня предложил новую схему “Карабах - Азербайджану, Зангезур - спорный, Нахичевань -Армении”. Однако и эта схема не была реализована: Азербайджан и Турция (кемалистская) настаивали на неподписании договора с Арменией, и в начале июля переговоры были прерваны с тем, чтобы возобновить их уже в Ереване. Несмотря на такой исход, эти переговоры убедительно показывают, что летом 1920г. Москва твёрдо стояла на том, что Нахичеванский край есть неотъемлемая часть Республики Армения.

После подавления Майского восстания большевиков правительство Армении приступило к выполнению задач, необходимых для укрепления

* В своих предыдущих (“Межнациональные столкновения в Ереванской губернии 1918 г.”, Ер., 2000 и “Нахичеванская проблема и “союзники” Армении (1918-1920)”, Ер., 2002) работах автором были описаны развернувшиеся события, в результате которых был завершён геноцид коренного населения - армян исторической Нахичевани. А начало геноцида было положено во время турецкой оккупации 1918 г.

внутреннего положения республики. Такой задачей правительство считало покорение населённых азербайджанцами мятежных районов (Зангибасар, Ведибасар, Шарур-Нахичевань), которые вооружились, организовали боевые отряды и не признавали власти правительства республики. 18-го июня Зангибасару был предъявлен ультиматум о выдаче турецких и азербайджанских агитаторов и признании власти республики. Не получив ответа, правительство послало войска, которые и очистили этот район от мятежников. То же самое произошло и с Ведибасаром: 11-го июля армянские войска начали наступление, 12-го заняли весь район, а 14-го перешли Волчьи Ворота (Гайли Друнк) и вступили в Шарурский район. Разгромленный турецкий отряд перебрался на правый берег Аракса, а азербайджанская конница и местные вооружённые силы отступили к г. Нахичевань. Потеряв возможность сопротивления, руководители Нахичевани прибегли к хитрости: начав переговоры с правительством Армении об условиях признания её власти, вместе с тем провозгласили советскую власть и обратились к находившимся в Зангезуре Красным войскам. 28-го июля передовые части Красной Армии вступили в Нахичевань, а 30-го командованию армянских войск предложили приостановить дальнейшее наступление. Так завершилась удачно начатая нахичеванская операция армянских войск.

Одним из главных вопросов в русско-армянских переговорах лета 1920г. являлся вопрос Шарур-Нахичевани. По заключенному в Тифлисе 10-го августа Соглашению о перемирии между Арменией и Россией было установлено, что спорные территории Карабах, Зангезур и Нахичевань временно, до окончательного решения их судьбы на азербайджано-армянской смешанной конференции с обязательным участием представителя России, занимаются русскими войсками, а Шарур остается за Арменией. Армения также получила право эксплуатации железнодорожной линии Шахтагты-Джульфа. Однако такое решение вопроса не устраивало ни Баку, ни Анкару. Под предлогом установления непосредственной связи между кемалистскими силами и вступившей в Нахичевань Красной Армией, они настойчиво требовали занять Шахтагты русскими или турецкими войсками. Председатель турецкой делегации Бекир Сами-бей на встрече с Лениным (14-го августа) настойчиво просил дать согласие, хотя бы устное, на занятие на территории Армении Шахтагты и Сарикамиша турецкими силами. По поручению Ленина Чичерин по телеграфу обсудил этот вопрос с Орджоникидзе и Кировым и дал положительный ответ турецкой делегации. Воспользовавшись этим, турецкие войска 23-го сентября перешли в общее наступление против Республики Армения.

Вопрос о спорных между Арменией и Азербайджаном территориях особенно остро стоял на октябрьских переговорах Б. Легран с правительственной делегацией Армении в Ереване. Переговоры завершились 28-го октября. Был подготовлен проект мирного договора между РСФСР и Республикой Армения и подписан “Протокол заключительного постановления”, в одном из пунктов которого было сказано, что “правительства РСФСР и АССР признают незыблемые права Республики Армения на территории спорных областей - Нахичеванского и Зангезурского уездов и выведут из пределов этих уездов все войсковые части, находящиеся в подчинении командования РСФСР и АССР”. Однако созданное 4-го ноября в г. Баку совместное заседание Политбюро ЦК АКП(б) и Кавбюро РКП(б) с участием И. Сталина, не одобрило представленный проект договора и поручило Сталину вести по этому вопросу переговоры с Москвой. На следующий день, 5-го ноября, за подписью Сталина и Орджоникидзе в Москву была послана телеграмма, в которой говорилось, что проект договора не может быть подписан немедленно и нуждается в подробном рассмотрении и существенном изменении. Этим самым была поставлена точка на выработанном в Ереване проекте договора между РСФСР и Республикой Армения.

Турецко-армянская война, которую развернули кемалисты против Республики Армения в конце сентября 1920г., завершилась поражением последней. Правительство Оганджяна вынуждено было принять тяжелые условия перемирия (18-го ноября), а также согласиться на созыв конференции в Александрополе для выработки условий мира и подписания договора.

Территориально-разграничительные вопросы были главными и вместе с тем самыми болезненными вопросами Александропольской конференции (25-го ноября - 2-го декабря). Работа конференции проходила по сценарию, заранее намеченному кемалистской дипломатией. Воспользовавшись безвыходным положением Республики Армения, кемалисты навязали ей непомерно тяжёлые условия мира. Армения вынуждена была не только отказаться от Севрского договора, но и уступить Турции Карскую область и Сурмалинский уезд. Не удовлетворившись таким расчленением, Турция заставила Армению отказаться также от Шарур-Нахичевани, которые по договору переходили под протекторат Турции. Отторжение Шарур-Нахичевани от Армении явилось результатом азербайджано-турецкой антиармянской политики.

Так называемая „наримановская декларация” от 1-го декабря 1920г. о передаче Армении спорных между Арменией и Азербайджаном территорий, была ничем иным, как простым пропагандистским актом, целью которой было способствование установлению советской власти в Армении. В действи-

тельности азербайджанское руководство никогда не отказывалось от идеи присоединения Карабаха, Зангезура и Нахичевани к Азербайджану. Изменились лишь методы достижения этой цели: лишившись силового метода, Нариманов и его окружение стали прибегать к таким средствам достижения цели, какими являются нефть и шантаж (в вопросе Карабаха), подкуп руководства (в вопросе Зангезура), единовенная и родственная Турция (в вопросе Нахичевани).

Вскоре после опубликования декларации в Нахичевань прибыл член Азревкома Б. Шахтагинский и совместно с командиром турецкого отряда Вейсал-беём развернул широкую антиармянскую пропаганду среди населения края. На митинге, созванном в г. Нахичевань, Шахтагинский объявил: «Азербайджан вас продал. Если бы я был в Баку, то не допустил бы этого... Теперь вы взирайте на турок. Они ваше единственное спасение. Крепко держитесь за них».

Достоверные архивные материалы показывают, что, ведя усиленную антиармянскую пропаганду среди населения, запретив всякое сообщение (железнодорожное и т. д.) между Ереваном и Нахичеванью, вместе с этим турецкие агенты Вейсал-бея в январе-феврале 1921г. в разных местах края организовали ряд антисоветских мятежей (в г. Нахичевань, в селах Джагри, Тиркеш, Карачух и т. д.) с целью захватить власть на местах, объявить о присоединении края к Турции и таким образом поставить Московскую русско-турецкую конференцию перед свершившимся фактом.

Хотя с заключением Александропольского договора и советизацией остальной части республики Армения фактически была разделена между Турцией и Советской Россией, однако окончательный её раздел был осуществлён только по Московскому русско-турецкому договору «О дружбе и Братстве». Слепо доверяя лживым заявлениям турецких националистов о готовности бороться против западного империализма и стремясь любой ценой удержать турок на своей стороне, советское руководство по всем вопросам (политическим, экономическим и т. д.) шло навстречу им. Территориальные притязания турок были удовлетворены за счет Армении за её спиной.

Крёстным отцом Московского договора был И. Сталин. Спорные вопросы (особенно территориальные) разрешались не на пленарных заседаниях конференции, а на закулисных переговорах Сталина с турецкими делегатами. В письме Чичерину от 6-го марта 1921г., сообщая о содержании своих бесед с турками в вопросе территориальных уступок Турции со стороны РСФСР и решительно констатируя, что „большая часть Батумского округа остается за РСФСР”, а Карская область отходит к Турции, Сталин обращается также к

Нахичеванскому вопросу и заявляет, что „по вопросу о Нахичевани последнее слово предоставляется представителю Азербайджана”.

По поручению Сталина Шахтагинский вел долгие переговоры с турками по вопросам Батума и Нахичевани и наконец убедил их, „что все споры об этих округах бесполезны”.

10-го марта конференция наконец приступила к официальному рассмотрению вопроса о границах. Российская делегация с самого начала заявила, что она готова признать турецкий „Национальный обет”, но требует произвести некоторое изменение границы, в частности в секторе Батума. После определения границы в секторе Батума конференция приступила к обсуждению вопроса о границах Армении, пожалуй, единственному вопросу, в котором Турция не шла на компромисс. Турки упорно настаивали на границах, определенных Александропольским договором, считая их единственно верным решением вопроса. 10-го марта Чичерин вынужден был заявить, что „российское правительство не будет настаивать на проведении границы западнее Арпачая и южнее Аракса...”. Так был санкционирован отход Карской области и Сурмалинского уезда к Турции. Однако турки не удовлетворились этим и подняли вопрос о принадлежности Нахичевани. По заявлению Кемаль-бея, „в силу самого факта призвания населением турецких войск Нахичевань состоит под турецким покровительством. Тем не менее она согласна уступить это покровительство Азербайджану при условии получения от Азербайджана обязательства не уступать этого покровительства третьему государству”. Возражения Чичерина, что нельзя серьёзно говорить о покровительстве Турции над Нахичеванью, поскольку версия о призыве турецких войск не соответствует действительности, а Александропольский договор не ратифицирован, и, наконец, обязательство возлагается на государство, которое не представлено на конференции, не увенчались успехом. Турки настаивали на своём, и последняя часть статьи о передаче Нахичевани под покровительство Азербайджана была сформулирована следующим образом: „при условии, что Азербайджан не уступит сего протектората третьему государству”, т. е. Армении.

Так Турция совместно с Азербайджаном осуществляла свою антиармянскую политику и добилась того, что Нахичеванский край также был отделён от Армении, завершив тем самым расчленение Армении. А когда 12-го марта на политической комиссии стали обсуждать границы Нахичевани, то выяснилось, что по настоянию турецких экспертов границы Нахичевани были определены по Александропольскому договору, то есть к Нахичевани были присоединены не только Шарур-Даралагыз, но и южная часть бывшего Эри-

ванского уезда от станции Арарат до Волчьих Ворот (Гайли Друнк). Чичерин не мог согласиться с этим, т. к. с переходом этого треугольника к Нахичевани турки получают возможность установить общую границу с Азербайджаном. После многочасового спора стороны наконец пришли к компромиссному решению: точную границу установит комиссия из представителей Армении, Азербайджана и Турции.

Зная из опыта Московских переговоров о роли Шахтагинского в деле решения судьбы Нахичевани, Чичерин даже пытался с помощью Армревкома отстранить Шахтагинского от участия в вопросе определения границы между Нахичеванью и Арменией. 11-го апреля в телеграмме Шавердову и Атабекову Бекзадян предупредил, что „вместе с Чичериным признаю необходимым, что по вопросу о Нахичевани, Шарур-Даралагазе представителем Азербайджана ни в коем случае не должен быть Шахтагинский ...”. А 12-го апреля в инструкциях Гусейнову Чичерин прямо указал, что граница между Арменией и Нахичеванью должна пройти у Волчьих Ворот (Гайли Друнк). Однако 7 мая при обсуждении на совещании в Баку Шахтагинский, говоря о том, что „на вопрос Чичерина, где правильно провести границу Нахичевани с Арменией, он указал на Волчьи Ворота (Гайли Друнк)”, но в конце добавил, что „было бы весьма рационально, если бы на месте провели точную и непрерываемую границу местные знающие товарищи“, и когда был услышан ответ Бекзадяна о том, что он „не может указать точную границу в силу незнания местности”, то по предложению Орджоникидзе совещание постановило: принять меры по изучению на месте представителями Азербайджана и Армении вопроса о правильном проведении границы в согласии с этнографическим принципом, а также с установившимися по этому вопросу взглядами местного населения”. А это означало, что Азербайджан воспользуется этим, и определённая часть Треугольной зоны присоединит к Нахичевани.

Готовясь к конференции с Турцией, правительство Армении приняло два документа: 1. Меморандум, 2. Проект договора между Арменией и Турцией. Оба этих документа не датированы, но судя по содержанию, можно предположить, что Меморандум был составлен в апреле или в начале мая, а проект договора — уже после определения границы в Треугольной зоне (в июне или в начале июля). Об этом свидетельствует тот факт, что в Меморандуме выдвинуто предложение о передаче протектората над Нахкраем Армении. А в проекте договора указанная линия границы, разделяющая Армению от Нахичевани, точно совпадает с границей установленной на Карской конференции.

На конференции в Карее (26-го сентября - 13-го октября 1921г.) Турция

вновь продемонстрировала сущность своей антиармянской политики. Цепляясь за Московский договор, турки ни в одном вопросе, поднятом армянской делегацией, не шли на компромисс. Так были отвергнуты предложения о том, чтобы оставить в границах Армении развалины её средневековой столицы Ани, о концессии соляных копий Кульпы, о возвращении разграбленного имущества Апександропольского депо и т.д. Единственным вопросом, в котором турки проявили лояльность и не требовали создания комиссии из представителей Турции, Азербайджана и Армении для определения границы между Нахичеванью и Арменией, как об этом сказано в Московском договоре, был вопрос об установлении границы в Треугольной зоне. Как только Ганецкий объявил о решении этого вопроса между Арменией и Азербайджаном и добавил, что если турецкая делегация согласна, то вопрос можно считать законченным, Карабекир, не обсудив с товарищами и не поинтересовавшись установленными границами, в ответ объявил, что турецкая делегация принимает границы, установленные Азербайджаном и Арменией. Такое быстрое согласие Карабекира говорит о том, что он заранее знал, какая именно граница установлена. Он знал, что усилиями Шахтагинского примерно половина Треугольной зоны оставлена Нахичевани (от станции Араздаян до Волчьих Ворот) и тем самым обеспечена общая граница Турции с Нахичеванью. И наконец, 3-го октября при оформлении статьи о передаче Нахичевани под протекторат Азербайджана выяснилось, что наряду с Арменией и Турцией упоминается и Азербайджан: „Правительство Турции и правительства Советской Армении и Азербайджана согласны, что Нахичеванская область образует автономную территорию под покровительством Азербайджана”.

Чьей бы не была эта идея (Шахтагинского или Карабекира), одно бесспорно: этой формулировкой Азербайджан по своим правам на Нахичевань приравнен к Армении и Турции.

E. A. Zohrabyan

NAKHIJEVAN PROBLEM IN 1920-1921

Summary

After the establishment of Soviet power in Azerbaijan (April 1920) Armenian-Azerbaijani relations became even more strained*. Capitalizing on the presence of the 11th Red Army, Azerbaijan took up the language of ultimatum, making an effort to resolve contentious territorial issues to its own advantage. Issues of territorial demarcations between Armenia and Azerbaijan were considered at Russian-Armenian talks in the summer (June-July) of 1920. The archives materials as well as the “Memoires” of a member of the Armenian delegation A. Terteryan reveal that the Russian government was not inclined to satisfy the territorial claims of Azeri nationalist leaders. At the beginning of the talks People’s Commissar for Foreign Affairs G. Chicherin suggested a draft on the issue of the disputed regions (“Karabakh – disputable, Zangezur and Nakhijevan – to Armenia”). However, he was obliged to alter his position late in June and propose a new draft “Karabakh to Azerbaijan, Zangezur – arguable, Nakhijevan – to Armenia”. However, this draft was not implemented either. Azerbaijan and Kemalist Turkey insisted on not signing an agreement with Armenia and early in July the negotiations were suspended: with an intention to resume in Yerevan. Despite such an outcome the negotiations reveal that in the summer of 1920 Moscow’s position on Nakhijevan being an integral part of Armenia was quite firm.

After the suppression of the Bolshevik May Revolt, the government of Armenia embarked on the fulfillment of the tasks necessary for strengthening the internal situation in the Republic. Among such tasks were considered the subjugation of the Azeri-populated rebellious regions (Zangibasar, Vedibasar, Sharur-Nakhijevan) which had armed, formed combatant squads and refused to recognize the authorities of the Republic. Having received no response the government sent troops and

* The previous works (“*The Intestine War in the Province of Yerevan, 1918*”, Yerevan, 2000 and “*The Nakhijevan Issue and “Allies” of Armenia (1918-1920)*”, Yerevan, 2002) of the author describe the events that resulted in the end of the genocide of the native people - Armenians in Historical Nakhijevan. Actually, a real genocide with all its manifestations was carried out. It had begun during the Turkish occupation in 1918.

mopped up the region. The same happened in Vedibasar: the Armenian forces launched an offensive on July 11, on July 12 they occupied the whole region, on July 14 crossed the Wolves’ Gates (Gaili Drunk) and entered Sharur region. The defeated Turkish detachment got over the right bank of the Araks, while the Azeri cavalry and local armed forces retreated to the town of Nakhijevan. Having lost the possibility of resistance, the authorities of Nakhijevan resorted to cunning: they started talks with the Armenian government on the conditions of the recognition of its authority and at the same time proclaimed Soviet power and turned to the Red Army in Zangezur. On July 28 the advanced detachments of the Red Army entered Nakhijevan and on July 30 the commanders of the Armenian troops were ordered to halt the further attack. The Nakhijevan operation which had started so successfully came to an end.

The issue of Sharur-Nakhijevan was one of the major issues at Russian-Armenian talks in the summer of 1920. According to the August 10 agreement between Armenia and Russia signed in Tiflis on August 10 it was settled that the disputed territories of Karabakh, Zangezur and Nakhijevan would be deployed by Russian troops while Sharur would remain in the territory of Armenia until the final decision at a joint Azerbaijani-Armenian conference with the participation of a Russian envoy.

Armenia was also granted the right to exploit the railway route Shakhatakhty – Julfa. However, such a decision was acceptable neither to Baku nor Ankara. Under the pretext of establishing direct connection between Kemalist forces and the Red Army in Nakhijevan, they persistently required deployment of Russian or Turkish forces in Shakhatakhty. On August 14 the head of the Turkish delegation Bekir Sami-Bey insistently required Lenin to give at least his verbal consent to deployment of Turkish forces on the Armenian territories of Shakhatakhty and Sarikamish. On Lenin’s behalf Chicherin discussed by telegraph the issue with Orjonikidze and Kirov and gave the Turkish delegation a positive response on September 23. Taking advantage of this opportunity the Turkish forces struck an offensive against the Republic of Armenia.

The problem of the territories disputed between Armenia and Azerbaijan stood particularly acute during the October talks of B. Legran with the government delegation of Armenia in Yerevan. The talks were concluded on October 28. A peace treaty between the RSFSR and the Republic of Armenia was drafted and they signed a protocol of the final resolution, one of the provisions of which stated that “the governments of RSFSR and ASSR recognize the inalienable rights of the Republic of Armenia on the territories of the disputed regions of Nakhijevan and Zangezur and will withdraw from the above territories their forces that are under

the control of the RSFSR and ASSR. However, the joint meeting of Politbureau of the Central Committee of ACP and the Caucasian Bureau of RCP with the participation of Stalin disapproved of the draft agreement and charged Stalin to hold talks with Moscow on the above issue. On November 5 a telegram, bearing signatures of Stalin and Orjonikidze was sent to Moscow; it stated that the draft agreement could not be immediately signed and needed thorough consideration as well as considerable alteration. This telegram put an end to the draft agreement between the RSFSR and the Republic of Armenia, drawn up in Yerevan.

The Turkish-Armenian war, unleashed by the Kemalists against the Republic of Armenia at the end of September of 1920 ended with the defeat of Armenia on November 18. The government of Ohanjanyan was obliged to accept harsh conditions of the ceasefire; it also had to agree to convene a conference in Alexandrapol in order to work out peace conditions and sign an agreement. The territorial demarcation issues were the main and the most painful issues at Alexandrapol conference (November 25 - December 2). The conference was planned in advance according to the scenario of the Kemalist diplomacy. Taking advantage of the desperate condition of the Republic of Armenia the Kemalists imposed excessively harsh peace conditions. Armenia was forced not only to renounce the Treaty of Sevres but also yield Kars region and Surmalu district to Turkey. The latter was not satisfied with this dismemberment and forced Armenia to yield Sharur-Nakhijevan as well, which passed under the protectorate of Turkey. Seizure of Sharur-Nakhijevan from Armenia was the result of the Azerbaijani-Turkish anti-Armenian policy.

The so-called Declaration of Narimanov (December 1, 1920) on the transfer of the disputed territories to Armenia was nothing but an act of propaganda, whose aim was to contribute to the establishment of the Soviet power in Armenia. In fact, the Azerbaijani authorities never renounced the idea of joining Karabakh, Zangezur and Nakhijevan to Azerbaijan. The only change was in the methods resorted to achieve the goal. Narimanov and the circle of people around him resorted to such means as the oil, blackmail (in case of Karabakh), bribery of authorities (in case of Zangezur), kindred Turkey (in case of Nakhijevan).

Soon after the publication of the declaration, a member of Azrevkom B. Shakhtakhtinsky arrived in Nakhijevan and together with the commander of the Turkish squad Veisel-Bey launched a broad anti-Armenian propaganda among the population of the region. At a meeting convened in Nakhijevan Shakhtakhtinsky announced, "You were sold by Azerbaijan. If I had been in Baku, I would not have allowed that. Now you should regard Turks. They are your only salvation. Hold fast to them".

Reliable archives materials reveal that carrying out intensive anti-Armenian

propaganda among the population, forbidding any communication between Yerevan and Nakhijevan in January-February 1921 the Turkish agents of Veisel Bey organized a number of anti-Soviet mutinies in different parts of the region (in Nakhijevan, in the villages Jagry, Tirkesh, Karachuk, et.), aimed at seizing power declaring the unification of the region with Turkey and thus confronting the Moscow Russian-Turkish conference with a fait accompli.

Although due to the conclusion of the Alexandrapol Treaty and the sovietization of the rest of the republic Armenia was actually divided between Turkey and Soviet Russia the final decision was accomplished only by the Moscow Russian-Turkish Agreement on "friendship and fraternity". The blind faith in the mendacious announcements of Turkish nationalists about their readiness to fight against western imperialism together with the urge to keep the Turks on their side at all costs led the soviet leadership to meet them halfway in all issues (political, economic, etc.). the territorial claims of the Turks were fully satisfied at the expense of Armenia behind its back.

I. Stalin was the godfather of the Moscow Agreement. Vexed issues (the territorial ones in particular were resolved) through his secret negotiations with Turkish delegates rather at the plenary sessions of the conference. In his letter to Chicherin (March 6 1921) Stalin informed the latter about the contents of his talks with Turks on the issue of territorial concessions to Turkey on the side of RSFSR, stating firmly that "the greatest part of Batum region remains to RSFSR while Kars region goes to Turkey". As regards the Nakhijevan issue, Stalin states that "the last word on the Nakhijevan issue belongs to the government of Azerbaijan".

On behalf of Stalin Shakhtakhtinsky held long negotiations with Turks on the issues of Batum and Nakhijevan and finally convinced them "that all disputes on these regions are useless".

On March 10 the conference finally started the formal consideration of the borders issue. At the very outset the Russian delegation announced that it was ready to admit Turkish "national vow" but demanded certain changes of borders, particularly in Batum area. Having defined borders in Batum area the conference proceeded to discuss the issue of the borders of Armenia, perhaps the only issue regarding which Turkey rejected any concession. The Turks stubbornly insisted in the borders settled by Alexandrapol Treaty considering them the only right solution. On March 10 Chicherin was obliged to announce that "the Russian government will not insist on extending borders to the West of Arpachay and to the south of Araks". Thus transition of Kars region and Surmalu district to Turkey was sanctioned. However, the Turks were not yet satisfied and raised a question on Nakhijevan ownership. According to Kemal Bey "by virtue of the fact of the population's summoning

the Turkish troops, Nakhijevan is under the patronage of Turkey. Nevertheless, Turkey consents to yield the patronage to Azerbaijan on one condition: Azerbaijan should pledge not to yield patronage to a third country". Chicherin objected that it was not serious to speak about the Turkish patronage over Nakhijevan, as the population's summoning the Turkish troops was not true, the Alexandropol Treaty was not ratified and finally the obligation rested with the state which was not presented at the conference. However, his objections did not yield success and the final part of the provision on the transition of Nakhijevan under the patronage of Azerbaijan was formulated as follows "on condition, that Azerbaijan should not yield the above protectorate to a third state", i.e. to Armenia.

Thus Turkey, together with Azerbaijan, accomplished their anti-Armenian policy and ensured the separation of Nakhijevan region from Armenia. Hence the dismemberment of Armenia was accomplished. When on March 12 the borders of Nakhijevan were considered at the political commission, it turned out that under the pressure of Turkish experts the borders of Nakhijevan were defined according to Alexandropol Treaty, i.e. not only Sharur Daralagyaz, but also the southern part of the former Erivan district (from Ararat station to Wolves' Gates - Gaili Drunk) were joined to Nakhijevan. Chicherin could not agree to this, as with the transition of that triangle to Nakhijevan the Turks were getting an opportunity to establish common frontiers with Azerbaijan. After a dispute that lasted for many hours the sides finally came to a compromise decision: the exact borders were going to be defined by a committee consisting of representatives of Armenia, Azerbaijan and Turkey.

Arising from the experience of the Moscow talks about Shakhtakhtinski's role in the fate of Nakhijevan Chicherin even tried by the help of Armrevcom to remove Shakhtakhtinsky from participation in proceedings related to border determination between Nakhijevan and Armenia. On April 11 in the telegram to Shaverdov and Atabekov Bekzadyan warned: "like Chicherin I consider it necessary that regarding the issue of Nakhijevan, Sharur Daralagyaz Shakhtakhtinsky be not the representative of Azerbaijan on any account". On April 12 Chicherin directly instructed Huseinov that the borderline between Armenia and Nakhijevan should be drawn at Wolves' Gates (Gaili Drunk). However, on May 7, while discussing the matter at the meeting in Baku, Shakhtakhtinsky referred to Chicherin's instruction on drawing the border at Wolves' Gates (Gaili Drunk) and then added that it would be most rational to have the accurate border drawn by local competent people. Bekzadyan replied that he "couldn't specify the accurate borderline" due to the lack of knowledge of the area. Then, in accordance with Orjonikidze's proposal, the meeting made a resolution: make arrangements for the place to be studied by the representatives of Azerbaijan and Armenia and draw the border in accordance with ethno-

graphic principles, as well as with the established views of the local populations on the matter. This meant that Azerbaijan would take advantage of that and would join part of the Triangle Zone to Nakhijevan.

Getting ready for the conference with Turkey the government of Armenia adopted two documents: 1. Memorandum, 2. Draft agreement between Armenian and Turkey. Neither of the documents bears a date. However, judging from the contents, one can assume that the memorandum was drafted in April or early May and the draft agreement – in June or early July (after the border at the Triangle Zone was defined). This is evidenced by the fact that the memorandum proposes to transmit the protectorate Nakhijevan region to Armenia while the borderline dividing Armenia and Nakhijevan, mentioned in the draft agreement fully coincides with the one worked out at the Kars conference.

At the conference in Kars (September 26 – October 13 1921) Turkey once again demonstrated the essence of its anti-Armenian policy. Clinging to the Moscow Agreement the Turks did not make compromises on any of the issues raised by the Armenian delegation. The proposal to leave the ruins of the medieval capital Ani in the territory of Armenia was rejected together with a number of others. The only issue around which the Turks demonstrated loyalty and did not demand a commission of representatives of Turkey, Azerbaijan and Armenia for defining the border between Nakhijevan and Armenia was the issue of defining the borderline in the Triangle Zone. As soon as Hanetzki announced about the decision of the mentioned issue between Armenia and Azerbaijan, adding that the Turkish delegation did not mind, the matter could be considered resolved, Karabekir, without any consultations with his colleagues, announced that the Turkish delegation accepted the borders drawn by Azerbaijan and Armenia. Karabekir's hasty agreement proves that he knew beforehand what border had exactly been drawn. He knew that thanks to Shakhtakhtinsky's efforts about half of the Triangle Zone was given to Nakhijevan (from Arazdayan station to Wolves' Gates - Gaili Drunk), thus providing a common border of Turkey with Nakhijevan. And finally, on October 3, while formulating the provision on transfer of Nakhijevan under protectorate of Azerbaijan it turned out that, along with Armenia and Turkey, Azerbaijan was mentioned as well. "The government of Turkey and the governments of Soviet Armenia and Azerbaijan agree that Nakhijevan region forms an autonomous territory under the protectorate of Azerbaijan".

Regardless of the author of the idea (be it Shakhtakhtinsky or Karabekir) one thing is doubtless: this formulation equals Azerbaijan with Armenia and Turkey as regards its rights over Nakhijevan.

ԲՈՎԱՆԴԱԿՈՒԹՅՈՒՆ

ԽՈՍՔ ԸՆԹԵՐՑՈՂԻՆ5

ՄԱՍ ԱՌԱՋԻՆ

ՆԱԽԻՋԵՎԱՆՅԱՆ ՀԻՄՆԱՀԱՐՑԸ ՀՀ ԱՐՏԱՔԻՆ ՔԱՂԱՔԱԿԱՆՈՒԹՅԱՆ
ՀԱՄԱՏԵՔՍՏՈՒՄ (1920 թ. ՄԱՅԻՍ - ԴԵԿՏԵՄԲԵՐ).....7

ԳԼՈՒԽ ԱՌԱՋԻՆ

Ադրբեջանի խորհրդայնացումը և վիճելի տարածքների հարցը հայ-ադրբե-
ջանական և Մոսկվայի ռուս-հայկական բանակցություններում:
Շարուրի վերամիավորումը Հայաստանին (1920թ. մայիս-հուլիս)9

ԳԼՈՒԽ ԵՐԿՐՈՐԴ

Նախիջևանյան հիմնահարցը Թիֆլիսի օգոստոսի 10-ի հայ-ռուսական
համաձայնագրում և Մոսկվայի ռուս-թուրքական առաջին
կոնֆերանսում81

ԳԼՈՒԽ ԵՐՐՈՐԴ

Իրադրությունը Շարուրի ճակատում Թուրք-հայկական պատերազմի
չրջանում: Նախիջևանյան հիմնահարցը Ալեքսանդրապոլի
կոնֆերանսում149

ՄԱՍ ԵՐԿՐՈՐԴ

ՇԱՐՈՒՐ-ՆԱԽԻՋԵՎԱՆԻ ԽՆԴԻՐԸ ԹՈՒՐԻՔ-ԽՈՐՀՐԴԱՅԻՆ
ՀԱՐԱԲԵՐՈՒԹՅՈՒՆՆԵՐՈՒՄ (1920 թ. ԴԵԿՏԵՄԲԵՐ - 1921 թ.
ՀՈԿՏԵՄԲԵՐ)221

ԳԼՈՒԽ ԶՈՐՐՈՐԴ

Իրադրությունը Շարուր-Նախիջևանում Հայաստանում խորհրդային
իշխանությունն առաջին ամիսներին: Թուրք-ադրբեջանյան
հակահայկական և հակախորհրդային խժոժությունները (1920թ.
դեկտեմբեր-1921թ. փետրվար).....223

ԳԼՈՒԽ ՀԻՆԳԵՐՈՐԴ

Նախիջևանյան հիմնահարցը Մոսկվայի ռուս-թուրքական երկրորդ
կոնֆերանսում269

ԳԼՈՒԽ ՎԵՑԵՐՈՐԴ

Նախիջևանի խնդիրը Կարսի կոնֆերանսում351

ՎԵՐՋԱԲԱՆ

.....408

Зограбян Э. А. - Нахичеванская проблема в 1920-1921 гг. (РЕЗЮМЕ).....413

E. A. Zohrabyan - Nakhijevan Problem in 1920-1921 (Summary).....420

ՋՈՀՐԱԲՑԱՆ ԷԴԻԿ ԱՐՏԵՄԻ

**ՆԱԽԻՋԵՎԱՆՑԱՆ ՀԻՄՆԱՀԱՐՑԸ
1920 Թ. ՄԱՑԻՍ - 1921 Թ. ՀՈԿՏԵՄԲԵՐ**

**Հրատ. խմբագիր՝ Լ. Գ. Մանուկյան
Տեխ. խմբագիր՝ Վ. Զ. Բղոյան
Կազմի ձևավորումը՝ Կ. Հ. Ավագյանի
Համակարգչային ձևավորումը՝ Ա. Աղուզումցյանի**

**Ստորագրված է տպագրության 06.12.2010 թ.:
Չափսը 60x84 1/16: Թուղթը՝ օֆսետ:
Հրատ. 25.0 մամուլ, տպագր. 26.8 մամուլ + 1 թ. ներդիր,
պայմ. 24.9 մամուլ: Տպաքանակ՝ 300: Պատվեր՝ 101:**

ԵՊՀ հրատարակչություն, Երևան, Ալ. Մանուկյան 1

ԵՊՀ տպագրատուն, Երևան, Աբովյան 52